

9  
SAMUELIS PUFENDORFII

E R I S  
SCANDICA,


Q U A  
A D V E R S U S L I B R O S  
D E  
J U R E N A T U R A L I  
E T  
G E N T I U M

• B J E C T A D I L U U N T U R :  
T O M U S N O N U S .



N E A P O L I M D C C L X X V .

Sumtibus Josephi de Dominicis , & Michaelis Stafi .  
SUPERIORUM PERMISSU, AC PRIVILEGIO.



# JULIUS RONDINUS

## LECTORI BENEVOLO

S. P. D.



**U**T alienæ fabulæ prologum agerem, amicitia in causa est, quæ mihi cum editore horum Scriptorum intercedit; cui cum placeret ista denuo publicæ luci tradere, a me rogavit nonnulla præmitti, quæ aliquid lucis hisce controversiis adferre queant. Ipse enim Auctor aliis negotiis intentus satis habuit adversariorum calumnias depulisse, ac sententiarum suarum veritatem atque innocentiam adstruxisse, inglorium de cetero atque indecorum existimans cum hominibus rixosis ulterius, quam necessum fuit, contentionis ferram reciprocare. Cui cum id semper fuerit propositum, ut pro modulo ingenii aliquid in commune conferret, quoquo se non inutilem reipubl. litterariæ civem fuisse testaretur; repente a malevolis eo se redactum deprehendit, ut tantum non de vita & fama certandum sibi foret. Origo ipsi molestiarum ab invidia, quod in Academia Carolina recens tunc instituta lautiore quam ceteri salario frueretur, ac magnam partem nobilis juventutis a se haberet pendentem. Ea res cumprimis male habebat *Nicolaum Beckmannum*, hominem fatuum juxta ac rudem, sed cui immensos spiritus dabat vocabulum Doctoris in Schola Aurelianensi triginta scutatis emtum; & quia collegium Pandectarum Marpurgi dictante quodam Professore exceptum in Gallia sumtibus suis publicasset titulo *Medulla Justinianæ*. Is cum nullo se numero fore crederet, quamdiu Lundini Pufendorfius floureret, ad eum subruendum omnes cogitationes intendit. Iis destinatis perficiendis idoneam sibi occasionem oblatam putavit, quando istius Libri de Jure Naturæ & Gentium Lundini imprimerentur, quos in typographia subinde inspectos, cum supra stuporem suum sentiret, nova-

vitatis crimine arguere instituit, eo securius, quod ipse Pufendorfius non inficias eat, se nunquam in verba Magistrorum nostrorum iurasse. Sed cum, quæ Anser iste notaverat, nulpiam cohærent, nec aliam idem rationem adferre noster, quare illa damnaret, quam quod eadem non caperet; Igitur paulo solertior assumitur calumniæ architectus *Josua Schwartzius*, qui expeditissimam sibi viam invenisse visus est ad Pufendorfius perendum, si Theologos isti negotio immiscere posset. Igitur scelesto artificio non modicum Indicem errorum Theologicorum contexuit, nefario modo detortis, aut interpolatis sententiis innoxiiis, & ad Theologiam nihil plane spectantibus. Instigabatur Scaniae tunc Episcopus, senio jam in puerilitatem vergens, ut a Rectoribus Regni postulare auderet, sibi censuram scripti Pufendorfianni committi. Eo foro constituto nil præter rogam manebat Pufendorfius, actore juxta ac judice Schwartzio: qui & eo facilius a reliquo Clero applausum sibi speraverat, quo pauciores ex illo sunt, qui operæ quid posuerunt in eo studiorum genere, quod Pufendorfius excolendum sibi sumserat. Sed cum improbum ausum Rectores Sueciæ non sine indignatione damnaissent, ac silentium turbulentis hominibus imposuissent, ad tenebras perpetuas damnato Indice Schwartziano, nondum a furore quietem sibi imperare *Nic. Beckmanni* malitia potuit, publicato contra interdictum Regis in Germania isto Indice, diffamandi Pufendorfi gratia, & quia crederat, præcipientes aliquos, rixosos aut malevolos homines ibi inventum iri, qui bellum isti movere non sint dubitaturi. Quo præjudicio armati in Suecia denuo impetum in Pufendorfius daturi erant. Enimvero sceleris convictus iste præmium accepit, quale merebatur, infamem e Regno Sueciæ relegationem; ex qua tamen id boni affecutus videbatur, ut deletæ jam semel existimationis nullam amplius rationem habendam sibi duceret; eoque postea libellos famulos publicare ausus est, quibus stolidiores juxta atque impudentiores seculum hoc non vidit. Et quia e Protestantibus nemo homini infami & insulso panem gratis præbiturus erat ejuratis, quibus innutritus erat, Sacris, Ecclesiam Romanam uno morione fecit auctiorem. Diversa Josuæ Schwartzii in non dispari scelere fortuna fuit. Silere quamtumvis a Superio-



## P R Æ F A T I O.

perioribus jussus, mustitavit tamen, & cum primis dignum sacerdote facinus patrasse sibi visus est, si e cathedra sacra velut e plaustro convitia jactaret, & ibi latraret, ubi a fustibus cautum sibi credebat. Post bello inter vicinos Reges exorto, cum Pufendorsius in tuta se subduxisset, jam plenam calumniandi libertatem nactum se judicavit. Itaque coram aurigis & olitoribus, eorumque vetulis, idoneis scilicet talium rerum arbitris, impudentissimas conciones eructavit, quas post typis divulgavit, quod eruditio ipsius non ulterius assurgat, quam ad compilandam miseram homiliam. Sed eo flagitio non contentus ad graviora descendit, & publica itidem concione cives a legitimo suo Rege in hostium partes pertrahere instituit; prorsus quasi civis fide sua exsolveretur hoste ingruente, ubi adhuc præcipua munitionum præsidio regio tenebatur; & ipse Rex cum exercitu indies expectabatur, cum hoste manum conferturus. Unde mox hoste victo perjurii & rebellionis poenam formidans in pedes se dedit, & transfugam egit, apud hostem sola flagitii commendatione, & odio in nationem Suevicam pacem primo, mox & novam functionem nactus. Ac deum pro eo facinore, quo alii funem merentur, aliquod temporariae insulae insigne reportasse dicitur; eodem, ut videtur, fato cum meretricibus Londinensibus gavisus, quas in patria quidem hærentes mox ergastulum aut nosocomium, vel etiam fustigatio manebat; ubi in Jamaicam, aut alias partes Novi Orbis delatae sunt, matrimonii vocabulo veteres sordes obumbrante, post honestas se matronas ferunt. Ceterum Index iste Schwartzianus, Beckmanno obstetricante in lucem editus, uti auctoris circa calumnias concinnandas dexteritatem orbi satis prodidit; ita primo intuitu, & antequam Pufendorfsii strigilem idem expertus esset, in erubescendum errorem induxerat grave alias Collegium, quod ex illo sinistrum de libris Pufendorfsii judicium ferre non dubitaverat. Cujus dignitati nisi Pufendorfsius pepercisset, in proclivi fuisset ipsi ostendere, quam turpe sit ejusmodi viris, ex solo libelli famosi testimonio judicium ferre de scripto, quod ipsi nunquam se inspexisse fatebantur. Post & alii quidam in controversiæ hujus partem venerunt, sed diverso fine, nec eodem modo. Natn non multum a furore Beckmanniano abiere *Fridericus Gesenius*, Gar-

læx Præsul, & *Valentinus Veltthemius*, barbariei apud Jenenses colun. en non infimum. Ceteri pro hypothesebus suis a Pufendoriana discrepantibus pugnare videri voluerunt. Occursum est utrisque ad eum fere modum, quem laceffendi impudentia, aut disceptandi modestia crebatur; nec puto ullum fore, qui jure queri possit, Pufendorium in aere ipsius esse. Unicus *Valentinus Albertus*, Lipsiensis Theologus, nondum adquiescere videtur, velut turpe sibi foret, inane litigium non in infinitum protrahere. Et si in eo vehementer laudandum sit viri ingenium, quod cum utique extremam personam in hac fabula agere pertenderet, ita inficetam defensionem adversus Julium Rondinum adornavit, ut nemo cordatus nanias istas responso dignaturus sit: quod adversarii silentium ipse post velut concessionem victoriæ interpretaturus sit. Sane enim cum nihil præter crambem bis coctam apponat, rancidis quibusdam distinctiunculis, & pedantico plane pipere conditam, primo statim intuitu lectorem nausea opplet, nedum ut quis in eam se obfirmare patientiam queat, ut commentis istis opere destruedis horam impendere possit. Et si ut verbo præcipuas hominis vanitates notemus, forte non abs re fuerit, si forte istum permovere possimus, ne suis sibi næniis tantopere placeat. Sic quam putidum est, quod post tam perspicue deductam status naturalis indolem, nondum desinat coccyssare Albertus, a Pufendorio pro *primario haberi principio statum hominis miserum, fictum illum atque commentitium, in quo hominem, tanquam projectum utcumque aut undecunque in hunc mundum imaginatur sibi*. Nuspiam quippe a Pufendorio hæc hypothesis assumitur, hominem undecunque aut utcumque in terram projectum: sed cum vellet demonstrare, quantum boni ex societate in hominem redundet, & quam miser sit homo sibi soli relictus, etiam a parentibus fuit abstrahendum, seu ab illo auxilio, quod nati homines a parentibus suis experiuntur, nisi hoc per peculiarem Numinis curam suppletum fuerit. An hæc est hypothesis, aut principium, si alicujus rei usum demonstrarem ex ejusdem remotione? Aut an tali modo demonstrandi admittitur aliquid homini Christiano indecorum? sed & nati parum sibi esse Albertus ostendit, quod non sine gratiarum actione acceptet, regulas, quas ipse commen-

tus

tus est, cum illis comparari, quæ de inventionem medii termini in Logicis jactantur; cum utraq; istæ regulæ vanitatis arguantur. Sane si quis vel millies regulas istas Logicas volvat revolvatque, nisi sibi mediorum terminorum pullulare videbit ad probandam aliquam thesin, ni aliunde ejusdem probationem didicerit. Sicuti nec hilum quidem regulæ Albertinæ ad eruenda officia legis naturalis conferunt, ni quis eorundem antea habuerit notitiam. Porro auctor rixæ & ille habendus est, qui alterum etiam intra privatos parietes multis arbitris vellat. Et quomodo alias Pufendorfio de ista Philosophia Christiana, quam Albertus meditabatur, innotescere potuisset? Per miracula concedit. Albertus Physicam haud fieri locupletiore, quia illa sint res plane supernaturales. Et tamen per propositiones personales atque sacramentales Logicam locupletari contendit. Atqui Logica est Disciplina rationalis, & quæ indolem ratiocinii nostri naturalis tradit. Circa dictas autem propositiones oportet captivare rationem sub obsequium fidei. Nec ideo ista Logici, ut ita dicam, sunt commercii, qui constant subjecto & prædicato, sunt categoricæ & affirmativæ. Hæc enim etiam dici possunt de hac propositione: Homo est lapis. Et eo ipso, quod inusitata dicuntur, sphaeram Logices transcendunt, & ad sublimiorem disciplinam unice spectant. Id vero nimis incogitanter ab Alberto positum, quod dicit: *Aguas supracælestes*, quas scæva interpretatio voculæ Hebraicæ *meal* peperit, *quomodocunque locentur aut ordinentur, tanquam supracælestes esse aliores*, ut perinde sit, quodcunque mundi systema præsupponatur. Nam si quis ex illis, qui vortices Cartesianos statuunt, quærat, utrum aquæ istæ singulis vorticibus sint circumfusæ, an vero non nisi universis; & hoc posito, quam figuram habeant, aut quem motum; aut num nihil auræ ætheris illis superius sit, plus difficultatum Albertus inveniet, quam ut tam imperioso responso defungi queat. Sicuti & magnam gratiam a curiosis rerum naturalium scrutatoribus inibit, si v. g. fontes Albis, aut Rheni, *per continuam aquarum particularium progressionem vel reptionem in materia terrestri ad loca vicina fonti exsurgere demonstraverit*. Sed nimirum ad phænomena physica explicanda liquidiore demonstratione opus est, quam conglomeratione

quorundam vocabulorum sensu carentium , & a natura rerum abhorrentium . Ad eundem gustum reliqua sunt misellæ defensionis , quorum vanitatem quilibet deprehendere ultro potest , qui isthæc Pufendorffii scripta legit , quæ hæc conjuncta damus . Et tantum sibi de æquitate juxta atque ingenio Lectorum pollicetur Pufendorffius , ut ad liquidum istis super controversiis judicium ferendum nullas amplius apologias desideraturi sint . Quin sæpe malæ causæ suspicionem præbet , circa defensionem suam nimis trepide satagere . Nec minus in eo facilem Benevoli Lectoris æquitatem sperat Pufendorffius , quod saltem paulo asperiores quandoque adhibuerit , defricandis advertariis . Nam pro horum indole ac meritis calamus temperandus fuit . Et uti circa quæstiones mere literarias valde stomachari impotentis est animi ; ita salutem atque existimationem nostram improba ratione impugnantès acriter repulisse , apud æquos rerum arbitros vel applausum strenuæ defensionis , vel veniam justî doloris habet . B. V.

## P O S T S C R I P T U M.

**I**STA cum jam in chartam conjecissem, allatus est Viri Illustris Dn. Viti Ludovici a Seckendorf liber, cui titulum idiomate Teutonico fecit *Ebristenstaat*; in quo super controversia inter Pufendorhium & Albertum agitata sic pronunciare ipsi placet; *Addit*: p. 315. *de Jure Naturali*, prout id ex Verbo Dei solidius docendum, e D. Valentino Alberti, & aliis. Ex iisdem rationibus, inquit, quibus professionem Moralem in Academiis emendari optarim, ut nempe loco Ethicæ Aristotelicæ Theologia Moralis tradatur, id quoque suaserim, ut Jus publicum universale, sive id naturale, sive Gentium vocisetur, e principiis Christianismi deducatur, aut saltem, quæ e lumine rationis promanant, ad ista exigantur & attemperentur; uti D. D. Valentinus Alberti in erudito & ingenioso Compendio Juris Naturalis Orthodoxæ Theologiæ conformato, & Anno 1678. Lipsiæ edito facit. In quo etiam multos egregios auctores & suffragatores habet; quos inter merito honoris gratia nomino Jo: Henricum Boeslerum p. m. cujus excelsa gloria apud eruditum orbem indelebilis erit, & quo ego ante quadraginta annos Argentorati præceptore usus sum: uti & solide doctum atque eximium Jctum D. Casparem Zieglerum. Equidem methodum illam, quam Dn. Samuel Pufendorfius a principiis revelatis abstrahendo secutus est, in se rejicere nolum, nec ipsius hypothesin eandem cum Hobbesiana judicare, multo minus aculeatis disceptationibus, quæ inde surrexere, me ingerere cupiam: pro modico tamen ingenio meo tantam utilitatem e separatione principiorum naturalium a jure divino revelato, seu quod eodem fere recidit, a Decalogo quaritur, perspicere non possum, quanta prima fronte videtur. Etsi enim verum sit, quod Ethnicus, qui S. Scripturam pro vera, aut regula actionum humanarum non habet, ex sola ratione, & illo lumine, quod saltem apud plerasque & cultissimas nationes agnoscitur, informandus sit: Tali tamen modo in Christiano Orbe scribere, & fundamentum juris divini revelati positum

ponere aut negligere non adeo necessarium est. Turca atque Ethnici libros nostros Latinos aut alia lingua conscriptos non legunt; cum illis efficacius disceptatur machinis & gladiis; aut si quid cum iisdem super commerciis & similibus negotiis tractetur, principia jam nota sunt; & horum praeipuum, nempe utilitas mutua subtili disceptatione haud constat. Hæc ubi claudicat aut cessat, frustra ratiocinari instituas. Enimvero e recentibus hypothesis (contra mentem quidem & scopum Auctorum) proterva nostra, & verbum Dei quotidie magis fastidians juvenus ansam arripit, ut veteres regulas, quæ apud ipsos tanquam Christianos merito valere debebant, non amplius magni aestimet, recentibus autem haud constanter fidem adhibeat, & non ulterius, quam quatenus expedit. Unde & hodie plures quam unquam alias dantur homines, qui Principum ac Rerumpublicarum destinatis qualibuscunque e laxis illis, & per probabilitatem corruptis principiis facile assentiri, coloremque allinere possunt. Non dubium est, quin ex hoc judicio Viri inter suos non exiguae auctoritatis Alberto non modici Spiritus accesserint. Sed quia in istum, quantum mihi constat, a partibus non fuit compromissum, ac in republica Literaria lex ea vigeat, ut si quis ultro circa controversiam quampiam sententiam pronunciare aggrediatur, ubi supersit qui respondere velit, huic quoque e tribunali descendendum, ac æquo animo ferendum sit, ut judicium suum judicio subjiçiat: igitur nihil iniqui fecisse videbimur, si parem libertatem, quam in alios sibi sumsit Seckendorffius, in ipsum quoque exerceamus. Pusendorffii igitur mens est, Jus Universale deducendum esse e principiis lumini rationis cognitis, quo illud sit ad caput omnium hominum, quamcunque circa sacra persuasionem foveant, quo idem idoneum sit ad dirigendas omnium inter se hominum actiones nullo religionis discrimine. Isthoc autem Jure universali rite adornato & stabilito licebit ad specialia progredi, & disquirere, an & quatenus ab hocce abeant, quidve eidem superaddant tum religio Judaica vetus, & Christiana, tum singulorum civitatum statuta. Sicuti & methodi lex hoc requirit, ut generalia præmittantur, sequantur specialia. Et utri Medicus dicitur incipere, ubi desinit Physicus, ita Theologus Moralis, & certæ Civitatis Jctus incipit, ubi

ubi Juris Universalis Doctor definit. Unde intelligi nequit, quid religionis Christianæ intersit, ut disciplina sua natura prior eadem religione, nec ei adversa aut repugnans, sed amice potius conspirans, præter nativam suam indolent alteretur, aut particularis reddatur per assumptas e religione Christiana hypotheses, quæ alii non Christiani ignorant aut non agnoscunt, imò ex ipsis Christianis aliqui in dubium revocant, quibus tamen universali jure utique opus est. Utque adeo pro limpidis & homogeneis fontibus substituat mixtura Albertina, quæ neque pro compendio Theologiæ Moralis haberi potest, neque vicem sustinere disciplinæ juris universalis, quæ juri civili subterni queat; quem posteriorem usum inter alios potissimum Pufendorfius respexit. Et si cura promovendi Christianismi utique eo extendenda est, ut Philosophia Moralis e solo rationis lumine deducta e Christianorum Scholis plane proscribatur, ( ad quod majore auctoritate quam Seckendorffii opus est, ) inque ejus locum Theologia Moralis subrogetur; in diversam plane formam compendium Albertinum refingendum fuerit, quod longe infra ambitum Theologiæ Moralis subsistit. Enimvero hoc modo existet duntaxat disciplina juris particularis, quam plusquam dimidia pars generis humani repudiabit, quæ religionem Christianam non amplectitur. Ac valde dubito, an Jcti disciplinam suam regulis Albertinis superstruere possint aut velint. Ne nunc multis arguam, quod Seckendorffius non recte hypothesein Albertinam eandem judicet cum sententia illorum, qui Decalogum juri naturali subternendum judicarunt. Nam Decalogus, quin tota religio tam Christiana quam Judaica vetus, ac omnium populorum leges, peccatum & statum hominis corruptum præsupponunt. Quæ ipsa res Albertum subegit ad absurdam illam & ridiculam analogiam confirmandam, per quam etiam, si Diis placet, bellum nunc ad analogiam status integri gerendum est, & carnifex Lipliensis jam non quidem formaliter, normaliter tamen ad statum Paradisiacum meretrices virgis cadere jubetur. Ceterum ubi Jus Universale genuinis e principiis deductum fuerit, nemo repugnat, quo minus ejusdem scitæ in Theologia Morali ad dogmata religionis Christianæ examinentur, & si quid ad regendas hominum actiones quolibet in casu deesse videatur, inde suppleatur. Alia  
attem-

attemperazione opus non est. Videamus nunc rationes, ob quas Albertinum commentum Pufendorfianæ hypothesi præferat Seckendorffius. Negat igitur insignem ulum se perspicere ejus instituti, ut nempe decreta Juris Universalis deducantur e principiis per naturalem rationem suggestis, abstrahendo ab illis, quæ revelatio divina supeditat. Nam apud Ethnicos, S. Scripturam ignorantes, hac docendi via procedendum; in Orbe autem Christiano ea methodo uti necessum non esse, postposito aut neglecto fundamento juris divini revelati. Enimvero finis & scopus S. Scripturæ tum Veteris, tum in primis Novi Instrumenti non est tradere principia, aut disciplinam Juris Universalis. Et quanquam eadem passim præcepta morum ingerat; non minus tamen disciplinam ista ex professo tradentem præsupponit, aut saltem non impedit, quo minus hæc ad leges genuinæ methodi constituatur. Sic *Roman.* I. & II. gentes arguuntur voluisse se per vitia lumini rationis repugnantia, habuisse legem inscriptam cordibus, non agnovisse Deum, qualem poterant, & debebant e contemplatione naturæ rerum. *1. Corinth.* V. accusatur quis flagitii Ethnicis inauditi. Cum autem ista, & infinita ejus generis alia divinx literæ ex professo, & ad formam disciplinæ aut artis non deducant, non repugnant, quo minus ejusmodi disciplina adornetur, ubi ista e lumine rationis explicentur; quin non obscure eandem præsupponunt. Nec merito Ethnici legem naturalem violasse argui possent, si hæc ad methodum Albertinam utique formanda foret, cujus regulæ cordibus hominum inscriptæ non sunt. Deinde Jus civile Romanum, cujus jam usus in magna parte Orbis Christiani est, ab Ethnicis primo conditum est. Ad ejusdem solidam cognitionem multum conducit discrimen nosse inter ea, quæ sunt juris naturalis seu perpetui, & quæ juris positivi. Ad hunc finem plus conducere hypothesin Pufendorffii, quam Alberti nemo inficiabitur, nisi cui invidia mentem plane corrumpit. Unde vel hic usus sufficere possit, ut jus universale ad Pufendorffianam formam adornatum in scholis Christianis tolerari debeat. Ne nunc dicam quanti sit, ope istius disciplinæ judicare posse de legibus quarumvis civitatum, sanæ rationi congruant, an minus, adeoque in imitationem ab aliis trahi, an damnari plane debeant.



beant. Non autem *negligit* fundamentum juris divini revelati, qui ex hocce quæ promanant peculiari disciplina, universali Juri contradistincta tractandum vult, nempe Theologia morali, quæ quod respectu ordinis & nativæ methodi hoc sequatur, non magis contemptum aut neglectum aliquem arguit, quam quod cognitio linguarum & philosophiæ studio Theologico præmittenda dicitur. Nec id ratiocinium cohæret; quia Turcæ & Ethnici nostros libros non legunt, igitur jus universale non est aptandum ad captum omnium gentium, sed superstruendum est hypothesi, quæ a magna parte generis humani non agnoscitur. Sane artes ac scientiæ formandæ sunt, prout indoles ipsarum requirit, paucos an multos Lectores inveniant. Medici non eo minus scita sua formant ad captum omnium hominum, seu ut omnium gentium morbis inservire queant, utut Moscis alliter fere panaceæ loco habeatur. Quin si vel maxime illiteratis gentibus ne vocabulum quidem Juris Universalis auditum sit, non minus, quæ cum istis a Christianis exercentur actiones ad normam istius juris moderandæ sunt. Nec ideo populis Christianis pauca negotia cum Muhammedanis & Gentilibus intercedunt, si vel maxime inter Sudetes montes ac saltus Thuringicos tractus a solis Christianis habitetur. Præterquam autem quod & bello sua sint jura, falsum est, solis armis adversus Turcas & infideles opus esse, nisi quando indictum cum ipsis est bellum. Nam pacis tempore utique communia humanitatis jura adversus istos sunt exercenda. Et hominem ideo hostili modo habere, quia circa sacra diversam a nobis, falsamque fovet opinionem, & religioni Christianæ, & sanæ rationi repugnat. Sic, verbi gratia, Germaniæ non minus armis opus est adversus Regem Christianissimum, quam Turcas: nec ideo tamen nullus Juris naturalis usus adversus Gallos est, Ista quoque se non consequuntur; si quis cum Turcis & Ethnicis super commerciis & similibus negotiis tractet, principia jam nota sunt; igitur supervacuum est disciplinam Juris Universalis adornare ad captum omnium hominum. Sicuti non sequitur; etiam rustici norunt, quid sit emere & vendere: igitur supervacuum est in disciplina juris de istis contractibus tradere. Sic haud ideo Euclides & subtilia Mathematicorum tradita proscribenda sunt, quia  
fabr

fabri dimensiones suas ad instrumenta sua parum operosa exegisse satis habent. Quin plerarumque artium principia sunt planissima; nec eo minus inde deducuntur propositiones haud quibusvis obviae. Denique utilitas mutua, quae haud subtili disquisitione constare dicitur, non est regula actionum inter diversas nationes susceptarum, sed causa, quae has ad negotia inter se contrahenda impellit: quae ubi cessat, negotii nihil contrahitur, quia prudentis non est, frustra quid suscipere. Sed quid inde adversus necessitatem atque utilitatem Juris Universalis concludi potest? Querela autem, quae subnectitur, de fastidio juventutis circa Verbum Dei, disciplinam Juris Universalis ad ductum sanæ rationis adornatam non tangit. Qui enim jus istud cum Theologia morali non confundi vult, haud impedit, quo minus pietati operetur juvenus. Quin potius pietatis studium commendatur, si demonstretur, ordini in ipsa rerum natura constituto repugnare, qui vitiis immergitur. Quod hypotheses in se innoxie in alium ab Auctorum mente sentum trahantur, culpa penes calumniatores est, qui alios morficando famam sibi qualemcunque quaesitum eunt. Quid per *veteres regulas* intelligat Seckendorffius, haud satis assequi possum. Veteres alias regulæ, si falsæ & inutiles sint, merito non amplius æstimantur: si veræ sint, nimirum valde stupidos oportet Doctores esse, qui earundem auctoritatem sartam tectam conservare nequeant. Recentibus autem regulis, ubi idonea demonstratione nitantur, qui constanter fidem non adhibet, morbo mentis laborare censendus est. Laxa denique & per probabilitatem corrupta principia quænam sint, distinctius debebat exprimi. Sane ejusmodi principiis Pufendorfii scripta superstructa non sunt. Igitur longe solidioribus rationibus opus est, ut credamus, rem Christianam libello Albertino magnopere promoveri, aut Jus naturale ad solius rationis humanæ captum adornatum & Christianorum scholis proscribendum esse.

---

# SAMUELIS PUFENDORFII

## A P O L O G I A.

PRO SE ET SUO LIBRO, ADVERSUS AUCTOREM LIBELLI FAMOSI, CUI TITULUS, INDEX QUARUNDAM NOVITATUM, QUAS DN. SAMUEL PUFENDORF LIBRO SUO DE JURE NATURÆ ET GENTIUM CONTRA ORTHODOXA FUNDAMENTA LONDINI EDIDIT.

*Q. D. B. V.*

**D**IFFICILIS & anceps sane habetur disceptatio, quid cordato viro sit faciendum, ubi existimatio ipsius ab impuris nebulonibus per disseminatos in publicum famosos libellos laceratur; silentio ne & contemptu adversus eos sit utendum, an vero eorundem vanitas, auctorumque improbitas stylo in justam indignationem laxato sit ulciscenda. Qui enim ejusmodi scripta pari cum latratu canum dignatione habenda censent, differere solent; supervacuum esse circa ista discutienda laborare, quæ ipse scribendi modus vanitatis arguit; quippe cum veritas aperta via incedere gaudet, mendacium furtivis tramitibus grassetur. Dignationem ultro istis furciferis addere, qui iisdem respondere aggreditur. Convicia sprete exolescere; si irascere, agnita videri. Esse pusilli animi, ad cujusvis malevoli gannitum commoveri. Conscientiæ suæ securo famæ mendacia ridenda esse. Falsum crimen in castam vitam jactum perire, sicut ignis in aquam conjectus continuo restinguitur. Præsertim ubi non in obscuro aliquo angulo, sed in luce & celebritate vixeris, innocentiaque tuæ infinitos testes excitare queas. Ex adverso constat, non semper famæ nostræ satis caveri tacito calumniarum contemptu, quæ aliqua probabilitatis specie adornatæ vestigia fere relinquunt

quant, nisi curiose abstergantur. Quæ & ipsa causa improbos homines ad audacter calumniandum impellit, quod vulnere curato cicatricem remansuram sperent. Canes quamdiu latratu tantum personant, negligi possunt: ubi dentes quoque cruribus imprimere instituant, fallis utique est expediendus. Neque vero omnibus adeo cogniti sumus, ut per se liquido discernere norint, quid falso in nos jactetur. Multis non vacat, ex nostris scriptis malitiam calumniantium investigare. Plerisque non ea talium rerum peritia est, ut proprio Marte aera lupinis dignoscere queant. Quo si accedat, ut his velut cuniculis ad subruendam nostram fortunam aditus queratur; nimirum non amplius rædum est, sed in hostem, sedam licet, arma vibranda. Neque vero summis ducibus in latrones, piratas, aut fugitivos pugnasse inglorium fuit. Atque istæ rationes me quoque jam subigunt, ut stylum in nefarium illum *Indicem* ipse stringam; utut fortasse non defuturi sint alii, qui nebulonis istius ruditatem & improbitatem sint castigaturi. Nam nemo mentem meam meipso accuratius nosse & interpretari potest; & multa ad hujus negotii illustrationem insigniter faciunt, quæ extranei alicujus noticiam fugiunt, utpote heic locorum inter paucos gesta. Licet etiam velut embryo hujus *Indicis* jamdudum a me stricturis confossus, & a Superioribus improbatus sit: tamen cum, qui hætenus erucæ instar tacite circumrepsit, nunc nescio quo interpolante & fovente alas sumserit, & tanquam papilio longe lateque circumvolitet, non abs re fuerit alas isti amburere, ut in sterco, ex quo enatus fuit, relabatur. Licet quoque *Serenissimo & Potentissimo Regi*, Domino meo Clementissimo, qui exultationis & fortunæ meæ summus heic post Deum est arbiter, satis de innocentia mea constet: nemo quoque ex Illustrissimis Regni Proceribus non agnoverit, injuriam mihi ab *Indicis* compilatoribus factam, quorum auctoritate & patrocinio munitus facile possum impuri alicujus scurræ maledicta despiciere: videtur tamen ex dignitate gloriosissimæ Nationis, ut ne quis ab Ipsa probatus sibi impune insultari patiatur, utque opinionem, quam apud Eandem habet, apud quosvis quoque alios tueri valeas. Cumque qui hunc *Indicem* a Sacra Regia Majestate jam suppressum interpol-

polare & in lucem protrahere non exhorruit, hoc ipso ejusdem supremam auctoritatem enormiter violaverit, nec minus existimationem eorum, qui primum librum meum adprobaverant, proterve suggillaverit; officii mei est, apud omnes, in quorum manus infamis ille *Index* inciderit, ostendere, utrisque judicii sui rationem constare, Quid de cetero præmii tam sædi facinoris auctoribus debeatur, publica Nemesis prospiciet. Illud igitur hoc scripto nobis agetur, ut & pudendam Auctoris infamiam, quam passim in hoc *Indice* prodit, paulo distinctius omnium oculis repræsentemus, & nefarias calumnias atque mendacia in nos jacta repellamus. Quamquam enim multorum literis moneat, a cordatissimo quoque *Indicem* itum, tanquam Idiotæ & nebulonis alicujus foetum contemni: tamen quia ex adverso constat, invidos aliquos & malevolos se hoc *Indice* deletare, nonnullos complura sibi exemplaria afferri curasse, quibus credo parietes suos sunt exornaturi in vicem pictarum tabularum, aut uti rustici in Germania prodigia januis hypocaustorum affigere solent: efficiendum est, ne isthæc voluptas hisce sit nimium diuturna; simulque specimen aliquod exhibendum, non impune mihi viventi barbam quantumvis minutam vellicari. De cetero hoc in medio relinquemus, benevoli lectoris arbitrio decidendum, ruditati an improbitati in *Asinio Tenebrione* ( hoc enim vocabulo calumniatorem insignire tantisper placet, ) prior debeat locus. Nam ut hæc quoque disquisitio me exerceat, operæ pretium vix videtur.

§.II. ANTEQUAM autem ad ipsum *Indicem* castigandum accedam, obiter heic visum fuit, querelam movere super injuria, abs duobus aliis viris nomini meo in Germania proximis temporibus illata. De qua ut publice constet, itidem existimationis meæ non parum interest. Et circa priorem quidem ita se res habet: Triennium abhinc est, cum Holmiæ Epistolam super divortio conscripsit Dn. D. Balthasar Menzerus; quam postea hoc infcio turbidus quidam sacerdos impressam divulgavit. Aliquanto post prodiit Dialogus de Polygamia, epistolæ illi oppositus, sub ficto nomine *Sinceri IVahrenberg*. Ejus dialogi Pufendorium esse auctorem per non pauca Germaniæ loca disseminavit Vir quidam non obscuræ  
*Pufend. Eris Scand. T.IX.* B alias

alias famæ, & non infimi subsellii: cujus nomen heic adponere per modestiam, & in respectu certi cujusdam Principis parco. Quo ipso gravis mihi ab illo injuria fuit illata, dum apud multos ea res credita non parum sinistra de me opinionis excitavit. Quamobrem existimationis meæ tuendæ necessitas, quæ optimo cuique maxime curæ est, subigit, ut heic publice contester, Virum istum, dum me auctorem prædicti dialogi sparsit, turpiter fuisse *mentitum*. Nec excusabitur a calumniæ orimine, si dixerit, se ab alijs id accepisse. Nam facile fuerat viro erudito judicare, scriptum istud nequiquam ab ingenio meo promanasse, utpote ab indole ceterorum scriptorum meorum plane abhorrens. Neque vero sum judicio adeo infelici, ut negotio ad me nihil spectanti me immiscerem adversus virum, quem amicum mihi credebam; aut famam antea eruditorum favore quæsitam ejusmodi libello ultro destructum irem, meque hominibus importunis exagitandum exponerem. Et sane, si quis cordatus scriptum istud penitus expendere, facile ibi deprehendet genium viri haudquidquam literas professi, sed naturali judicio fere subnixi. Quod si autem iste repone velit, sibi non de me, sed de Fratre meo sermonem fuisse; tunc ipsius nomine itidem *mentitum* eum pronuncio. Nam habet profecto alia Frater meus, quibus tempus suum impendat. Et si libris scribendis ille voluisset inclarescere, splendidior & plausibilior materia defutura non erat.

§. III. ALTERA injuria priore non paulo atrocior videtur, dum quidam valde musteus scriptor, qui sibi fictum *Christiani Vigilii Germani* vocabulum indidit, in *Dissertatione super Polygamia simultanea Sincero Wahrenbergio opposita*, aperte me sub isto Wahrenbergio latitare arguit. Qui licet forte rumorem a priori disseminatum causari velit, non eo minus tamen calumniæ & mendacii est reus; cum haudquidquam fas sit, utcunque audita chartis illinere, & publice pro suis asserere. Et eo gravius est scripto publico, quam privato sermone mendacia de aliquo spargere, quo plurimum in manus ista perveniunt. Accedit præter supra adductas rationes, quæ ipsum ab hac calumnia mihi impingenda revocare debebant, quod in opere meo de *Jure Naturæ & Gentium* L. VI. c. 1. §. 19. clare perspicere poterat, me polygamiz nequiquam esse fautorem. Quæ ergo ratio movere me posset,

posset , ut alio scripto ejus me propugnatorem ferrem , & dicta Sacrarum Literarum cavillari aggrederer ? Præfertim cum mihi semper visum fuerit, ubicunque potius quam circa oracula divina, ingenium exercere . Equidem iste *Vigil* humaniter valde mecum agere velle videtur , dum invidiosis me encomiis onerat ; sed quæ facile ipsi potuissem remittere . Pessimum inimicorum genus laudantes , qui palpum obtrudunt , ut eo acrius mordeant . Apage istas viperino velle adpersas blanditias . Abi , & aliam quercum excute , ac vide , num quem invenire possis , qui abs te ad errorem suum revocandum compellatur . Nam mihi quidem cum *Wahrenbergio* nihil commercii est . Et hoc meæ humanitati beneficium debe , quod nomen tuum , de quo optime mihi constat , dissimulaverim , ne publice mendacii exprobrationem deglutire cogaris . Quod si excipere velis , non mihi , sed Fratri meo *Wahrebergium* abs te adscribi , idem tibi , quod priori , dictum puta . Atque hæc isto loco inserere placuit , quod omnino dicenda forent , nec commodior jam occasio eadem publicandi occurreret .

§. IV. His obiter expeditis , ad *Indicem* evoluendum accingimur ; qui in ipso frontispicio non obscure præ se fert , qua classe ejusdem Auctor censeatur , dum *Novitates* libri mei notare instituit . Quod vocabulum familiare valde est hominibus indoctis & stupidis , quorum omnis scientia uno & altero compendio memoriæ mandato absolvitur ; abs quo quicquid discesserit , hoc solo nomine damnatur , quod ignorantiam ipsorum arguit . Sicut isti hominum generi *novitatis* vocabulum non errorem aliquem in altero , sed in ipsis ruditatis confessionem notet . Hoc ubi insonuit , statim velut ad commune incendium restringendum concurrunt universa semidoctorum turba , ludimagistrorum colluvies , & ex sacerdotum ordine , qui postillas tantum evoluerè callent . Et sane si quævis nova doctrina ab ipsorum compendiis & tabellis discrepans invaluerit , ad idiotarum classem redigi ipsos manifestum est , qui hætenus magno cum fastu definitiones & regulas suas crepaverant . Judicant quoque isti homines , vocabulo *novitatis* magna cum invidia jactato subtile inesse stratagema pedanticum , sequestrandæ rationi , & declinando oneri ad aliorum argumenta respondendi ; simulque ut postquam vanitatis

convicti sunt, aliquid saltem causæ proferre queant, quare tumultum moverint. Enimvero novimus in vera religione, verbo DEI nixa, nihil esse novandum. Crimen quoque est in republ. res novare. At in disciplinis, quæ rationi subjectæ sunt, eo ampliorem ingenii ac industriæ laudem merentur scriptores, quo plus novitatum invenerint. Contra qui nihil continet liber, quod non ab aliis dudum ad nauseam fuit inculcatum, is relegandus est ad piper, & quidquid chartis amicitur ineptis. Est quoque circa titulum famosi libelli non insuper habendum, quod istæ novitates *contra Fundamenta orthodoxa* editæ ferantur. Cur non apertius loquebaris, Asini Tenebrio: contra Scripturam Sacram, & symbola Suecanæ Ecclesiæ? Scilicet olent & ista *Fundamenta orthodoxa* dictionem hominum indoctorum, quibus hoc nomine venire solet, quidquid communiter a Theologis traditur circa quæstiones philosophicas passim systematicis Theologicis admisceri solitas. Atqui cum circa talia dogmata Theologi nondum reliquos omnes, qui sana ratione æque ac ipsi possunt uti, sacramento suo adegerint; non novitatis aut heterodoxiæ maledictum, sed rationem opponere debent, si quis a tralatitiis ipsorum dogmatibus discesserit.

§. V. In universum autem circa modum, quo in confarcinando isthoc famoso libello auctor usus est, observandum; Asinium utut protritissimæ eruditionis, ab artibus tamen sycophantarum uberrime instructum deprehendi, ac imperitorum animis sat solerter adrepere. Qui alterum non per calumniam erroris arguere instituit, ei primo statuenda est certa thesis, extra dubium utrinque posita, vel ab ipso immotis rationibus abstruenda. Tum ostendendum est, alterum huic thesi directe contradicere; simulque si quas idem rationes affert, solide destruendæ. At nihil horum a sycophanta isto fit. Tantummodo Sociniani, aut Calviniani, aut Pontificii scriptores allegantur. Aliquando ne hoc quidem additur; quasi immota foret hæc consequentia. Asinius Tenebrio dicit Pufendorhium hoc statuere: Igitur hoc falsum est. Atqui præterquam quod nostra tradita toto cælo a Socinianorum, Calvinianorum ac Pontificiorum commentis abeunt, etiam maximus imperitis fit fucus insidiosa ista heterodoxorum allegatione. Id enim genus hominum



num , quod proprio ex judicio inter rectum & pravum discernere nequit , quodque odium erga certos scriptores , sectasque ex auditione duntaxat hausit , statim , ubi ejusmodi invisum nomen insonuit , exhorrescunt , ac de Ecclesia jam conclamatum arbitrantur . Nec mora , auctor liberque inclementi censura noratur , praeunte calumnia primarii cujusdam sycophantæ , cujus ob reverendum schema ab istis omnia , quæ hic per inconsultos affectus , aut inscitiam eructaverit , velut oracula inclinato in terram capite adorantur . Ast quis tam imperitus est , qui nesciat , scriptores extra Ecclesiæ nostræ communionem constitutos non undiquaque ab orthodoxæ religionis scitis dissidere , in multis amice conspirare ; quæstiones autem extra fidem , ac reliquas disciplinas non minus feliciter quam nostros tractare ; in non paucis nostratibus palmam præripere . Si quis igitur Pontificii alicujus Logicam magis , quam manuale Scharffii , aut tabeilas Stiirii cujusdam sequatur , num ideo orthodoxiæ ipsius aliquid decedere judicandum est ? An & jam in philosophiam , medicinam , & jurisprudentiam inferentur odia , quibus Christiani ob discrepantiam religionis inter se flagrant ? Quin potius hanc viam insistimus , ut dogmata fidei a nostra orthodoxia abeuntia damnemus : circa cetera , quæ isti præterea in re literaria elaborarunt , saltem non deteriore eos quam ethnicos loco habeamus quibus quotidie omnia pulpita resonant . Illud autem improbum & inficetum habeatur , si cum aliquo heterodoxo in quæstione extra fidem convenias , argui , quasi & ejusdem errores circa articulos fidei adprobes . Sic , exempli gratia , in nuperrimo *Commentario ad prima juris fundamenta* ab Amplissimo Auctore Nicolao Beckmanno p. 678. quæstio sane lepidissima , & rarissima ingenii acuendi causa ventilatur , *utrum mulieres sint homines , vel non ?* quam pari felicitate , atque Alexander nodum Gordium solvit hoc modo : *Quamquam mulier quidem non est κατ' ὄψιν homo , sicut mas , est tamen homo , cum anima rationali sit prædita* . Atqui eodem tendit effatum Muhammedis in *Alcorano capite de Vacca* . Quis tamen ideo magnum Virum Muhammedanum pronunciaverit , aut præputium ejus in dubium revocaverit ? Enim vero ad hæc nobis confugere non est necessum , quod dogmata nostra a Socinianorum , aliorumque placi-

tis plane diversa sint , uti ad singulos articulos clare ostendemus.

§. VI. EXAMINEMUS nunc singulos errores , quorum me reum peragit Alinius Tenebrio. I. *Statuit , civitatem ejusmodi doctrina personare debere , quæ cum fine & usu civitatum congruat ; explicatque hoc ipsum non tantum de scientia humana , sed etiam ea , quæ est circa cultum Dei . Sic enim pag. 910. Inde expedit , ut publice &c. confer. p. 911. Debuerat etiam conferri p. 1013. §. 4. Circa hunc articulum etsi non opus erat aliquid reponi , cum omnes boni Christiani , bonique cives eandem mecum foveant sententiam ; vel ideo tamen quædam erunt monenda , ut eo liquidius in apricum protrahatur , quid veneni monstrum istud intra præcordia sua alat . Ac illud initio manifestum est , me de civitate , ejusque natura , deque summo imperio civili non alia tradere , quam quæ ex dictamine rectæ rationis , ipsaque adeo lege naturali promanant . Sic & quod de recto duntaxat & legitimo usu summi imperii civilis sermo mihi sit , *caput ultimum Libri VII. de officio summorum imperantium* satis arguit . Cum ejusdem abusu , pravisque imperantium artibus nihil mihi negotii est . Deinde usque adeo a me nulla repugnantia inter genuinam politicam , & sinceram , doctrinæque & praxi Servatoris nostri & Apostolorum conformem religionem Christianam adseritur , ut potius d. p. 1013. non obscure innuam ; nullam religionem tam perfectâ continere præcepta moralia , & quæ magis ad tranquillitatem & decus civitatum adaptata sint , quam Christianam . Præterea & hoc mihi persuasum est , ideo Servatorem nostrum , Apostolosque nihil novorum scitorum circa politicam architectonicam doctrinæ suæ admiscuisse ; quod isthanc satis liquido ex rationis lumine mortales eruere possent , ita ut si illud heic rite sequerentur , voluntati Numinis nihil adversi sint facturi . Quo spectat quoque Augustinæ Confessionis effatum : *Evangelium non abolet politias* . Ex quibus omnibus tuto videor concludere posse ; officia boni civis , politicique , ac boni Christiani haud quidquam sibi invicem repugnare . Qualem porro *finem , usumque civitatum* statuam , perspicue satis exposui L. VII. c. 1. §. 7. ut nempe præsidia sibi homines circumponerent contra mala , quæ homini ab homine imminant . Ad hunc finem*

finem obtinendum unionem & imperium necessarium esse demonstravi L. VII. c. 2. & 4. Hanc unionem quæ destruunt aut perturbant dogmata, & quæ jus naturale, & sana politica scita convellunt, adeoque exitiabiles morbos in republ. producere apta sunt, e civitate proscribenda censeo, sive sub specie religionis, sive alio modo obtrudantur. Ubi probe notandum, non esse hanc meam thesin; cultum Dei ad usum civitatum aut regulas politicas formandum, uti Asinius Tenebrio inquirere videtur. Nam cultus Dei presse consideratus ex altiore principio est derivandus. Sed hoc dico; nulla dogmata moralia; qualia omnem fere religionem comitantur, contra jus naturale & sanam politicam pugnantia, sub specie religionis obtrusa, in civitate esse toleranda. Qualia sane pestilentissima sub religionis larva alicubi irrepsisse nemo rerum humanarum peritior est, qui ignorat. Ex eo genere sunt isthæc dogmata: dari potestatem extranei alicujus sacerdotis, quibus summi Imperantes civiles sint subiecti, quique ipsos solio dejicere, ac cives obligatione adversus eosdem absolvere queat: omnibus sacerdotibus cujuscunque reip. Christianæ necessario dependendum ab sacerdote aliquo extraneo: isti sacerdotes summo imperio civili nullam esse potestatem: sacerdotibus necessario competere immunitatem ab oneribus reip. ut tamen ipsis in infinitum suas opes cumulare liceat: quemlibet civem actiones suas exteriores, & ad statum civitatis spectantes juxta propriæ conscientiæ dictamen posse regere, etiam contra leges publicas & jussa summorum imperantium: non dependere abs cujusque arbitrio actiones, super quibus in foro humano solet ratio exigi: illicitos esse homini Christiano aliquos actus ad conservationem civitatum in isthac mortalium conditione necessarios; aut dari aliquod vitæ genus civitati necessarium, quod per se vitio & impuritate laboret: fanaticorum hominum deliria & commenta pro oraculis divinitus inspiratis; & si quæ sunt ejus farinae alia. Cum igitur Asinius Tenebrio meam sententiam hactenus expositam, tanquam orthodoxis fundamentis repugnantem damnet; necessum est, ut ipse hunc articulum fidei fundamentalem statuatur: *Debere civitatem ejusmodi doctrinis personare, quæ cum fine & usu civitatum non congruunt, animosque civium a puero istis imbuendos,*

*etiam talibus, quæ sive sub specie religionis, sive alio modo obtruduntur, jus naturale ac principia sana politica convellunt, adeoque exitiabiles morbos in civitate producere apta sunt.* Hoc tam egregio fundamento substrato superest, ut novus ille doctor pro sublimi ingenio suo integrum systema ejusmodi dogmatum adornet, ut homines turbulenti, inter quos ipse non obscurum nomen decusque gerit, in promptu semper habeant prætextus, ob quos tumultus in rep. excitare queant. Hoc tam præclarum opus cuicumque Principi obtulerit, quam parvus ille sit, præmii tamen loco laqueum scriptori offeret. Ceterum ne sine ratione meam doctrinam damnassee, suamque pro articulo fidei venditasse videatur, addit: *Qui error Theologiam Gentilium idcirco sequitur; quippe quæ etiam utilitati publicæ respondere debebat.* Hæc primo exorandus est Asinius Tenebrio, ut explicet nobis, quænam sit illa Gentilium Theologia moralis. Cum enim Theologia moralis notet doctrinam de regendis moribus & actionibus, depromptam ex principio illo, quo cultus divinus traditur, (sicut Theologia moralis inter Christianos est doctrina de formandis moribus & vita hominis Christiani, prout super iis divinæ literæ docent: velim scire, ubinam extent ejusmodi velut biblia gentilium, ex quibus præter doctrinam de cultu deorum peti queant officia hominis Ethnici ut talis, seu quomodo idolorum cultor sese debeat gerere, ut professione idololatriæ suæ dignus habeatur. Equidem id tralatitium est, Romanis quondam non nisi inter instrumenta status adhibitam, cujus ope animos vulgi per lætitiâ, metum, spem, confidentiam, timorem, similesque affectus versare possent, prout præsentibus reip. temporibus expedire videretur. Quam ob causam quoque sacerdotes ibi non constituebant peculiarem ordinem, a politicis separatam; sed qui amplissimis in rep. muneribus, iidem & sacerdotiis fungebantur, ne forte circa temperandam religionem, vel superstitionem potius a commodis reip. aberraretur. An tamen super hac re peculiare caput in Theologia Romanorum morali extiterit, adparebit, quando Asinius Tenebrio Catechesin Pompilii Numæ, qui liber diu in bibliotheca ejus rarissimis instructa codicibus latitavit, publici juris fecerit. De cetero dubito, an hæc rite consequantur; quia gentiles

tiles religionem non ad perturbandam temp. sed potius ad ejusdem utilitatem promovendam adhibuerunt, ideo fas esse sacerdoti Christiano cornua imperio civili obvertere, & plebem in principes concitare, aut peculiarem sibi factionem in republica formare. Sicuti non, quia gentiles mendacium & calumniam pro scdissimo vitio habuerunt, ideo jam hominem Christianum decet, Indices novitatum in aliorum libros conscribere. Videmus jam, quomodo impurissimus nebulo ex isthoc articulo anam arripuerit, dirissimam in me calumniam evomendi. *Corrupta hac doctrina, inquit, luculenter innuit sicut sibi proficuum fuit Heidelbergæ agere Calvinistam, ita in Suecia sub specie pietatis Lutheranismum fidee praestetur.* Male pereas, infame caput; ita ambiguum est, utrum oratio tua sit vitiosior, an calumnia detestabilior. Ego Heidelbergæ Calvinistam egi? Atqui impudentiam hujus mendacii norunt non solum omnes ejus urbis incolæ; sed & maximus numerus egregiæ juventutis ex omnibus partibus Germaniæ, ac imprimis illustres, nobiles, ac præstantissimi juvenes, ex Suecica natione, qui per septennium, quo ego professoris ibi munereungebar, magno numero Heidelbergæ degebant; quorum aliqui contubernio ac mensa, plurimi informatione mea utebantur. Neque vero is est locus Heidelbergæ, ut ulla quempiam causa subigat hypocritam agere, suamque religionem dissimulare. Imo ultro irrideretur, & pro vanissimo homine haberetur, qui simulationem reformationis religionis ad fortunas suas ibi stabiliendas aut augendas adhibere institueret. Extruxerant sibi cives nostræ religioni addicti novam ibi ædem sacram, cui primum lapidem ipse SERENISSIMUS PRINCEPS ELECTOR sua manu posuerat. Heic pari nos libertate nostram religionem exercebamus, atque reliqui suam. Nisi quod hoc vehementer conscientias nostras angeret, quod sonitu Calvinianarum campanarum ad nostra sacra evocaremur. De cetero pari gratia cum aliis apud Optimum & Sapientissimum Principem florebamus, cui citra discrimen religionis acceptus erat, quisquis recte faceret. Id tamen non abnuerim, me aliosque Lutheranos cum Reformatis amice & jucunde conversatos fuisse. Nullæ in congressibus nostris servidæ disceptationes super religione audiebantur; non maledictis nos & conviciis edomi-

nomine infectabamur; non invicem nos diaboli filios in contestationem Christianæ caritatis salutabamus. Tali modo me Heidelbergæ vixisse nec ceteros pœnituit, & meipsum nunquam pœnitebit. Et vero valde dubito, an major laus illi debeatur, qui obtentu singularis cuiusdam zeli ejusmodi turbas dat, ut in patria sua profugiat, vita sub carnifice sit ipsi ponenda; aut qui moribus est ita tectis, ut ubicunque pedem posuerit, rixas Furia alicujus ad instar serat, societatemque, in quam malo fidere conjectus est, continuis turbis exercitam teneat. Quod superest ego uti in religione Luthæra natus educatusque sum; ita eandem & Heidelbergæ, & in Suecia non *fictæ*, sed sincere & ex animo profiteor, & ad vitæ finem profitebor. Fictam pietatem illis occine, mi Alani Tenebrio, qui schema Pharisaicum præ se ferant, qui irreprehensibiles sese undiquaque crepant, qui precum suarum horam æris campani pulsu divulgant; & interea pectus ambitione, superbia, contumacia, invidia, aliorumque horridorum affectuum sentina turgidum gerunt, quæ quotidie intolerabilem mephitim cum bonorum omnium detestatione eructat. Sed & ita hæcenus SERENISSIMI AC POTENTISSIMI REGIS SUECIÆ gratia, ac gloriosissimæ nationis Sueciæ favor mihi allubuit, & in posterum quoque de se sperare jubet, ut non opus futurum mihi sit in *Muschovia benigniorem fortunæ auram* captare; in cujus extremas partes potius auctor famosi Indici deportari mereatur, ut cum zobellis & martibus bellum ibi gerat, in præmium bellorum, quæ nullos sane habitura triumphos gerit. Ceterum infra pluribus exponam, quo fine hocce mendacium contra propriam, si quam habet, conscientiam finxerit *niger ille calumniator, nigra scholæ primipilus, nigri magistri niger discipulus, nigra scholæ tiro niger, calumniatorum omnium antesignanus, vel potius orci aut inferni monstrum, monstrorum omnium teterrimum*; quo elogio luculento sane id genus homines maestat Generosissimus atque Reverendissimus Dominus, Dominus PETRUS WINSTRUPIUS, Dominus Aulæ Lundensis & Werpingæ, Theol. Doctor, Episcopus Scanix, Academiæ Carolinæ Procancellarius, Consistorii Ecclesiastici Præses, undiquaque eminentissimus &c. &c. Poëta & Orator sine æmulo, cum multis aliis nomi-

minibus, tum imprimis vasto opere Pandectarum sacrorum propriis sumtibus & citra ullam lucri spem editorum de Ecclesia meritissimus, in elegantissima sua *Oratione Synodica de Calumniis & Calumniatoribus* anno 1667. habita; cujus alteram editionem nonnullis annotationibus auctiorem libenter adornatam, si pace Auctoris fieri posset; quia pleraque ibi contenta ad præsens hocce negotium levi facta immutatione adplicari apta sunt.

§. VII. CIRCA secundum articulum Indicis prius sententiam nostram, prout libro nostro exprimitur, perspicue declarabimus. In *capite* igitur *I. Lib. II.* docetur, quod hominis quidem naturæ non congruat, ut vivat exlex; Denm autem supra leges positum, bruta infra leges abjecta. In Deum porro §. 3. omnimodam, & omnis defectus ac impedimenti nesciam libertatem cadere asseritur, quæ & ipsa cum omnipotentia est conjuncta. Unde quod Deus quædam non agit, v. g. quod non plures Lunas circa terram, uti circa Jovem & Saturnum creavit, aut quod non omnia semper agit, v. g. quod quotidie nova corpora mundana, aut novas species non creat; id non est ex defectu libertatis, sed ex proprio beneplacito. Hanc enim solam rationem circa similes quæstiones reddere simplicius, & in majestatem divinam reverentius duco, quam subtilia commenta curiose adornare, quibus omnipotentia divina in ordinem redigitur. Quod autem Deus quædam non posse agere dicitur, v. g. mentiri, aut promissa sua destituere; id non provenit ex aliquo impedimento extrinsecus accedente, naturali aut morali, id est, illud non ideo non posse dicendus est, quod ens aliquod extra Deum constitutum ipsius facultatem agendi vinculo quopiam constringat; sicuti qui homo vinculis & compedibus oneratur; ei facultas quoquo versus sese movendi adimitur, aut quod ab ente aliquo extra ipsum constituto obligatio quædam ei sit injuncta, cujus vi a certo actionum genere abstinere sit eidem necessum. Nam qui naturale vinculum alteri injicit, robustior, aut dexterior & astutior est illo, cui vinculum injicitur. Qui autem morale impedimentum agendi alteri asserre potest, superior est illo, cui id impedimentum affertur. Ergo alterutrum horum asserere, ponit aliquid Deo potentius, aut superioris,

rius, ipsamque adeo omnipotentiam & summam Dei maiestatem destruit. Imo ex Deo facit non Deum. Qui enim non est summus, Deus non est. Add. L. I. c. 6. §. 4. 8. Quæ cum ita sint, nil aliud relinquitur, quam ut dicamus, ex proprio beneplacito Dei provenire, quod is quædam agere non posse dicatur; *quod beneplacitum ad magnitudinem & præstantiam ipsis attemperatum concipimus*. Quæ verba Asinius Tenebrio omisit, vel quod ea non caperet, vel quod per ipsa ansam calumniandi sibi præripi animadverteret. Scilicet quando mortales de Deo loquimur, non solum id reverenter faciendum, & citra omnem petulantem curiositatem, ac dictatoriam definiendi insolentiam: sed etiam locutiones, quas a rebus humanis commodato velut sumtas, & ad modulum rerum humanarum primitus formatas Deo adplicamus, ab omni velut imperfectione depurare debemus, ne Deum angustiis, quæ humana natura circumscripta est, includere velle videamur. Inde quando de homine sermo est, solemus ejus voluntatem, potentiam, & agendi necessitatem seu obligationem sæpe sibi invicem opponere. Sic sæpe dicimus; homo vult aliquid supra vires seu potentiam suam positum; vult quod est contra ipsius obligationem: agit quod est contra eandem. Idque ideo, quia in facultatibus hominis non est ejusmodi perfecta unio, ut omnes semper amice conspirent; sed illæ sæpissime in diversa abire, sibi invicem repugnare deprehenduntur. At in attributis divinis, quæ ad analogiam facultatum in homine utcumque solemus concipere, perfectissima unio & velut conspiratio est intelligenda; sic ut voluntas Dei ejusdem magnitudini, præstantiæ, justitiæ, sanctitati, bonitati nunquam repugnare possit, & consequenter voluntas Dei nunquam ejusdem bonitati, sanctitati aut justitiæ sit opponenda. Sic quando dicimus. Deus non potest mentiri, quia non vult; non hic est sensus, quasi Deus mentiri quidem posset, modo vellet, aut quasi hoc agendi objectum ab ipsius magnitudine non abhorreret, modo voluntas versus illud se moveret; (sicuti hominibus sæpe naturalis facultas peccatum aliquod patrandi adest, in quod tamen voluntas ipsorum hæc & nunc non fertur: ) sed quia voluntas Dei nunquam ejus magnitudini & perfectioni adversatur. Sic ut ista assertio plane conspiret  
cum



sum hac thesi: Deus non potest fidem fallere, aut mentiri, quia hoc repugnat ejus veracitati & justitiæ. Eodem inquam redeunt hæ duæ assertiones, quando Deo adplicatur: quæ tamen si de hominibus enunciarentur, diversæ sunt, & aliquando una earum falsa. Perinde inquam est, siue dicam; mentiri repugnat justitiæ Dei essentiali: siue dicam, idem repugnat ejus voluntati, quæ ad magnitudinem & præstantiam ipsius attemperata concipitur. Ubi autem de libertate Dei sermo est, convenientius meo quidem judicio ejusdem perfectioni exprimendæ videtur, voluntatem, qualis in perfectissimum ens cadere potest, velut principium ipsius actionum assignare, quam justitiam; quod hoc vocabulum simplicioribus facile insinuare possit, quasi in Deo existeret obligatio extrinsecus accedens, quæ prohiberet certas ipsum obire actiones, abs quibus alias, ipsius natura & voluntas per se non abhorreret. Ex quibus ita explicatis ejusmodi resultat interpretatio tralatitii illius; *Deus sibi ipse est lex*: hominum quidem voluntas legibus est circumscribenda, ne ad ea patranda aberraret, quæ ipsis indigna sunt. Enimvero Deo legē aliqua extrinsecus accedente opus non est, sed voluntas ejus ita sancta, ita perfecta est, ut in omnibus exactissime, prout divina magnitudine & perfectione dignum est, sese velut moveat, non secus ac si exquisitissima quadam lege regeretur. De cetero manifestum est, siquidem istud dictum proprie accipiatur; inde secuturum maximum hocce absurdum: Deum seipso esse superiorem, cum lex decretum superioris sit. Conferamus cum hisce articulum II. Indicis: *Deum, eo quod agens liberrimum est, nature sue legibus ita non teneri docet, ut hoc vel illud (intellige peccata) agere non possit, affirmatque omnia illa, quæ non agere posse dicitur, non per naturale impedimentum, sed ex placito vel voluntate non agere, legemque; sibi ipsi non nisi ex placito esse, p. 133. §. 3. Quod autem & p. 166. §. 6. sicut & valde expressè ibid. Sed nec citra animadversionem &c.* Hunc articulum si considero, sane mediocris mihi videtur fraus diaboli, quando in allegando Scripturæ dicto unum & alterum vocabulum insidiosè reticebat; ita ut si compareretur cum detorsionibus heic adhibitis, vix pro specimine primæ laureæ in facultate calumniandi haberi queat. Enim

Enim vero Asinius Tenebrio Licentiatum & Doctorem se in eadem facultate jam exhibet, ad cuius pedes tiro ille adhuc puto diabolus tanquam discipulus sedere, & biennium suum absolvere debebat, si cum honore velit in ea facultate locum obtinere, abs qua ipsi nomen est inditum. Primo enim hæc verba, *Deum legibus suis non ita teneri, ut peccata agere non possit*, a deterrimo sycophanta ita sunt concepta, ac si docerem: Deum per leges suæ naturæ non impediri quo minus peccare possit, adeoque Deum revera posse peccare. Quæ blasphemia tantum a verbis & mente mea abest, quantus ad ætherium cœli suspectus Olympum. Neque dictis locis, neque alibi in meo libro hæc extat thesis: *Deus naturæ suæ legibus ita non tenetur, ut hoc vel illud (nempe peccata) agere non possit*. Sed hæc sunt mea verba: *Quod Deus quadam non posse agere dicitur, est ex proprio placito, quod mortales ad magnitudinem & præstantiam ipsius attemperatum concipimus*. Sed nec illa mea est thesis: OMNIA illa, quæ non agere posse dicitur, non per naturale impedimentum, sed ex placito vel voluntate non agere. Verum ita se habent verba mea: *Quod Deus QUÆDAM non posse agere dicitur, id non provenit ex aliquo impedimento extrinsecus accedente, naturali aut morali*. Quid discriminis inter hæc theses intercedat, cæcus sit qui non videat. Quod si autem aliquis quærat, quare ego thesin meam particularem posuerim, causa est, quia cetera peccata, quæ in homines cadunt, quæque nos animo concipere possumus, ideo in Deum non cadunt, partim quia illa exercentur actu aliquo corporeo; Dei autem essentia est ipsiritualis: partim quia patrantur adversus superiorem, Deus autem superiorem non habet; adeoque quia obiectum ejusmodi actionum in Deo citra contradictionem fingi non potest. Et sic Deus peccare non potest, quia quædam peccata sanctissimæ, justissimæ, & perfectissimæ ejus voluntati adversantur, reliqua contradictionem involvunt. Denique nec hæc thesis uspiam in libro meo extat: *Deum sibi ipsi legem non nisi ex placito esse*. Quæ & ipsa tam absurda, nulloque plane sensu est, ut non nisi in cerebro Asinij Tenebrionis nasci potuerit. Neque vero consequitur; si homo legibus naturæ tenetur, Deum quoque suæ naturæ legibus teneri. Nam quod

quod homini dictamina rectæ rationis leges sint, causa est, quia Creator O. M. homini præcepta sua per ista insinuat, sic ut iisdem imperium Dei vim legum tribuat; uti ostendimus *lib. II. c. 3. §. 20.* Sed si vel maxime essentiam divinam ad modulum nostræ rationis vellemus exigere, quod nempe & ipse, quando actionem aliquam est suscepturus, velut reflexionem faciat super essentia & attributis suis, an hæc eandem deceat, vel non: tamen illud ipsum, quod ita concipitur, velut dictamen, lex proprie dicta vocari nequit, utpote quæ necessario a superiore proficisci debet. Nec ad rem faciunt, quæ Asinius deinceps blaterat; (*Ex quo posteriori loco nempe p. 166. §. 6.* ubi dixi, intolerabile esse homuncionem oggannire suo Creatori, Deus debet necessario aliquid facere) intelligitur fundamentum erroris esse, quod existimat, legibus naturæ adstrictum esse, majestati omnipotentia incongruum esse: cum tantum quidem absit, ut vel omnipotentia vel beatitudini divine hoc quidquam derogat, ut etiam perfectionem & immutabilitatem Dei quam maxime confirmet. Equidem majestatem terreni alicujus Principis non dedecet, legibus, quæ alias per fastigium suum exemptus videri poterat, ultro se subjectum profiteri; quia omne regnum humanum sub graviore regno est. Ast hoc utique majestati divinæ derogat, legibus proprie dictis obnoxium esse; quia si Deus legibus proprie dictis tenetur, habet superiorem; si superiorem habet, Deus non est. Claudid demum sycophanta hunc articulum: *Sequitur autem Pufendorfius in errore hoc Zwinglianos, qui etiam legibus Numen non teneri ideo docent, quia libere cum creaturis agere licet.* Atqui ego nequaquam assertionem meam ex eo fundamento deduxi, quia Deo libere cum creaturis agere licet. Deinde etsi mihi jam non vacat inquirere, quid illi, quos iste Zwinglianos vocat, super jure Dei in creaturas statuunt: hoc tamen mihi persuadeo, neminem eorum tam stupidum esse, ut ita ratiocinetur: *Numen legibus non teneri, quia libere cum creaturis agere licet.* Cum potius inverso ordine dicendum fuerat: ideo Numini libere cum creaturis agere licere, quia legibus non tenetur. Ceterum non obicurum est, quò fine nequam calumniator iithanc clausulam addiderit. Vult quippe aliis persuadere, me errore isto,

isto, tantopere a nostratibus exagitato, teneri, quasi Deus citra ullam velut reflexionem magnam partem hominum ad æternos inferni cruciatus condiderit. Abs quo dogmate tantopere abhorret mea mens, ut illud manifestam in se contradictionem involvere judicem: ex absoluto placito aliquem ad æternas pœnas damnare. Quia omnis pœna iusta demeritum præsupponit: nec bonum dixeris creatorem, si hoc fine creat, ut creaturæ infinities pejus sit, quam si creata non fuisset.

§. VIII. ARTICULUS III. paucis verbis expediri potest. *Quando p. 133. docet, ex placito vel voluntate, non autem ex naturali vel essentiali impedimento provenire, quod Deus quadam agere non posse dicatur; voluntatem utique & essentiam Dei non unum idemque, sed distincta esse cum Vorstio T. de Deo docet.* Heic verba mea mutilata adduci adparet: quæ ita sese dicto loco habent: quod Deus quædam non posse agere dicitur, id non provenit ex aliquo impedimento *extrinsecus accedente naturali aut morali*, sed ex proprio placito, quod mortales ad magnitudinem & præstantiam ipsius attemperatum concipimus. Ubi manifestum est, furciferum omittere verba hæc, *extrinsecus accedente, & pro morali substituere essentiali*, quasi inter duo hæc nihil interesset. Et res ipsa loquitur, me voluntatem Dei opponere coactioni validioris, & imperio superioris; nequaquam autem vel essentiae, vel sanctitati, bonitati, aut iustitiae divinæ. Eat igitur, & alium quærat, quem cum Vorstio heic consensisse mentiatur.

§. IX. CIRCA articulum IV. prius nostra sententia liquido erit repræsentanda, ut eo clarius omnibus adparere queat, qua fide in meo libro Asinius Tenebrius sit versatus. Verba mea hæc sunt, p. 134. *Hinc & quando Deo tribuitur iustitia, non illa est intelligenda respicere aliquam obligationem, aut ius in altero, sicut iustitia humana id infert. Sed quia talem agendi modum perfectissimæ suæ naturæ congruere ipse operibus & per revelationes ostendit: inde eidem mortales id vocabulum adplicamus, quo, quæ recte a nobis adversus alios aguntur, exprimimus.* Adstruitur eo loco hæc thesis, quod libertas Dei nullis legibus proprie dictis circumscribitur. Objici heic poterat, Deum utique esse iustum. Jam autem iustitiam tam personæ, quam actionis in-

vol-

voluere respectum ad legem; ad quod reponitur; justitiam Dei, & justitiam humanam disparis esse indolis. Nam justitia humana respicit obligationem, quæ legem & superiorem ponit: jus autem, si perfectum sit, notat facultatem alterum cogendi ad præstandum vi propria, aut actione in foro intentata: aut ubi imperfectum sit, saltem probabilem rationem super alterius inhumanitate conquerendi. Atqui quæ Deus agit, haudquidquam ex obligatione aliqua, aut dictante lege agit, quia Deo superior non datur; & nemo jus adversus Deum valiturum jactare potest. Quis enim vel vi adversus Deum contendet, vel in quo foro actionem adversus eundem instituat, vel qua fronte creatura super inhumanitate creatoris expostulabit? Quia autem Deus constantissime sua promissa servat, & supremi legum latoris & assertoris, atque judicis munere incorrupte fungitur; idque quia hic agendi modus cum perfectissima ipsius natura congruit, quicum & voluntas ejusdem perpetuo conspirat: inde istud attributum divinum solet exprimi vocabulo justitiæ, quia & justitiæ humanæ non postrema pars est promissa servare, & jus ἀποστολοληπτος dicere. Sic & p. 166. §. 6. & p. 177. §. 12. nihil aliud inculcamus, quam justitiam Dei, & justitiam hominum non eodem modulo esse metiendam. Nam justitia commutativa & distributiva magnam humanæ justitiæ partem absolvit. Atqui justitia distributiva versatur circa contractum societatis; commutativa circa pacta reciproca de rebus & actionibus in commercium venientibus. Vid. Lib. I. c. VII. §. 9. 10. Quis vero mortalium cum Deo contractum inivit societatis circa habendum pro rata parte lucrum & damnum? Quis Deo quid vendidit, quis ab eo quid emit? quis pecuniam ipsi credidit. Vid. Psalm. L. 10. 11. 12. Roman. XI. 35. Add. quoque p. 164. 165. Audiamus jam Asinium Tenēbrionem, qui heic utique dat sine mente sonum. Bellua visa loqui, rudere visus homo. Et sane monstri similis est in eodem animali astutia plusquam diabolica, & stupor sesquiasininus tam mire invicem mixtus & confusus. Statuit, inquit, Justitiam ad Deum propter similitudinem saltem, talem nempe agendi modum, qualis est in hominibus, ad Deum adplicari, Deoque ἀντίως, imo etiam minus Deo quam hominibus Pufend. Eris Scand. T.IX.

C

com-

*competere* p. 134. *Hinc & quando &c. inter homines sanctum* p. 166. §. 6. p. 177. §. 13. *Istis locis &c.* Heic patet, priora verba mutilate esse adducta, & prout heic ponuntur, nullum plane exprimere sensum. Per horribilem quoque calumniam affingitur mihi, quod ego scripserim, *Deo justitiam minus competere*: quod dictum nullibi in meo libro extat. Ego doceo, Deum eminentissime esse justum in servandis promissis, & exercendo velut munere judiciario: alios actus justitiæ humanæ in Deum propter perfectissimam ejus naturam non cadere. An qui ita de justitia Dei docet, *minus* seu improprie, Deum esse justum docet? Par mendacium est, quod addit, me statuere, *justitiam minus Deo quam hominibus competere*. Ubi ista verba in libro meo legisti, furcifer? An, si dicam, in Deum non cadit justitia, quæ contractus onerosos regit, quippe qui inventi sunt ad sublevandam indigentiam humanam; ideo dico, Deo minus competere justitiam, quam hominibus? Perinde ac si velles inferre: Dei scientia non paratur per discursus humano ratiocinio similes, a notioribus ad ignotiora procedendo; igitur Deo scientia minus quam hominibus competit. Ex quibus omnibus constat, nihil meam sententiam commune habere cum Socinianorum commentis; quos passim nebulo in famoso suo libello ad fucum simplicioribus faciendum, velut illi mecum conspirarent, adducit.

§. X. ARTICULUS V. inauditam novitatem continet. *Deum non principaliter propter essentiam, sed propter potestatem, voluntatem & beneficia coli.* Ubi miseret me Brochmanni, & aliorum, qui hæcenus orthodoxi crediti, nunc ab Asinio Tenebrione in Socinianorum classem compinguntur. Ita enim ille *Artic. de Prædestinat. cap. 3. quæst. 7. Omne jus, quod Deus sibi vindicat in creaturas veluti aequitate temperatum est, ita nititur aliquo Dei in creaturas beneficio.* Si enim quidquam in rerum natura esset, quod per actionem nullam divinam esset id, quod est, nullo certe jure illud Deo subditum dici posset, eo quod a Deo non dependeret, ac ea propter sui juris esset. Et sane ita clare a me ea res d. p. 91. 92. est exposita, ut non nisi asinus eam non capere, non nisi syncophantarum princeps calumniari queat. Exponitur ibi, utrum hæc sola ratio sufficiat imperio in alterum sibi

arro-

arrogando, quod quis natura præstantiore, quam alter, sit præditus? id quod a nobis negatur; quia præstantior gradus essentiae per se non involuit necessario dependentiam minus præstantis gradus. Additur, etsi impia sit Epicuræorum thesis, Deos felicitati suæ immerfos, humana non curare, probandam tamen eorum ratiocinationem, illa thesi posita religionem inanem fore. Nobilitatem enim essentiae admirationem excitare posse, cultum non posse. Cultus enim divini præcipuæ partes sunt ex religione naturali, Deum diligere, timere, in eum sperare, eidem parere. At quomodo diligere eum possumus, qui nihil boni nobis fecit, aut qui nullo modo ad nos quid spectat? quomodo timere, qui nihil acerbi nobis inferre vult, aut potest? quomodo in eum sperare, qui nulla nostri cura tangitur? quomodo ei obsequi, qui regimen in nos nullum exercet? Sed res tam clara est, ut putidum sit, verbum amplius addere. Et qui contrarium asserunt, horrendis sese absurditatibus involuunt. Statuendum quippe illis est; Deum propter solam essentiae suæ præstantiam debere coli etiam ab illis, qui ab eodem dependent. Atqui isti, quos citra ullum a Deo acceptum beneficium sola ejus essentiae nobilitas ad cultum obligare dicitur, erunt Deo vel æquales, vel inæquales. Si æquales, sequetur, plures esse Deos, æquales & invicem independentes: sequetur, cultum ab æquali in æqualem proficisci posse; cum tamen omnis cultus involvat agnitionem eminentiæ in eo, qui colitur. Sin inæquales, sequetur: Deum non esse conditorem omnium substantiarum; & existere aliquid in hoc universo non summum, quod tamen a Deo non dependeat; darique entia finita, quæ vel ab alio quopiam Deo præter eum, qui est creator cœli & terræ, sint condita, vel a seipsis originem suam duxerint. Quæ sunt theoremata digna Asinii Tenebrionis theologia, abs cujus singulari ingenio orbis eruditus curiosissimum jam opus expectare incipit, *Systema Theologia eorum hominum, quorum Deus non est creator*. Sed nec citra animadversionem transmittendum est, quod vocabulum *voluntatis* thesi suæ insercit. Neque enim in meo libro dicto loco aliquid de voluntate extat; & nullum sensum hæc propositio habet: *Deus est colendus propter voluntatem*. Solemnis tamen hæc ipsi ars est, verba mea suis

assumentis interpolare, ut demum thesis calumniæ capax procudi queat. Velim quoque considerari ea verba, quæ in Indice sequuntur: *Idque primum implicite his verbis p. 79. Adeoque legibus obeditur non principaliter propter rem ipsam, sed propter voluntatem præcipientis*. Jubeo, ut omnes aciem mentis suæ intendant, an possint capere hanc consequentiam: legibus non principaliter propter rem ipsam, sed propter voluntatem præcipientis obeditur; Ergo Deus est colendus non principaliter propter essentiam, sed propter beneficia.

§. XI. SEQUUNTUR errores circa hominem in statu integritatis, qui in Asinii Tenebrionis male temperato cerebro sunt enati. Quos ultro evanescere deprehendet; qui consideraverit, mihi propositum fuisse, disciplinam juris naturæ & gentium non ad mores unius aut alterius populi, aut ad genium certæ religionis accommodare; sed ita universaliter eam concipere, ut sit ad caput quarumcunque gentium, quamcunque religionem foveant, modo locum aliquem sanæ rationi apud se relinquant. Quæ causa etiam fuit, ut ejusmodi fundamenta & principia forent assumenda & constituenda, quæ apud omnes populos citra ullum religionis discrimen admitterentur, aut saltem ad quæ admittenda isti ope solius rationis naturalis adigi possent. Nisi enim in principio conveniamus, frustra omnis opera circa persuadendas alicui conclusiones impenditur. Atque hoc ipsum satis clare professus sum in præfatione ad Lectorem circa finem hisce verbis: *Cum hæc disciplina non solos Christianos, sed universum mortalium genus spectat; tale sane principium constituere convenientius fuerit, quod nemo, modo rationis sit compos, abnuere queat*. Inde quando nobis de statu hominum naturali sermo est, id est, quando consideramus, qualis futura esset hominum vita, si nihil auxilii, nihil communicationis ab aliis hominibus accederet; fingimus nobis animo conditionem alicujus hominis solitarii, undecunque in hanc terram ab omni humano cultu vacuum projecti; ut eo clarius constet, quantum auxilii & solatii homini ab alio homine accedat. Nequaquam autem loquimur de statu Adami, quem Scriptura sacra nobis felicissimum describit, de quo hisce quidem temporibus liquido constare non potest, nisi ex sacris literis: postquam quæ super eodem traditio



tio in genere humano primis seculis viguisse videtur , lapsu temporum apud plurimos plane exolevit , apud reliquos tenuia quædam , multisque fabulis admixtis confusa vestigia reliquit . Ex quibus patet , inter ea , quæ Sociniani de statu Adami tradunt , & inter ea , quæ nos super conditione cuiuspiam plane solitarii meditamur , tantum interesse , quantum verus homo a fictitio distat . His præmissis excutiamus articulum VI. *Docet illum statum in quo homo absque ulla cura vel ope ab alio homine accedente consideratur , longe miserrimum esse ; ne illo quidem excepto , in quo homo iusta statura ac robore præditus fuit , quam primum existere cœpisset , hoc est , statum Adami ante Evam creatam .* p. 140. §. 2. Conferamus cum hisce nostra verba ; & desinemus mirari , quare ex eodem flore apis mel , aranea venenum trahat . *Per statum hominis naturalem intelligimus heic illam conditionem , in qua homo per ipsam nativitatem constitutus* **CONCIPITUR** , *prout* **ABSTRACTA INTELLIGUNTUR** *inventæ atque instituta humana quibus aliam velut faciem vita mortalium induit .* Hunc statum ita conceptum & abstrahendo intellectum dicimus miserrimum fuisse futurum . *Si igitur* **CONCIPIAMUS** , ( sunt verba nostra dicto loco ) *hominem in hunc mundum projectum ;* si , inquam , fingamus nobis aliquem hominem undecunque demum in hunc mundum delapsum , & non præditum pluribus dotibus , quam prout nunc homines nascuntur ; non autem Adamum a Deo in Paradiso collocatum , ubi vestibis non erat opus , & ubi delicatissimos cibos arbores ultro velut porrigebant : Si inquam fictum istum nostrum hominem concipiamus citra illam curam opemque ab alio homine accedentem , & prout plurimæ partes naturæ rerum nondum per industriam humanam ad usum hominis erant excultæ ac dispositæ ; tunc de ejusdem statu pronunciamus , eum fore miserrimum . Idque non solum , si ponamus istum hominem esse infantem , cui sine dubio pereundum fuerit ; sed etiam si ponamus eum vel maxime jam iusta præditum statura ac robore , quam primum , ita nempe in mundum projectus existere cœpisset . Id si Asinius Tenebrio capere non potest , age , exuamus eum omnibus vestibis , adimamus ei omnia instrumenta , cibi potusque nihil relinquamus , & in desertam aliquam , ac ab omni humano cultu vacuum insulam deportemus ; ibique

que solum destituamus . Ni intra annum falsus fuerit , a se miseram ibi vitam trahi , tunc ego bonum & doctum virum eum fatebor . Et tamen Asinius multarum in ea solitudine rerum notitiam habebit , quæ isti , quem fingimus , homini deest . Vid. quæ de Petro Scarano tradit Ynea Garcilassus de Vega Comment. Regii L. I. c. 8. Ex hisce omnibus manifestum est , quomodo scēdissimus sycophanta verba mea in talem sensum detorsit , de quo mihi nunquam in mentem venerat . Cum enim hæc sit mea thesis : si fingatur homo solitarius in mundum incultum projectus , etiamsi ponatur jam iusta statura & robore esse , cum tali modo existere cœpisset , ejus status erit miserrimus ; ex hac talem ille concinnat propositionem : status illius hominis , qui iusta statura erat præditus , quam primum existere cœpisset , erat longe miserrimus . Quæ profecto major est transmutatio , quam cum ex asino fit Doctor .

§. XII. QUANTUM articulo VII. sit ponendum premium , patebit , si sententiam meam declaravero . Postquam igitur d. p. 140. ostenderam , statum hominis aliquis solitarii in mundo inculto destituti fore miserrimum , inde ulterius infero ; si aliquis sacrarum literarum cognitione carens , & solo naturali lumine subnixus consideraverit mortalium primævam indigentiam & imbecillitatem , quam debiles sint , quam indigi omnium rerum , ubi nascuntur ; cum is utique rationis ductu colligere possit , aliquando genus humanum initium cepisse : non aliter sibi persuadere potest , quam peculiarem curam Numinis circa primam hominum stirpem intervenisse , quousque ipsi usu & meditatione , ac conjunctis inter se operis necessitatibus suis prospicere didicissent . Atque hoc ipsum etiam auctoritate sacrarum literarum confirmatur . Postquam enim Adamus in eam conditionem fuerat redactus , in qua jam genus humanum est constitutum , ( nam hanc conditionem semper præsupponimus , quando ex solo rationis lumine differimus , cui status hominis in Paradiso est incognitus , ) sane legitur , Deum ipsi consecisse vestimenta ex pellibus . Ac dum ad agrum colendum eundem ablegat , quis dubitaverit , quin Deus docuerit ipsum naturam seminum , tempora sementis , quo modo , quibusque instrumentis terra semini accipiendi præparanda foret . Quarum rerum scientiam utique ex Paradiso efferre non

poterat; ubi hortus ultro ad victum necessaria proferebat. Et si propria demum meditatione & experientia hoc debuisset addiscere, dudum fame fuerat pereundum. Igitur in malam crucem abeat jam cum suo articulo Afinius Tenebrio: *Docet, primum ac recentem orbis incolam, hoc est, Adamum, servari non potuisse, nisi Deus ipsum necessaria etiam vite media adhibere peculiariter docuisset.* p. 140. §. 2. *Inde licet de originibus &c.* Nam de conditione Adami in paradiso plane mihi sermo non fuit.

§. XIII. In articulo VIII. repræsentatur horridum quodpiam somnium cerebri gravi intemperie laborantis, quo ex varie velut discerptis ac mixtis speciebus male cohærens imago deformatur. *Quod homo prout ex creatione physice perfectus extra societatem existit, sine lege, ordine & decore reluctantem habuerit voluntatem, brutisque ipsis inferior ac pravior fuerit, quæ causa, quomobrem lex illi superaddita sit.* Hoc sibi vult pag. 3. *Nobis illud §. 3. Exinde p. 4. §. 4. p. 136. §. 5. & 6. p. 138. §. 8.* Vah mi Afini Tenebrio, quam multi ruditatem & malitiam tuam ignorare poterant, ni male consultata mens, pœnæque suæ imminens, ad Indicem Novitatum compilandum te stimulasset. Nunc quia hac potissimum via inclarescere voluisti, age efficiam, ut voti tui compos fias. Cum igitur Afinio librum meum legenti somnus obrepisset; visus est sibi videre speciem hominis primitus quantum ad substantiam suam creati perfecti, qui tamen foret exlex plane, & horridus, pravisque cupidinibus scatens, sic ut brutis miserior & pravior existeret; donec ea conditio hominis Deo displiceret, qui ad ipsam dispellendam legem ei superaddidit. Credo ad eundem modum, uti qui parietes ex rudi lapide extruxit, postea eorum asperitate offensus tectorio eosdem inducit. Mox cum somnus placide discussus esset, putavit se id in libro meo legisse. Atqui antequam tua somnia chartæ illineres, debueras denuo librum meum legere, ut constaret, num Morpheus forte tibi illuserit. Sane enim a me nuspiam scriptum est, *hominem physice perfectum sine lege, ordine & decore unquam existisse.* Contrarium a me docetur p. 6. & p. 312. 314. Nuspiam a me scriptum fuit, *hominem ab ipsa creatione reluctantem rationi habuisse voluntatem, brutisque ipsis miseriorem ac praviorem fuisse.* Contrarium potius

insinuo p. 136. ubi rationes, quare exlex vita hominem non decuerit, petuntur ex conditione hominis *primigenia, aut post superveniente*. Quare primigeniæ hominis conditioni non convenerit vita exlex, exponitur dicto loco §. 5. Quare eadem non convenerit conditioni hominis post supervenienti, docetur dicto loco §. 6. 7. 8. Quando autem necessitatem legis ex conditione subjecti demonstratum eo, non statim suppono, subjectum illud aliquando a lege immune fuisse. Sicuti verbi gratia, si dicam, congruum valde esse & utile homini pedes habere, ne tanquam vermis humi repere cogatur; non statim præsuppono, hominem aliquandiu pedibus caruisse, & deprehensa reptionis deformitate pedes ipsi superadditos. Quo sensu autem entia moralia rebus & motibus physicis superaddita dicantur, sequenti §. tradetur. Inde & adparet, quam ridiculum sit, quod addit: *Talia vero Socinianorum & Hobbesii principia secutus docet*: cum satis constet de illis, quæ Tenebrio heic comminiscitur, nemini mortalium unquam in mentem venisse.

§. XIV. ARTICULUS IX. ita se habet: *Attributa vel Entia moralia originitus homini physice perfecto, superaddita saltem, non concreata esse*, p. 3. §. 3. & 4. Video isti homini parum cum entibus moralibus convenire; tentabo, an possim illum cum hisce in gratiam reducere. Quod si aliquis dicat, me operam ludere, dum asinum docere aggredior; excusabit me ille nescio quis ex Sanctis minorum gentium, qui anseribus concionatus memoratur. Trado igitur dicta p. 4. §. 4. modum originitus producendi entia moralia vocari *impositionem*; sicuti modus originarius producendi substantias physicas ex usu Theologorum vocatur creatio; licet Latini auctores vocabulum creationis productioni personarum moralium frequentissime adhibeant. Causa autem, quare impositionis vocabulum nobis heic potissimum arripserit, est, quia non solum illud a Philosophis in simili materia adhiberi cœpit; sed & quia magis appositum nondum dispicere potuimus. Cum enim entia moralia sint modi, seu si ita mavis, accidentia, quæ utique subjectum aliquod prærequirunt; & vero accidentia physica ipsam substantiam rerum physicam perficiant, alterent, aut alio modo disponant & afficiant, eamque velut ingrediantur; entia moralia contra rebus quoad substantiam physicam perfectis velut superaddita intelligun-

guntur. Exemplum proponemus, ex quo illa impositio in omni classe entium moralium, ( quarum quatuor potissimum nos facimus, statum, moralem personam, quantitatem & qualitatem, ) liquido perspicui queat. Est igitur aliquis studiosus, Nicolaus Beckmannus, non quidem auream, sed plumbeam in literis, mediocritatem sectatus, qui ad munus aliquod involandum non parum sibi doctoris titulum profuturum sperat. Is abit in Galliam, pecuniam Professoribus offert. In cathedram ducitur; per sesqui horam silet & erubescit, quod disputationis inauguralis loco habetur. Post mitra imponitur, Doctor creatur, renunciatur, proclamatur, ab omnibus pro tali haberi & honorari jubetur. Heic, ne comœdiam actam credamus, repente ex omni entium moralium genere aliquid ipsi fuit superimpositum. In novum *statum* seu ordinem jam protruditur, in quo antea non erat. Nova quoque *persona* ipsi imponitur. Qui enim antea simpliciter Dominus Nicolaus erat, jam Dominus Doctor Nicolaus, & quidem Utriusque Juris factus est. Ex classe *quantitatum* moralium nova quoque existimatio ei superadditur. Qui enim antea frater ignorantiae habebatur, jam ubi nomen Doctoris insonnit, a rusticis creditur herniam posse curare, aut putridos dentes extrahere, aut lumbricos intestinis elicere. Ex classe *qualitatum* moralium superadditur eidem novus titulus, ut Doctor audiat, qui Afrius est. Confertur potestas publice docendi, si vocationem nanciscatur; salarium eo nomine accipiendi, si detur; de Jure respondendi, si quis consulere ipsum velit. Denique obligatio ei injungitur, ut quando de Jure consulitur, in principia juris ne impingat. Tanta moles entium moralium imponitur & superadditur homini, qui jam physice erat perfectus, id est, qui corpus & animam, oculos & aures, manus & pedes, ventriculum & jecur habebat. *Superadditur*, dico, quia substantiam & qualitates ejus physicas per se entia moralia non afficiunt, aut alterant. Postquam enim Doctor renunciatus fuit, non fit longior aut crassior, nec accipit novum membrum corporis; si antea habuit caput acuminatum, illud non fit deinceps rotundum; non fit quoque vel pilo melior & doctior, non saltat elegantius, quam antea, non digladiatur dexterius, non levius ineptit. Ex accidenti tamen fieri potest, ut entia moralia occasionem præbeant

beant qualitates physicas augendi aut depravandi. Nam quibusdam titulus incitamento est ad eruditionem parandam, ut fiant, quod audiunt; aliorum ruditas augetur, dum tituli inani sonitu adquiescunt. Nonnullis gravitas & modestia, aliis fastus & stolidi jactantia accedit. Mover aures meus auditor, credo quod jam aliquid de entibus moralibus quasi per nebulam sibi cernere videatur. Et quia jam aliquod vestigium docilitatis in eo animadverto, scrupulum, qui ipsum urgere videtur, eidem adimam; num igitur nulla dantur entia moralia concreata? Quippini, mi Asini? Nam ego nusquam *superadditum* esse, & *concreatum* esse opposui; nec nostræ sententiæ repugnabit, qui aliqua entia moralia homini concreata, id est, in ipsa creatione superaddita dixerit. Imo & ego de statu naturali p. 6. & de obligationibus congenitis p. 312. trado. Quod autem substantia modo vel accidente, subjectum adjuncto, ut ut tempore simul, natura tamen prius sit, etiam tirones philosophiæ norunt. Sic ut nihil repugnet, statum aliquem aut obligationem homini esse concreatam aut congenitam; & tamen eidem physice perfecto velut superadditam concipi. Audiamus nunc, num & antehac entia moralia probe intellexerit Asinius Tenebrio. *Intelligit autem, inquit, per entia moralia illos etiam modos, ( ut loqui amat, ) quibus homo creatura esse debet, auctorem sui agnoscens, colensque, quibusque diversa plane a brutis ratione vita eidem exigenda est ( hoc est, legem naturæ. ) Sic enim entia moralia ipse explicat pag. 5. & 6. §. 6. & 7. Tu qui in meum librum nefariam tibi censuram arrogabas, tantopere cecutiebas, ut non animadverteres, me nuspiam legem in genere, aut legem naturæ inter entia moralia referre. Equidem normam actionum moralium eam nuncupo Lib. I. c. 6. Ast ut norma cum normato ejusdem naturæ sit, necessarium non est. Ad ferream normam etiam lapides & ligna exiguntur. De cetero quid planius est meis verbis p. 6. §. 7. dum doceo, statum naturalem absolute consideratum vocari illam conditionem, in qua homo constitutus esse intelligitur, dum eximium præ aliis animantibus eum esse voluit Creator, id est, dum legi eum naturali obnoxium fecit, a qua bruta sunt immunia. Ex quo statu fluit, ( id est, quia Deus hominem constituit in tali statu, in quo lex naturalis ipsi foret observanda, & ejusmodi dotibus ornavit, quibus bruta ca-*  
rent,

rent, consequitur, ) quod homo debeat esse creatura auctorem sui agnoscens, colensque, & cui diversa plane ratione a brutis vita sit exigenda. Pergit Asinius : *Illud vero, nempe quod entia moralia originis superaddita saltem, non autem concreata homini sint, quando docet, cum Papistis maxime facit. Ex his enim Bellarminus cap. 6. de gratia primi hominis eundem in modum scribit. Creatio refertur ad naturam, indumentum virtutis ad superaddita dona. Et mox: Innocentia autem ad illius vestem non naturalem. Atqui virtutes illæ, & innocentia primi hominis, de quibus inter nostrates, & Pontificios disceptatur, non sunt entia moralia. Imo ne ipsa quidem virtus moralis ens morale est, sed pertinet ad classem qualitatum physicarum; quod Asinio paradoxum videri non miror. Quod autem Bellarminus dona primi hominis vocat superaddita, & ego entia moralia homini superaddita doceo, exinde non magis ego cum isto conspiro, quam hæc consequentia est bona: calceus induitur, thorax induitur, ergo calceus est thorax. Subjungitur demum huic articulo emblemata aliquod, non quidem Tribonianum, sed furciferianum. Ut multa paucis exprimantur, inquit, si quis penitus inspexerit Pufendorffii opus, non diffitebitur, Pufendorffium non modo entia moralia, verum etiam totum ferme librum primum, tam obscure tractare, ut ipse vix intelligat, quid infirmis suis novitatibus sibi velit, nisi ut eas imprudenti juventuti sub terminis metaphysicis & fictitiis venales indigne exponat. Ast mihi nimium stolidæ furcifer, si refera paucis multa volabas exprimere, id debueras dicere; te & alios, qui Pufendorffii librum allatrarunt, fuisse asinos ad lyram. Et quis cogebat te tuosque complices omnino librum meum legere, aut ad eum carpendum provolare, si præ obscuritate ipsum non intelligebatis? Quod alias obscuritatem attinet, cum illa duplex sit, dictionis, & rerum; de illa sane nemo queri potest, qui Latine novit. Hanc autem amoliri non semper est penes scriptores. Et quid asinis satis clarum esse possit? Quod si quæ in genere super entibus moralibus traduntur, obscuritate quadam videantur laborare, culpa fere penes philosophos est, qui vix levi brachio ista attigerunt. Ac decedet obscuritas, si ista usu trita fieri incipiant. Imo desinent & tibi entia moralia obscura videri, modo per*

per aliquod tempus inter auditores meos assidere velis ; qui te eo libentius in cœtu suo ferent, quod dum longas tuas aures subinde motitas , eadem opera muscas a vicinis sis depulsurus , aut lenem ventulum factururus .

§. XV. ARTICULUS X. est. *Primos homines, prout in origine ac statu suo primævo se habuerunt, non tantum mortalium nomine appellat, sed tantam etiam illis imbecillitatem tribuit, ut sine peculiari cura servari non potuissent. Mortalitatis etiam causa genus humanum diversitate sexus, propagandique sese facultate creatum esse, p. 140. §. 2. Inde licet, pag. 750. Hujus articuli priori membro supra §. 11. satisfactum fuit ; ubi satis patet, nos primos homines in statu integritatis haudquidquam mortalium vocabulo insignire ; cum de istis eo loco sermo non sit . In posteriore membro calumniator pro more suo verba mea sœde corrumpit, quæ p. 750, §. 2. ita se habent: *Postquam igitur morti obnoxium fuerat redditum genus humanum, ne aut nova semper stirps creando esset sufficiens, aut tam nobilis speciei duratio unius ævi spacio extingueretur, sapientissimus Creator prospexerat discrimine sexus, & naturali facultate indita commixtis corporibus sese propagandi*. Heic animadvertere debebat lycophanta, non frustra verbum plusquam perfecti temporis, fuerat, prospexerat, esse positum, ad significandum, genus humanum non ab initio fuisse morti obnoxium, sed postea ad eam conditionem devolutum & in hunc eventum, quem Deus utique prævidebat, velut provisionaliter diversitatem sexus, & facultatem se propagandi humano generi inditam eo quoque fine, ut idem morti obnoxium factum citra novam creationem durare posset . Idem alio modo efferri potest . Ab initio par hominum diverso sexu creatum fuit, ut stirpem ex se propagare possent morti non obnoxiam . Postquam homines morti fuerant obnoxii reddituri, illa propagandi se facultas huic quoque fini inserviebat, ut non subinde novi homines essent a Deo immediate creandi, neve intra spatium unius ætatis genus humanum foret extinguendum . Eique rei sapientissimus Creator quasi eventualiter prospexerat per diversitatem sexus, quæ tam in statu integritatis, quam corruptionis usum haberet . Non credo esse, qui luculentiorẽ heic declarationem desideret .*

§. XVI. ARTICULUS XI. ex prioribus jugulatur. Re-



*centem & solitarium orbis incolam attonitum, hoc est, consternatum fuisse, p. 140. §. 2. Quid tum? Ille recens orbis incola non est Adamus, sed quem fingimus, animoque concipimus in mundum undecunque projectum. Quem si ponamus ita repente solum in orbe inculto destitutum, quis negaverit subita rerum imagine confusum, & attonitum fuisse circumspecturum vastam mundi machinam, corporum cœlestium splendorem; nec non anxie meditaturum, quid sibi inter omnia ignota & nova agendum foret. Hoc si capere non potest Asinius Tenebrio, per me in Morboniam abeat.*

§. XVII. ARTICULUS XII. non firmiore, quam prior, stat talo. *Illud autem, quod primus homo extra societatem sine lege, ordine ac decore miserrimus fuerit, probari illo posse dicto putat: Non est bonum, hominem esse solum. Præfat. fol. 3. fac. 1. Ceterum &c. Inprimis vero p. 138. §. 8. Igitur quod homo non miserrimam, &c. Tædet me toties repetere, dicto loco, non esse mihi sermonem de Adamo in statu primævæ felicitatis. Sed quando p. 36. §. 6. seqq. adduco rationes, quare homini non conveniat, ut vivat exlex, earum aliquas desumo ex conditione naturæ humanæ post superveniente, quæ verba extant, dicta pag. 136. lin. 9. 10. Inter has rationes p. 138. §. 8. adducitur quoque hominis imbecillitas, quæ miserrimum ab omni aliorum auxilio & societate destitutum effectura erat. Quem locum hisce verbis claudio: Igitur quod homo, ex conditione scilicet post superveniente, non miserrimam vitam inter omnia animantia degit, a conjunctione sui similium habet. Non est bonum, hominem esse solum, non ad matrimonium duntaxat, sed ad societatem cum aliis hominibus in universum pertinet. Quis non videt, istam sententiam a nativæ suæ sede & intentione ad aliam materiam transferri & applicari; qualis applicatio ne a sacris quidem literis aliena est. Sicuti fas mihi est plerasque sententias Psalmi LII. & CXX. ad conditionem meam, qua heic inter malevolorum quorundam calumnias per annum & amplius conflictatus sum, applicare. Quæ cum ita sint, plane præter rem Asinius Tenebrio tanto cum supercilio heic febriculosam suam philosophiam expromit. Quasi vero, inquit, externa illa socialitatis felicitate deficiente naturalis etiam & essentialis hominis deficeret feli-*

*felicitas*. Quasi vero non ipse Deus declarasset, felicitatem primi hominis etiam in paradiso non futuram fuisse omnibus numeris perfectam citra societatem: *Quasi vero, inquam, pergit coaxare rana, bonis fortuna deficientibus bona statim animi & corporis deficerent*. Quasi vero, inquam, aliquis magnopere gavisorus sit animi & corporis sui bonis, ab omni humana ope in solitudine destitutus. *Alicujus, non autem omnis humane felicitatis causa est socialitas; augmentum, non fundamentum*. Argute dictum, & supra Asinii captum. Quasi vero ego alicubi asseruerim, omnis felicitatis humane causam esse socialitatem. Nam non statim cujus absentia me miserum reddit, ejus presentia omnem mihi felicitatem conciliat. Si tua uxor in capillum tibi involat, miser es: si eadem blando tibi arridet vultu, non ideo albæ gallinæ filius es.

§. XVIII. SEQUITUR LOCUS *de homine in statu corruptionis*. Nam tanta fuit nebulonis istius circa calamitiam mihi instruendam sollicitudo, ut etiam quos ipse somniaverat errores, velut sub locos Theologicos redigeret, ad fucum simplicioribus faciendum, quasi ego integrum systema novæ cujusdam & inauditæ Theologiæ procudere instituissem. Heic igitur primo occurrit articulus XIII. *Entia moralia eorumque effectus originis etiam considerata amitti, vel deleri pro lubitu posse, sine ulla mutatione aut corruptione ejus rei, cujus antea fuerunt* pag. 4. §. 4. *Ac per eadem*, p. 19. §. 23. Credit heic Asinius, hac assertionem negari labem illam, quæ ex amissa imagine Dei per lapsum in genere humano consecuta est. Sed uno verbo illi somnium hoc excutiam. Quæ per lapsum Adami amissa sunt, haudquidquam erant entia moralia, sed longe sublimioris indolis. Qui amisso rationis usu in delirium incidit, qui amisso usu excæcatus est; in eo haudquidquam ens aliquod morale perisse aut mutatum esse dicimus. Quod si tamen stupor Asinii capere non possit, vera entia moralia, eorumque effectus deleri posse, nulla mutatione physica in re, cui erant superaddita, proveniente, seu ut ipsa rerum substantia physica haudquidquam immutetur; age afferamus exemplum, quod Asinius Tenebrio manibus palpare queat. Fingamus Asinium Tenebrionem, si diis pla-

placet, professorio munere fungi. Fingamus eundem ob quædam scelera, puta, ob famosos libellos editos, munere dimoveri & infamem fieri. Quot heic entia moralia perierunt? Periit ipsi status, in quo hætenus egit, periit persona, quam gessit, periit obligatio ad legendum & disputandum; periit denique titulus, ut deinceps audire cogatur Dominus Exprofessor. Et tamen ejusdem jam intra nebulonum classem conjecti substantia physica nullam sentit mutationem. Statura ejus non contrahitur; crura priorem retinent longitudinem; stolidum manet caput antiquo loco positum, manent aures, (nam præsupponimus illas per carnificem non abscindi,) manet facies lurida & cicatricosa; manent qualitates physicæ, manet eruditio, si quam habuit, manet vox graculis æmula, manet libido saltandi; manet ars digladiandi, circumforaneis lanistis non concedens. I nunc Asini Tenebrio, & de entium moralium obscuritate querelam move.

§. XIX. In articulo XIV. extremum proponitur, quousque aut brutalis stupor, aut dirissima calumniandi libido progredi possit. Sic enim facerrimus index: *Negat quadam per se citra omnem impositionem honesta vel turpia esse, omnesque actiones hominis adeoque ipsum furtum, homicidium, incestum, adulterium, blasphemiam &c. natura sua actiones esse indifferentes.* pag. 25. 26. NB 27. *Hoc enim modo, conf. pag. 47. §. 14. pag. 167.* §. 4. Ad hanc calumniam dispellendam, etsi nihil amplius necessarium sit, quam ut quis loca adducta in meo libro accurate legat; explicare tamen paulo clarius ibi tradita placet, ut eo manifestius constet, Asinium Tenebrionem omnibus sycophantis & nebulonibus palmam præripere. Quando igitur a Scholasticis inquirebatur, quodnam discriminis esset inter ea, quæ naturali, & quæ positiva lege vetantur aut præcipiuntur; id demum ab uno vel altero pronunciatum in tralatitium dogma invaluit, ut quæ lege naturæ præcipiuntur, aut vetantur, in se & sua natura honesta aut turpia esse; quæ vero positiva, per voluntatem & imperium legislatoris talia fieri dicerentur. Et admisisse ut hæc fortasse commodam explicationem, modo certum constituissem γνέσκειν, ex quo liquido constaret, an & cur aliquid in se esset honestum vel turpe. Id dum non fecerunt, neces-

neceſſum fuit provenire definitionem legis naturalis, quæ non poſſet non in circulum revolvi, & petere id, quodd eſt in principio. Si enim quæras ex illis hominibus, de quibuſuam lege naturæ diſponatur? reſpondent; de iis, quæ per ſe ſua natura honeſta & turpia ſunt. Sin ulterius quæras, quænam autem ſunt illa; per ſe & ſua natura honeſta vel turpia? nihil aliud habent, quod reſpondeant, quam ea, de quibus lege naturæ diſponitur. Ex quo & aliud horribile abſurdum conſequitur; ſi nempe datur aliquid honeſtum & turpe in ſe antecedenter ad Deum, vel admittendum eſſe fatum Stoicorum, cui & ipſe Deus ſit alligatus; vel dari aliquod principium Deo prius aut cœternum, formas rerum quali determinans & ſpecificans, cui ne Deus quidem contravenire debeat, aut poſſit. Quo cum nihil ſtolidius fingi poſſe videatur, ſæpe miratus ſum, non Grotium ſolum, ſed & pleroſque ex noſtratibus Theologis iſtam aſſertionem citra ullam dubitationem paſſim aſſumere. Contra id mihi fixum ſedet, diſcrimen honeſti, & turpis utique a Deo, ejuſque definitione eſſe petendum, nec idem ab alio extra ipſum principio dependens fingendum eſſe. Quo poſito conſequitur, neceſſitatem illam, quæ actionibus ad honeſtatem & turpitudinem tribuitur, non eſſe abſolutam, ſed hypotheticam, ſupponentem nimirum, creationem animantis rationalis, quam nemo eſt, quin liberrimæ Dei voluntati adſcribat. Id eſt; quod quædam dicantur neceſſario honeſta aut turpia homini, hoc ſemper eſt intelligendum cum relatione ad naturam hominis tanquam animalis rationalis & ſocialis; & conſequenter cum relatione ad voluntatem Dei, qui uti omnia, ita & hominem, & quidem tale animal liberrimæ ſua voluntate creavit. Cui conjunctum eſt, ut ſi conſideremus actiones hominum, prout ſunt nudi motus facultatis alicujus phyſicæ, aut ejusdem negatio, antecedenter ad legem, ſeu abſtrahendo ab omni lege circa eum motum aliquid diſponente, eſſe indifferentes, id eſt, neque bonas neque malas: bonitatem autem & malitiam, quæ in illis deprehenditur, oriri a convenientia & diſconvenientia cum lege. Et annon ipſa Scriptura ſacra peccatum ſeu actionem malam definit per *ἀνομία*, ſeu diſcrepantiam a lege? Ac nullus ruſticus eſt tam ſtupidus, quin intelligat & adplicare norit tritum illud: Ubi non eſt lex,

ibi

ibi non est transgressio . Enimvero heic probe observandum, quid sit notus motus physicus; & quod haudquam omnia vocabula actionem exprimentia notent nudum motum physicum, sed quod pleraque expriment actiones cum relatione ad legem . Toto quippe cœlo differentes propositiones sunt; actio, prout consideratur tanquam nudus motus physicus, citra & ante omnem respectum ad quancunque legem, est indifferens, id est, nec bona nec mala: & omnia vocabula actionem exprimentia notant nudum motum physicum, seu actionem in se indifferentem nec bonam, nec malam . Prior propositio mea est, quam ut arbitror invictis rationibus itabilivi . Altera nulli mortalium præter Asinium Tenebriorem, in mentem unquam venit . Quis enim est tam stupidus, qui nesciat, quasdam voces aut locutiones notare nudum & indifferentem motum physicum, a respectu ad legem abstractum; alias & quidem longe pluri-  
mas notare actionem cum respectu ad legem, seu actionem bonam aut malam, vero gratia, loqui, scribere, manum extendere, lapidem emittere, arma vibrare, concumbere, rem de loco in locum transferre, ignem excitare, & plurima alia, exprimunt meros & simplices motus physicos, qui citra respectum ad legem, & ullam designationem objecti, aut alterius circumstantiæ considerati, utique indifferentes, id est, neque boni neque mali sunt . Sed mentiri, blasphemare, calumniari, Indices Novitatum scribere, lapide vulnerare, armis lādere innocentem, homicidium committere, scortari, mœchari, incestum committere, furari, incendiarium agere, & infinita alia, non notant nudum motum physicum & indifferentem, sed motum aliquem lege vetitum . Pari se modo res habet circa motus animi . Amare, honorare, sperare, probare, gaudere, dolere, & similia, citra respectum ad legem utique indifferentia sunt . Prout autem illi motus versantur circa objectum legibus probatum aut improbatum, boni vel mali fiunt, verbi gratia, Amare Deum, honorare Deum, sperare in Deo, probare bonum, gaudere bonis eventibus bonorum, dolere ob peccata, sunt bonæ actiones . Contra amare vitia, honorare idola, sperare in diabolo, probare peccata, gaudere calamitatibus innocentum, sunt actiones malæ . Impossibile autem foret, ut verbi gratia,  
*Pufend. Eris Scand. T. IX.* D                      tia,

ria, *amare* pro diversitate objecti fieret bonum aut malum, ni illud extra objecti aut legis considerationem esset indifferens. Et quid clarius verbis meis p. 26. *Hæc ipsa vocabula, nempe malevolentia, impudentia, invidia, adulterium, furtum, homicidium, non notant nudos & simplices motus actusve physicos, sed tales, qui legibus repugnant.* Sic & nuda intermissio motus alicujus physici citra respectum ad legem utique est indifferens; verbi gratia, non dare, non facere, quiescere, non moveri. Ast eadem cum respectu ad legem, objectum, tempus, locum, modum determinante, mala sit; verbi gratia, non dare mercedem operario, non reddere mutuum, commodatum, depositum, opus sibi injunctum non facere, quiescere quando laborandum erat, non obedire seu non facere, quod a legitimo imperante jubebaris. Judicet nunc cordatus lector, num mica prohibitatis aut eruditionis insit illis, qui affingere mihi non erubuerunt, me omnia peccata statuere indifferentia, seu (ut horridum vocabulum sædæ calumniz conveniens fingerent) me indifferentissimum velle introducere. Ceterum quasi impudentiæ nondum satis foret litatum, allegatur quoque contra me disputatio quædam Ultrajectina. *Qui Hobbesii error Ultrajecti nuper publica disputatione refutatus est.* Extat ea disputatio subjuncta libello *Gisperti Cocqui*, cui titulus: *Hobbes ἀνερχόμενος, sive Vindicia pro Lege, Imperio, & Religione*; editus Ultrajecti anno 1668. Ne tædeat, quæso, disputationem illam penitus inspicere. Illa igitur p. 12. proponit sententiam *Becani*, statuentis actus quosdam, ut Deum colere, proximum diligere, parentes honorare, esse ex se & natura sua bonos, eosque præcipi lege naturali, & contra, furtum, falsum juramentum, homicidium &c. esse actus ex se & natura sua malos, ac proinde lege naturali prohiberi. Hanc sententiam dicit magis esse tolerandam, quam quæ *HOBBSIO* traduntur de Cive cap. 14. artic. 9. Sed mox sequenti p. 14. addit: *Nec tamen Becani sententia simpliciter probanda est. Quare ut intelligatur, quid in hac materia statuendum sit, notare juvat, dupliciter tantum se habere posse actiones humanas, 1. in statu possibilitatis, prout sunt in potentia obiectiva, 2. in statu actualis existentia, prout scilicet subjective, vel potius effective sunt a Petro vel Paulo.* At

*At vero neutro modo sunt actiones per se & natura sua bonæ vel malæ: non primo quidem; quia ne sic quidem entia realia sunt propriæ, sed tantum ex hypothefi, & καταρχήτως; eodem igitur modo neque bonæ aut malæ propriæ dici possunt, non posteriori modo, quia ut sic plusquam manifestum est, habere eas suam bonitatem & malitiam moralem a lege; quoniam moralis earum bonitas in conformitate cum ea, malitia autem in difformitate ab ea formaliter consistit. Non ergo hi actus, Deum colere, diligere proximum, parentes honorare, sunt boni ex se & sua natura; sed fluit eorum bonitas, ut jam dixi, ex imperio & voluntate Dei, qui de regulandis his actionibus leges naturales menti creature rationalis impressit. Atque hactenus in thesi verum est, quod HOBES dicit c. 12. art. 1. omnem actionem natura sua esse adiaphoram; & quod actio aliqua iusta vel iniusta sit, a jure imperantis provenire. Sed in hypothefi hoc falsum est, nimirum ante leges civiles justum & injustum non existisse. Quem errorem Hobbesii & ego confutavi lib. 8. c. 1. §. 5. Locum quantumvis prolixiorem huc transtuli, non quod mea interesse putem, quid Cocquius Ultrajecti disputet; sed ut hoc specimen manifestam exhiberem, æque in aliorum scriptis, quam in meo libro Asinium Tenebrionem cæcutisse. Etsi in eo Cocquius illè graviter erret, quod actus illos, Deum colere, parentes honorare, putet in se indifferentes; cum illi non sint nudi motus physici, sed involvant respectum ac legem. Nam colere, honorare, sunt tantum motus physici in se indifferentes; sed dum obiectum additur, statim simul insinuaturs actus lege præceptus. Cum igitur disputatio illa Ultrajectina contra Asinium Tenebrionem faciat, neque utut contra me esset, magnopere ego Cocquii auctoritate terterer: non aliam causam dispicere possum, quare ea heic jam sic adducta, quam quod Cocquii vocabulum vetus ipsi gentilitium nomen Coquinorum e Gallia oriundorum perspicua allusione repræsentat. Nam in Asiniorum familiam adoptione transit. Sub finem magnus ille vir sollicitudinem suam pro salute reipublicæ testatur. *Quantum mali, inquit, ex tam impiis novitatibus in rempublicam redundare, incauteque juventutis animos opinione citius corrumpere possis, norunt Theologi.* Atqui mi nimum*

caute Asine, illas impias novitates non liber mens continet; sed tu istas somniaſti, & incautæ juventutis animos inani terrore agitas, ut etiam in clariffima luce ſpectra ſeſe cernere arbitrentur. Miror quoque, quare turciſer nunc aliquid intereſſe putet, quid ex dogmate aliquo mali in rempublicam redundare queat, cui in articulo 1. ethnica opinio videbatur, civitatem perſonare debere doctrinis cum fine & uſu civitatum congruentibus. Nec illud ſatis digero, quare Theologi potius, quam Politici melius intelligant, quæ dogmata reipublicæ noxia ſint. Niſi hoc fortaſſe dicere vis, Illuſtriſſimos viros, qui nomine S. Regiæ Majeſtatis librum meum adprobarunt, minus perſpicaces fuiſſe, quam illos eruditiffimos viros, qui Londini in Scania Indicem Novitatum in eundem moliti ſunt, quorum triumphos inferius tangemus.

§. XX. ARTICULUS XV. *Peccatum alienum exſequi, peccatum non eſſe*, p. 1028. 1029. non ſine maxima fraude ita indefinite proponitur, ac ſi in omni caſu cuiſlibet citra ullam conſiderationem liceret alteri miniſterium ſuum ad peccatum exſequendum exhibere. Cum tamen ſermo mihi ſit de peculiaribus tantum caſibus, ac quibus rigidiffimæ limitationes adduntur; puta, ut imperans ſe ſolum auctorem facinoris haberi velit, & alteri meram executionem injungat; ut quis miniſterium, quantum poteſt, deprecetur; nſique eo præſtracte denegato graviſſimum ſibi periculum vitæ immineat. Neque vero habet Aſinius, quod contra ſolidiſſimas rationes opponat; niſi quod, ne nihil plane dixiſſe videatur, gannit. *Quemadmodum in plurimis aliis, ita & in hoc caſu, amplam ſovent conſcientiam, & novitatis cum piorum offenſione eſt ſtudioſiſſimus.* Sceleſtum caput! De conſcientia etiam aliquid mutire audeſ, qui edito famoſo libello, ſi quid ſcientiæ, aut conſcientiæ forte habueras, prodegiſti? Aut quinquam ſunt illi pii, qui offenduntur? Credo vetus aliquis calumniarum inſtitor, qui compendioſam valde viam invenit, quævis dogmata proſcribendi; ſe ſe hac propoſitione offendi, hoc ſibi novum videri. Ne tamen forte quis objiciat, fruſtra eſſe quæſtiones nulli futuras uſui anxie diſceptare; paucis monere lubet, quæſtionem iſthanc tanti eſſe momenti, ut ni ea rite decidatur, convuſio diſciplinæ militaris, & obſequi



quii civilis inde secutura sit . Id quod uno & altero exemplo declarabimus . Sine dubio peccatum est , bello alium sine iusta causa invadere . Peccatum etiam est , cum commodiore via controversia componi posset , ad arma provolare , tanto malorum proventu exuberare solita . Denique & hoc peccatum est , fiducia suorum armorum alteri denegare , quæ ipsi debentur . Heic ergo , si nullo casu quis alienum peccatum citra suum peccatum exsequi posset , necessario sequeretur , vel salva conscientia nullum civem posse arma ferre , vel civi obtentu suæ conscientia licere operam militarem reipublicæ denegare . Scilicet est non levis disquisitio , num aliqua causa sit iusta , & ad movendum bellum , quod infinitam post se malorum segetem trahit , sufficiens . Longe altioris indaginis est illa disceptatio , an heic & nunc reipublicæ nostræ necessaria & utilissima sit via , controversiam cum altero armis exsequi ; quæ etiam summos viros , & usu rerum præstantissimos anxios solet habere . Circa tantæ molis disceptationes non poterit non maxima vulgi pars , tanta rerum momenta ponderare nescia , gravissima dubitatione involui ; & quia id , de quo dubitas , non est faciendum , obtentu conscientia omnem operam bello denegabit ; ceteri ex timiditate aut tædio belli scrupulos fingent . Quam facile demum foret civibus ad militiam vocatis obtendere ; se vereri , ne fiducia exercitus sui rex abutatur ad injuriam alteri inferendam ; se nolle oblato suo ministerio efficere , ut Rex animum peccandi concipiat : si nemo civis militare velit , necessario Regi quiescendum , & ab injuriis inferendis abstinendum esse . Add. L. VIII. c. l. §. 8. Hoc novum Evangelium si quis rusticis nostratibus annunciare velit , maximam sine dubio gratiam ab iisdem inibit , qui ad cælum usque tam pium , tam angustæ conscientia doctorem efferent , cujus concionibus nixi molestiam militiæ plane subterfugere possint . Alio quoque exemplo ostendemus , quid absurdi secuturum sit , nostra thesi non admissa . Sine dubio peccatum est , innocentem in carcerem compingere . Nocens autem quis sit , ante causæ cognitionem sciri nequit . Ex doctrina igitur Asinii Tenebrionis , meæ utique thesi opposita , necessum erit , ut quando Magistratus aliquem comprehendere vult , prius cum lictoribus in concilium

eat, & ipsorum sententiam exquirat, num sufficiens ipsis causa videatur adesse ad istum hominem comprehendendum. Ast ut de hoc solidi quid pronunciare queant, necessum fuerit, ut non solum prima juris fundamenta delibaverint, sed & ut ipsam Justiniani medullam exorbuerint. Et quid aliquid relictum erit, quam ut deinceps ex ipso Jctorum ordine lictores petantur? Cui fini aptissimus sane erit, non tam prout quisque subtili legum peritia, aut insigni docendi, disputandique facultate præ ceteris fuerit instructus, quam prout proceritate corporis, virium vastitate, ac cum primis artis gladiatorix dexteritate reliquos sui ordinis eminuerit, ut si forte resistere velit reus, manum cum ipso conferere, aut si idem fugæ se dederit, cursu superare eundem queat. Quibus omnibus si accedat horrida inftar liitoris inde resultabit. Sic ut Alinii Tenebrionis dogma non leve argumentum ad illustrandam Jurisconsulti in republ. necessitatem asserere possit. Addamus tertium exemplum, si forte priora nimis obscura fuerint visa, peccatum utique maximum est, de innocente supplicium sumere. Quod si igitur nemo posset ullo casu meram alieni peccati executionem facere, non sufficeret carnifici, ne conscientiam nimis laxam videatur fovere, & piorum animos offendat, sententiam a iudicibus pronunciatam audire. Sed quia iudicis iniquam sententiam ex ignorantia juris, aut per affectus pronunciare possunt, necessum plane fuerit, viros illos, quibus tam facile est hominem jugulare, quam vulpes pirum comest, in omnibus tribunalibus, ubi de rebus capitalibus agitur, assessores facere, saltem supernumerarios aut honorarios, quo ipsi certo intelligant, ab initio ad finem causam rite fuisse disceptatam. Ne autem velut *καρὰ πρόσωπον* isti hominum mactatores assideant, & inani tantum tituli sonitu superbi circumvolitent, non paulo plenius, quam lictores, Justiniani medullas liguriisse debent. Sic tandem eo res redibit, ut aut carnifices debeant fieri Jureconsulti, aut Jureconsulti carnificum munus exercere. Quod dogma si in rempublicam introducendum sit, gratulor sane mihi de iudicio illius viri, qui sub finem libelli famosi allegatur, cujus auctoritate freto, inter philosophos latitare licebit.

§. XXI. JAM sese novus iterum locus aperit *errorum circa liberum arbitrium*; ubi articulus Indicis XVI. habet: *In ipsa facultate apprehensiva & in judicio naturalem inesse rectitudinem, vel intellectum hominis naturaliter esse rectum*, p. 37. §. 3. p. 72. Si Asinius Tenebrio integra excerptisset verba mea, tuto poteram omni responsione heic supersedere. Primo enim protestatus sum, non esse mihi sermonem de viribus intellectus circa res a peculiari divina revelatione dependentes, sed de aliis viribus, quæ sufficere possunt actionibus legi naturali attemperandis, quantum fori humani usus, & ratio vitæ humanæ jam fert. Heic assero intellectum hominis naturaliter, ( id est, non accedente peculiari depravatione & corruptione ex mala educatione & assuetudine ) esse rectum, id est, recte adprehendere posse, & judicare, quid honestum, quid turpe sit; neque tam facultatem adprehensivam, quam judicium ita depravatum esse, ut invincibilis error aut ignorantia circa dictas actiones semper versetur. Addo tamen, *debita adhibita attentione, & præmissa debita inquisitione*; ne quis etiam circa hæc plenam perfectionem intellectui a me tribui arbitretur. In aliqua autem facultate inesse rectitudinem, cui tamen cultura etiam laboriosa sit adhibenda, nihil repugnat. Ceterum intellectui humano tantum rectitudinis, quantum ad hunc finem sufficit, etiam post lapsum essetribuendum, manifestissime inde colligitur; quod alias necessum foret; ethnicos contra legem naturalem ex ignorantia invincibili peccasse, & sic non potuisse illis adversus eandem admitta imputari. Quod non solum sacris literis repugnat, ubi sæpe numero ethnici propter ejusmodi peccata graviter reprehenduntur; sed etiam res ipsa loquitur, ethnicos utique circa agenda & omittenda in plurimis rectissimas fovisse sententias, quas magno numero passim invenire est. Atqui si naturalis in ista facultate esset detorsio & obliquitas, non magis recte homines talia adprehendere & judicare possent, quam per vitrum fractum aut distortum rectæ rerum imagines videntur, aut per idem coloratum veri rerum colores adparent. Allegatur dictum ex *Articulis Schmalcaldicis loco de peccato*. Verum istud explicandum est ex *Apologia Augustana Confessionis* p. 217. ( qui locus etiam in margine citatur. ) Ubi ita

traditur: *Neque vero adimimus humanæ voluntati libertatem. Habet humana voluntas libertatem in operibus & rebus deligendis, quas ratio per se comprehendit. Potest aliquo modo efficere justitiam civilem &c.* Cum enim reliqua sit in natura hominis ratio & iudicium de rebus sensui subjectis, reliquus est etiam delectus earum rerum, & libertas & facultas efficiendæ justitiæ civilis. Redditur dein ratio additæ restrictionis aliquo modo. Quamquam tanta est vis concupiscentiæ, ut malis affectibus sæpius obtemperant homines, quam RECTO iudicio, & diabolus, qui est efficax in impiis, non desinit incitare hanc imbecillem naturam ad varia delicta. Apparet igitur, ideo justitiam civilem imperfectionis argui, quod pravi affectus rectæ rationi tam sæpe & valide oblucentur, ut videant quidem homines meliora, probentque, deteriora sequantur. Fatendum tamen est, Asinio Tenebrioni constare rationem, quare recto iudicio intellectus tantopere infensum sese ferat. Nam si vel mica recti iudicii honestatisque, qualis etiam in maxime barbaros homines cadit, in eo fuisset, nunquam ad ejusmodi Indicem Novitatum compilandum animum adplicuisset.

§. XXII. SEQUENS articulus XVII. paris cum priori notæ est. *Omnibus affectibus vel passionibus imperare hominem posse, ne in actionem erumpat, verbis Cartesii, quæ sua facit, statuit, pag. 55. Illud instituto nostro &c.* Quousque ego homini imperium in affectus suos asseruerim, satis explico, L. VIII. c. 3. §. 14. nimirum ne erumpant in actionem aliquam, in quam pœna fori humani solet constitui. Et sane si omnium gentium leges evoluamus, nullibi reperietur illa delicta plane excusari, quæ ex violentia affectuum fuere patrata. Quod certissimo argumento est, omnes legislatores præsupponere, penes hominem esse, affectus sistere. Quamquam facile agnoscamus, hunc laborem, hoc opus esse, & uti Cartesius quoque innuit, multum industræ adhibendum ad homines instituendos & dirigendos, quibus imperium in affectus suos esse debet. Non omnibus enim hanc Corinthum adiri, indicio est, quod mihi sane noti sint homines, non juvenia fervidi, sed profecta ætate, magnoque sapientiæ & pieratis fastu turgentibus, ac in tali officio constituti, quo aliis exemplo moderationis præire debe-

deberent ; qui tam violentis agitantur affectibus , ut æratem , & dignitatem , & munus suum sæpe turpissime prostituant ; & non magis se amabiles , quam ursos , aliaſve mordaces belluas reddant .

§. XXIII. Nunc in ipsa fundamenta nostri libri invadit Afinius Tenebrion , Reatini , Arcadicique agri grandissima bestia , & *Errores circa legem naturæ* proponit ; immemor tam fidelis moniti , quod certis hominibus in præfatione libri mei occinebam ; ne sutor ultra crepidam . Est igitur articulus XVIII. *Genuinum , sufficiens , & adequatum principium cognoscendi legem naturæ esse socialitatem* , p. 181. §. 14. p. 183. §. 15. NB. p. 188. . 9. Atqui hoc ipsum ita me demonstrasse arbitror , ut nemini cordato amplius super ea re dubium superesse queat . Quod si autem aliquis ita ingenio polleat , ut ex sola ratione investigare possit aliud principium , quod omnes gentes , quamcunque habeant religionem , admittant , aut ad idem admittendum evidentiâ rationum adigi possint ; illum & vehementer mirabor , & multum ab eo me didicisse profirebor . Neque vero erat , quare Phrysiathus tanto cum fastu suum illud *quasi* vero , crepare inciperet . *Quasi* vero , inquit , *Paulus Rom. 1. ex professo juris naturalis principia enumerans ignoravisset ac omisisset principium maxime genuinum , manifestum , sufficiens & adequatum* . Quid audio ? An igitur ex professo Paulus juris naturalis principia enumerat ; & ex doctore gentium jam repente factus est doctor juris gentium ? O hebetes tot eruditos viros , qui principia ejus disciplinæ tam clare ibidem exposita perspicere nondum potuerunt ! Sed nimirum reservabatur inventi hujus gloria Afinio Tenebrioni , abs cujus illustri ingenio eruditi propediem expectant novum juris naturalis Systema , ex solo *capite 1. ad Romanos* deductum ; quod sine dubio reliquorum omnium , qui hætenus circa eam disciplinam aliquid elaborarunt , luminibus obstruet . Equidem dicto loco Apostolus ostendit , gentiles invisibilem Dei majestatem ex contemplatione creatorum ita clare potuisse colligere , ut facile iisdem fuerit animadvertere , indignum esse , Deum sub imagine hominis , aut brutorum animantium coli , aut hæc in Dei velut locum substitui . Inde Deum quoque ex justo judicio eos tradidisse cupidinibus suis , ut infandis se flagitiis macularent .

larent. Hoc tu igitur principium solum assume, & ex eo omnia officia hominum inter se perspicue deduc, & ita quidem, ut non solum ipsa præcepta, sed & præceptorum rationes liquido adpareant, & pro Tenebrione deinceps Lucifer mihi eris.

§. XXIV. ARTICULUS XIX. est: *Legem naturæ insitum quendam vel connatum habitum esse negat. Ut adparet, magnopere nobis sudandum erit, ut ostendamus, infantes non nasci Jureconsultos. Videamus primum verba nostra: Quam ad rem ( ut nempe ex lumine rationis leges naturales investigentur, ) vix necessarium arbitramur præfractè contendere, animis hominum ab ipsa nativitate congenita & velut impressa esse juris naturalis saltem generalia præcepta, ad modum distinctarum & actualium propositionum, quæ statim atque usus sermonis accessit, citra ulteriorem informationem aut meditationem abs homine possint exprimi. Heic adparet, thesin meam esse hanc: posse ex lumine rationis demonstrari legem naturalem, et si actuales & distinctæ propositiones circa illam animis infantum ab ipsa nativitate non inhæreant. Sic ut per me nemini sit interdictum, quantum velit habitum connatorum credere. Quia tamen Asinius Tenebrio pro imperio jubet me statuere, quod ipsi aliquam calumniandi ansam præbere queat, age ostendamus pecori isti, non ita facile esse in infantibus aliquos habitus intellectuales asserere. Per habitum igitur legis naturæ nihil aliud intelligi potest, quam systēma aliquod propositionum, officia hominis exprimentium, animo infantis actu inhærens. Illum quippe habitu verbi gratia Theologiæ præditum dicimus, in cujus animo hærent propositiones dogmata theologiæ exprimentes. Ast quomodo quis demonstraverit, in animo infantis hære propositiones actuales? Omnis enim propositio constat nomine & verbo, affirmando vel negando inter se combinatis. Atqui infantes nascentes neque nomina neque verba sciunt, multo minus hæc per affirmationem aut negationem conjungere norunt. Quod si autem quis peculiare genus imaginum in animis infantum fingere velit, quæ agenda aut fugienda repræsentent, non tamen ad modum propositionum nomine & verbo constantium; is optime sese captui lectorum accommodabit, si id genus imaginum schemate aliquo repræ-*

repræsentaverit . Et sane manifestum est , quibus incrementis scientia infantum procedat . Primo enim omnium ex frequenti auditione addiscunt nomina rerum , quæ quotidie in oculos ipsorum incurrunt . Inde progressus fit ad verba , communissimas actiones exprimentia , sed quæ primo in infinitivo modo , tanquam simplicissimo , efferuntur . Dein paulatim nomina , & verba infinitivi modi combinantur . Inflexiones verbi & nominis , aliæque particulae pedetentim addiscuntur . Ac talibus incrementis etiam imagines rerum , quæ per propositiones exprimuntur , procedere videntur . Cum porro præcepta legis naturalis sint , verbi gratia homicidium non est patrandum , non mœchandum , non furandum , non mentiendum ; scire velim , quomodo in animo infantis existere possint imagines homicidii , furti , falsi testimonii : quæ etiam a majusculis demum pueris intelliguntur . Neque vero satis hisce difficultatibus sese extricare videntur , qui habitus istos connatos *imperfectos* jactant . Arbitror enim tanta eosdem imperfectione laborare ; qua laborant propositiones , in quibus neque nomen , neque verbum , neque copula adparet . Quin ergo satius fuerit , minus monstrose philosophari , & juxta receptam plurimorum veterum & recentiorum sententiam statuere : intellectum hominis nascentis esse tabulae nudaæ similem , cui quidvis possit inscribi ; seu habere naturam s. cultatem recipiendi & retinendi imagines , quæ per sensus sese insinuant ; ex quarum tamen collatione inter se idem aptus sit novas quasdam imagines formare , & quam ope sensuum recepit cognitionem in se ipso multiplicare . Ceterum habituum connatorum assertores patet velut arcem causæ suæ collocasse in phrasi illa *Roman. II. 15. inscriptum esse cordibus* . Sed cum illa phrasis sine dubio sit metaphorica , ex aliis S. Scripturæ locis ceterarumque linguarum usu videndum , quid eadem significet . Vid. 2. *Corinth. III. 3. Proverb. III. 3. VII. 3. Jerem. XXXI. 33. conf. XXIV. 7. Hebr. VIII. 10. X. 16. Jerem. XVII. 1. Æschylus Prometheus vinclo: Σοὶ πολὺδαὸν πλάνην φράσω ἢν ἱγγράψῃ σὺ μνήμοσι δὲ λόγοις φραζῶν . Tibi edisseram multiplicem errorem , tu inscribas tabulis firmis mentis* . Quibus omnibus probe perpenſis hic demum dicti loci ad *Rom. II.* sensus emergit : Legis naturalis cognitionem ex dictamine rationis hau-

haustam ita firmiter animis gentilium impressam, eodemque tam evidenter de ejus certitudine fuisse convictos, ut nunquam eandem excutere potuerint, si vel maxime ad sopiendas conscientiarum vellicationes illas plane animo ejicere conati essent. Igitur a me quidem dictum illud nequaquam *in falsam sententiam detorquetur*, uti Asinius Tenebrio mentitur; sed genuino suo sensui vindicatur. Neque obstat, quod fortasse Sociniani istis habitibus connatis parum detulerint. Nam & hoc ipsum faciunt multi ex Theologis & Philosophis orthodoxæ religioni addictis. Et quid aliud insinuat Scriptura sacra, quando infantes negat discernere posse inter bonum & malum, *Esaiæ VII. 15. 16.* inter dextrum & sinistrum *Jonæ V. 4. ult.*

§. XXV. Et si articulo XX. in superioribus satisfactum fuit; tamen, quia ita vult Asinius Tenebrio propter eandem crambem bis adpositam, bis quoque vapulabit. *Essentialem Dei justitiam prototypum juris naturalis esse negat*, p. 163. & 164. Si aures paulisper vis immobiles tenere, experimentum capiam, an forte aliquid humani sensus sub ista pelle delitescat. Quod alicujus prototypi *εἰκόνος* vocari potest, non solum omnes ejus partes, & veram similitudinem repræsentare; sed & revera ad eundem expressum esse debet, non autem per accidens tantum cum eo convenire; utut de cetero prototypus nobilior aut amplior sit, quam *εἰκὼν*. Hoc posito, dico, *difficile probatu fore*, legem naturalem esse *εἰκόνος* justitiæ Dei essentialis, id est, præcepta legis naturalis, quæis officia hominum inter se præscribuntur, expressa esse ex justitia Dei essentiali, omnesque ejus partes accurate repræsentare. Justitiam vocamus illud Dei attributum, juxta quod promissa sua firmiter servat, ac munere supremi judicis, legumque suarum velut assertoris incorrupte fungitur. Ea justitia essentialis dicitur, quia ut ita agat, non lege aliqua a superiore injuncta compellitur, neque disciplina ad id assuesfactus est; sed quia perfectio essentia divina non alium hæc agendi modum fert; quippe cum diverso modo velle & posse agere cum imperfectione sit conjunctum. Atqui præterquam homini officium suum a superiore sit injunctum, sane justitia humana longe pluribus partibus absolvitur, quam sola promissorum expletionem, & incorrupta juris-



dictione . Accedit , quod iustitia divina exerceatur a supremo domino in creaturas ; iustitia autem humana ab iis , qui natura inter se sunt æquales . Unde patet , quanta absurditate se se involuant , qui nostram sententiam oppugnatum eunt ; quippe quibus hoc asserendum est : Iustitiam Dei , & iustitiam hominibus inter se exercendam sibi quoad omnes partes invicem respondere , Deoque eadem , quæ hominibus officia incumbere . Addidi præterea dicto loco , non videri mihi firmam hanc consequentiam : homo est creatus ad imaginem Dei ; ergo iustitia hominibus invicem exercenda est expressa ad iustitiam Dei essentialem tanquam ad prototypum . Rationem subnecto ; quia imago Dei per lapsum amissa est , lex autem naturalis & ejus sensus atque cognitio in hominibus adhuc superest . Hisce argumentis , an ego *iustitiam Dei cum ejus imagine , vel eo , quod ei conforme est , confuderim* , uti Asinius Tenebrio nugatur , eruditi judicent . Gannit insuper , *hunc errorem etiam legi in Elementis juris universi , esseque gravissimum* , quippe quo fides Christiana de imagine Dei ex ipso fundamento evertitur . Id priusquam Asinius ex doctrina mea exsculperit , probandum ipsi est , ad hoc , ut homo ad imaginem Dei conditus dici queat , requiri , ut homini Deus per omnia sit similis , ut omnia attributa Dei in homine sint expressa , ut denique Deus iisdem quibus homo officiis obstrictus teneatur . Carpit porro , quod scripseram ; *imaginem Dei amissam , cum tamen sensus legis naturalis remanserit* . Gratis a me hoc addi dicit : *Quandoquidem ita simpliciter amissam esse imaginem Dei non credimus , ut nulle ejus supersint reliquie , quæ nunc lex naturæ sunt* . Neque præterea valet consequentia hæc , *Imago essentialis Dei iustitia est amissa* . Ergo *lex naturæ non potest esse imago Dei iustitia* . Nam simpliciter illam quoad spiritualia amissam esse credimus , nihilominus tamen spiritualia illa , quibus ad imaginem Dei renovamur , *ἐκτύπωµα* essentialis Dei sapientiæ , iustitiæ & sanctitatis sunt . Hæc non pauca sunt , quæ fustem merentur . Inepte dicitur ; lex naturæ est pars imaginis divini . Si enim utique imago Dei ad legem etiam naturæ pertinet , ita dicendum fuerat , liquida & perfecta cognitio legis naturalis erat pars imaginis Dei . Sicuti corpus Juris non est pars Juris consulti , sed Doctore ad

cathedram ambulante famulus illud pone sequens sub brachio gestat. Deinde liquido probandum est, imagine Dei amissa revera aliquas ejus particulas remansisse, & quænam sint illæ particule, & quod inter illas particulas fuerit sensus & cognitio legis naturalis. Denique demonstret Asinius Tenebrio, quod quævis imago, quævis similitudo, etiam inadæquata & imperfecta, sit *εικονισµός*, quale supra descripsimus, ex amulsum prototypo respondens; seu quod homines per regenerationem & renovationem fiant *εικονισµοί* seu imagines adæquatæ & expressæ ex sapientia, iustitia & sanctitate Dei, id est, homines fide Christi imputata justificatos, & paululum quid in divinis vel ut per speculum in ænigmate cernentes, & mores suos utcumque emendare conantes, esse *εικονισµοί* seu imagines sapientiam, iustitiam & sanctitatem Dei undiquaque repræsentantes. Quæ dogmata an Ecclesiæ orthodoxæ probentur, mihi nondum constat.

§. XXVI. ARTICULUS XXI. est: *Negat legem naturæ esse æternam*, p. 25. §. 6. *Et sane*, p. 28. *Ex quibus apparet*. Circa æternitatem legis naturalis res paucis expediri potest. Qui primi legem naturæ æternam dixere, eidem opposuerunt legum civilium recentem originem ac mutabilitatem, quasi diceret, lex naturalis non a Solone, aut Minoe cœpit, sed ipsis civitatibus antiquior & generi humano cœva est. Nec ea mutationibus est obnoxia, sicut leges civiles, quæ ob mutatam reipublicæ utilitatem, aut ex libidine imperantium rogantur, aut abrogantur: sed una & eadem perpetuo durat, quousque genus humanum supererit. Hanc æternitatem & nos legi naturali tribuimus, p. 28. Ut autem lex naturæ Deo cœterna statuatur, id mihi necessarium non videtur. Cum enim illa Deum non spectet, uti supra ostendimus, sed humano generi divinitus data sit: quid opus est, fingere istam legem actu exstitisse, antequam homines, quibus ferretur, existerent. Quod si autem quis cavillari velit, ejus legis ideam ab æterno in præscientia Dei fuisse, ille hoc modo legi naturæ nihil peculiare præ ceteris rebus tribuit.

§. XVII. ARTICULUS XXII. verbo potest expediri. *Entia moralia, (adeoque etiam leges natura) mutabilia esse docet*, p. 19. §. 23. Nuspiam enim leges a me inter entia

entia moralia referri supra dictum est. Et immutabilitas legis naturalis a me satis adstructa est p. 163. §. 5. Sed huic articulo additum epiphonema miram quandam affectuum præ se fert mixturam, dum primo quidem turgidum livore pectus pro more in calumniam desputat; mox sublimiori & velut prophetico spiritu inflatur, & incipit loqui ore non suo. *Hæc nova*, inquit, *plus veneni, quam commodi juvenibus afferunt*. Atqui in meo libro venenum non invenit Asinius, sed pestilentissimo suo pectore depromptum intulit, dum circa res, quas stupor ipsius non capiebat, stolidi sibi somnia finxit. Miror quoque, cur tantam ubique ostenderit juventutis sollicitudinem. Mitte quæso hanc de pectore curam. Nam pro speciminibus, quæ tu edidisti, ne bubulcus quidem filium suum tuæ disciplinæ est commissurus. Ceterum repente in aliam se formam mutat turgida mens, & os sacrum in oracula solvere incipit. Ubi tamen illud minus ex decoro, quod lectorem citra præparationem, & ita incompositum ad ista mysteria admisit. Exclamandum prius fuerat: procul o procul este profani; aut quod magis pietatem tuam decebat, sursum corda! aut Dominus vobiscum. *Beati*, inquit *sanctissimus vir, qui simplici via jus naturæ & decalogum tractant, & entia moralia, eorumque mutabilitatem Pufendorfio soli volvenda ac revolvenda relinquunt!* Eat nunc aliquis & hisce temporibus vates, somnia atque miracula deesse queratur. Hæc enim, si fallor, oraculum adparet Davidico compar, aut sublimius. Beatus qui non ambulavit in consilio impiorum, obsoletum prope jam est. Hæc novus sese pandit *μενεργμός*, & angustior quædam via ad perfectionem Evangelicam emergendi. Et quia protrita jamdudum sunt illa consilia Evangelica, ex quibus veterum ambitiosa pietas nova sibi vitæ genera comminiscébatur; igitur jam ut adparet, auspice Asinio Tenebrioue (quod felix faustumque sit,) super isthoc oraculo fundendus erit novus ordo Equitum sanctæ simplicitatis, qui præter tria usitata vota Ruditaris, Stultitiæ & Invidiæ, hoc quarto loco velut summam perfectionem daturum emittant, inexpiabili bello entia moralia, (sicuti equites Melitenses infideles) persequi, & non nisi simplici via jus naturæ & decalogum tractare. Et sane videtur hic ordo brevi tem-

tempore futurus numerosissimus, quo minus laboris est, non in naturæ solum jure, sed in omni scientiarum genere rudem, & plus quam simplicem deprehendi. Quia tamen hocce tempore plerorumque Principum & privatorum liberalitas in pias causas refrixit, valde metuentum, ne novus iste ordo patrimonio fruatur satis tenui, sic ut plerique sine stipendio & tanquam honorarii militare cogantur. Saltem plerique donationes suas videntur suspensuri, quousque constiterit, quem eventum prima Asinii Tenebrionis in entia moralia expeditio sortita fuerit, in qua nisi aliquot millia eorundem trucidaverit, aut ad remum dederit, parum gloriæ novo suo ordini erit circumpositurus. Interea dum Equitum S. simplicitatis insignia, ( & quæ alia, quam crux nigra in campo griseo, quam notam asinis natura impressit ) habitus & leges publicantur, & quoad de successu novæ hujus militiæ liquidius constiterit, licebit mihi in Asinium Tenebrionem *μυνηστὴρ* illum retorquere, haud paulo verius: *Beati qui non scribunt Indices Novitatum, quia non confundetur facies eorum in conspectu omnis populi.*

§. XXVIII. In articulo XXIII. singulari studio eruditionem suam ostentare conatur Asinius Tenebrio. *Principium effendi, inquit, vel fundamentum legis natura non naturam hominis ponit, quatenus integra & incorrupta ad imaginem justitiæ & sanctitatis Dei essentialis velut prototypi creata erat, ( quod recte qui sentiunt cum Mavii Prodromo secundum Scripturas & Formulam Concordiæ de tertio usu legis, thesi 1. Etenim ne primi &c. faciunt ) sed legis natura fundamentum, quatenus a Creatore socialis facta est, adeoque ipsam socialitatem cum duce suo HOBBSIO Heretico ponit esse, idque statim in præfat. sol. ult. Ceterum id quoque monere visum, ibidem: quid porro planius est, quam hoc &c. Adde p. 167. Sic quod &c. Heic moneo, me nuspiam in ista materia terminum illum, principium effendi adhibuisse, & cum non nisi ineptissime idem heic adplicari queat, me nolle quid cum ipso habere negotii. Deinde ego nuspiam socialitatem opposui naturæ humanæ, prout a Deo integra fuit creata. Quis enim dubitaverit, quin homines in statu quoque integritatis persistentes futuri fuerint sociabiles. Ergo opponit*

Asi-

Asinius, quæ non erant opponenda, seu ut magis ad captum tanti Philosophi loquar, committit elenchum oppositorum. Quare autem a statu integritatis abstraxerim, & consideraverim hominem prout nunc est, non attendendo an primitus aliter se habuerit; rationem attuli satis gravem, quia propositum mihi fuit hanc disciplinam ita generaliter tractare, ut & eadem ad captum ethnicorum foret. Qui utique statum integritatis ignorant, quem ex solis divinis scripturis licet addiscere. Socialitatem autem omnes agnoscunt, aut ad eandem agnoscendam evidentibus argumentis adigi possunt. Displicet hæc ratio Asinio Tenebrioni, ut tantopere sibi adamatam quasi vero eruſtandi iterum habeat occasionem. Ratio ipſus est, inquit, quod nostrum Orthodoxorum illud fundamentum illi tantum ex Christianis admittunt, qui peccatum Originis agnoscunt, non autem universum mortalium genus. Quasi vero ab ignorantia illius fundamenti ad negationem ejus descendendum sit; præsertim cum ista sit ignorantia non facti, sed juris universalissimi, quod scire omnes & debent, & possunt, secundum illud Apostoli Roman. X. v. 16. 18. Multi quæ Evangelio inobedientes sunt. Ego vero dico annon audiverunt, &c. Hæc primo querere lubet, quo in concilio, aut quo Symbolo definitum sit, quod omnes orthodoxi circa deducendam disciplinam juris naturalis, etiam ethnicis accommodatam, debeant fundamenti loco subſternere; hominis naturam ab initio integram fuisse creatam? Sed nec video, quare HOBBESTUS, si nullo alio errore teneatur, hoc tantum nomine Hæreticus audi debet, quod fundamentum legis naturalis socialitatem constituit. Nisi si ea Asinio Tenebrioni in socialitatem odiorum causa est, quod ipse revera animal insociabile videatur, omnibus vitiis scatens, quæ societatem perturbare apta sunt, vera Aleæ soboles, paci infesta, turbis movendis unice occupata. Deinde non impugno ego illud Asinio dictum nostrum orthodoxorum fundamentum; sed tantum dico illud non idoneum esse attemperaturo se enim ethnicis; quia nisi principia utrinque confessa constituantur, frustra omnis disceptatio sumitur. Atqui ethnici debebant scire hoc Principium & poterant; adeoque versantur in ignorantia non facti, sed juris universalissimi. Quid audio? Hactenus credideram

Pufend. Eris Scand. T. IX. E Aſ.

Asinium Tenebrionem nil nisi Theologastrum esse, & quidem uti isthoc specimine ostendit, ab ortu in istius ordinis opprobrium & dedecus elisum. Nunc etiam video eum in titulo de ignorantia juris & facti non mediocriter versatum; nisi forte cum aliquo JCto societatem coiverit, quo suggerente hæc mytheria hausit. Enimvero mi Asini, sit ignorantia juris, sit facti, quod ethnici statum primævæ integritatis ignorant; non eo minus tamen nihil aget, qui antequam ipsi divinas literas agnoverint, ex hoc fundamento officia hominis apud eosdem deducere aggrediatur. Addit denique: *Quanquam fundamentum illud nostrum materialiter etiam gentes ex parte admittunt, quando principia connata, quæ nihil aliud sunt, quam reliquæ imaginis divinæ, nobiscum agnoscunt.* Ast ego te cum materiali & partiali tua admissione in malam rem abire jubeo; ita non materialiter & ex parte, sed formaliter & in totum rudissimum juxta & ad vitiligandum projectissimum monstrum es.

§. XXIX. In articulo XXIV. sollicitus esse videtur Asinius Tenebrio, ne forte aliquando præ meritis suis pœnæ loco duas domum ducere simul uxores cogatur. *Plures uxores quam unam, inquit, domum duxisse contra jus nature (vel decalogum) non esse implicite docet p. 776. §. 16. ubi dicit 2. Sam. XII. v. 8. Deum Davidi tanquam insigne beneficium imputasse, quod ei complures uxores dederit. Nam singulare Dei beneficium si fuit aliquando polygamia, nunquam contra jus naturæ, quod æternum & immutabile est, esse poterit, add. pag. 778. §. 17. p. 782. §. 19. Hæc repono, me a pag. 776. ad 782. §. 16. 17. 18. tantum referre, quæ ab aliis in utramque partem disceptantur. Sed p. 782. §. 19. quid mihi super polygamia videatur, explicare. Quod eo redit, etsi ex adductis contra polygamiam argumentis liquido & citra omne dubium colligi nondum a me potuerit, eandem directe legi naturali repugnare; sicuti cædes, adulterium, furum, calumnia, confectio Indicis novitatum, & alia eidem repugnant: id tamen etiam ex sola ratione perspicui, optimum & maxime decorum, simulque ad quietem domesticam accommodatissimum esse, unum una vivere contentum; adeoque hoc matrimonii genus sine dubio perfectissimum habendum. Quid*  
am-

amplius postulas ab eo , qui disciplinam juris naturæ non aliter tractat , quam quatenus ratio sola jam peringere potest? Intende ergo tu nervos tui ingenii , quod sentio , quam sit exiguum , agita aures tuas , & tenta , num tua ratione ulterius possis progredi . Attingo præterea sub finem dicti loci rationes politicas contra polygamiam tam pravas , ut licet illa omnibus divinis legibus absolute & semper fuisset permessa ; tamen legibus civilibus tanquam plerisque civitatibus exitiosa proscribi debeat . Ceterum illud circa hanc quæstionem de polygamia cordati facile vident , postquam animadversum est , multos ex sacerdotibus ad eandem tantopere commoveri , non paucos in privatis sermonibus paulo liberius heic philosophari cœpisse , ut istis hominibus ægre faciant . Nam quod scæminæ ad hanc quæstionem statim incallescant , id inde est , quod nunquam dirigere queant illud Hesiodæum : Dimidium plus toto . Ast profecto uti aliquos nonnullam divortiorum licentiam serio optare non abnuerim ; ita paucissimos ex Christianis dari crediderim , qui duas pluresve iustas habere simul uxores cupiant . Et valde simplex est , cui persuaderi potest , ullum esse principem Christianum , qui polygamiam in rempublicam introducere velit , aut serio velle possit . Sicuti nec capio , quod per licentiam potissimum polygamia , uti aliqui arbitrantur , atheismus aditum sibi sternere molitur . Nam ad mendicitatem ea quidem certissima via est ; & si ad excitandam pietatem aliquid calamitates domesticæ faciunt , longe maximum videtur pietas incrementa sumtura per introductam polygamiam , dum miseri mariti in remedium tantorum malorum beatam analysin ardentissimis precibus indefinenter sunt optaturi . Quod autem attinet Elementa Jurisprudentiæ universalis circa hanc quæstionem , eorum patrocinium commendabo celeberrimo Theologo *D. Johan. Adamo Osiandro* , qui in *Observat. ad Grot.* p. 748. eandem propugnat sententiam . In quem itidem Indicem Novitatum adornare licebit *Afinio Tenebrioni* , si nondum heic satis vapulat .

§. XXX. SEQUUNTUR jam errores circa *Decalogum* , ex quibus miror quare peculiarem voluerit locum formare *Afinius Tenebrio* , cum tamen ipsi jus naturæ cum decalogo idem videatur . Sub isto loco articulus XXV.

Indicis est. Deum præcepta, prout duabus tabulis insculpta, & per Moſen populo Iſraëlitico promulgata fuerunt, civiles (vel forenſes) leges ejuſdem populi fuiſſe, p. 1015. §. 4. Heic ſatis adparet, Aſinum Tenebrionem non legiſſe, aut percepiſſe ejus capitis §. 1. p. 1018. ubi *lex civilis dici traditur duplici modo, vel reſpectu auctoritatis, vel reſpectu originis. Priori ſenſu civiles leges vocari poſſunt omnes leges, juxta quas in foro civili jus dicitur, ex quacunque demum origine promanent.* In §. 4. autem dicti capitis proponitur & rejicitur ſententia HOBBSII, qui ideo præcepta decalogi civilia, non naturalia vocat, quod ante civitates nihil proprium, nihil alienum, nullum matrimonium, & quidlibet in quemlibet fuerit licitum. Hæc inquam HOBBSII ſententia a me refellitur. Addo autem alio ſenſu præcepta decalogi leges civiles poſſe vocari; nempe *reſpectu auctoritatis*, quam in Republica Iſraëlitica obtinuerunt, dum juxta iſtas in foro ejus populi dictum fuit, eademque ſanctionibus poenalis, in foro ejus populi valitoris, fuerunt munitæ. Quod nemo ignorat, qui pentateuchum inſpexit. Poterat autem facile animadvertere Aſinius Tenebrio, leges civiles & forenſes mihi non eſſe unam & idem: adeoque me non attendere heic diſiunctionem legis, Theologiſ nſitatam, qua illam intuitu materiæ dividunt in moralem, ceremonialem & forenſem. Deuiſſet igitur prius diſcere Aſinius quid a me lex civilis vocaretur, antequam rudere inciperet. Nam quantam calumniandi rabiem hoc arguit, quod in eo ipſo loco *in tantum ſequi me Hobbeſium* addit, a quo tamen perraro diſcedere ſoleo. Quid ais carnificis victima? Ego perraro ab Hobbeſio diſcedo? Oſtende ergo aliquem, qui errores Hobbeſii in politicis, (nam Theologiæ, quam iſte ſibi finxit, aliorum eſt deſtruire) magis ex fundamento everterit, quam ego in libro meo feci. Nam ex illis qui ita in univerſum eundem damnaverunt, plerique ejus mentem non ſunt aſſecuti; aliqui eum, quem damnant, ne quidem legerunt. Sicuti conſtat, unum ex illis non imi ſubſellii, qui negotium mihi heic faceſſiverunt, eum primum de Hobbeſianiſmo mihi impingendo inter ſocios agitaretur, tunc prima vice Hobbeſii nomen audiviſſe, & ejus librum de Cive velut novum in Africa monſtrum adſpexiſſe.



§. XXXI. ARTICULUS XXVI. est: *Nudam illam & universalem cognationem, quæ ex similitudine naturæ resultat, causam & fundamentum esse propter quam homo hominem diligit, p. 6. §. 7. In ordine autem, p. 187. §. 18. Nam revera. Quod attinet priorem locum, p. 6. §. 7. ubi verba nostra hæc sunt. In ordine ad alios homines consideratus naturalis status ille dicitur, prout intelliguntur homines sese invicem habere ex nuda illa & universali cognatione, quæ ex similitudine naturæ resultat, ante factum aliquod aut pactum humanum, quo peculiariter unus alteri redditus fuerit obnoxius, id est, Illi homines in statu naturali invicem vivere dicuntur, qui nullo alio vinculo præter communem illam cognationem juncti sunt. Quid hoc ad fundamentum dilectionis, Asini Tenebrio? In altero autem loco p. 187. hæc verba extant: Nam revera ad communem istum amorem nulla alia requiritur ratio, quam quod quis homo sit. Natura quippe ob causas supra dictas ( p. 183. §. 15. ) revera generalem aliquam amicitiam inter omnes homines constituit. Ubi sane patet, rationem illam communis dilectionis, quod quis homo sit, plura complecti, præter nudam illam naturæ similitudinem. Et si vel maxime solam naturæ similitudinem causam communis dilectionis statueremus, quid absurdi inde sequeretur? Annon Adamus causam dilectionis erga Evam allegabat, quod esset caro de carne, & os de ossibus ipsius? Nam quod additur, ( ita vero sentit contra illud Genes. IX. 6. ubi imago Dei fundamentum mutæ charitatis esse ponitur ) ad hoc rehero; soli rationi, ex qua ego hanc disciplinam deduco, ignotam esse doctrinam de imagine Dei, quæ articulum Theologiæ Christianæ constituit. Deinde dicto loco, Genes. 9. non dicitur, causam dilectionis esse, quod homo sit conditus ad imaginem Dei; sed hoc esse causam abstinentiæ a carne humana. Quæ duo non sunt idem, nec ex se necessario consequuntur. Non, inquam, necessario sequitur: quæ causa est, quare ego hominem non debeam occidere, eadem etiam causa est, quare ego hominem debeam diligere.*

§. XXXII. ARTICULUS XXVII. est: *Dictum Salvatoris, quo jubemur proximum nostrum diligere sicut nos ipsos, explicandum esse non tam de gradu dilectionis,*

*quam ejusdem sinceritate*, p. 226. Ad hoc respondeo ; disputari a me dicto loco, defensionis licentiæ non posse opponi notissimam sententiam Salvatoris. Nam certe, si illa eouique valeret, ut in pari casu periculi ego potius, quam alter perire debeat, utique juberemur proximum magis diligere, quam nosmetipsos. Ac generale est illud Salvatoris effatum, ex quo peti non potest decisio casus alicujus particularis, singularibus circumstantiis vestiti; quid nempe faciendum, si ego meipsum & alterum simul diligere nequeam. Nam ceteris paribus proximum cedere nobis ipsis expresse traditur 2. *Corinth. VIII. 13.* Quid ergo aliud inde sequitur, quam quod in illis casibus, ubi meipsum recte præferre aliis possum, *ut sicut meipsum* de gradu dilectionis intelligi nequeat; adeoque illud *sicut* in genere de dilectionis sinceritate interpretandum; sed quid in collisione salutis nostræ cum aliis sit faciendum, ex aliis fundamentis deducendum. Nam uti casus dantur, ubi ego meipsum recte præfero aliis; ita vice versa casus dantur, ubi mea incolumitas aliis postponi debeat. Hos casus tam diversos quomodo quis ex solo illo dicto deduxerit; diliges proximum tuum sicut teipsum? Add. OSIANDER ad *Grotium*, p. 615.

§.XXXIII. ARTICULUS XXVIII. est: *Neminem sibi ipsi obligatum esse, nisi respectu socialitatis, quo respectu etiam homo Dei servus est*, p. 86. & *Præfat. sol. ult. fac. 1. dantur sane.* Hæc patet Asinium Tenebriorem pro more suo affingere mihi thesaurum, quæ mea non est. Hæc enim sunt verba mea, dicta p. 86. *Hactenus homo seipsum conservare tenetur quatenus Dei servus, & societatis humana pars est, cui sese utilem jussu Dei præstare debet.* Quæ verba ab Indice multum discrepant. Neque in præfatione hæc thesis extat; homo respectu socialitatis servus Dei est. Sed hoc tantum dicitur: *Cum religio, quatenus ad disciplinam juris naturalis pertinet, intra spheram hujus vitæ terminetur; eo quoque intuitu ad socialitatem referri potest, quatenus illa societatibus hominum efficacissimum vinculum præbet.* Quæ assertio nequaquam repugnat illi thesi, quod causa obsequii, Deo ab homine debiti, sit creatio, & alia beneficia, quæ a Deo in hominem conferuntur. Ceterum illud obiter observandum, dum in hoc & quibusdam

dam aliis articulis Asinius Tenebrio nihil causæ allegat, quare assertionem meam rejiciat; non obscure ipsum hoc sibi auctoritatis arrogare, quasi quod ipse non capit, aut quod etiam abique ratione ei displicet, aut quod in obsoletis suis compendiis non reperit, citra ulteriorem inquisitionem damnari debeat. An tanta auctoritas Asinio Tenebrioni sit tribuenda, si nullum aliud præter hunc Indicem Novitatum specimen ediderit, vehementer dubito.

§. XXXIV. ARTICULUS XXIX. est: *Nullam esse morum honestatem & innocentiam ubique & extra societatem servandam, seu citra reflexionem ad alios homines in præfat. fol. ult. fac. 1.* Est vir constans Asinius Tenebrio; ad finem usque Indicis retinet morem meas theses detorquendi. Nam nuspiam a me dicitur: nullam morum honestatem ubique & extra societatem esse servandam. Sed ita dico: *Quenam sit illa morum honestas & innocentia, ubique & extra societatem servanda, seu citra reflexionem ad alios homines, nondum dispicere potui.* Si ergo quid voluisset agere, debebat exemplum ejusmodi morum honestatis afferre. Et tunc meum fuisset, ultro tam ingenioso viro pro communicata sua sapientia gratias agere.

§. XXXV. POSTQUAM Asinius Tenebrio dudum omnem pudorem consumserat, circa finem nihil interesse putavit, quid infelicibus chartis illineret. *In naturali statu*, est articulus XXX. *neminem altero superiorem esse, cujus arbitrio voluntatem suam, suumque judicium submittit, p. 143. & 763.* Sic pater filium, & maritus uxorem non regerent, nec iis dignitate, judicio, robore corporis, animo, & atate prævalerent. Quis liquido jurare potest, ista ab homine pronunciata esse? An oblitus es, stipes, te paulo ante allegasse paginam 6. ubi status naturalis in ordine ad alios describitur, prout homines sese invicem habere intelliguntur ex nuda illa & universali cognitione; quæ ex similitudine naturæ resultat, aut factum aliquod aut pactum humanum, quo peculiariter unus alteri redditus fuerit obnoxius. Aut si hæc obscura tibi videbantur, an non legisti p. 146. §. 5. illos a me dici in naturali statu vivere, qui neque communem dominum habent, neque unus alteri parat, aut imperat. An nondum adhuc capis, inter maritum &

uxorem, inter patrem & liberos pactum & factum humanum intercedere, ob quod unus alteri peculiariter redditus fuit obnoxius, & arctiore vinculo conjunctus, quam communis illa cognatio, ex similitudine naturæ resultans, ferebat? An nondum inquam intelligis, maritum cum uxore, patrem cum liberis non vivere invicem in statu naturali; quia maritus uxori, & pater liberis imperat. An forte hæc ideo nova tibi videntur, quia quid sit uxori suæ imperare ignoras?

§. XXXVI. OPINIONE citius destituit nos Asinius Tenebrio. Expectabamus integrum systema Theologiæ novæ, per omnes locos deductum. Nunc repente finem mimo imponit, promulgato tamen prius ingenti errore circa magistratum politicum. Principi (absoluto puta) injuriam subditis inferenti, si evitandi locus non sit, vi occurrere posse, p. 1004. 1006. & 1007. contra illud 1. Petri II. 18. Ubi primo notandum, in hac quidem questione a me Principes absolutos & limitatos, seu qui in certas leges fundamentales & pacta cum populo suo convenerunt, non distingui, modo revera habeant summum imperium. Ergo ex Asinii Tenebrionis doctrina nihil obstat, quo minus principibus limitatis a subditis resistatur. Deinde falsum est, quod ego definitive aut positive asseram, Principibus injuriam inferentibus vi occurrere posse. Verba mea hæc sunt, p. 1004. *Dum hostem pro Principe induit, civi quoque obligationem, qua is ei devinctus tenebatur, remisisse intelligitur. Etsi fuga heic, quantum potest, sit arripienda, ac tertii alicujus patrocinium querendum, cui nulla adversus Principem istum obligatio. Quin & si fuga via non datur, moriendum potius, quam occidendum est, non tam propter ipsius Principis personam, quam propter totam rempublicam, quæ tali occasione gravibus fere turbis solet involvi. Sic & verba paulo post sequentia satis ostendunt, me nihil heic positive definire. Est insuper & illud observandum, si vel maxime concedatur, interdum alicui civi nefas non esse, salutem suam vi contra atrocissimas injurias superioris defendere, &c. Pagina 1006. rejicio perniciosum illud dogma politicæ Græcicæ de tyrannorum cæde licita: Illi sane ferendi non sunt, qui ita crude jactant, regem, ubi in tyrannum degeneraverit, posse a populo exui imperio & puniri. Pagina 1007. §. 7. re-*

sentetur a me GROTIJ mens super hac quæstione, ubi isthæc potissimum sententia a me probatur; nulli Principi competere potestatem ex mera libidine innocentem occidendi, ut huic nullo modo resistere liceat; seu, quod eodem redit; nullus Princeps, quando innocenti civi ultimum exitium intentat, suo jure postulare potest, ut innocens ille sibi non resistat. Ex qua assertione tamen non arbitramur sequi hanc, aut eidem æquipollere: subditus principi extremam injuriam intentanti recte potest vi resistere. Non inquam sequitur; ille suo jure postulare nequit, ut ipsi non resistam: ergo ego eidem recte possum resistere. Nam ex alia ratione, præterquam ex jure injuriam inferentis, illa resistantia fieri potest illicita. Probatur autem ista assertio duplici argumento; tum quia ejusmodi potestas ad salutem civitatis nihil facit, ex qua sano amplitudo imperii civilis est metienda; tum quia illa a civibus imperanti collata intelligi nequit. An autem sacra literæ in hac quæstione peculiare quid disponant, aliorum est inquirere. De cetero ea mihi doctrina civitatibus utilissima videtur, ut civibus quidem inculcetur, personam Principum esse sacrosanctam, eorumque ingenia ferenda; Principibus contra diligentissime imprimitur, non solum homines se esse, sed & hominibus imperare, quorum ea indoles, ut atroces & continuatæ injuriæ eos demum ad desperationem adigere queant. Sed & valde dubito, an in hac quæstione recte allegetur dictum 1. Petri II. 18. Sane enim Apostolus in genere ibi docet, etiam *καταμάρτυρε*, asperis dominis parendum esse, qui colaphis & flagellis per morositatem plus quam par est in servos sæviant: nequaquam autem eam quæstionem definit, an servus jugulum quoque præbere immortum debeat domino, trucidare innocentem volenti. Et nescio quam indignum videtur, conditionem liberi alicujus populi mancipiorum conditioni æquare; parique modulo metiri servum exiguo aere emptum, quem pro lubitu Dominus vendere iterum possit, cum populo aliquo ex multis myriadibus virorum fortissimorum constante; qui ex singulari affectu, aut ob merita majorum, propriæque opinionem & spem virtutis summum imperium in aliquem ultro contulit. Denique qui citatur ab Asinio GR-

RHAR-

RHARDUS plane mecum facit, *Articulo de Magistratu politico*, inprimis §. 488. circa finem.

§. XXXVII. DESTRUCTO Indice superest, ut etiam conclusionem tanto opere dignam consideremus. Ex qua sole meridiano clarius patebit, quem scopum sibi perditissimus furcifer propositum habuerit. Quanquam enim fortasse alius articulorum istorum sit auctor, alius autem appendices maledicentissimas addiderit, opusque tam nobile in lucem protraxerit: tamen ista jam ita curiosè mihi discernere non vacat, & tantisper Asinius Tenebrio universi libelli famosi auctor habebitur. Ille calido mihi sanguine, aut pulverulento potius tergo pœnas dabit. Ille erudito orbi prostituetur tanquam monstrum ex ignorantia & malitia conflatum, quod ex invidia furore mixta tam nefario modo, probitque omnibus detestando famam meam maculare, & ad fortunas meas subruendas viam sibi aperire voluit. *Quem*, inquit bellua, *corruptarum novitatum pruritus prapostere instigat contra juris naturæ & divini solida fundamenta, is unicum omnium instar sibi commendatum habeat Pufendorffium, a quo unius anni spatium tam immensum novarum opinionum cumulum sibi comparabit, quos omnes orthodoxi Theologi per omnem vitam ei adimere non valebunt.* Quin delin-  
nis latrare novitates nebulo? quo ipso aut ruditatem tuam debuccinas, aut meum ingenium aut industriam commendas. Quid enim non in omnibus artibus & disciplinis aliquando novum fuit? Quod si eo solo nomine fuisset proscribendum, universo generi humano intra barbariem erat hærendum. Cum porro hoc seculo tanta bonorum juxta ac malorum sit librorum copia, nil nisi ludibrium eruditis debet, qui libros edere vult, in quibus nihil plane novi occurrat, aut saltem ubi quæ ab aliis minus exacte traduntur, curiosius non discutuntur & expoliuntur. An credis, si quis ex quatuor aut quinque libris sextum compilaverit, aut ex quadraginta codicibus in machinam versatilem dispositis, quam ipse in sella versatili sedens in vertiginem det, ad eum fere modum, quo Peripateticorum Intelligentiæ orbis cœlestes rotant, farraginem aliquam sine judicio congefferit: illum aliud agere, quam ut tabernas aromatariorum cucullis instruat? Ceterum quod istæ, quæ a me tradi arguuntur novitates aut corruptæ sint, aut solidis juris naturæ

turæ & divini fundamentis repugnent , ex Indice isto expurgatorio hætenus nondum adparuit . Et si quis alius sit eruditus , qui honesto modo quædam a me tradita in disquisitionem vocare velit , sentiet non defutura mihi , quibus mea defendam . Ejusmodi enim stolidorum Indicium confectores , ac famosorum libellorum architectos non magis inter eruditos numero , quam asinos inter citharædos : quibus displicere bonis & cordatis placere est . Abite sues , nihil vobis oleo . Illa vero furiosi plane & mente mori vox est , intra unius anni spatium tam immensum novarum opinionum cumulum a me posse addisci , quas omnes orthodoxi Theologi per omnem vitam alicui adimere non valebunt . Quæro enim ex te , totius Arcadiæ auritissima bestia , illæ novitates , quæ ex me intra spatium hauriuntur , suntne vere , an falsæ ? Si veræ sunt , quid circa illas orthodoxis Theologis negotii est ? Aut cur illi circa eas convellendas aliquid operæ sumant ? Nisi forte Theologorum esse credis , barbariæ sese defensores præbere , obsoletis naniis scholas occupatas tenere , bona ingenia opprimere , importunissimam dictaturam in omnes eruditos exercere . Sin autem falsæ sunt meæ novitates , tunc tu vero nescio quam miseros & stupidos homines mihi narras , qui universi per tantum temporis spatium non possint subvertere falsa dogmata viri neque proceritate corporis eminentis , neque prolixo barbitio venerabilis , neque vim miracula faciendi aut diabolos expellendi sibi vindicantis , neque somniorum snorum præfagia , neque doctrinæ suæ papalem infallibilitatem jactantis , & quod maximum est , qui nunquam per somnum carmina fecerit . Post tantam stolidam sententiam Asinius Tenebrio jam demum intima pectoris sui recludit , & quid ad famam meam infestandam ipsum compulerit , non obscure fatetur . Nimirum illi Magnatum & Nobilium filii , qui informatione mea usi sunt , & adhuc utuntur , Asinium ejusque complices tanta invidia adversus me impleverunt , ut crepandum ipsis fuisset , nisi hac via virus suum ex parte evomere licuisset . Hos ut abs me averterent , non alia porior aut magis compendiosa via fuit visa , quam de novis dogmatibus religionem tangentibus rumorem spargere . Quo audito quis amplius suos filios mihi commendaret : Præsertim cum matres eo vocabulo audito mi-

mirum in modum soleant exhorrescere; & trepidæ prefere ad pectora natos. Et spes erat, plerosque concionatores aulicos, qui fere circa dirigendam puerilem informationem Palinuri vice funguntur, in patres descensuros. Vis tu filios tuos commendare Pufendorffio? Per omnes Deos Deique ne feceris, si ipsorum salutem amas. Ille Heidelbergæ vixit, ubi Lutherani æque ac Calviniani vinum libentius quam cerevisiam bibunt. Ille habet mira principia; non credit amplius in quatuor elementa, nec in sanctissima decem prædicamenta. Ab isthoc viro liberi tui ita corrumpentur, ut compendium logices & rhetorices, quo recitari audito tanto solebas gaudio perfundi, deinceps nauci sint facturi. Et habet entia moralia, quibus conspectis asini in rabiem aguntur. An non audisti, quod Monzambanum legit, qui tamen Jesuitis tantopere est invisus, & Hobbesium, qui librum de diabolo scripsit. Imò credit ille, horresco referens! multos asinos binis pedibus incedere. Quin tu ergo potius commendas eos alicui viro pio & simplici, qui ab antiqua pedanteria ne latum unguem discedit, qui juxta suam in re literaria simplicitatem nulla entia moralia intelligit. Qui meris medullis discipulos suos pascit, sicut quondam Chiron Achillem, ex quo cibi genere magni heroës proveniunt, qui Trojam vel biduo expugnare queant. Ac qui insuper recreationis causa cum filiis tuis lectiones saltatorias repetere poterit, circa quas ipsi subtilissimum judicium, non minus quam circa generosissimas species aquæ vitæ. Quis jam dubitaverit, quin confestim quicquid est nobilis juventutis Pufendorffio vale sit dicturum, & ingenti agræ pium illum doctorem. Equitum S. simplicitatis Commendatorem magnum, stipendarum, ejusque crumenam inanis turgentem auro oppleturum? Ast mi nimium odiose obtrectator, credas hoc mihi velim ex animo loquenti. Si vel maxime ego in Moscovia, uti tu auguraris, Knesius factus fuero, tu tamen profecto Asinius Tenebrio manebis. Ergo brutalibus tandem tuis affectibus frænum impone, & si quid in caduca hac mortalitate curas, id unum cura, ut ne deinceps unquam Indices Novitatum edas. Et ut videas, me calumnias tuas nauci facere, en verba tua bona fide repræsentō. *Multos quidem, (non obstantibus istis novitatibus) Magnatum, & Nobilium filios*



*lios Heidelbergæ olim habuit discipulos , quo nomine etiam nemo , qui arces suas extra lunam possidebat , ibi me oderat , ) & jam Londini in Suecorum Universitate habet , ( ut fama fertur ) Attamen eorum neminem ex abortu suo Monzambano & damnato Hobbesio , quos ipsis continuo inculcare studet , quidquam præclari docuit . Hos accepta eorum pecunia , splendide inanes domum remittit , sic suæ crumena , & non ingenio eorum consulit . O tempora o mores ! Ubi miror impuri nebulonis belluinitatem incogitantiam , quod cum nuper tantam doctrinæ meæ efficaciam tribuisset , ut ab omnibus Theologis per totam vitam extirpari nequeant , quæ a me uno anno hauriuntur ; jam omnes a me discipulos splendide inanes dimitti ganniat . Sed talis est Asinius , ut sua mendacia ipse destruat . Discipulos meos quod attinet , eorum duas possum facere classes ; alii publicas tantum & privatas meas frequentarunt lectiones ; alii insuper peculiari meæ commendati fuerunt curæ . Circa priores nos , qui publice in Academiis docemus , pari cum concionatoribus jure fruimur , ut si quod nostri est officii fecimus , de professoribus auditorum rationem non reddamus . Qui capere vult , capiat . Et tamen multos eorum nominare possum , qui honorificam adhuc mei memoriam retinent . Ex his qui privata mea disciplina usi sunt , quidam ad insignem eruditionis gradum pervenerunt , amplisque muneribus & in hoc regno , & in Germania admoti sunt ; qui summum in me amorem quavis occasione testari non intermitunt . Qualem si Asinius Tenebrio unum haberet , dudum ejus effigiem in domus suæ insigne publice suspendisset . Fuit unus & alter , qui minores profectus fecit . Et quis unquam fuit doctor , qui omnes suos discipulos quantum cuperet eruditos præstare potuit ? Certum tamen mihi est , neminem eorum unquam culpam in me collaturum . Imo ut videas , Asini Tenebrio , quam parum tuis mendaciis movear , jam publice denuncio , si quis tales meæ informationi commendare velit adolescentes , qui vel stupidissimo sunt ingenio , vel animum a literis plane aversum gerunt , nil nisi arma & ventionem spirantes , aut qui sub prioribus præceptoribus nulla fundamenta posuerunt , & intra annum abs me universam eruditionem deglutire habent , aut qui dimidiam partem temporis domi apud parentes , reliquam*

heic

hic in Academia consumere volunt, aut qui formosam amore puellarum flagrantem maximam diei partem dulcissimis confabulationibus absumunt, per reliquum tempus domi mellitorum laborum & selibrium mammarum memoriam ruminantur; hos omnes denuncio apud me parum aut nihil profecturos; quin me susque deque habere, an tales mihi commendentur vel non, præsertim ubi culpam deinde in me conferre velint. Quin & hoc insuper addo, si quis semicrudæ adhuc studia abruperit, & præmaturis sese peregrinationibus vel discurvationibus potius dederit, apud eundem paucissima literarum vestigia, ubi domum reversus fuerit, adparitura. Inprimis autem arguit Asinius, quod ex Monzambano & Hobbesio discipulos meos nihil præclari doceam. Ergo sufficit, quod ex ceteris libris, quos ipsis præterea inculco, aliquid præclari doceam. Priorem autem ne deinceps quoque discipulis meis commendem, Asinius quidem Tenebrio me nunquam prohibebit. Hobbesium autem & Grotium, qui tam multa a religione nostra abeuntia suis operibus immiscuerunt, ne amplius juventuti prælegere cogerer, librum meum præcipue edidisse me professus sum; in quibus non omnia a me probata fuisse, ille ipse meus liber satis testari potest. Quod autem furcifer Monzambanum abortum meum vocat, ad id repono, me nunquam id scriptum pro meo agnovisse, utut nolentem publica me fama ejus auctorem ferat. Inde mea nihil refert, an ab Asinio iste liber abortus vocetur. Id tamen dicere non verear, non erubescere auctorem, quisquis is est, eo foetu debere, qui tanto cum applausu per cultissimam Europæ partem a cordatissimis quibusque sit receptus; & cujus impugnatores non multo ampliorem gloriam reportarint; quam confectorem Indicis Novitatum manet. Illud tamen nescio, an quis mihi sit suaserus, ut, ne Asinio Tenebrioni præ invidia illa rumpantur, repudiare debeam liberalitatem quorundam Magnatum, & aliorum, qua operam meam, si non semper eventu, tamen fide æstimandam prosecuti sunt; præsertim cum tam raro nostri ordinis homines aureus imber inundare soleat. Neque tamen erat, quare Asinium tantopere mea crumena angeret; quippe cum hanc præcipuam mearum divitiarum partem, lucam, quod nemini debeam. Cui rei tamen non parum

rum contulisse judico, tum quod uxor mihi contigit parum fortuosa, tum quod nullos libros propriis sumtibus edidi. Ceterum illud optime in rebus humanis comparatum est, quod invidia sibi ipsa supplicium est; quæ tunc demum asperissima tormenta admovere est censenda, quando ad confessionem doloris sui invidos cogit. Et quantopere istum nebulonem excruciaci arbitramur, qui continere sese amplius nequit, quin exclamet; *o tempora! o mores!* Quid enim heic clamor aliud arguit, quam dirissimos moriùs, quibus iste proprium sibi pectus lacerat, dum me aliquo inter eruditos numero, se non nisi Asinium Tenebrionem videt. Perge igitur invidia æstare, furcifer, angere dies noctesque, excoque infidum istud pectus, pallesce, exaresce, a laqueo demum velaniae tuæ remedium pete, ut ista impura anima per dignam se portam triumphalem exitum inveniat.

§. XXXVIII. RESTAT ut etiam excutiamus auctoritatem magnorum virorum, quos Asinius Tenebrio adversus me testes excitat, quibus & ego & liber meus vehementer displicuit; ne forte solus Asinius ex invidia aut ruditate nos allatrare videatur. Gravissimum sane præjudicium, vel doctrinae valde irregularis, vel morum plane difficilium, cetera dissentientes in me improbando conipirare. Eo curatius horum testimonia discutienda mihi erunt, ut quatenus Asinii causa per ista sublevetur adpareat. Primo igitur loco prodeant Professores Londinenses. *Nobis insuper a fide dignis nuperrime relatum est, ipsos Professores Londinenses præsertim Theologos Lutheri animositate Pusendorfium jamdudum multorum errorum accusasse, quem tamen Procerum gratia penes Regem contra omnium insultus adhuc conservavit, &c. Relatum est, inquit, nobis nuperrime.* Ubi credamus Asinium Tenebrionem aulam suam habere? Nam illam longe abhinc sitam esse arguit, quod *nuperrime* demum audivit rem, quæ jam ante annum non sine strepitu gesta est; cum tamen istum nebulonem plus satis curiofum circa rumulosculos de me captandos fuisse adpareat. Et tamen dum dicit, illos *jamdudum* me errorum accusasse, cum mihi demum paulo ante editum superiore anno librum meum innotuerit, illos nescio quid in me machinari; suspicionem excitat Asinius, quasi dudum arcana quædam commercia ei cum istis intercesserint

ut quid iidem adversus me parturirent, longe ante ipsi innotuerit, *Relatum est nobis*, inquit. Quo argumento probabis, *Asini Tenebrio*, tibi non potius hæc fuisse verba adhibenda; quæque ipse miserrima vidi, & quorum pars magna fui? Num etiam ex te scire possumus, quinam sint ibi *viri fide digni*; num fortasse mendacio tibi illuserint? Nam si neminem habent præter te; abs quo commendentur, non erit, qui magnam istorum verbis fidem est adhibiturus. Cur etiam aut tu fuisti tam incuriosus; ut quinam forent isti errores non inquireret? aut si de istis intellexisti, quare erudito orbi tantorum virorum observationes invideres, quæ magnum lumen Indici tuo potuissent asferre? Sed quid multis ambagibus utor? Mi *Asini Tenebrio*, affatim quidem est tibi improbitatis, ut sis nebulo; sed ad id parum tibi esse astutix patet, ut scelera tua paulo tectius possis expromere. Nam hic ipse Index a Theologo quopiam Londinensi confectus est, qui jam dirissimis sese execrationibus devovet: illum sibi ab *Asinio Tenebrione* furto subductum, ac quibusdam in locis interpolatum, seque infcio typis exscriptum. Sic ut iste quidem satis tenuem tibi referat gratiam pro tuo elogio, quo Lutheri animositatem ei tribuis; cum ipse vice versa palam jactet, te ut furem & nebulonem egisse. Verum super hac re in judicio videbimus. Ceterum postquam ad hunc locum provectus sum, solemniter prius protestandum est, me, quæ mox narraturus sum, non referre animo injuriandi; sed ex inevitabili necessitate famam meam ab omni sinistra suspitione purgandi apud omnes, in quorum manus Index iste facerrimus pervenit; ad quod plurimum facit, si ipsi intelligant, quodnam heic loci Indicis fuerit fatum. Neque vero crediderim illum fore cordatum, qui vitio mihi vertat, quod nihil eorum dissimulem, quæ ad tuendam meam existimationem faciunt. Concessit mihi Deus, ut quantulumcunque nomen inter eruditos nactus sum, ac largitus est stationem, ultra quam ambitionem meam non profero. Sed cum tam illud, quam hæc diu stare nequeat, si talis sum, qualem *Asinius Tenebrio* mentitur, indignus sane & divina illa gratia forem, & tanto summorum juxta ac mediocrium hominum favore, si unius vel alterius invidi calumniis opprimi me per silentium paterer. Sed  
& co-

& cognatis atque amicis, quin universis meis popularibus merito erubescendus haberer, ni tantum mihi inesset facultatis, ut rudissimi hominis deliria dissipare possem. Seponatur ergo paulisper respectus aliorum, quoad meæ famæ & quæ inde dependet fortunæ consultum sit. Jacturam alii faciant existimationis suæ merito suo, qui immerentem scædissima labe adspargere non erubuerunt. Frustra quis dignitatem suam mihi occinit, quando ipse ferrum jugulo meo intentat. Id tamen mihi gratulor, quod nullus Professorum ex natione Svecica huic sese negotio immiscuerit, ut ne mihi necessum foret, quædam parum honorifica memorare de ullo ex ea natione, ejus favorem in me meosque semper sum expertus pronissimum. Quod si illis, qui me tam atroci modo impugnarunt, acerbum videatur, sua facta propalari; habent quod Asinio Tenebrioni indignentur, qui scrinia ipsorum expilavit, & jam obelo confossum Indicem in lucem protraxit. Istum nebulonem, istum plagiarium, istum calumniatorem, istum famosorum libellorum architectum mecum execrentur. Quas tamen vias videre videor, qua excusari possint ea, quæ in me isti egerunt, sane a communi jure, & modo inter honestos viros agendi non parum abeuntia. Una est, si heroico sese spiritu actos dicant, quem ad vulgares agendi regulas non alligatum, creditur, cuique adeo jura nata non sint. Atque hoc ipsum non obscure insinuat Asinius Tenebrio, dum *animositatem Lutheri* illis tribuit; quem sane virum animos supra communem sortem gessisse nemo est ex nostratibus, quin agnoscat. Dicant ergo, se habuisse heroicum Lutheri spiritum, sed qui per diurnitatem temporis vehementer degeneraverit, aut qui in impura vasa infusus ex generosissimo velut vino in mordacissimum acetum abiërit. Ni malint uti dicto Poetæ: ætas Parentum pejor avis tulit nos nequiores, mox daturos progeniem vitiosorem. Accedit & hoc, quod unus ex illorum numero quondam de altero, qui non parum ad conflandum hocce negotium contulit, pronunciaverit istud dictum; Deum, si insigne opus efficere velit, excitare ingenia heroica; (ita *Winstrupius de Nicol. Beckmanno*.) Id quod in vulgus heic notum est. Imo & unus eorum (*Josua Schwartzius*) cum proximo anno ipsi mitra doctoralis inter tubarum clangores imponeret.

*Pufend. Eris Scand. T.IX.*

F

tur,

tur, a quopiam studioso, qui in ejus culina diu ossa ar-  
 roserat, inter enormia alia elogia *pretiosus Dei filius*  
 ( *Gottes werther Sohn* ) nuncupatus fuit; quod nomen  
 soli Servatori nostro in lingua Teutonica tribui omnes  
 linguæ ejus periti norunt. Et sane, quicquid est Judæo-  
 rum per orbem terrarum dispersum, huc velut ad no-  
 vum Messiam confluxisset, ni istis Sveciæ regno inter-  
 dictum foret. Talis tantusque quale non heroëm se fer-  
 re possit? Altera autem via paulo simplicior videtur,  
 si nempe pertinaciter hæreseos arguere pergant articulum  
 XVII. Indicis, supra excussum: se affectibus suis impe-  
 rare non potuisse, nec debuisse; se pro orthodoxis Theo-  
 logis non fuisse habendos, ni affectibus frana laxarent:  
 iis sese adeo occæcatos fuisse, ut Pufendorffii librum da-  
 mnaverint, antequam intelligerent, ut neque Christiani  
 hominis officium, neque ætas aut dignitas, gravitasque  
 muneris, nec respectus censuræ & adprobationis regiæ,  
 neque amicitia mecum quondam culta, neque officia  
 quædam illis a me exhibita, vel paululum ipsos retine-  
 re potuerint; quo minus tanquam deterrimum me hæ-  
 reticum diffamarent; aut saltem damnationem suam eo-  
 usque suspenderent, quoad meam mentem & explicatio-  
 nem super istis articulis audivissent. Sed dum isti deli-  
 berant, utra via sese excusandi ipsis magis sit ad pala-  
 tum; ego interea rem, prout eadem heic notoria est,  
 fideliter referam, non eo fine quidem, ut aliquem ve-  
 lim infamare, sed ut famam meam contra Alinii Te-  
 nebrionis calumnias asseram, qui isto velut præjudicio  
 me premere instituit. Cum igitur ad finem jam prope-  
 raret libri mei impressio, animadvertere licuit, tres po-  
 tissimum, inter quos hætenus similtas, aut frigida val-  
 de amicitia fuerat, repente syncretismum velut coivisse;  
 concurrare, trepidare, crebra inter se conventicula agi-  
 tare; ( *Beckmannum, Schwartzium & Christianum Fos-*  
*sium.* ) Cui fundamento nova ista amicitia innixa sit,  
 sequentia ostendent. Ut factioni robur & auctoritas ac-  
 cederet, adsciscitur aliquis ( *Petrus Winstrupius* ) cujus  
 canitie ceteri abuterentur, ut, velut post Ajacis cly-  
 peum Teucer latitans, sagittas suas eo tutius in me  
 emittere possent. Plures sollicitantur, sed qui tamen pa-  
 rum gloriosum hujus rei finem augurantes, sacramento  
 jungi recusarunt. His ergo velut quadrigis Bellona in  
 librum

librum meum irruitura invehebatur. Stimulabantur illi contra me pari fere odio, causis diversis. Ardebat unus & alter pædagogicam quandam dictaturam in nos sibi struere; cujus quietam possessionem sibi me hæc salvo desperabant, utpote apud quem ejusmodi vana arrogantia risum potius, quam venerationem excitare solet; & qui ideo a legibus cuique muneri suos limites præscriptos arbitratur, ne quis pro sua libidine aliis insultare præsumat. Alius hancce compendiosissimam judicabat viam inclarescendi, si me subvertisset; qui perfectissime cujusdam, & ad quintam usque essentiam sublimatæ Theologiæ specimen credebat, Indicem Novitatum in Pufendorffii librum congesisse. Alius denique me sepulto & summam eruditionis famam, & lautissimam fortunam sibi sperabat accessuram; qui me vivum suis luminibus, utut toto vertice supra sit, officere putabat. Et commendatione digna est unius (*Schwarzii*) ex isto numero ingenuitas; qui apud amicos non amplius negat, hanc sibi intentionem fuisse, ut ego ab hac Academia dimoverer. Id tamen se nunquam quæsisse, ut fortunæ meæ ruinam procuraret. Esse enim S. Regiæ Majestati longe plurimas stationes, in quibus opera mea uti possit; quibus non obstat, si vel maxime ego quasdam erroneas opiniones foveam. Cui ego quidem pro singulari sua benevolentia, ex qua pro mea promotione tam sollicitum sese exhibuit, dignas gratias ago; vicissimque opto, ut ille aliquando Martyrum corona potiatur, quæ jam jam capiti ejus quondam imminerebat, ni fuga sibi consulisset, quo ipsius nomen deinceps pro nigro rubrum in Calendario stet. Simulque rogo, velit ejusmodi commendatione mei ad splendidius officium deinceps supersedere. Cum ergo & ceteris sociis mea promotio tantopere cordi esset, ut finem suum obtinerent, nullam faciliorem viam sibi relictam judicant, quam ut calumniam mihi intentarent, cui semper apud semidoctorum fecem eruditissimus quisque patuit, me nova habere principia, me juventutem ita corrupturum, ut non amplius antiquum Donatum sit veneratura. Accendebat ista unus ex sociis, qui subinde in typographiam currebat, & cum pleraque pro sua simplicitate, quam ille tantopere in jure naturali commendare solet, non caperet, mire eadem traducebat. Augebat suspicionem, quod ego prohibuissem, ne

antequam opus perfectum foret, singulæ paginæ hinc inde raptarentur. Hinc certa fides monstrolum esse, quod tam solícite a me occultaretur. Quid multis? Indicitur concilium solemne Cerviæ, Pontificiæ ditionis oppido, missa Spiritus Sancti cantatur, & post aliquot sessiones unanimi Patrum consensu statuitur, Pufendorfium hæreticum esse faciendum. Offeritur decretum Concilii Pontifici ratificandum, (nam ut ipse Conciliis interlit, recentiores doctores ejus majestate indignum ducunt.) Ille laudata patrum pietate decretum approbat, & annulo piscatoris obli-gnat. Hoc factó duo quidem ex sociis in latibula sua se recipiunt, nec apertius deinceps negotio immiscuntur, ex eventu animos sumturi, aut si secus res cadat, extra periculum subducti. Reliqui duo negotii executionem in se recipiunt; somniaturi hæreses, si non invenirent. Nova tamen spes oritur, fore, ut si diligenter inquirerent, magnam vim novitatum sint deprehensuri, quod certus homo duo folia de præfatione, digitis forte fortuna adhærentia, e typographejo attulisset; in quibus occurrebant ea verba, quæ concilio isti expresse opposueram; quibus tritum illud, ne sutor ultra crepidam, occinebam iis, quos ad sumendam in ejusmodi scripta censuram fastus, ignorantia, aut petulans πολυπρηγυσότη impellit. Interea liber absolvitur, ego Holmiam proficiscor. Et jam in publicum emergere incipiunt, quæ hætenus in me cusa fuerant consilia. Primo in prologi vicem epistola Holmiam scribitur, hoc fere argumento, insignem gravitatem præferente: Prodire jam in publicum Pufendorfii librum, quem ipsi tamen nunquam viderint, quod is noluerit quenquam nasum suum in eo exercere. priusquam S. Regiæ Majestati, cui inscriptus est, offerretur. Quia tamen sibi ejus libri censura non fuisset oblata, se excusatos haberi velle, si quid iste orthodoxæ religioni, quæ ipso-rum humeris, tanquam Atlante cælum, potissimum niteretur, contrarium contineret. Petebant præterea, ut sibi denuo liber iste censendus committeretur; in quo negotio ipsi magna cum circumspectione essent progressuri, & nullam mihi injuriam illaturi. Nam illos Illustrissimos Regni Senatores, qui jussu S. Regiæ Majestatis librum meum adprobassent, tam profunda non instructos fuisse sapientia, ut de jure gentium ju-dicium



aicidm ferre potuerint ; cum politicorum nemo tam  
 demens unquam fuerit , ut privilegium infallibilita-  
 tis sibi arrogaret . Adduntur & quædam de Monzam-  
 bano , quem ego auderem privatim heic legere . Eum  
 in Germania publico Cæsaris edicto proscriptum , ( quod  
 sibi solis sit conspectum ) . Cum autem hoc regnum  
 provincias possideat in Germania , metuendum esse ,  
 ne hæc belli causa arripiatur , & Croatis , milite fero-  
 cissimo , Septentrio inundetur . Respondebatur ad has  
 literas a superioribus leniter & humaniter : quiesce-  
 rent , & rerum suarum satagerent . Librum meum esse  
 politicum , nec ad Theologos quidquam spectare . Jam  
 S. Regiæ Majestatis censuram & adprobationem accessis-  
 se . Neminem in ipsos ob eum librum culpæ quid col-  
 laturum ; nec rationem ejus rei ab illis reddendam , quæ  
 nunquam ipsis foret commissa . Tanta lenitas itorum  
 hominum pertinaciam magis accendit ; nec ita facile  
 concilii sui decreta eludi debere arbitrantur ; præsertim  
 cum jam dirissima quæque de libro meo in vulgus spar-  
 gere cœpissent , quæ ita repente vana deprehendi aucto-  
 ritati suæ parum conducere censebant . Interea ne ipsi  
 in me ex invidia rapi aut consueto vitiligitandi morbo  
 agitari viderentur , aliæ literæ scribuntur ad certum Theo-  
 logum , tunc Holmiæ agentem , in quibus aliqua loca  
 libri mei quasi errorem fœventia annotantur , ac iste ro-  
 gatur , ut pro eo fervore , quo circa religionem flagret ,  
 hanc rem apud Illustrissimos Regni Proceres diligenter  
 insinuet , & quantum ex meo libro veræ religioni peri-  
 culum immineat , solícite demonstret . Easque literas  
 iste uni & alteri ex præcipuis regni officialibus recita-  
 vit ; qui facile infami fraude animadversa , auctorem  
 earundem , & fœdas calumniandi artes graviter sunt de-  
 testati . Nullam enim aliam subscriptionem illæ literæ  
 præferebant quam hanc : *Hafniæ, Tuus quem ex fama*  
*noſti* . Qua epistola etiam Theologis Hafnienſibus , viris  
 sane cordatissimis , non levis injuria fuit illata , quasi  
 ipsi , ubi quid in libro meo desiderarent , non ingenue  
 & aperte , prout viros bonos & doctos decet , fuissent  
 monituri , sed per tramites non nisi nebulonibus uturpa-  
 tos forent grassaturi . Enim vero ne quis aliquem Haf-  
 nienſem in suspicionem vocet , istæ literæ Londinum  
 habent patriam ; ac retulerunt mihi aliquot viri , qui  
 E 3 earum

earum literarum autographum apud dictum Theologum huc revertisse viderunt, sese manum probe agnovisse. Nec difficile erit; eum scriptorem obscurarum epistolarum in lucem protrahere, si quidem in eam rem serio inquiratur. Ubi miror inficetam plane astutiam illius scriptoris, quod speraret, sese tam prudentibus viris ita facile illudere posse; cum potius vel sola hæc fraus istos conatus plane redderet suspectos. Jam tertius a publicatione mei libri mensis labebatur, & Index in formam embryonis coalescere videbatur, ac non obscura vitæ signa dabat; cum alius ab istis insultus (ut Asinii Tenebrionis vocabulo utar,) tentatur. Obstabat quippe adhuc censura & adprobatio regia, quæ non sine specioso aliquo obtentu proculcanda erat. Qui facile inveniri poterat ab hominibus, quæ conscientia qualitercunque informata regum jussis longe potior est. Neque enim ignotum est, maxima scelera sub larva conscientiæ, & inter allegata passim seu profane potius detorta dicta sacra expromi. Scribit ergo epistolam senior ad professores Theologos hujus Academiæ; adjungit elenchum errorum, qui in libro meo deprehendantur; adjurat ipsos per omnia sacra, per tremendum ultimi judicii diem, velint super istis articulis ingenue & libere suam confessionem edere; prout id ipsorum munus, & communis Christianorum obligatio requirit, qua ab Apostolo parati esse jubentur ad respondendum cuilibet petenti rationem ejus spei, quæ ipsis est. Isthoc tam horribile carmen duo priores ex Theologis surdis auribus accipiebant, certi alieno sese furori socios non addere. Tertius autem, in cujus utero Index ille conceptus erat, magna cum pietatis & conscientiæ contestatione profertur; se utique illis articulis gravissime offendi, seque adeo posse, & debere, & velle confessionem suam edere, prout pium virum & Theologum decet, quantacunque mala ipsum eo nomine sint mansura. O inauditam animositatem! O genuinam Lutheri sobolem, Asinio Tenebrione encomiasta dignam! Ubi nescio an magis miranda sit subtilitas commenti, per quod obrinuisse sese arbitrabantur, ut in eodem negotio ipsi actorum, judicum, ac testium loco esse possent; an vero argutissima ratio per compendium de errore aliquem convincendi, cum *offendi* aliqua se doctrina jactant. Labet tamen quæ-

quærere , cum fieri possit , ut quis ejusmodi offensam mentiat , quo indicio liquido deprehendatur , teneram ejus conscientiam revera lædi ? Nam barbitum , & togam , & faciem ac verba in gravitatem composita , & dejectiones multis velandæ nequitiae inservire , etiam in vulgus notum est . Deinde non dispicio , an satis dignum sit viro , per quem Servatori nostro titulum suum non amplius retinere licet , profiteri , doctrina se aliqua *offendi* . Vulgarium hoc animarum , & humi repentium videtur , & qui nullam aliam rationem , quare sibi quid displiceat , allegare queunt , quam incitiam & stuporem suum . Magni isti & animosi Lutheri , qui clavem scientiæ possident , quosvis errores solis ronchis dissipare debeant . Infirmi in fide , & qui lacte adhuc indigent , super offensione queri solent . Denique nescio an ad rei literariæ incrementa multum faciat , si bonis & alacribus ingeniis hanc velimus legem dicere , ut ne quid in disciplinis rationi subjectis eruere , aut olim tradita limæ subicere laborent , ne fortasse aliqui ista novitate offendantur , aut potius , ne in pudorem dentur antiquæ pedanteriæ consulti , dum vident sua compendia , ex quibus ipsi aliquot regulas & definitiones memoriæ mandarunt , inter quisquilias deinceps habenda . Si tamen hæc ratio superioribus placet , age & nos mentum mentemque sylvescere patiamur , proscribamus bonos libros , insipidas naniâs per totam vitam cantillemus , denique ordinem equitum S. simplicitatis nomina demus ; & sub auspiciis Asinii Tenebrionis internecinum bellum in entia moralia geramus . Ceterum cum confessio unius , ( *Jos. Schwartzii* , ) qui & antea turbulenti ac vani ingenii non pauca specimina ediderat , parum ponderis habitura videretur , a seniore conventus Theologorum indicitur , an tunc fortasse ceteri , ut offendi se quoque faterentur , permoveri possent . Tunc enim conclamatus plane erat meus liber , si abs tota Facultate , ( quæ cur non pari jure atque Concilium Tridentinum immunitatem ab erroribus sibi arrogare posset ? ) fuisset damnatus . Conveniunt ; confidetur . In mensa expositus erat meus liber , & protocollum magnæ molis recens compactum , cui nihil adhuc inscriptum erat . Postquam a seniore causa conventus exposita fuit , prima erat quæstio , quis secretarii vices obire deberet ; quia protocollum seipsum

conscribillare non didicerat. A senioris dignitate id alienum erat. Duo priores Theologi nullam ejus negotii partem attingere volebant. Ultimus ob imperitiam linguæ Danicæ ei scriptioni inhabilis judicabatur. Sic protocolium tunc quidem virginitatem suam immaculatam retinuit. Quanquam autem hoc modo nulla futura erant acta Confessionis Lundensis; hortatur tamen senior, ut nihilominus annotatos in scheda articulos ordine excutiant, & ubi singuli istorum in libro meo extarent, inspiciant. Enim vero alter eorum negat, se judicium ferre posse de libro, quem nondum legisset. Alter causabatur, sese unum vel alterum locum inspexisse, nec deprehendere potuisse, meam esse sententiam, quam ipsi mihi vellent impingere. Heic statim senior non sine ronchis fremere; tu ea non intelligis; ille tertius, qui istos articulos non sine labore enixus est, hæc optime intelligit. Ad quæ & iste incalescebat; ergo solus, inquit, iste intelligat. Et sic irritatis animis sellæ crepant, consurgitur, & confessui finis imponitur. Interea regiæ advenerant, hoc argumento; si quis utique jus sibi competere crederet aliquid circa librum meum monendi; ut mecum privatim conferret, sententiamque & declarationem meam audiret. Si nondum adquiescere vellet, ad Consistorium Academicum referret; quod cognosceret, an digna res foret, quæ ad Illustrissimum Academiæ Cancellarium remitteretur. Omnia tamen placide & modeste peragerentur, citra turbas, & infestas concertationes. Et mox quoque adest Illustris vicinæ provinciæ Præses, ad negotium illud cominus inspicendum. Auditque primo auctorem Indicis, huncque scripto sibi exhiberi postulat. Inde & me audit, ac ut itidem scripto responsum meum ad Indicem paucis verbis concipiam, jubet. Utrumque scriptum in aulam transmittitur. Ex quo cum facile vanitas accusationis intellecta fuisset, aliæ literæ a S. Regia Majestate huc veniunt, quæ silentium adversariis meis injungitur, & ne quis super libro meo deinceps quid movere audeat, severe interdicitur, præter gravem comminationem addito & hoc; S. Regiæ Majestati alias curæ fore, ut si utique iste liber nova censura opus videatur habere, ea res committatur viris idoneis, & qui dextre eandem obire queant; nec unquam id censendi munus illis de-

feren-

ferendum, qui tam præpostere hæcenus circa id heis versati essent. Cum ne istæ quidem literæ ferociam Indicificis compescere valuissent, tertiæ demum literæ Regiæ mense Januario hujus anni huc mittuntur, quibus denunciatur: meritum eum esse, ut severe in ipsam animadvertatur, hac tamen vice adhuc ipsi veniam dari; caveat deinceps clementia regia abuti. Mihi quoque ut actione adversus eundem supersedeam, injungitur. Ac sane pessimum sortita esset exitum spuria ista Lutheri animositas, ni singularis quædam S. Regiæ Majestatis clementia meritis poenis subtraxisset virum, nescio an per mollia remedia emendandum. Sane divino jure calumniatorem manebat eadem poena, quam proximo suo intentaverat. Igitur cum ipse fateatur sibi propositum fuisse ab Academia hac me dimovere, deprecari non poterat, quin ipse abhinc in patriam suam relegaretur. Petebantur porro per meum latus Illustrissimi Regni Senatores, quibus libri mei censura commissa fuerat, quos iste vel crassissimæ inscitæ, vel sædæ negligentæ proterve accusabat; proculcabatur privilegium Regium, ac sæpius repetitæ literæ Regiæ vix tandem contumaciam hominis utcumque frangebant. Quibus omnibus quæ poena debeatur, leges hujus regni non obscure definiunt. Adparet igitur Asinium Tenebrionem parum sublevari auctoritate Theologorum Lundensium. Nec credo magnam ab ipsis eundem inivisse gratiam, utut alias decempedalibus elogiis immane quantum videantur titillari, quod necessitatem mihi attulerit animosa eorum facta publice jam exponendi. Præsertim cum ipse Asinius Tenebrio sui oblitus stupenda mentis vertigine mox meam causam agere incipiat. *Quem tamen*, inquit, *Procerum gratia penes Regem contra omnium insultus adhuc conservavit.* Contra insultus dicit. Atqui solemne est Theologis diaboli in pios molimina insultuum vocabulo nuncupare. Sicuti profecto ex eo genere fuerunt insultus, quos animosi isti viri in me sunt moliti. Quos cum Proceres Illustrissimi tam gratiosè depulerint, ac innocentiam meam adversus malevolorum improbas calumnias protexerint, immortales iisdem eo nomine gratias ago. Et sane cum isti viri me probent, parum puto referre, quid Asinius Tenebrio, & reliqua invidiorum turba, qui famam meam allatrant, de me sentiat.

Spø.

Spes quoque est insultatorum istorum importunitatem, quæ hæcenus molli tantum ratione repulsa fuit, aliquando ita calligatum iri, ut mihi & propriis omaibus negotium deinceps facessere sint desituri.

§. XXXIX. ULTIMO loco producantur quoque adversus me Professores Heidelbergenses. *Nec mirum*, inquit, *periculosas & inauditas Pufendorfsi novitates Theologis orthodoxis vehementer esse invisas*. Periculosas dicit novitates, quia si quis illas eo modo attigerit, quo Afinius Tenebrio, ei maximum infamiæ periculum imminet. *Inauditas* addit. Atqui quos Indicis auctor mihi affinxit errores, obsoleti sunt, & ab Ecclesia Orthodoxa dudum proscripti, & in omnibus auditoriis Theologicis exagitati. *Theologis orthodoxis*, ait, per quos intelligit *κατ' ἱστορίαν* compilatorem Lundensis Indicis, quem jam jam representabimus, hominem nomine suo obcuriorem, & qui, quid probet aut improbet, nemo sanus cicum interdui; & alterum illum, cui specimen senilis puerilitatis visum, damnare, quæ non legerat aut intellexerat, ac negotio tam insulso barbitii sui auctoritatem, velut tutelare aliquod numen, accommodare. Nam quod ullus præterea Theologus periculosas in meo libro somniaverit novitates, nondum audiui; & ne ullas cuiquam deinceps somniare in mentem veniat, hoc scripto efficiam. *Cum jam ante multos annos*, pergit furcifer, *ipsis etiam Calvinianis Professoribus Heidelbergensibus, tam Theologis, quam Iureconsultis, ut & Cancellario Blumio propter novas rerum formas, fictitios terminos, monstrosa entia moralia &c. valde displicuerit, quem ut Philosophum & Philosophiæ Professore magis in studio historico, quam in Theologico vel Juridico versatum autumarunt*. Usque adeo, bellua, omnem tibi memoriam consumsit mentiendi libido, ut propria tua commenta ipse destrueres? Supra enim Heidelbergæ me Calvinistam egisse ganniebas, id est, talem, qui Theologis istis maxime placere laboravit: nunc iisdem me valde displicuisse nugaris. Etsi revera heic lupum auribus teneam. Si enim dicam, me istis viris non displicuisse, Calvinistam oportebit me esse apud illos, qui summam hanc orthodoxiæ perfectionem arbitrantur, cælum nolle introire, si Calvinistis quoque eodem aditus pateat. Sin autem agnoscere velim, quæ furcifer

bla-

blaterat, indignum sane foret candore præstantissimorum virorum amicitiam unquam abnuere. Sed de ea re supra jam dictum. Fui ego plerisque ibi carus; fuerim uni vel alteri invisus. Quid tum? An cuiquam contigit, omnes pariter habere amicos? An non ubique unum vel alterum *piperis granulum* occurrit? Id tamen certum est, neminem toto, quo ibi fui, septennio ullum verbum super ea displicentia ad me fecisse. Nul- lumne mihi amicum aut inimicum ibi fuisse, qui tanto temporis spatio super tam horribilibus rebus aut me moneret, aut easdem mihi exprobraret? Nam quam atrocia sunt ista, ob quæ Heidelbergensibus displicuisse arguor? *Nova rerum formæ*, seu irregulares rerumpubli- carum formæ, ingratum valde pedanticis palatis fercu- lum, *ficticii termini*, quia nupero Imperii recessu pro- hibitum est, nullos amplius novos terminos procudere, & *monstruosa entia moralia*, Equitibus S. Simplicитatis tantam triumphorum materiam præbitura. Nec isthoc satis. *Autumarunt etiam, eum ut Philosophum*, (ut igno- miniam ejus vocabuli declaret Asinius Tenebrio, sanæ rationi bellum indixit: ) & *Philosophiæ Professore*, ( atqui etiam ipsi justitiæ sacerdotes Ulpiano veram, non simulatam Philosophiam affectare dicuntur: ( *magis versatum in studio historico*: ( quia jam magno cui- piam ) Cto gloriosum scripsisse ad prima juris fundamen- ta; *Ægyptii reges suos partim Ptolomæos, partim Pha- raones, partim ARSACIDAS nominarunt*: ) *quam in Theologico*, ( ad hoc enim docendum me Heidelber- geneses evocaverant; ) *vel Juridico*. ( Quid in hoc stu- dio præstiterim, vel non præstiterim, scripta mea osten- dunt. Id tamen non diffiteor, cum anno 1660. a Sere- nissimo Electore Palatino professio institutionum juris mihi clementissime oblata fuisset, me eam recusasse; quod judicarem, non adeo splendidum exserendi ingenii campum esse, si post nongentos nonaginta novem Insti- tutionum Commentarios, ego millesimum adderem. ) De *Cancellario Blumio* nil habeo, quod peculiariter ad- dam, quem vix credo agnoscere tale suum de me judi- cium. Quicquid tamen ille de me judicaverit, sane uti ego cuique suam in judicando libertatem relinquere co- gor; ita & mihi contra fas est, & de istis iudiciis, & de eorundem iudicio judicare. Neque enim heic  
quæ-

quæſitor Minos urnam movet. Audiamus demum con-  
cluſionem tam lepidi ſcripti. *De hiſce novitatibus*, in-  
quit (ſane in meo libro non natis) *quas unico obolo*  
*venales nimis care vendi emique credimus*, (ingenue  
1 agit Aſinius, qui merci ſuæ non enorme pretium ſta-  
tuit;) *ſuo tempore prolixius agam*, (nimirum quando  
a carnifice tergum tibi pro navata hac opera virgis pu-  
blice fuerit conſcribillatum.)

§ XL. CORONIDIS loco addere neceſſum judicavi illos  
ipſos articulos Lundenſes, de quibus ſupra mentionem  
feci; qui huic negotio non parum lucis aſſerre poſſunt;  
ſimulque multos, qui in Germania ob iſtum libellum  
famolum immerito in ſuſpicionem vocantur, liberabunt.  
Eorum compilerator eſt *Jofua Schwartz, Theologiæ Doctör*  
*& Profeſſor in hac Academia*. Qui tamen publico pro-  
grammate d. 17. Kal. Jul. heic publice circa mutatio-  
nem Reſtoratus affixo teſtatur, illos per Aſinium Te-  
nebrionem plagio ſibi ſubductos, & aliquot in locis in-  
terpolatos, ſeque inſcio typis exſcriptos. Verba ad iſt-  
hanc rem ex dicto programme hæc ſunt: *Homo rudis*  
*quidam & pravus illa non ſolum, de quibus eſſe aliqua*  
*diſſenſio cœpit, per apertiſſimum plagium, tantumque*  
*non calumniandi nocendique ſtudio typis nuper divulga-*  
*re, ſed ineptis etiam ſuis & improbis commentationibus*  
*adſperſis, infamare omnia ſuſtinuerit; quando ita meum,*  
*at honorum omnium de iſto, eſt vorum illud Pauli ad*  
*Galatas, ὁπῶλον καὶ ἀποκρίſανται οἱ ἀνταγώνιſται ὑμῶν?*  
Repræſentabo autem illos articulos de verbo ad verbum,  
prout illi ſuperiori æſtate Illuſtri vicinæ provinciæ Præ-  
ſidi fuerunt ab Auctore exhibiti. Ex quo adparebit,  
quid polituræ illis articulis poſt acceſſerit, & quam im-  
proba metamorphoſi illud innoxium ante & eruditum  
ſcriptum in ſædiſſimum libellum famolum abierit. Ut  
hoc exemplo moniti eruditi accuratius ſua ſcrinia obſe-  
rate diſcant, ne tam facile ejuſmodi Harpyiæ, quæ  
contactu ſuo omnia ſædant, eadem diripere queant.  
Quod enim antea meram ambroſiam ſpirabat ſcriptum,  
poſtquam in Aſinii Tenebrionis manus incidit, nil niſi  
oletum eſt.

Index præcipuatum Novitatum, quas Dn. Prof.  
PUFENDORFIUS libro ſuo de Jure Nat. & Gentium hic  
apud nos edidit.

DE



## DE THEOLOGIA IN GENERE.

I. DOCET, quod in articulos fidei non abeant, quæ proprie ad Jus Naturæ pertinent, idque in præfatione fol. 2. fac. 2. Neque enim si qui ex illis &c. Ad hunc articulum ego in ltricturis extemporaneis ita reposueram : *Per articulos fidei Auctor intelligit capita religionis salvificæ, ex revelatione divina profluentia, & ad salutem æternam spectantia. Jus autem Naturæ, quod hoc libro traditur, ex lumine rationis cognoscitur, & tranquillitatem hujus vitæ pro fine habet. igitur demonstrandum Schwartzio est, articulos fidei esse, qui ex lumine naturæ demonstrari possunt, & non ad salutem æternam, sed ad tranquillitatem hujus vitæ ultimata tendunt, adeoque universam Philosophiam moralem & Jurisprudentiam esse articulos fidei. Probet quoque statim articulum fidei fieri, quicquid Theologi quidam sibi tractandum sumunt, etiam dum falcem mittunt in alienam messem.* Adparet puto ratio, quare primogenitum suum jugulaverit ipse Indicis pater. Sicuti primogenito asini, quod ovæ redimere dominus nolebat, cer-vices frangebantur, Exodi XIII. 13.

II. STATUIT, Civitatem ejusmodi doctrinæ personare debere, quæ cum fine & usu civitatum congruat; explicatque hoc ipsum non tantum de scientia humana, sed etiam ea, quæ est circa cultum Dei. Sic enim p. 910. Inde expedit ut publicæ &c,

## DE SCRIPTURA SACRA.

I. QUÆSTIONEM facti hoc esse docet, de quo non nisi ex divinarum literarum auctoritate constare potest : utpotè doctrinam de statu integritatis & corruptionis. In præfat. fol. ult. fac. 2. Enimvero præterquam &c.

( EGO reposueram : *Heic nulla esset novitas, si Schwartzius intelligeret, quid sit quaestio facti. Quo audito patrem sua proles parum decere visa fuit, eoquæ illam exposuit, )*

## DE DEO.

I. NEGAT Deum naturæ suæ legibus teneri, ut hoc vel illud agere non possit; affirmatque omnia illa, quæ

quæ non agere posse dicitur, ex placito non agere, legemque sibi ipsi non nisi ex placito esse, p. 133. §. 3. Quod autem idem quædam &c. confer p. 166. §. 6.

II. JUSTITIAM ad Deum propter similitudinem saltem, talem nempe agendi modum, qualis est in hominibus, applicari, Deoque *ἀνάλογως*, imo etiam minus Deo, quam hominibus competere, p. 134. Hinc & quando &c. pag. 166. §. 6. pag. 177. §. 12. istis locis argumentum a minori ad majus ductum videtur, conf. p. 164.

III. DEUM non principaliter propter essentiam, sed propter potestatem, voluntatem & beneficia coli. Idque primum implicite p. 79. his verbis: Adeoque legibus obeditur, non principaliter propter rem ipsam, sed propter voluntatem præcipientis. Deinde explicite pag. 92. Inde etsi impia sit Epicureorum, &c.

## DE HOMINE IN STATU INTEGRITATIS.

I. DOCET, illum statum, in quo homo absque ulla cura vel ope ab alio homine accedente consideratur, longe miserrimum esse, ne illo quidem excepto, in quo homo iusta statura ac robore præditus fuit, quum primum existere cœpisset, hoc est, statum Adami ante Evam, aliosque homines creatos existentis, p. 140. §. 2. Si igitur, &c. (Ad ultima verba hujus articuli ego monueram: *Obiter petit, ut Schwartzius sibi ostendat, quinam sint illi alii homines, præter Adamum & Evam a Deo creati. Ne igitur Præadamitas videretur introducere velle, ea verba expunxit.*)

II. DOCET primum ac recentem orbis incolam, hoc est, Adamum servari non potuisse, nisi Deus ipsum necessaria vitæ media adhibere peculiariter docuisset, p. 140. §. 2. Inde licet de originibus &c.

III. QUOD homo prout ex creatione physice perfectus extitit, sine ordine & decore, reluctanter habuerit voluntatem, brutisque ipsis pravior fuerit, quæ causa, quare lex illi superaddita sit, pag. 4. §. 4. Nobis illud jam &c. p. 3. §. 3. Exinde &c. p. 136. §. 5. 6.

IV. ATTRIBUTA vel Entia moralia originitus homini physice perfecto superaddita saltem, non concreata esse, p. 3. §. 3. 4.

V. PRI-

V. PRIMOS homines prout in origine & statu suo primævo se habuerunt, non mortaliū tantum nomine appellat, sed tantam etiam illis imbecillitatem tribuit, ut sine peculiari cura servari non potuissent. Mortalitatē etiam causā genus humanum diversitate sexus, propagandique facultate creatum esse, p. 140. §. 2. *Inde licet* &c. p. 750. §. 2. *Postquam* &c.

VI. RECENTEM & solitariū orbis incolam attonitum, hoc est, coniternatum stetitisse.

( Ad ultimum vocabulum hujus articuli reposueram: *Probet Schwartzius fundamentalem hunc articulum fidei: quod Adamus quando primum hanc mundi machinam mirābundus adspiciebat, steterit non vel jacuerit vel sederit. Hinc illud stetitisse mutatum in fuisse. )*

## DE PECCATO ORIGINIS.

I. ENTIA moralia, eorumque effectus originis etiam considerata amitti vel deleri pro lubito posse, sine ulla mutatione vel corruptione ejus rei, cujus antea fuerunt, p. 4. §. 4. Ac per eadem ipsis & p. 19. §. 23.

II. NON posse nobis imputari, quæ ex causis extra directionem nostram positis proveniunt, vel vires nostras excedunt, p. 64. porro ut aliqua actio &c. p. 66. §. 8. p. 37. §. 3. nec vitio nobis verti &c.

( Quia responderam, hanc regulam tantum ad forum humanum pertinere, ergo & hic articulus in manus Asinii Tenebrionis non incidit. )

## DE PECCATIS ACTUALIBUS.

I. NEGAT quædam per se citra omnem impositionem honesta vel turpia esse, omnesque actiones hominis, adeoque ipsum furtum, homicidium, & similia natura sua actiones indifferentes esse, p. 25. 26. NB. 27. Hoc enim modo &c. conf. p. 47. p. 14. p. 161. §. 4.

II. QUOD cæli solique genius, & humorum in corporibus temperatura voluntatem hominis ad peccata vertere faciat, p. 53. Inter illa igitur &c.

( Hic reposueram: *Auctor non dicit cæli solique genium disponere homines ad peccata, sed ad certum genus actionis: Hoc ipsum autem qui credere non potest,*

pa-

*parum sese perigrinatum fatetur.* Hæc causa fuit, cui articulus hic in cunis elideretur. Nam Schwartzius per integrum octiduum Parisiis fuit; & in Hollandia cum crumenisecis ludens viaticum amisit.)

III. PECCATUM alienum exsequi peccatum non esse, p. 1028. 1029.

## DE LIBERO ARBITRIO.

I. IN ipsa facultate apprehensiva & iudicio naturalem inesse rectitudinem, vel intellectum hominis naturaliter esse rectum p. 37. §. 3. p. 72. Nam id utriusque &c.

II. OMNIBUS suis affectibus vel passionibus imperare hominem posse, verbis CARTESII, quæ sua facit, statuit, p. 55. Illud instituto nostro &c.

## DE LEGE NATURÆ.

I. GENUINUM, sufficiens & adæquatum principium cognoscendi legem Naturæ esse socialitatem, p. 181. §. 14. p. 183. §. 15. NB. p. 188. §. 19.

II. LEGEM naturæ insitum quendam vel connatum habitum esse negat, primum quidem implicite toties, quoties entia moralia naturæ perfectæ superaddita saltem vel superimposita esse statuit, item quoties discrimen honestorum, aut turpium ex informatione, assuetudine & discursu esse docet, id quod potissimum p. 179. 180. 190. facit. Deinde explicite p. 178. §. 13. Quam ad rem &c. adde p. 19. Nunquam enim.

III. ESSENTIALEM Dei iustitiam prototypum vel fundamentum Juris naturalis esse negat, p. 163. §. 5.

IV. NEGAT igitur Legem naturæ esse æternam, p. 25. §. 6. & sane p. 28. Ex quibus adparet.

V. ENTIA moralia omnia, adeoque etiam leges naturæ, mutabilia esse docet, p. 19. §. 23.

VI. PRINCIPIUM essendi vel fundamentum Legis Naturæ socialitatem esse docet, vel Naturam, quatenus a Creatore socialis facta est, idque statim in præfat. fol. ult. Ceterum id quoque monere visum. &c. Quid porro planius est, quam hoc.

VII. PLURES uxores quam unam domum duxisse, contra jus naturæ, quod materialiter decalogus est, non esse,

esse, p. 776. §. 16. Sic 2. Samuel. XII. 8. Add. p. 778. §. 17. 782, §. 19.

D E D E C A L O G O.

I. DECEM præcepta, prout duabus tabulis inscripta, & per Moſen populo Iſraelitico promulgata fuerunt, civiles leges ejus populi fuiſſe, p. 1025. §. 4. Quando tamen.

II. NUDAM illam & univerſalem cognationem, quæ ex ſimilitudine naturæ reſultat, cauſam vel fundamentum eſſe, propter quod homo hominem diligit, p. 6. §. 7. In ordine autem &c. p. 187. §. 18. Nam revera.

III. DICTUM Salvatoris, quo jubemur proximum noſtrum diligere, ſicut nos ipſos, explicandam eſſe non tam de gradu dilectionis, quam de hujus ſinceritate, p. 226.

IV. VALDE dubium eſſe, an invaſor aliquis ſub proximi nomine venire poſſit, ibid. p. 226.

(Heic regeſſeram: Si Schwartzius probaverit ex Luca X. 36. 37. latrones viatoris iſtius ſeminis proximis fuiſſe: Auctoꝝ quoque credet, ipſum & ſocios bonorum virorum officio ſunctos, dum eum tanquam hæreticum infamare inſtituunt. Credo poſthæc matrem ſuis contemnit infans.)

V. NEMINEM ſibi ipſi obligatum eſſe, niſi reſpectu ſocialitatis, quo reſpectu etiam homo Dei ſervus, p. 86. & præfat. fol. ult. fac. 1. Dantur ſane &c.

VI. NULLAM eſſe morum honeſtatem & innocentiam ubique & extra ſocietatem ſervandam, ſeu citra reflexionem ad alios homines in præf. fol. ult. fac. 1.

VII. IN naturali ſtatu neminem altero ſuperiorem eſſe, cujus arbitrio ſuam voluntatem, ſuumque judicium ſubmittat, p. 143. 763.

D E M A T R I M O N I O.

I. QUICQUID juris habet mas in ſceminam, ex ipſius conſenſu habere, p. 763.

(Ego regeſſeram: Adde tanquam ex cauſa ſecunda & proxima, quæ reſtrictio extat, p. 770. lin. 15. Et ſic iſte embryo vitalis eſſe deſiit.)

Puſend. Epiſ Sc and. T. IX.

G

DE

## DE MAGISTRATU POLITICO.

I. IMPERIUM Magistratus in subditos ex pactis , Deumque causam saltem adprobantem , hoc est , moralem esse . p. 897. 898. 899. 900. 902.

( Hic repolueram : Sine dubio ad finem properantis Schwartzio somnus obrepserit , quando istum articulum fidei excerpserit . Nam expresse Auctor pag. 899. sententiam Grotii rejicit , quasi Deus ex postfacto tantum civile imperium adprobaverit : & antecedenter Deum id introduci voluisse asserit . Præterea eo loco de causa proxima & secunda imperii civilis agit . Inde probabile est , somno discusso a matre proli manus illatas ; ne per Asinium Tenebrionem pars libelli famosi fieret . )

II. PRINCIPI injuriam inferenti , si evitandi locus non sit , vi occurrere posse , p. 1004. 1006. 1007.

## DE MINISTERIO ECCLESIASTICO.

I. Si minister suo jure , seorsim sibi competente , hoc est , ita ut hoc jus non dependeat a magistratu , agat , dominium mundanum contra magistratum sibi sumere , p. 913. Denique penes &c.

( Ego reponeram : Cautius ut animum suum in Principes Schwartzius obtegat , suadet Auctor . Interim ubi Schwartzius distincte explicaverit , quousque illud jus ministris seorsim competens extendat , Auctor ab illis , qui ipsius librum adprobarunt , percunctabitur , quid ad hunc articulum sit respondendum . Hoc audito Schwartzius abortum fecit . Et inde est , quod Index iste , capite & cauda truncatus in nefarii plagiarii manus inciderit . )

Hactenus Lundensis Index Novitatum.

Ut puto ita depexum dedit Asinium Tenebrionem , ut cuivis in proclivi sit futurum judicare , quo loco & Index Novitatum , & ejus auctor editorque sit habendus . Sed & illud quivis cordatus agnosceret , ex inevitabili necessitate ad existimationis meæ defensionem isthæc mihi fuisse publicanda . De cetero quid præmii mereantur , qui tam scædo exemplo grassantur in famam bonorum virorum , & qui pro modulo ingenii Sparram , quam sortiti sunt , ornare laborant , magistratui curæ erit ; cujus auctoritas ne a civibus suis ludibrio habeatur , ipsius quam maxime interest .

SAMUE-

---

# SAMUELIS PUFENDORFII EPISTOLA

A D

PLURIMUM REVERENDUM ATQUE  
CELEBERRIMUM VIRUM

DN. D. JOH. ADAMUM SCHERZERUM,

THEOLOGUM APUD LIPSIENSES PRIMARIUM,

SUPER CENSURA QUAPIAM IN LIBRUM  
SUUM INIQUE LATA.

---

PLURIMUM REVERENDE, ATQUE  
CELEBERRIME VIR.

**A**NTIQUA est ista eruditorum fors, qui prius inventis aliquid addere, aut polituram adhibere sunt aggressi, ut primum fere hunc laboris sui fructum percipiant, varia variorum judicia incurrere; ac sæpe malevolorum aut sciorum dentem lassare. Scholastica cumprimis ingenia quibus morbis agitentur, quis est qui ignoret? Invidere alterius famæ, arreptam semel opinionem mordicus defendere; carpendis aliis auctoritatem sibi conciliatum ire, clarorum virorum inimicitias inclarescere velle; intemperie litigandi laborare, velut epidemica isti ordini labes semper fuit. Quid ergo mirum, si & mea scripta unius vel alterius supercilio non omni ex parte se potuerunt adprobare? Et qua fronte postulare velim; ut omnia mea in oraculorum vicem ab aliis adorentur; eum ipse nunquam circa res rationi subjectas in ullius

magistri verba jurandum mihi duxerim? Aut cur ægre feram; quam ego in alios innoxiam libertatem mihi summi, eandem alios in me quoque exercere? Enimvero quæ in me tentata sunt, postquam illustrandæ disciplinæ juris naturalis meam quoque symbolam conferre institui, nescio ad quam morbi speciem referenda sint. Ut enim inter officia heroicæ pietatis referre velis, sententias non intellectas, aut maligne interpolatas distortasque hæresum vocabulo diffamare; tamen libellos famosos publice edere, in duellum provocare, de sicariis immittendis minas jactare, supra ludimagistrorum rabiem est. Sic facile est, ut *Vigilis* alicujus vecors maledicentia contemnatur. Ast quod abs tam gravi Collegio apud populares meos liber meus tam atroci notatus sit, censura, id plane præter omnem meam opinionem accidisse fateor; cum potius in istis non leve mihi præsidium positum adversus aliorum iniquitatem arbitrarer. Et sane cum viderem, tantos viros ex libello famoso de me sententiam tulisse, non poteram non graviter commoveri, non tam quod apud intelligentes ea res existimationem meam læsura esset; quippe cum facere injuriam, non pati, turpe sit: sed quod necessitas mihi foret imposita secus sentiendi de illis, quos sincero affectu prosequi perpetuo cupiebam. Animus tamen erat tantam injuriam tacite concoquere, eamque natali solo, quod me ac mea studia quondam tam benigne fovit, condonare; imprimis quod spes esset, oblivione eandem paulatim sepeliendam, diemque temere præcipitata judicia emendaturam. Ast id non amplius integrum est per importunitatem *Christiani Vigilis*, sub quo vocabulo *Dn. Fridericum Gesenium Superintendentem Garlebiensem* latitare fama publica & amicorum literæ indicant; qui in impudenti suo scripto tam odiose Saxonicæ censuræ mentionem injicit, ut in me, meosque injurius sim, si ejusdem iniquitatem ulterius dissimulem. Præsertim cum apud imperitos tam speciosa nomina a malevolis magna cum ambitione jactentur, velut quibus ipsorum causa immane quantum sublevetur. Quod autem isthoc scripionis ad Te potissimum, *Vir Celeberrime*, dirigam, ejus ratio inferius satis adparebit. Visum est enim jam una fidelia duos parietes dealbare, & ad maledicum *Vigilis* libellum pauca quædam reponere; ut agnoscas, quam



quam turpe Tibi sit futurum, si ab istorum partibus stare videaris, qui ruditatem & malitiam suam tam impudenter apricantur.

PRÆTER Sycophantias igitur & maledicta, quæ impuro scripto passim spargit *Vigil*, tria sibi præcipue agenda sumit, unum est, ut *iniquitatem in jus naturæ* me admisisse arguat, quod retorsionem ipsi impeggerim ob attributum Fratri meo aut mihi *Sinceri* WARENBERGII *de divortio dialogum*. Heic si quid efficere volebat *Vigil*, probandum erat, vel plane id scripti a se nobis non fuisse tributum, vel vere tributum. Horum cum neutrum præstare possit, nugas tamen agere mavult, quam delictum suum agnoscere. Ac sane nulla erat causa, quæ *Vigili* necessitatem imponebat jejunum illud scriptum emittendi. Horribile mendacium est, in *Svecia controversiam agitari super cœlesti monogamias præcepto; triviales ibi discursus in congressibus publicis ac convivis solemnioribus ea super re frequentari*. Sanè illis qui in *Svecia* habitant, de hoc nihil auditum fuit. Neque Dn. D. MËNZERI *epistola* tale quid tradit. Non enim, si unus vir super epulis, incertum serio, an ingenii exercendi, vel informationis petendæ causa cum erudito viro quid disernerit, id statim trivialis & publica erit controversia, ut non solum fato hujus Regni sit indolenscendum, sed & vicinis a contagio periculum immineat. Et quidem ut *Vigil* potissimum ingruenti malo obviam ire debuerit; cui potius incumbebat, auditores suos monere, ut probæ notæ cerevisiam coquant. Sane enim si quid heic in moribus aut dogmatibus labet, non deerunt idonei emendandi auctores: nec unquam eo nobiscum res redibit, ut Præfulis Gardelebiensis opera Ecclesiæ nostræ indigeant. Utut non sine fastu creper; *se a Deo Ecclesiæ non ita uni destinatum, ut non totius etiam salutem quarere debeat*. Nam valde dubito, an Pontifex Romanus Præfulem Garlebiensem æquo animo collegam sit admissurus. Quid porro opus erat *Vigili* scripto, cum jam dialogus iste a Dn. D. Menzero, quem ea res propius spectabat, abunde esset confutatus? Cujus tamen æmulum se ferre per modestiam abnuitt, dum ait: *ab initio se sibi potius quam aliis scripsisse*. Credas graves stimulos carnis sensisse hominem, ut ægre a pluribus uxoribus ducendis absti-

nere se potuerit, nisi demum emphasin phraseos, & *erant duo in carne una*, sibi ad nauseam inculcasset, ardoribusque suis ab aquis diluvii, & igne Sodomorum, syllogismisque in forma propositis medicinam peteret. Sed si tanta scribendi libidine miser ægrecebat, cur Pufendorsium nomen vellicandum sibi sumebat? Cur non *Dn. D. Menzeri* prudentiam imitabatur, qui rem tractasse contentus, de auctore parum sollicitus est? *Fama publica*, inquit, *sufurrabat*, *Pufendorsium esse auctorem trivialis discursus in Suecia de polygamia divinitus non interdicta*. Ast antequam *sufurris* fidem adhiberet præsul, evoluisse debuerat illud *Siracidis* XIX. 15. Quin ipse *Vigil* agnoscit, a me non potuisse Holmiæ discursus disseminari, qui in Scania dego, in quam eo tempore vix biennium erat cum adpulissem. Fratrem autem meum ejus *opinionis auctorem & professorem* fuisse, effrons plane commentum erat: quem constat proximis novem annis apud exteros perpetuis legationibus detentum, hoc spatio non nisi semel paucos per menses Holmiam invisisse. Quod ipsum æque facile nosci poterat; quam quo munere is quondam in Suecia functus esset. Nil ergo habet, quod indignetur *Vigil*, si ad famam nostram vindicandam retorsione in ipsum usum sum. Cur enim remedium jâris communis nobis solis non pateat? Neque vero in ea retorsione dictum quid est, quod leges non permittunt. Nam ad ipsum solus §. 3. *Apologia* spectat. Et quod *Vigil* in Asinii Tenebrionis elogia involare velle videtur, id si vel maxime ego non invidiam, ipse tamen Asinius intercedet, qui per ista martyrum se coronam meritum arbitratur. Frustra porro ad famam *Vigil* provocat, ejus falsitas facillime deprehendi poterat; & quæ nondum inveterata, aut longo meo silentio confirmata erat. Frequens autem est; ut ubi plures de aliquo sinistri quid sparserint, ut ille talitrum accipiat, qui primus id publice spargere ausus est. Ergo caveat deinceps *Vigil* nasam suam ante primum, agmen protendere. Ridiculum autem est; quod scribit, me debuisse *scandalum*, quod *Warenbergii scripto Ecclesie obvenerat*, tollere. Nimirum quia jam scandalum dat is, de quo mendacia sparguntur, non is qui mentitur. Sed nec dignitas sua *Vigilem* tutum præstabat, quo minus retorsionem audiret. Non enim credit

dit Pufendorfius, Præsulatum Garlebiensem id habere fastigii, ut injurias inde profectas tacite deplurire debeat. Intentio pia, quam jactat, excusare *Vigilem* potuisset, si privatim scripta epistola me znouisset. Sed ubi publice fama nostra læditur, defensio nobis patet etiam adversus stolide credulum, aut inconsultæ pietatis specimen edere parantem. Quin si *Vigil* aliquem ex suis cerevisiæ coctoribus, famæ mendacio deceptus, gravis cujusdam facinoris, pro suggestu nominetenus arguisset, injuriarum postulari poterat. Et mihi vitio verteretur, si in conspectu Orbis eruditi scriptum uti vocat *atheum, venenatum & perniciosum* falso impingenti retorsionem opposuero? Nisi forte negare velit, se unquam id scriptum mihi attribuisse; sed tantum illi, qui mihi alter ego sit. Atqui ipse fatetur, in sua *scriptione ex publica fama Pufendorfi* nomen menti observasse, (quæ ipsius est latinitas,) & suum scriptum forte *Bessavium fortunam habuisse*. Ergo vel meo nomine, vel ejus, qui mihi alter idem est retorsionem cape. Quis denique credat, sensum communem illi homini inesse, qui me jubet *illam calumniam, illudque mendacium ea, qua par est, evidentia probare*? Adparet Garlebiæ incognitum esse, quod actori probatio incumbat. Quanto satius ergo fuerat *Vigili* ægrotos imitari, qui amaras pilulas non diu intra dentes revoluunt, sed confestim deglutiant. Nam hærebit jure impacta ipsi retorsio, quousque ingenue injuriam suam agnoverit.

ALTERAM partem scripti defensio Asinii Tenebrionis occupat; de qua vel ideo non magnifice sperare possumus; quod ipse clientem suum ignorat. *Plurima dixit in levum conversus; at illi dextra jacebat Bellua*. Sane enim quem tam suavi fratris & socii vocabulo compellat Asinium *Vigil*, ne pilum quidem Theologi habet: sed *Utriusque Juris Doctor* est. Idcirco inquam est, qui *Indicem Novitatum* ipse veterator jam perpetuis damnatum tenebris denuo protraxit, & nefariis modis interpolatum edi curavit. Hoc igitur parente iste scærus, a primis suis genitoribus abdicatus, deinceps censetur. Nec ullum unquam sani sincipitis Theologum tam absurda ambitio vexabit, ut isthanc deformem prolem sibi velit vindicare. Et quia tanta rerum novarum prurigne

laborat Præful Garlebiensis, quædam circa hoc negotium ipsi antehac ignota pandam. Cliens igitur ipsius vocatur Nicolaus BECKMANNUS *Heida Holsatus* U. J. D. & in *Academia Carolina* Ex professor; qui & antea edita *Medulla Justiniana*, & *Commentario ad prima Juris fundamenta* suam in exscribendis libris solertiam satis ostendit. Huic viro regentium Indicem Novitatum orbis debet. Quam tamen operam non gratis insumsit. Nam & ipse judiciali sententia infami relegatione testis damnatus, & *Index Novitatum* manu carnificis comburendus insigne lumen auctori scenerabit. Dignum ergo jam adparet patella operculum Asinii clientis patronus *Vigil*. Quem quod asinum subinde & forciferum salutarim, mitius irascetur *Vigil*, si ingenii mei simplicitatem cogitare velit, quod scapham scapham, & ficum ficum vocare amat. Sed & illud mali advocati specimen exhibet *Vigil*, quod si vel maxime daremus, ipsius clientem ex sacro esse ordine, ejus causam turpi prævaricatione destituat. Si enim agere quid volebat, macilentus iste Judex, in justum systema inauditæ cujusdam Theologiæ erat redigendus. Aut si hoc specimen calumniæ ingenium ipsius superabat, saltem ab impudentia subsidium erat petendum, & importune clamandum; illos errores utique in meo libro adstrui. Quorum cum neutrum faciat, sed nil nisi *Atlantem ipsi incumbentem*, ac intemperiem Zeli crepet, & pauculas propositiones philosophicas imperite vellicet; videri potest, virum istum non obscure arguere, quasi per inscitiam aut præcipientiam circa horrendos errores tumultum moverit, qui nusquam nunc adparent. Sed & videtur novus iste caudicus quasdam sententias ponere, quas nescio an omnes citra granum salis sint admitturi. Veluti quod de censura Theologorum in disciplinas rationi subjectas jaçtat. Sane enim peculiaris disciplina est Theologia, tum ab aliis scientiis, tum ab ipso quoque jure naturali distincta. Licet enim Theologia moralis plurima inculcet præcepta, quæ & ipsa jus naturale tradit: hujus tamen, non illius, disciplinæ est, eorundem necessitatem ex ratione demonstrare. Unde sane nihil repugnat, dari Theologum, articulorum fidei Christianæ gnarum, sed qui in aliis scientiis sit plane hospes. Hinc sane impu-

den-

denter censuram sibi arrogabit in ea, quæ non didicit. Quod si autem quis cum Theologia alias quoque disciplinas se conjunxisse gloriatur, illi tamen nec alia via in hisce addiscendis; quam ceteri, progressus est, nec ideo quod Theologus audit, peculiare quasdam inspirationes sensit; cum & ipsa Theologia non alia jam ratione, quam ceteræ disciplinæ, addiscantur. Unde si circa alias disciplinas moliri quid velit Theologus, non pro imperio, sed rationibus rem geret, & ex principiis cuique disciplinæ peculiaribus; nisi ea principia falsa esse demonstrare possit. Tum si quid a recentioribus tradatur, quod in ipsius dictatis & collegiis manuscriptis non invenitur, non statim heresim & atheismum proclamet; sed num illud revera ita se habeat examinet. Denique si imperite procedat, non minus eruditis ludibrium se credat debere, quam si alium ratio fugiat, præsertim si cum ignorantia fastum aut pertinaciam conjunxerit. Ubi porro summis civitatum Rectoribus ipsorum Theologorum scripta sub suam censuram revocandi jus est, quo obtentu isti in aliarum scientiarum doctores dictaturam exercebunt, nisi quatenus sibi ab istis peculiariter sit delegatum? Præterea nisi Theologos supra communes leges ponere vellet *Vigil*, non erat, quare tam indignum facinus clamitaret, si cujuscumque sacerdotis injuria & vesania ab aliis fortiter repellatur. Equidem merito prudentes rixas cum sacerdotibus vitare monent. Sed si ipsi ultro in nos irruant, num cervices nostras pedibus eorum calcandas prosterneamus? Aut si unus vel alter Ecclesiæ minister hostili in nos animo feratur, num ideo ceteris minus amicis uti nobis licebit? Sane enim ut & ipsi inter se capitalibus odiis dissideant, nihil novi est. Quæ insuper *Vigil* de persecutione philosophiæ Cartesianæ gannit, me non tangunt. Non enim, quia sacerdotes in *munitissima* Helvetia eam ex scholis suis exturbarunt, ideo acu rem tetigerunt, qui Indicem Novitatum architectati sunt. Et dubito, an quicquid ubique est eruditorum, Helvetiis sit assurecturum. Sane mea sententia præstabat inquirere, num ea Philosophia cum rerum natura congrueret, quam quousque illa a vulgatis scholarum dogmatibus discedat. Novum quod si dogma, an vetus, modo verum, nihil interest. Et si veritas nova fuerit eruta, non difficile erit, eandem  
cum

cum antiquis veritatibus conciliare. Maneat porro usus, tollatur abusus; abs quo ne vulgata quidem philosophia immunis est. Et fallor an plerique non tam pro veritate pugnant, quam ne nova philosophia introducta ipsi in tironum classem rejiciantur. Sed, quid Cartesio fiat, ejus sectatores viderint. Denique nec id operæ, quod ego in falsis Hobbesii sententiis destruendis collocavi, ideo minoris est, quia *Richardus Cumberlandus* eodem anno in diversa regione in eundem arma movit. Ergo hæctenus nihil attulit *Vigil*, quo clientis sui causa sublevaretur; nisi forte in eo sibi vehementer placet, quod sacra dicta tam profane adplicare calluerit, aut protritum illud Zeli pallium tam putide jactet, quod nunquam non velando sacerdotum furori inservit.

Ad extremum tamen non vulgaris caufidicinæ specimen exhibet *Vigil*, dum saltem sibi comparatum Asinium probum atque eruditum virum haberi debere perterrit. Et sane si confidero, qua via *Vigil* suam in eruendo naturali jure felicitatem voluerit ostentare, jam Asinius sublimi vertice sidera ferire videtur. Ac primo quidem carpit, quod socialitatem (non ad petitum socialitatis) constituerim fundamentum legis naturalis. Per fundamentum ego intelligo primariam propositionem in disciplina juris naturalis, extructam ex observationibus a natura rerum & hominum petitis, sub qua ceteræ propositiones facile possint subsumi & in eandem resolvi. Eodem sensu, quo in Sacris Literis dilectio summa legis dicitur. Sicuti & ea sententia Platoni, Aristoteli, ac cum primis Stoicis est familiarissima; ac fundamento HOBBSII de conservatione sui ipsius præcipue opponitur, quod & ipse CUMBERLANDUS mecum oppugnat. Unde neque socialitas natura humana prior constituitur, neque ab hac via jus naturale inquirendi ratio, & quicquid luminis homini post lapsum adhuc superest, excluditur; uti *Vigil* sibi persuadet. Ea porro socialitas non in illis tantum terminatur, qui peculiari nobiscum societate juncti sunt, sed ad omnes omnino homines porrigitur. Et leges universalis istius socialitatis quarumvis particularium societatis leges antecedunt, iisque limitationem & exceptionem addunt. Id quod ex *Operis* mei p. 185. 186. & L. III. c. 1. ac passim adparet. Ut nullus plane locus sit *peffimis* illis *consequentis*,  
quas

quas *Vigil* nectit, quibus jam a me occursum est. L.II. c. 3. §. 10. 11. Quin & iisdem consequentiis Salvatoris nostri sententia de dilectione proximi obnoxia est, si Garlebiensi ratiocinatio valet. Sic illud quantum malitiam arguit, quod *Vigil* hæcce verba nostra calumniatur: *Religio quatenus ad disciplinam juris naturalis pertinet, intra sphaeram hujus vite terminatur*: quæ latius explicantur in *libello nostro de Officiis* L. I. c. 4. §. 8. 9. Ergo ni fallor Garlebia nova jam religio surgit, quæ citra operam Salvatoris nostri ex sola illa noticia circa cultum Dei, quam in hac conditione ex rationis lumine haurimus, salutem æternam confert. Habent Garlææ doctores, quod sibi de tali præfule gratulentur. Parè rabie carpitur dictum, jam Asinii supercilio notatum; *Expedire, ut publice civitas ejusmodi doctrinis personet, quæ cum fine & usu civitatum congruunt, simulque animi civium a puero istis imbuantur*. Quæ sententia ex L. VII. c. 4. §. 8. desumpta de directione duntaxat doctrinarum, quæ ex lumine rationis profluunt, ac præcipue moralis philosophiæ & juris naturalis, agit. Nam de potestate summorum imperantium circa sacra Christiana tractare consulto abstinui, nec id ratio operis mei ferebat. Ceterum quo minus ego deinceps quoque ita doceam, neque Jesuitæ, neque Anabaptistæ, neque Millenarii, neque Quackeri, neque universa fanaticorum cohors, neque Asinius Tenebrio, neque *Vigil* me prohibebunt; qui omnes heic amice conspirant, & facultatem turbas in republica movendi hoc dogmate subtrahi indignantur. Nam quod aliqui afferunt dictum *Matth. X. 34. 35.* id quale sit, etiam pueri vident. Nisi forte isti homines in Sacra Biblia Indicem Expurgatorium moliantur, in quo primo omnium Salvatoris nostri elogium, *Princeps pacis*, expungatur; tum præterea virtutes, caritatis, veritatis, humanitatis, mansuetudinis, humilitatis, patientiæ, facilitatis, ad condonandas offensas, & similes, quæ ad pacem alendam faciunt, longe exesse jubeantur; & in eorum locum Christianis commenderetur odium proximi, superbia, morositas, turbulentia, ardor vindictæ, pertinacia, libido calumniandi, & similes, quæ fini & usui civitatum, *Vigili* & sociis tantopere inviso, quam maxime repugnant. Nec dubium est, quin tunc *Vigil* cum suo cliente illustre

stre Christiani orbis lumen sit futurus.

DENIQUE circa quæstionem de origine moralitatis in actionibus humanis nil nisi nugæ & virus eructat *Vigil.* Eum moralitatem antecedenter ad voluntatem Deï se habere absque sensu dicitur. Cum enim Deus liberrima voluntate creavit hominem, id est, animal rationale ac sociale; quomodo voluntas Dei excludi inde queat, quod eidem obligatio observandi legem naturalem sit iuncta? Si ad totum subjectum producendum voluntas Dei concurrit, cur eadem a præcipua istius affectione removetur? Sic quando dicitur: ea de quibus lex naturæ disponit, *per se* sunt honesta aut turpia: istud *per se* opponendum est dispositioni legislatorum humanorum; nequaquam autem vel dispositioni Creatoris, qui legis naturæ auctor est, vel congruentiæ aut aberrationi istorum actuum a natura hominis rationali ac sociali, ex qua lex naturalis intelligitur. Ac fateor, me non ita esse perspicacem, ut videam, quod periculum rebus humanis immineat, si dicatur: Deum eo ipso, dum hominem creat, animamque eidem inspirat, simul eidem legem naturalem tulisse & insinuassee; cui qui congruunt actus honesti, qui non congruunt turpes sint. Sic & (ut obiter hoc addam,) ille *Professor senensis*, qui nuper eandem quæstionem ventilandam sibi sumisit, non multum a *Vigile* abit: dum absurdas aliquot propositiones mihi de suo affingit, & mox postquam propria figmenta operose destruxit, vacuo sibi ipse plausus theatro dat, verbi gratia: Hæc erant mea verba: *Postquam Deus destinasset creare hominem animal rationale ac sociale, non poterat non lex naturalis ipsi congruere non ex necessitate absoluta, sed hypothetica. Si enim Is (in hac vocula mirifice se jactat,) ad contraria officia fuisset adstrictus, non sociale animal, sed alia feri & horridi species animantis fuisset producta. Ex hisce verbis Ille fingit, me respondisse, hominem dupliciter spectari posse, 1. ut Deus eum destinavit creare animal rationale ac sociale; 2. ut Deus eum potuisset ferum & horridum animal producere. Item: postquam Deus decreverat creare hominem, in liberrimo Dei beneplacito fuisse, qualem naturam homini voluerit assignare, num animalis rationalis ac socialis, an naturam animalis horridi & feri. Item: Deus potuit creare hominem & potuit velle crea-*



re, ut tamen in beneplacito ipsius adhuc fuerit, qualem naturam homini vellet assignare, num animalis rationalis ac socialis, an feri & horridi. Felicia ingenia, quæ somniare possunt, quod volunt! Quid istis faciemus, qui ex tam plana sententia ejusmodi monstra comminiscuntur? Sane enim uno eodemque decreto Deus constituit ceteris eminentius animal creare, idemque facere rationale ac sociale, cui animali vocabulum hominis inditum: nequaquam autem primo quidem decrevit creare hominem, & post interpositam deliberationem de forma ipsi assignanda constituit. Unde postquam Deus isti animali hanc formam attribuit, non potest non eadem isti competere, hoc quippe sensu essentiae rebus necessario convenire, & æternæ dicuntur, quia quam formam Creator illis dedit, eam non possunt non habere; & si quis diversam formam rei alicui velit affingere, non illam ipsam rem, sed diversam concipiet. Unde si quis per superfluam curiositatem quærat: Quid si Deus creasset animal, forma externa hominem, qualis nunc est, referens, quod & ipsum tantisper hominem vocabimus; sed ut idem non foret rationale ac sociale? Ei respondemus, istud animal non futurum verum hominem, qui animal sociabile est, sed aliud ferum & horridum animal, non obstante externa figura inter bruta referendum. Igitur vocula Is dicto loco, non notat mihi verum hominem, quales nos sumus, sed id animal, quod superflue quæstionis gratia tantisper fingitur. Neque vero ejusmodi locutio plane insolita, aut inaudita est; sed ubicunque similes quæstiones proponuntur, responsio aliter concipi nequit. Sufficiat unum exemplum adduxisse. Ponamus constare de diversa natura scarabæi, & grylli campestris seu cicadæ. Ponamus moveri hanc quæstionem: num ex gryllo campestri potuerit fieri scarabæus? Respondeo minime; quia si Is, qui jam ita petulca & obstrepera est indole, tetricam & inficetam scarabæi naturam sortitus fuisset, non amplius gryllus campestris foret, sed purus putus scarabæus, pomis voluendis unice occupatus. Plura addere nihil attinet, Neque enim operosam responsionem istæ næniæ merentur. Sed nec *Vigilem*, qui in furias plane abit, amplius morabor, postquam hoc duntaxat addidero; ne si clamando rumpatur, ipsum hæc vesaniæ suæ socios inventu-

turum. Nam & ejus similes heic Anticyras navigare jubentur; neque moris apud nos est, innocentes viros rabioforum hominum seditiosis clamoribus ad supplicium dedere. Hoc unicum tamen *Vigil* sua scriptione est consecutus, quod nemo unquam ipsum *canem mutum* sit appellaturus, (a quo convicio mirum quantum abhorrer). Nam quantum latratu valeat, non amplius puto obscurum est,

## A P P E N D I X.

**Q**UONIAM animadverto nonnullis circa doctrinam nostram de *Origine Moralitatis in actionibus humanis*, de quibus solis disquirere nobis propositum fuit, scrupulum hærere, nonneminem quoque inficetis clamoribus eandem impugnatum iri; visum est hoc loco mentem denuo quanta fieri potest perspicuitate exponere, si forte quibusdam hominibus pudor incuti possit. Primo omnium igitur distinguimus inter id, quod in actione humana est physicum, & quod in eadem est morale. Physicum istud, seu actionem hominis quatenus præcise consideratur ut motus alicujus facultatis naturalis, abstrahendo a rectitudine & pravitate, dicimus esse moraliter indifferentem, id est, neque bonam neque malam. Id quod omnes Theologi agnoscunt, quando circa peccatum distinguunt inter motum physicum, & *actum*, & hanc soli homini tribuunt, ad illum autem Deum tanquam conservatorem naturæ influere docent; quod citra blasphemiam asseri non posset, ni motus iste physicus moraliter foret indifferens. Et res ita manifesta est, ut nemini sano dubium heic oriri queat. Cum enim dentur actiones, in quibus motus physicus plane unus est & idem, quæ tamen moraliter sunt diversissimæ, & una in bonarum aut licitarum, altera in malarum classe locum fortiaur; necessum sane est, ut motus ille physicus sese ad bonitatem & malitiam indifferenter habeat. Sic occidit hominem latro, carnifex, miles, occidit alius defendendæ adversus vim suæ vitæ.

La-

Latronis actio scelus est; ceterorum factum bonum, aut saltem licitum. Igitur actus physicus in cæde est utique aliquid indifferens. Et sic in ceteris.

DEINDE distinguimus inter vocabula & phrasas, quæ nudum motum physicum notant, & quæ integram actionem moralem, seu motum physicum moralitate junctum expriment. Ad priorem classẽm pertinet verbi gratia colere, honorare, opus facere seu laborare, homini vitam eripere, concumbere, rem loco movere, loqui, cupere, edere, bibere, & similia. Eorum autem, quæ ad alteram classẽm pertinent, plenum indicem texere operosum juxta foret, atque supervacuum, cum nemo sit tam stupidus, quin intelligat, actiones morales bonas aut licitas esse, verbi gratia, Deum colere, honorare parentes, Reges, opus facere suæ vocationis & recto tempore, fontes punire, fortiter se gerere in bello iusto, uxori suæ cohabitare, rem suam alienare, loqui veritatem, cupere virtutem, edere & bibere moderate, &c. contra morales actiones malas esse, colere diabolum, aut idola, satagere circa aliena, opus facere die sabbati, homicidium, latrocinium committere, scortari, adulterium, incestum patrare, forari, mentiri, calumniari, cupere uxorem alterius, edere, bibere immoderate &c. Quæ cum ita plana & perspicua sint, mirum est, tantam vel calumniandi rabiẽ in ullum mortaliũ posse cadere, ut clamare non erubescat; *adulterium, homicidium, furtum a me pro actionibus indifferentibus haberi.*

Quod si autem ulterius investigemus, in quonam consistat actionis humanæ moralitas seu quidnam sit illud, per quod motus physicus indolem actionis moralis induat; deprehendimus id nihil aliud esse, quam quod ista a principio libero ut tali procedat, cui tamen insit necessitas quædam intrinseca, seu obligatio, actionem certo modo ad certam normam dirigendi. Ea directio ubi ab agente debito modo facta fuerit, sic ut actio examussim ad normam congruat, ea bona & honesta vocatur; ubi a norma aberratum fuerit, mala & turpis audit. Si enim peccatum seu mala actio est *contra*; etiam bona actio erit aliquid legi seu normæ congruens.

CUM porro in hominẽ præter obligationes, quæ ex imperio aliorum hominũ proveniunt, circa factum quo-

quoque humanum obligatio ad certas actiones suscipiendas aut omittendas deprehendatur ; circa investigandam hujus originem ultimo demum ad Deum O. M. tanquam conditorem generis humani recurrendum nobis videtur. Huic enim cum pro immensa sua bonitate & sapientia placuisset, hunc orbem terrarum non a solis brutis incolli, sed etiam abs tali creatura, quæ Ipsum agnosceret, coleretque, ac certo inter se more viveret ; inde istam creaturam idoneis ad hunc finem dotibus instruxit, regendisque actionibus obligationem legemque præscripsit. Neque enim ullo modo nobis videtur congruere, ut hæc obligatio ex alio fonte, quam ipse homo, derivetur. Sed qui conditor est humani generis, auctor quoque obligationis in homine, legisque naturalis habetur, & qui hominem erectos ad sidera vultus gerere jussit, idem quoque data ipsi lege effecit, ut non omnes actiones huic forent indifferentes. Ubi tamen non est cogitandum, distincta per decreta Deum constituisse primo creare hominem, ac velut ex intervallo, & præmissa nova deliberatione, idem rationalis ac socialis, an vero animal irrationale ac insociabile sit futurus, socialem esse demum jussisse, ut tamen eundem insociabilem quoque potuerit creare & exlegem. Nam hoc modo per summam absurditatem Deus sibi ipsi repugnare fingeretur. Ceterum uti omnes fatentur, Deum ex liberrimo beneplacito Universum hoc condidisse ; ita & eidem acceptum refert homo, quod a Deo conditus sit. Et quia nullum principium extra Deum statui potest, quod ipsi formas rerum suggesserit : inde uti quælibet creatura a Deo habet quod sit, ita & ab eodem habet, quod talis condita sit. Adeoque in homine obligatio ad observandam legem, & ipsa lex, & quod istius actiones certas inde affectiones possunt sortiri, non ex diverso principio debent derivari, quam ex beneplacito Dei, cum sapientia & bonitate summa conjuncto. Sic ut quicquid est necessitatis in homine ad moderandas certo modo suas actiones & quicquid in ipsis actionibus est habitudinis. Juxta quam ad legem componi queat, ultra creationem non sit retrahendum, abs qua divina voluntas, nequaquam excludi potest. Neque tamen eo minus & obligationi hominis & legi inconcussa stat firmitas. Non enim Dei voluntas ita vaga & desultoria cogitanda est, sicut

sicut hominum in diversa & sæpe sibi repugnantia volubilis animus ; sed ad quem finem semel eadem sese determinavit , ad eum assequendum pro ipsius sapientia & bonitate constituta media non minore quam ipse finis , firmitate gaudent . Isthanc ergo sententiam , scriptis nostris sat perspicue propositam , oppugnare aperta via instituit *Valentinus Velthemius* Professor Jenensis . Cui quidem si ad hanc disceptationem vel ingenii quid & eruditionis , vel saltem candorem attulisset viro honesto dignum , ultro gratias agerem , quod occasionem præberet tam nobili quæstioni illustrandæ . Sed cum eundem audiam diris clamoribus & calumniis in tam celebri loco meæ famæ insultare , non mirabitur , si talis a me habeatur , qualem sese exhibet ; qui scilicet in sola stentorea voce , & impudentia omne suum præsidium collocat , securus existimationis , quam nullam habet . Ille igitur voluntatem Dei ab origine obligationis in homine , legisque naturalis humanæ , nec non moralitatis in actionibus humanis exturbare omnibus viribus conicitur ; & contra tanquam lapidem angularem omnis naturalis ponit hanc sententiam : *dantur actus PER SE honesti ac turpes* .

UT igitur hæc lis super vocula *per se* ordine disceptetur , primo omnium videndum est , cuinam rei ista opponatur . Si enim hæc propositio accipitur ex mente Aristotelis , qui τὸ δίκαιον φυσικόν opponit legibus civilibus & positivis , quæ non ubique valent , quæque ex impositione humana , conventionem , aut opinionem oriuntur , mihi non contradicatur . Sed si τὸ *per se* nostræ sententiæ opponitur , eo termino excludetur voluntas Dei cum sapientia , & bonitate conjuncta , ejusque beneplacitum , definitio , atque impositio tunc facta , cum Eisdem libere genus humanum condere placeret . Ergo ex mente Velthemii Deus quidem dedit homini ut sit ; sed ut talis sit , nempe legi obnoxius , non dedit . Num igitur homo citra Dei voluntatem semetipsum in animal sociabile finxit ? Aut num aliud extra Deum fuit principium , quod formas rerum ipsis invito obtruderet , ei que nil nisi materiæ adaptationem relinqueret ? Aut actus illi citra ullam operam legislatoris seipsos determinant ? ut quis sit subditus , legique obnoxius , non amplius legislatore opus est ?

DEINDE revera inepte propositio hæc concipitur si  
*Pufend. Eris Scand. T. IX.* H ne

ne mentione subjecti, cui actus illi honesti aut turpes esse dicantur. Nam sane nulli dantur actus, qui pecori per se, aut alio modo sint honesti vel turpes. Sed addito subjecto habili omnis controversia tollitur. Nam ambabus manibus largimur hanc propositionem: dantur actus, qui per se Deo non conveniant, seu qui salva ipsius perfectione, & citra contradictionem in eum cadere non possunt. Amplectimur etiam hanc: dantur actus per se honesti & turpes homini, id est, quæ posita hac conditione & natura hominis non possint non eidem congruere vel non congruere. Et revera qui istam propositionem ita nude enunciant, non animadvertunt, sese tacite istorum actuum honestatem & turpitudinem ad naturam hominis referre, ac eandem judicio humano, utique sensu legis naturalis imbuto, metiri. Imo id ipsum aperte profitentur, dum huic propositioni probandæ ad rectæ rationis judicium provocant; quod sane non aliunde, quam ex collatione certi actus cum conditione humana promanat. Quoniam autem conditio hominis primæva beneplacito Creatoris ipsi assignata est, quicum comparati actus humani honesti aut turpes dicuntur, frustra principium mortalitatis in actibus humanis fingitur, quod voluntatem Dei autvertat. Imo cum ipse VELTHEMIUS Dissertat. suæ §. 28. & 29. jus naturale dividat in *creatum* & *increatum*, quomodo ab isto voluntas Creatoris excludi possit; nisi Stoica necessitate ipsum ad creandum coactum dicas?

RATIO autem, quare tanto ardore isti homines ab origine moralitatis voluntatem Dei exclusum eant, non alia est, quam quia isthanc ad humanæ voluntatis modulum exigunt, quæ rectæ rationi crebro solet oblectari. Inde metus est, ne forte absurda aliqua mutatio in lege naturali exsistat, Deo voluntatem suam mutante: eoque aliqui consequentias, juris naturalis firmitatem destruentes, stolidè admiserunt; quidam ab aliis sibi tales per calumniam obtrudi sunt questi. Enimvero mihi non est dubium, quin sapientia, bonitas & perfectio divina divinis placitis sat firmitatis addat. Ac si a libertate voluntatis divinæ mali quid mortalibus immineret, non jussisset nos Salvator orare; *fiat voluntas tua*. Nisi forte Velthemio pro illa clausula substituere placeret; fiant quæ per se & sua natura sunt necessaria. Sicuti quon-

quondam in Anglia Cromwellii tempore nonnullos tantum odium gubernationis regiae ceperat, ut nollet amplius dicere *adveniat regnum tuum*; sed potius videbatur; *adveniat respublica tua*. Et sane quantam hoc vesaniam arguit, quod VELTHEMIUS differtatione quadam *de justo dolore* non exhorruit dicere; *scite differi* a GRO-  
TIO in Prolegomenis, fore ut jus naturale stringat gentes, etiamsi daremus, Deum non esse, aut non curari ab eo negotia humana. Ergo & hoc scitum dogma Velthemio videbitur; huic universo integritatem & ordinem constare posse, si vel maxime Deus hoc universum non creasset, aut si idem plane extra mundum relegeretur. Eo absurditatis demum devolvuntur, qui circa calumnias aliis intentandas tantopere laborant!

VIDEAMUS nunc, quid VELTHEMIUS in *priori differtatione super hac quaestione* nobis opponat, in cuius proemio monet, maxime appositam sibi viam videri ad investigandum jus naturale, *contemplari naturas actuum*, qui objectum ejus juris constituunt, in iisque fundatam obligationem. At si actus illos comparas cum conditione humanæ naturæ, nihil ages. Nec obligatio in actibus, sed in jussu legislatoris fundatur. In §. 2. explicat terminos quaestionis. Ac circa vocabulum *actus* infausto omine eadem se fraude illigat, ob quam alius jam non mediocriter vapularat, dum exempli loco subjicit, *colere Deum, honorare parentes, omittere furtum, homicidium*. Si enim hanc thesin oppugnat Velthemius, quod motus physicus sit indifferens; per summam ruditatem aut malitiam adducuntur exempla actionum quam maxime moralium. Sin vero id displicet, quod ab origine moralitatis in actionibus humanis voluntatem Dei non excluderimus, tunc ex Velthemio scire velim, an non lumen intellectus requiratur in eo, qui cultum & honorem alteri exhibiturus est. Sane enim inter bruta neque cultus divinus, neque honor parentum reperitur. Num ergo citra voluntatem Dei homo lumen intellectus nactus est, cultui divino subserviturum? Aut num usus istius luminis citra beneplacitum divinum per se provenit? Sed & propriam causam destruit Noster, dum §. 3. *honestum* dicit id, *quod recte rationi ut tali convenit*. Nam quando ad rectam rationem provocatur, præsupponitur, eam cognitione legis naturalis imbutam.

Neque ejus rectitudo aliunde potest æstimari, quam quod ex contemplatione conditionis humanæ legis naturalis dictata, adeoque iustum & beneplacitum Creatoris, bene ratiocinando colligat. Unde etiam si indifferentia motus physici oppugnatur, contradictorie status quæstionis formatur. Sin beneplacitum divinum ab origine moralitatis removetur, nimirum invito Numine rationem suam possidet Velthemius. Vocabulum *debiti* & *moraliter necessarii*, ubi de homine sermo est, principium utique velut debitionis & necessitatis involvit, quod sane non est vocabula *per se*, sed decretum & voluntas legislatoris, per legem declarata.

PORRO circa statum controversiæ, qui proponitur in §.4. & 5. notandum, quæstionem restringendam esse ad hominum actiones, de quibus solis mihi sermo est. Unde male VELTHEMIUS ita indefinite loquitur; *num ab agentis libero arbitrio quæ tali procedentes actiones dentur, quæ ratione sui citra impositionem convenient rectæ rationi*. Nam si actiones Dei & hominum eadem classe vult censere, & in majestatem divinam injurius est, & improbe dicta nostra cavillatur. Deinde & hoc probe notandum, vocabulum *impositionis* non ita stricte, ut a plerisque, a nobis accipi pro ejusmodi determinatione, quæ citra fundamentum in re ex solo lubitu imponentis provenit. Sed ea quoque ex impositione nobis esse dicuntur, quæ exposita voluntate ac dispositione auctoris non possunt non consequi, siquidem ille sibi constare debet, verbi gratia: Ponamus architectum constituisse domum extruere inhabitationi hominum servitutam. Heic necessum utique est, ut ejus ædificii partes aliter disponantur, quam harum aut ovilis. Quis negaverit tamen, istam constructionem esse ex impositione architecti? Qui si haram aut ovile ex mera sua impositione prætorium esse velit, delirare censebitur. Unde alia nobis impositio est, quæ nil nisi merum placitum imponentis præsupponit; alia est, quæ provenit ex necessitate hypothetica, sive per consecutionem necessariam eorum, quæ prius ab eodem determinata sunt. Quarum hæc in actibus humanis ad legem naturalem spectantibus, illa in legibus & institutis positivis cernitur. Sic ut Velthemium ratio vehementer fugiat, dum putat; si nulli actus sunt per se honesti aut turpes  
citra



citra impositionem divinam, æque facile Deum quævis peccata posse licita declarare, atque Princeps gladii usum aut bombardæ dislosionem in urbe vetare aut permittere potest. Unde fatius erat quæstionem ita formari: Num natura hominis ita sit a Deo formata, ut posita ea conditione non potuerit non necessitas moralis ipsi injungi certos actus suscipiendi aut omittendi? Sic enim nulla futura erat controversia, cum hoc ipsum nos passim inculcemus.

CETERUM jam copias suas contra nos in aciem producit VELTHEMIUS, & in §. 8. recoquit objectionem in meo opere propositam; L. II. c. 3. §. 4. p. 162. ad quam dum ego dicto loco respondeo, putat me contradictione involvi hisce verbis: *Postquam Deus destinasset hominem creare animal rationale ac sociale, non poterat non lex naturalis ipsi congruere, non ex necessitate absoluta, sed hypothetica. Si enim IS (in hac vocula Nostra omnis spes victoriæ reposita est,) ad contraria officia fuisset adstrictus, non sociale animal, sed alia feri & horridi species animantis fuisset producta.* Inde VELTHEMIUS §. 12. exclamat: *me respondisse, hominem dupliciter spectari posse, 1. ut Deus eum destinavit creare animal rationale ac sociale. 2. ut Deus eum potuisset ferum & horridum animal producere.* Ast mi Velthemi, injuriam tibi non facio, si dubitem, num non modo rationis vox & sensus, sed & probitatis quid ac frontis tibi adsit, quousque liquido ostenderis, ubinam locorum in meis scriptis ista duplex hominis consideratio occurrat. Ibidem ponitur & hæc assertio: *Postquam Deus decreverat creare hominem, in liberrimo Dei beneplacito fuisse, qualem naturam homini voluerit assignare, num animalis rationalis ac socialis, an naturam animalis horridi & feri.* Item: *Deus potuit creare hominem, & potuit velle creare, ut tamen in beneplacito ipsius adhuc fuerit, qualem naturam homini vellet assignare, num animalis rationalis ac socialis, an feri & horridi.* Quæ asserta quod Velthemiis vanissima ac falsissima pronunciet, magnopere proba; cum mea non mea fiat, sed ab ipso conficta. Ac mirum est, quam universa sycophantarum natio in hoc amice conspirat, quod ex aliorum verbis mire contortis falsam thesin concinnent, quam dein magis clamoribus impetant, revera propriis cum

larvis luctati. Et quantum vel stuporis vel malitiæ in talem cadit, qui tam planam sententiam vel capere non potuit, vel ita scæde detorquere non erubuit. Sane! postquam Deo placuit cetera animantia eminentius hisce creare, uno eodemque decreto, & ut esset, & ut talis esset, constituit. Nequaquam autem decrevit prius creare hominem, & ex intervallo, postquam de conditione ipsi assignanda in ambiguo hæssisset, demum decrevit eundem facere rationalem ac socialem. Est enim hoc ex imperfectione intellectus humani, ut priori loco genericam alicujus rei naturam, & inde specificam concipiamus. Quale quid de Deo circa creationem hominis fingere divinæ essentiae perfectioni repugnant; & in se absurdum est, duo heic decreta comminisci, cum *res* rationale ac sociale esse, in definitione hominis contineatur. Quo si *Paræus* aut alius absurdi quid heic admisit, eoque nomine convitiis fuit proscissus, id me quidem profecto non tangit aut angit; quin jure optimo maximo ista elogia Velthemius sibi vindicare potest. Ceterum si quis nolit adquiescere, quod sciat; ideo legem naturalem honesti & turpis, necessario in hominem cadere, quia Deus ipsum creaverit rationalem & sociabilem; sed ex supervacua curiositate quærat: quid si Deus creasset hominem adstrictum ad ejusmodi legem naturalem, quæ ei, quam nunc habemus, contraria præcepta contineret? ei respondemus, hanc quæstionem absurdam & contradictoriam esse. Si enim ponere velis, eum ad contraria officia fuisse adstrictum, non is homo, qui ex destinatione Creatoris animal sociale est, sed aliud horridum ac ferum animal esset. In qua responsione vucula *IS* neque notat, neque notare potest verum hominem, qui utique rationalis ac socialis est, sed fictum aliquid, quod absurdx quæstionis ergo tantisper supponitur, hoc sensu: si vel maxime ponas animal membris & forma homini, qualis nunc est, simile; is non verus homo erit, sed aliud ferum & horridum animal. Exemplo rem illustrabimus, si forte quis ingenio sit ita stupido, ut hæc capere nequeat. Ponamus figulum constituisse amphoram effingere. Si quæras, utrum is amphoræ possit formam urcei tribuere; negamus id fieri posse: quia, si ista urcei formam haberet, amphora non esset. Quis heic dixerit, amphoram duplici modo considerari;

vel

vel ut habet figuram amphoræ, vel ut potuerit habere figuram urcei; Afferamus aliud exemplum; quod fortasse magis sit ad captum Velthemii. Ut Velthemius Jenæ Professor Moraliū esset, necessarium non erat. Postquam tamen ex isto ligno Professore sculperē Collatoribus placuit, danda ipsi utique fuit, instructio impacto muneri conveniens. Ponamus jam superfluum quæstionem moveri; num Velthemio inter partes officii Professorii potuerit injungi, ut cum histrionibus per Germaniam circumvagaretur, & in comœdiis morionis personam ageret? Respondeo, minime. Quia si ad hoc exercitii adstringeretur, IS non amplius Professor esset, qui impudenti clamore Jenæ doctorum virorum famam laceraret; sed non minus histrio esset, quam frater ipsius, qui lauream Magistralem Lipsiæ obtentam per publica theatra non sine vocis stentoreæ gloria circumfert, ac versatili jam pileo non minus quam olim liripipio sibi placet. Quis jam dixerit, Velthemium heic dupliciter considerari, 1. prout factus est Professor Jenensis; 2. prout idem simul cum professione potuit histrioniam facere? Aut postquam Collatores professorum munus in ipsum conferre decreverant, adhuc in liberrimo horum beneplacito fuisse, utrum auditorium Jenense, an theatra vociferationibus ab ipso oppleri vel-  
lent?

QUEMADMODUM autem error ab histrionibus in primo actu commissus totam fabulam refrigerat; ita destructo primo Velthemii commento, tota ejus dissertatio ultro corrui. Atque secundum argumentum itidem ex nostro opere loco citato desumit: *Si non dantur actus per se honesti aut turpes, sequitur, Deum si voluisset potuisse ita constituere, ut inter officia hominis esset Deum blasphemare, inter vetita Deum colere.* Ego reposueram, hoc ratiocinium contradictionem implicare. Heic nihil habet quod regerat Velthemius, nisi ut cantilenam jam explosam instauret, ac suas sycophantias mihi obrudere impudenter labore. Nusquam enim mea hæc est assertio, sed Velthemianum somnium; *Deum ita potuisse creare hominem, ut idem non esset animal rationale ac sociale.* Ergo quo magis de absurditate hujus dogmatis declamat, eo magis propriam stultitiam flagellat. Neque opus est repetere, *colere Deum* non esse motum me-

re physicum & indifferentem, sed actionem quam maxime moralem; quippe quæ supponat subiectum rationale creatum, & involuat respectum ad dependentiam creaturæ a Creatore. Nam data creatura rationali, necessarium ipsi est Deum colere. Sicut posito, Deum post cetera animalia voluisse creare hominem, necessum erat, ipsi legem naturalem congruere. Quod genus necessitatis ut mihi quidem tantisper hypotheticum vocare liceat, si qui sunt terminorum scholasticorum dictatores *idonei sunt*, supplex veniam rogo. Si enim Deus hominem non creasset, non erat necessarium Eundem ab homine coli. Ergo necessitas cultus divini ab homine præstandi actum creationis præsupponit.

CIRCA tertium argumentum stratagema jocosæ histrionis Velthemius expressit, qui repente in aliam se personam transire arbitratur, si pileum versatilem & palliolum inverterit. Sic & primum argumentum levi sub mutatione iterum in orchestram prodit. *Si non dantur actus per se honesti aut turpes, sequitur, quod inter hominis debita possit esse seipsum perdere, seipsum odisse, gustus elementa per omnia quarere, &c.* Sed velut de sibilo præfagiret, ita repente post si parium sese hoc ratiocinium recondit.

QUARTO loco metuit Velthemius, ne posita nostra sententia nullum amplius sit discrimen inter legem naturalem & positivam. Istum metum demere poterant, quæ a nobis traduntur L. I. c. 6. §. 18. & L. II. c. 3. §. 23. Sed quia hic actus valde jejunos erat futurus, ideo intersceni loco duas sententias promulgat valde infectas. Prior occurrit §. 20. *Ut libera voluntas hominis, penes quem majestas est, legem voluntariam ferre & mutare potest: Quidni divina majestas cum voluntas Dei sit summe libera, æque, imo multo magis, ac in legibus positivis fieri solet, legem natura mutare, imo contrarium ejus præcipere posset?* Adparet Velthemium de voluntate Dei non optime sibi polliceri. Inde tam anxie vincula eidem injicere, aut moderamine rerum dimovere ipsam laborat, ne forte in licentiam degeneret, & absurdas leges hominibus promulget. Quales opiniones istud animal de Deo habere credamus? Quod ne tertiam quidem petitionem orationis Dominicæ novit. Per posteriorem autem sententiam nihil sibi rationis & frontis

tis esse Velthemius testatur. Nam in §. 22. scribit: *me non erubuisse statuere, ac si Deus ad contraria officia hominem potuisset adstringere. Ita enim aperte loco supra cit. p. 162. tradit: Si ad contraria officia (puta ad furandum, mœchandum, calumniandum) homo fuisset adstrictus, non sociale animal, sed alia feri & horridæ species animantis fuisset producta.* Quid ais Velthemi?

Ego qui statuo, si creatura sub figura humana fuisset producta, ad contraria legi naturali officia adstricta, non ea sociale animal & homo, sed bellua futura erat; ideo statuo, quod homo potuerit fieri bellua, id est, quod animal, de cujus essentia est rationalitas, potuerit esse irrationale? Optionem tibi relinquo, Velthemi, stuporem tuum an rabiem calumniandi accusari malis.

QUINTO argumento ita *insurgit* Velthemius, ut & quinques cadat. *Si Deus sua natura justus est, sequitur, quod actus denrur per se honesti, suæque natura debiti, itemque actus per se turpes ac ex sua natura illiciti.* Atqui ego non puto hæc consequi: Si summus legislator natura justus est, igitur actus creaturæ rationalis ut motus physicus spectati, sunt honesti aut turpes ante omnem respectum ad legem a Creatore profectam. Nobis quippe propositum fuit inquirere in originem justitiæ humanæ, a qua divinam multis modis differre alibi ostensum. *Jus naturæ in Deo* illis sapientiæ Atlantis definiendum relinquo, qui caput inter nubila condunt. Quæ Velthemius ex *mysteriis prædicamentorum de relatione ejusque fundamento ac ratione fundandi* gannit, nil nisi obstrepera vocabula, & in ambitiosum gyrum disposita sunt, rerum inania. Neque etiam illa, qua se non parum jactat, *obligatio ex ipsa rei natura*, contradistincta obligationi ex lege proveniente, satis adhuc ad liquidum deducta est. Sed & dubito, an ferri possit, a Velthemio *sanctitatem & justitiam in Deo* vocari *morales perfectiones*. Nam hætenus credidimus moralem perfectionem esse, quæ disciplina, usus, adfuetudine comparatur, ad modum habitus acquisiti animo inhærentem. Porro quando de imagine Dei mentionem injeci, unice præ oculis habui proximam ejus & specialem significationem, qua notat eam hominis perfectionem, quæ per lapsum amissa est, & in cujus locum corruptio illa, quæ jam sentitur, successit. Quibus præ-

præ-

præterea respectibus homo imaginem Dei referre dicatur, mihi inquisitum non fuit. Denique quantum velit Velthemius distinguat inter *conceptum formalem & materialem*; ac sapientiam, iustitiam, virtutes, & jus Dei atque hominum quoad illum communia, quod hunc diversa asserat. Nam licet illa vera esse ponas; ratio tamen mihi constat, quare jus naturale isthac via investigare non placuerit.

ILLUD autem minus ex legibus artis comicæ, quod fabulam nobis det Velthemius quinto actu productionem. Nam sexto loco quæstionem movet: *Num Deus ullo modo possit velle, ut inobedientia erga Deum formaliter & in se spectata non sit peccatum?* Ego respondeo, stolidè quæstionem hanc institui, ni simul ponatur subiectum, cui inobedientia sit tribuenda. Nam posita creatura rationali, negamus Deum hoc velle posse, ni eum sibi ipsi repugnare absurdeingas. Nulla autem posita creatura rationali, Deus super obedientia in neutram partem decernere intelligitur. Quomodo enim Deus possit velle, ut sibi obediat, si nullos condiderit, qui obedire possint? Sint, quibus imperet.

DENIQUE ut sacro numero parallogismos suos terminet Velthemius, septimo loco argumentatur: *Si nullus actus per se honestus ac suapte natura illicitus, sequitur Deum posse facere omne possibile realiter a se distinctum, nullamque in genere naturæ in Deo importans imperfectionem.* Hujus ratiocinii vanitas planior fiet, si idem pressius ad præsentem quæstionem formaveris, hoc modo: si motus physicus in actionibus humanis citra respectum ad legem est indifferens, aut si voluntas divina concurrat ad hoc, ut homo legi sit obnoxius; sequitur, quod Deus possit mentiri. Id enim exemplum rei, quæ in genere naturæ nullam imperfectionem importat, a Velthemio adfertur. Quis ita ratiocinantem ferat? Ne dicam, quod *mentiri posse* in genere naturæ maximam importet imperfectionem. Quis enim mentitur, vel alteri furtim nocere vult, quod malitiæ est cum degeneri quadam ignavia conjunctæ; vel non audet, sensa animi sui palam aperire, quod robutiorem metuentis est; vel plura promisit, quam præstare possit, quod vires suas ignorantis est. Inde patet ratio, quare divinæ scripturæ negent, Deum posse fallere, aut mentiri, quia id

id repugnat perfectissimæ ipsius essentia. Ex quo tamen nihil, nostræ sententiæ repugnans, concludi potest. De cetero uti fœdum est mendacium, quod Velthemius eructare non erubuit, *me dicta Scriptura sacra in alienum prorsus sensum detorquere*; ita nihil impudentius, quam dicere: propositionem, *Impossibile est Deum mentiri*, hunc habere sensum, *Deus non vult mentiri*. Cur enim tantopere arrident Velthemio sycophantarum artes, ut verba mea mutilate adduceret? Quæ integra hæc sunt: *Quod Deus mentiri non posse dicatur, est ex beneplacito istius, quod mortales ad magnitudinem & præstantiam ipsius attemperatum concipimus*. Id perinde est, ac si dicerem: Mentiri adversatur perfectioni divinæ, a qua nunquam divina voluntas discedit, sed cum ea semper amice conspirat. Sic igitur mimum huncce calumniarum legit Velthemius, ut vel iudice Gesenio pro plausu sibilum sit meritis. Altera disertatione minatur se innumeras legiones *Gentium, Legumlatorum, Ictorum, Theologorum, Philosophorum, cum veterum, tum recentiorum* in aciem educturum, quæ solo adpectu me exanimem darent. Nondum tamen adeo fortuna mihi fuit propitia, ut illud illustre ingenii Velthemiani monumentum conspiciere liceret. Interim circa auctoritates, quæ jactantur, observandum, earum multitudinem nihil efficere, nisi rationibus suam sententiam adstruxerint, meam refutarint; & quatenus nemini eorum, ut ab omni errore sit immunis, cavetur, piaculum non esse rationem potius, quam numerum errantium sequi. Sic quam multæ in rebus philosophicis erroneæ opiniones per complura secula & scholas & populum occupaverunt, quas tamen posteriorum temporum accuratior inquisitio explosit? Hæc si testium numerus momenti quid habuisset, in hunc usque diem antipodes in cælum delaberentur, harmonia orbium cælestium aures nostras obtunderet, intelligentiæ istis orbibus rotandis insudarent, ignis sphaera proximam Lunam ambureret, denique barbaries integro adhuc regno suo gauderet. Sic sane non difficile erit multas myriades invenire eorum, qui pro sanctitate numeri denarii in prædicamentis mortem æquo animo subire velint; quæ tamen ceteris puerilis superstitio videtur. Deinde ex testibus illis integræ legiones deficient, si consideretur, plerisque nunquam in mentem ve-

venisse vocabulo *per se* Deum ab origine juris naturalis excludere. Denique omnia ista testimonia demum in auctoritatem unius ex antesignanis barbariei, puta Thomæ, aut Scoti resolvuntur, quorum commenta demum in popularia dogmata evaluerunt, postquam ceteri ista sine debita inquisitione in sua scripta transtulerunt; & uno anfore bibente reliquos omnes sitis corripuit. Præsertim cum notitia juris naturalis valde confusa & jejuna fuerit, antequam hoc demum seculo de isto in formam artis redigendo a quibusdam eruditis labor susciperetur. Id tamen retulit unus & alter, qui recens ex istis oris advenientes heic me salutarunt, in publico conflictu ejus disputationis Velthemium clamore Martem Homericum superasse, & ignea facie, horridis capillis, oculisque ardentibus furiam aliquam, egregiæ expressisse. Quin non erubuisse in tam frequenti cœtu vel decies exclamare; *me nulla agnoscere officia hominis erga Deum & seipsum*. Ergo vel scripta mea non legit Velthemius, vel impudentissimus est mortalium, qui sunt & fuerunt. Pari rabie multoties fuisse ingeminatum; *adulterium penes me hætenus saltem turpe haberi, qua supponeret creationem animalis rationalis & socialis; adeoque secundum mea principia adulterium non turpe dari inter vaccas & boves vel inter caseum & butyrum; qui sunt flosculi Velthemiani*. Quid est furere, si hoc non est? Ergo cum neget Velthemius, adulterium supponere creaturam rationalem & socialem, ex ipsius mente adulterium dabitur inter creaturas, in quibus nulla est diversitas sexus, & ad se multiplicandum potentia, nec minus inter creaturas, quæ fidem conjugalem neque intelligunt, neque dant. Quin & deinceps homicidium non turpe erit, si felis murem occiderit. Quod porro erat opus, ut Velthemius tanta contentione asseveraret, adulterium in se & sua natura turpe esse; cum idem a me adstruatur L. I. c. 2. §. 6. p. 26. & in *Apolo-  
gia* p. 38. Quo tamen non obstante certissimum manet; non dato homine, adulterium non dari; sicut non dato homine, Velthemius Jenense auditorium rugitu suo non erat impleturus. Sed nec omitti debet, quod cum unus opponentium urgetet, *cum actiones hominum per circumstantias, id est, res extra ipsam actionem, fiant morales, non videri, quemodo actio in se & sua natura moralis esse*



*esse possit?* Velthemius respondebat: *Præcellens Dn. Magister, adjuro conscientiam tuam, eloquere, an firmiter credas cum venerandis nostris Theologis, dari actus per se bonestos.* Quod ille Magister præmissa contestatione observantiz suæ erga *Maxime Spectabilem* (magis adhuc audibilem) Dn. Decanum affirmabat. Et sic argumento erat plenissime satisfactum. Quid hac disputandi via compendiosius? Quæ tamen alteram istam dissertationem invidiæ fortuna, alio me ingenii Velthemiani specimine beavit, dum donante amico dilectissimo obtinere licuit *Synopsis Institutionum Juris naturalis* manuscriptam, quam is auditoribus suis ad calamum dictavit. Cui ipse auctor non vile pretium ponit, quando eam *Nucleum juris naturalis* indigitat. Quo scripto etsi nihil indoctius aut infectius vidisse memini; veritatem tamen adhuc contare deprehendi *Pliniano* illi: *Nullum librum tam malum esse, qui non aliqua ex parte prodesset.* Ingens quippe operæ pretium fuit didicisse flosculum illum Latinitatis Velthemianæ, in *Analytices* studio non magis versatæ sunt quam *vana viridis in nucis arbore*. Nec minoris fuit definitionem legis cognovisse, qua immane quantum eum sibi placere audio. *Lex est, inquit, dictamen practicum in materia universali, quo necessitas actionis exprimitur in genere morum.* In qua quid mysterii latitet, patebit, si aliis eam vocabulis extulerimus. Si igitur *dictamen practicum* enunciatio, quæ non cognosci solum, sed & in actum deduci debeat, *in materia universali*, id est, quæ omnes illos tangat, ad quos enunciatio dirigitur; *quo necessitas actionis exprimitur in genere morum*, id est, quo significatur quid agendum, quid omitendum, ut actiones bonæ vel malæ, laude vel vituperio dignæ haberi queant. Heic primo necessum erat exprimi subjectum, abs quo dictamen illud promanaret; num id intellectus sit divinus, an humanus, an uterque. Dein ad cujusnam actiones dirigendas id dictamen spectaret, ad proprias, an ad alienas. Denique unde ea necessitas proveniret. Quam ex ipsa actione resultare absurdum dictu videtur; cum eadem aliter concipi nequeat, quam prius aliquid, & diversum ab actione, quodque adeo in ipsam actionem operetur. An & quatenus illud, quod mortales dictamen intellectus divini concipimus, Deo lex dici possit, alibi a nobis expositum

tum fuit. Deum omnia quæ agit optime agere, & per essentiaæ suæ perfectionem non posse non optime agere, & quæ cum ista non congruunt, non posse non omittere constat. Sed quia legem aliter concipere non valeamus, quam aliquid extrinsecus necessitatem adferens certo modo actiones dirigendi; inde si quis velit Deum legi subiicere, faciat id suo periculo. Quod si igitur ad legem, quæ in homines cadit, ea definitio restringatur, vitiosum est, quod ea legibus positivis applicari nequit. Quando autem lex naturæ dictamen rectæ rationis aut intellectus dicitur, nihil aliud innuitur quam medium, quo ista lex investigatur. Atque eo ratio ut recta sit, & talem sese intelligat, oportet ut firmo fundamento ratiocinia sua superstruat. Quod nullum aliud inveniri potest, quam conditio humani generis; nisi quis cuilibet persuasiones, sæpe oppido quam irrationabiles, pro lege naturali velit venditare: sicut stolidum sit, ultimum hoc habere argumentum demonstrandi aliquid juris naturalis esse: quod recta ratio aliter de hoc vel illo actu judicare nequeat. Sed & illud constat, si definitio illa applicetur juri humano, inepte a VELTHEMIO §. 11. tradi, *dictamen intellectus* esse aliquid prius, quam *normam seu regulam Justinii* si dicere velis, hominem sibi ipsi legem naturalem ferre, aut intellectum humanum dictare quid posse, antequam objectum adsit. Sane ponenda est lex naturalis tanquam norma justitiae, antequam intellectus humani dictamina practica possint existere. Id autem nimis quam ingeniosum, quod Velthemius, tantopere alias a novitatibus abhorrens, juris naturalis novam denominationem comminiscatur, quasi *quod primo ac per se fundatur in natura actus, quam præcipit aut prohibet, ita ut propterea jus sit, quia hunc actum præcipit aut prohibet, quia e sua natura debitus aut illicitus est*. Quo commento uti nihil vanius, & per quod juri naturali circa actiones morales non amplior tribuitur operatio, quam ephemeridibus circa motum planetarum: ita obiter scire velim, quomodo a contradictione sese liberare Velthemius possit, dum *præcipi* aut *vetari* a lege naturali dicit, quæ jam *in sua natura* erant *debita* aut *illicita*? Quid enim præcepto opus est, si ista alias fieri utique debebant? Aut ergo lex naturæ super-  
vacua

vacua est; aut si cum effectu præcipit ac vetat, utique actus debitos aut illicitos facit.

SED tædet quisquiliis Velthemianis diutius immorari, nisi quod obiter spectandum, quid in demonstrationibus valeat, qui tanto fastu peritiâ Analyticis crepat; ut tandem discamus nostra ratiocinia in circulum (quæ figura perfectissima utique est,) disponere, & præfultore Velthemio in perpetuam vertiginem circumvolui. Si enim quæras ex isto, quare verbi gratia adulterium juri naturali repugnet, respondebit; quia in se & sua natura est turpe. Si quæras, quid sit in se turpe, respondebit; quod rectæ rationi ut tali non convenit. Atqui rectæ rationi qua tali non convenire est juri naturali repugnare. Igitur juxta Velthemium adulterium juri naturali repugnat, quia juri naturali repugnat. Ac proinde falsum est, quod clamat, *turpe in puncto rationis prius esse, quam juri naturali repugnare*. Sed & par erat, eum qui viam præcepta juris naturalis deducendi nobis placitam ita importune impugnat, ingeniosius quid aut planius asserre. Quid autem tanto hiatu dignum trifaux iste profert? *Principium primo primum*, inquit est; *honestæ per se sunt expetenda; turpia per se sunt fugienda*. Atqui sane, ne nunc dicam, quod stolidè sit omiſsa mentio subjeſti, cui aliqua honesta aut turpia sint; circa hoc principium quærere licet, non solum quid honestum aut turpe per se sit, quod non nisi congruentia aut disconvenientia cum recta ratione definiri a Velthemio solet; sed etiam eousque non potest adquiescere intellectus noster, ut rationem omnino nosse velit, quare & unde vel in perfectitate, vel in dictamine rationis necessitas insit. Eoque Velthemio vel iterum circulus suus erit perfultandus, vel si vertigine liberari cupit, demum nostræ methodo insistendum; ex qua ista propositio a priori demonstrari potest. Sicuti & illud nemo sanus abnuet, imperium Dei esse, quod hominem ad adpetendum honestum & turpe fugiendum primo movet aut movere debet, non autem perfectitatem Velthemianam. Deinde ne hoc quidem tantum demonstrandi artificem decebat, pro *principiis secundo primis* venditare sententioſas, verbi gratia, *neminem ledere, suum cuique tribuere*, veras quidem, sed multis determinationibus adaptandas, priusquam ex iis distincta & li-

Liquida scientia haberi possit. Sed & nimis quam iracundum, fustes statim intentare, si quis dictata Velthemiana in oraculorum vicem arripere detrectet. Quid enim si Reges, ac integri populi istorum veritatem in dubium vocent? Quid fustibus suis heic efficiet Velthemius? An clamoribus suis eosdem protelabit, qui norunt, animal Cumanum esse quam maxime vocale? Quibus porro argumentis hosce convinct Velthemius, si nihil præter dictamen suæ rationis crepare possit apud tales, qui suam rationem diversa dictantem non minoris æstiment, & legiones Scholasticorum a Velthemio in subsidium evocatas adunco naso suspendunt? Plura occurrunt in eo scripto emblemata, veluti quod §. 57. juris naturalis *causam efficientem dicit hominem*. Aut quod §. 55. hominem tradit *tamdiu vivere in statu animalis, non item in statu hominis, quamdiu usus rationis se nondum exserat, aut ad annos discretionis homo pervenisse dicatur*. Cui adjungi debet inauditum hætenus dogma a Velthemii discipulo publica disputatione Jenæ promulgatum: quod *majestas sit non-Ens*. Nimirum quia ad majestatem sufficit superiorem non habere, nec requiritur potestas gubernandi civitatem; & quia statim majestate Velthemiana præfulget, qui in regionem desertam ejectus nec dominum habet, nec subditum. Quæ monstra errorum aliis exagitanda commendamus.

RESTAT adhuc GESENIUS Garlæ Præsul; de quo tamen eloquar, an sileam dubito. Nam ea est hominis ruditas, impudentia, & vesania, ut merito quivis condatus tam tetrici monstri contactum refugere debeat. Qui cum nil nisi obscœnam virulenti pectoris saniem erueret, passim impio abusu dictis sacris interpolatam, *benedictionem tamen Christianam* emittere videri vult. Prorsus uti reliqua fanaticorum natio tunc, cum maxime delirat, sacro instinctu agitari sese clamat. Verum, uti peculiare scriptum isti opponere supervacuum erat; ita poterit heic obiter ceteris, qui ex me oppugnato gloriolam inauspicato captarunt, subungi GESENIUS tanquam vilis appendix, & in quem jactari queat illud tritum; *ultimum occupet extremum scabies*. Saltem ne in posterum arguat me criminationes, ad quas plane sæpi, agnovisse. Ex decore igitur GESENIUS a menda-

cio scriptionis suæ exordium capit, quasi ego in *suprema Regni curia enixe contra ipsum & famam ejusdem egerim*; qua super re monitum se dicit *ab eo qui procul habitabat, & bene cupiebat*, Dignus hoc Oreste Pylades; qui circa veritatem non nimis curiosum se ostendit. Equidem si ejusdem reipublicæ cives essemus, comes ivisset Gesenius editori Indicis. Nunc quid contra exterum incuria hujus Regni agerem? Præsertim cum ejus scripta tantum ruditatis ac vesaniæ præ se ferant, ut famæ suæ neminem infestiores, quam seipsum, hostem experjatur. In eo autem nihil a me peccatum est in reverentiam, quam *Serenissimo Electori Saxoniæ* debeo, quod modelte, & Gesenii demum, aliorumque malevolorum imporrunitate coactus, super nimis præcipiti Ministrorum Ipsius judicio questus sum. Nam de isthoc negotio nihil ad Ipsum relatum constat; & si Optimus Princeps consultus fuisset, haud quidquam decorum judicasset, inaudita partis alterius defensione sententiam superstruere libello famoso, per carnificem flammis dando. Quod si autem iniqui aliquid mea querela habet, sane is, quem publice provocavi, suam existimationem non destituet, nec *Censuræ* istius *sanctimoniam* Velahemio alicui aut Gesenio asserendam committet. Ac vel ideo istum omnibus ingenii sui copiis explicatis in aciem, prodire cupiebam, ut cum adversario non erubescendo congredi liceret, ac tandem Gesenio similium hominum ruditus obticesceret. Quid porro ad rem præsentem, quod Gesenius de Monzambano gannit? Sane publicam famam extinguere penes me non est; & cui non sufficit, quod publice ejusdem me auctorem abnuerim, qua ratione isti os obrurem? *Ejusdem caput 6.* exercitii gratia a me defensum adversus eos, qui id impugnarunt. Quid præstiterim indigent harum rerum intelligentes, & affectibus ac præjudiciis vacui. Cetera quæ carpuntur defensorem accipiant, an minus, mea parum interest. Præsertim cum quæ liberius ibi quibusdam scripta videntur, auctoris, quisquis demum is sit, religioni aut pietati nihil præjudicare queant; si cogitemus, quam ille sibi personam imponat, aut quales loquentes introducat. Et qui nescit, quam multum intersit, Davusne loquatur an herus; is quæso absteineat de ejusmodi scriptis judicium ferre, ni inter Midæ socios censeri velit.

*Pufend. Eris Scand. T.IX.*

I

Ergo

Ergo fama illa de Monzambano, cui a me contradictum fuit, non obstat, quo minus adhuc Pufendorfius, quam Gesenius esse malim.

SED ne solis convitiis foedas chartas maculasse videatur, circa rem ipsam quoque aliquid nugari conatur Gesenius. Ac primo queritur, me ipsius demonstrationibus non respondisse modo tam scholastico, quam ipse proposuerat. Cujus quidem rei nulla alia fuit ratio, quam quia inficeti hominis vestigia legere nolui. *Iniquum me in jus natura arguebat, quod atrocem ipsi injuriam intulisset, mendacium & calumniam exprobranda.* Ego reponebam, me legitima *retorsione* eum fuisse. Adparet puto, me ad minorem respondisse. Tantum enim abest, mihi unquam in animo fuisse Gesenium ladere, ut quid hominis ille esset, & quamnam inter fumos Garlæ deliria eum agitent, perpetuo ignoraturus fuero, nisi me epistola illa insipida ultro lacessivisset. Puto autem satis gravem injuriam esse, alicui falso tribuere scriptum venenatum, ut ipse vocat, & *atheum*. Eam injuriam ut in me hæere paterer, nullum jus obligabat. Repellendi non expeditior via, quam ut mentitum esse dicerem, qui hæc de me assereret. Præsertim cum nondum auditum foret de aliquo privilegio, per quod Gesenio impune sit honestorum virorum famæ insultare. Atqui in ea accusatione ipse mihi non consto. Modo enim a Gesenio scriptum Warenbergii *aperte* mihi, modo Fratri meo tribui queror. Nimirum quia Gesenius sibi non constabat, & aliquando Warenbergium ita delineabat, ut facile adpareret, me peti; aliquando talia ipsi tribuebat, quæ non in me, sed in Fratrem meum cadere poterant. Ea causa fuit, cur retorsio alternative conciperetur. Sat *aperte* autem aliquem arguit, qui scripto publico id facit. Et licet hæc verba non expresse sint posita; tu Pufendorfi ejus scripti es auctor; extreme tamen stupidum fuisse oportet, qui non viderit, nostrum nomen abs Gesenio vellicari, quod & ipse menti suæ *obversasse*, dum ista scriberet, fatetur. Et statim atque illa epistola prodibat, passim amici de injuria nobis illata monebant. Id autem frequens est; ut & qui obliquis verbis alium pupugerit, directe & citra ambages vapulet. Neque vero mirum est, Gesenium titubanter scribere de viris, quos tam  
parum

parum noverat; cum solemne ipsi sit ad furiosi instar discrepantia sibi blaterare. Sicut *benedictio Christiana* eidem vocatur, qui spurcissimus libellus famosus est. Et qui modo nil nisi dicta sacra crepat, & schema hypocriticum ostentat, mox obscœnitate convitiis cum balatronibus & anhubajis certat. Quæ cum ita sint, satis puto manifesta est injuria, qua retorsionem meruit Gesenius. Ac supervacuum est istius verba heic producere, quæ *vel κατὰ τὸ πᾶν, vel per equipollentiam, vel per consequentiam planam, facilem & apodicticam id quod volo arguant*. Ista enim quibusvis exposita sunt; & vehementer dissuadent Medici, ne illud scriptum de-  
nuo attingam; quod gravissima nausea, stomachique languor inde sit proventurus. Recte porro ego a Gesenio postulavi, ut, si retorsionem meam abs se amoliri vellet, probaret, vel me aut Fratrem meum auctorem esse dialogi Warenbergiani, vel nusquam se id scriptum nobis tribuisse. Nunquam autem credebam, eo usque impudentiæ processurum Gesenium, ut posterius negare auderet, quod in clara luce est positum; & postquam nostrum nomen scripto publico in conspectu orbis eruditi investisset, ultro postulaturum, ut ego hoc ab ipso factum probem. Et inde dubitaveram, nam sensus communis illi inesset, qui probari adhuc sibi postularet mendacium & calumniam, quam scripto publico evomuerat. Quod si autem altera via retorsionem declinare volebat, tunc utique probandum ipsi incumberebat, vere eum dialogum nobis tribui, mihi autem simpliciter id negasse sufficiebat. Quid ergo mea verba cavillaris, Geseni, nisi ut complusculas paginas numis & calumniis implere possis? Aut cur adeo tumultuaris, quod tua aque ac famæ mendacia proprio vocabulo a me fuerint designata?

SECUNDO loco negat Gesenius, Asinium Tenebrionem abs se defensum. Quod ergo aliud non modica parte sui scripti agit? Magnam vero vim *Christiani amoris*; per quam *contemptim sentire* non potest Gesenius de Nicolao Beckmanno, quem *Regia Majestas tanto munere dignata est*, utut Eadem Regia Majestas istum munere dimotum *propter Indicem editum cum infamia relegaveris*. Nisi forte arcana quædam genii conspiratio ista illustria ingenia Tenebrionem & Vigilem

jungit; quorum scripta quoque pares Gratias redolent. Cur porro Gesenius tam odiose altera jam vice cuculat iudicium Sarcasmii de meis Elementis Juris prudentiæ, eo tempore latum, quo iste in Parnasso somniabat? Cum alii jamdudum injuriam mihi factam publicis scriptis ostenderint, & ipse auctor, uti amici retulerunt, aliam plane mentem postea induerit. Unde mihi nunquam curæ fuit injuriam istam persequi; & non degenerem animi duxi; qui errorem suum emendare potuit. Ergo quod nunc Gesenius ista dudum sepulta iterum in lucem protrahit, merito vapulare deberet, si nova plaga in homine, qui pudorem plane decoxit, locum haberet. Qui aut *Pacificum a Lapide* & ejus scripta novit, non multum referre agnoscet, quid ipse de aliis scribat aut judicet. Qui Bavium non odit, amet tua carmina Mævi. Quanquam & deformes buccæ suos basiatores quandoque inveniant, & similes labra lactucas adpetant. Præterea ex alio me capite iniquitatis in legem naturæ reum arguit Gesenius, quod *contemptim ac duriter habuerit legatos Dei, qui ex officio debite super periculosis novitatibus monuerint*. Ubi primo quidem miramur, quare ardellio Garlebiensis tam importune sollicitus sit, quid in aliena republica geratur. Si quis enim apud nos alternam injuria afficiat, sunt judices, sunt tribunalia; nec unquam ea cognitio Gardelebiam remittetur; ut plane cuculus iste non opus habeat tam rædiose ingeminare, quid ab hoc vel illo recte, quid secus gestum fuerit. De cetero nunquam ego debitum honorem sacerdotibus detraxi, inter muneris sui limites versantibus, iisque ut in conversatione civili amicis uterem, operam dedi; ac si unum vel alterum excipiam, neminem eorum novi, quem non amici loco habere possim. Id tamen firmiter mihi persuadeo, Deo propitio posse gaudere illum, quem unus aut alter sacerdotum iniquis odiis persequitur. Nec minus fas esse, salutem famamque suam contra sacerdotem, quam alium quemvis, defendere. Sed & hoc statuo, censuram librorum ad eos pertinere, qui summum in civitate imperium habent, & quibus eandem hi delegaverint, Eam si quis alius proprio ausu involaverit, non magis ipsius ratio habenda est, quam prætoris, si extra limites jurisdictionis suæ jus dicere aggrediatur. Quin & ubi in



ea re malitiose aut imperite versatus sit, injuriam non accipit, si digna facto suo vocabula audiat; præsertim cum ipse Gesenius, velut qui post longum delirium repente ad se redit, non absurde addat; *quàmvis humanæ illorum actiones humanorum errorum rubigine tangi & tentari facile potuerint: nec enim humani quidquam a se alienum putabunt.* Denique nec id saltem in dilucido isto intervallo negabis, Geseni, si quis vel ex officio vel ex amore veritatis, aut charitate Christiana alterum super errore omnino monendum sibi duxerit, illi esse observandum, ut revera in altero hæreat, de quo ipsum moniturus est; ut alterius errorem idoneis argumentis convincat; ut denique amice eundem hortetur errorem suum exuere. Ubi nihil horum præcesserit, quid faciendum mihi suaseris tu, qui ob impactam retorsionem in furias abiisti? An censes, cum silentio gladium jugulo fuisse excipiendum? Puto igitur ad demonstrationes Gesenii sic esse responsum, ut etiam acutissimis disputatoribus, qui *Gardelebia habitant*, satis fieri queat; quorum peritiam expressit supremus eorum choragus Gesenius, dom dicit; *quod Professor in publicis disputationibus illos, qui Thesibus suis opponunt, jubere soles; responde ad Syllogismum, &c.* Nam quantum ego memini, hoc quandoque respondentem ingeritur, opponenti nunquam.

ENIMVERO uti in convitiis spargendis nemo Gesenium facundia superaverit; ita ubi ad seria tandem deveniendum erat, nihil ipso est aridius, sic ut non amplius latret, sed mussitet. Eo breviori responsioni amoliamur hominem rudissimum. Quam late ego socialitatem extendam, tradidi L. I. c. 3. §. 15. *de Officiis.* Eam in constituendo juris naturalis fundamento rationalitati opponere, stolidum est. Mox, ne ob calumniam suam erubesceret, simulat se meum responsum non capere. Dixi, *religio quatenus ad disciplinam juris naturalis pertinet, intra spheram hujus vite terminatur*; id est, ex sola religione naturali jam nemo salvatur. Rationem articuli in libello *de Officiis* L. I. c. 4. §. 8. Hoc si quis negare velit, admittere cogetur, dari viam salutis æternæ extra Christum. Move aures, Geseni, ut sciam, an hæc jam intelligas, simulque fatere, nequissimum te calumniatorem esse, qui illud, quod ego de religione,

*quatenus ad jus naturale spectat*, enunciavi, malitiose detorques ad religionem salvificam, quæ ad juris naturalis disciplinam nequaquam pertinet; quasi nempe etiam salvifica religio a me pro nudo vinculo reipublicæ haberetur. Denique antequam cum ratione mecum agere destinat Gesenius, hoc ratiocinium, ingenii & candoris sui monumentum nobis relinquit. *Quia expedit, ut publice civitas personet doctrinis cum fine civitatum congruentibus*, id est, quia, uti ego explicavi, solida & bona ethica & politica in civitate doceri debet; igitur ex mente GESENIUM parum interest, turpis sit sive honesta, sive vera sive falsa religio, modo huic civitatum fini apta sit & congruens. Quid hoc argumento solidius? Ne nunc multis ostendam, quod neque vera religio fini civitatum, quem ego designavi, quidquam obsit, neque falsa prosit. Ceterum ut bona fide rationi renunciassent Gesenium credamus, ecce obsoletum suum carmen de polygamia recinit, quasi ego istam velut remedium promovenda pietatis commendaverim. Sane nunquam credidi, aliquem fore tam stupidum, quin intelligeret, id me dixisse; non esse, quare circa impugnandam polygamiam tantopere trepident certi homines, cum ab nullo vitio orbi Christiano inprimis in Europa minus periculi, quam ab hoc immineat. Unde frustra tanta cum consternatione ad arma conclamari, ubi hostis non adparet. Præsertim cum nulla major calamitas maritis obvenire possit, quam si plures simul habere uxores cogantur, in cujus mali remedium mortem sint optaturi.

SED nimirum pauca hæc a Gesenio obiter tantum adducta fuerunt. Summa autem laboris ipsi fuit specimen ostendere, in quantas furias homines fanatici possint ire. Cujus non minima pars est, illis, quos sibi insectandos sumserunt, gratia divina velle interdicare. Verum mi Geseni, postquam semel terrorem digestimus, quem quondam fulmina Vaticano emissæ vertici solebant generare, non facile addueimur ut credamus, Præfati Garlææ claves cæli erebique commissas. Sed nec ea, quæ inter nos agitur lis, Ministerium Ecclesiæ, ejusque sanctimoniam ullo modo spectat. Tu venenatum scriptum mihi falso tribuis: ego injuriam mihi fieri, addita retorsione, testor. Tu excandescis, & maledictorum atque calumniarum plaustra evomis: ego quantum

tum ad meam defensionem , ac retundendæ tuæ impudentiæ sufficere judicatur , repono. An & in hoc casu qui sacerdotis furorem abs se repulerit , unctus domini violasse judicabitur? Quin potius si cui ex tuo ordine omnino placeat virus suum in alterum evomere , tutius cathedra sacra abutetur , ubi intemperies animi & affectuum malignitas speciosiore sub prætextu delævire potest. Ast ubi ad scriptionem publicam idem provolvaverit , non est quod eximæ quid sortis præ reliquis sibi polliceatur. Si enim falsi quid asserit , erroris arguetur. Si fictis criminationibus de aliorum existimatione detrudere instituat , mendax & calumniator audiet. Si inepta scripta edat , eruditæ ludibrium debet. Si rationem ejeraverit , stolidus judicabitur. Si quæ convitia eructet , nihil pensi habuerit , furere videbitur. Si imperite de rebus , quas non didicit , judicium ferre instituat , Midæ fraterculus nuncupabitur. Porro uti cum Præsulatu Garlæano nihil mihi negotii est ; ita quæ pro salute mea cura vigilias tibi , mi Geseni , imperat , plene supervacua est. Neque enim tali nobis sacerdotum genere heic opus est , qui sub imagine precum scdam animi inflammari rabiem exhalant. Dira quoque ista carmina tuo potius capiti cane. Et si qui precando vales , ora , ut tuam tibi ruditatem & vesaniam agnoscere detur. De cetero ; uti haudquaquam timidum aut imparatum me offendent , si quibus sorte deinceps calamum in me stringere placeat , modo inscitiam , iracundiam , & scdas calumniandi artes procul habeant : ita Gesenio id honoris sufficere debet , quod mea opera ad qualemcunque nominis celebritatem protractus fuerit , qui antehac in alta velut caligine Garlæam bibebat. Si in posterum furere pergat , optimum responsi genus fuerit , contemnere & silere.

# SAMUELIS PUFENDORFII EPISTOLA

A D

AMICOS SUOS PER GERMANIAM,  
SUPER LIBELLO FAMOSO,

Q U E M

NICOLAUS BECKMANNUS

QUONDAM PROFESSOR IN ACADEMIA  
CAROLINA,

NUNC VERO CUM INFAMIA INDE RELEGATUS,  
MENTITO NOMINE VERIDICI CONSTANTIS  
SUPERIORI ANNO DISSEMINAVIT.

**N**ON dubium est, *Viri amici*, quotquot vel collegio quondam, vel conversatione, vel literarum commercio, vel benevolentia ex scriptis meis concepta, vel alia ratione mihi conjuncti estis, quin gravem dolorem atque indignationem conceperitis, prorepente in conspectum vestrum execrabili libello famoso, quo foediorum quidem orcus nunquam in opprobrium seculi evomit. Quanquam enim & ipsa dictio hominem asinino stupore ac ruditate arguat, & tota nefarii scripti facies nil nisi professam mentiendi rabiem præ se ferat: dolendum tamen videbatur, adversus me potissimum fuisse exserendum; quousque furor, infernali agitato æstro, procedere, & quid extremum in mentiando atque calumnia-

maniando foret. Sane multi in vicem mercedis pro utilissimo labore suo malefactorum importunitatem sunt experti; in plurimos quoque innocentes viros sœda & absurda multa sæpe numero jactata sunt; tamen quantum mihi ex historia literaria notum est, hoc certe seculo exemplum non exstat viri eruditi, cujus veræ & innoxia sententiæ per inscitiam aut pravitatem malevolorum malignius detortæ sint, vel qui obscœnioribus mendaciis, modoque magis scelesto adpersus sit. Quin & cum hætenus creditum fuerit, penes monachos & missifices palmam impudentiæ extitisse circa adversarios suos sœdis mendaciis & criminationibus onerandos; jam tandem repertus est novus Alastor, qui calumniatorum antesignanis omnem ruborem possit abstergere. Quorum & hoc insigne est artificium, plaustra mendaciorum in alios jactare, ac dein postulare, ut ista falsa esse ostendantur; perinde quasi accusasse & convitia sparsisse ad criminis probationem sufficiat. Ceterum eo iniquius fors mea comparata est, quod nec plane silere ad mendacia ista liceat, nec alius detur, qui horum vanitatem ita perspicue demonstrare queat & tamen honesto viro cum infami isto Alastore congregi erubescendum sit, cui jam amisso honore & existimatione ea novissima voluptas petitur, quam magnitudo infamiae apud desperatos gignere suevit. Equidem apud eos, qui me norunt, defensione nulla opus est, quibus de absurditate horum mendaciorum abunde constat. Honesti autem & cordati viri ultro ejusmodi sputeas chartas detestantur; improbumque judicant, de viris integræ semper famæ sinistri quid suspicari ex tali scriptionis genere, quod apud omnes populos moratiores infamiam & grave supplicium meretur. Et si eo res humanæ redierunt, ut ejusmodi chartis aliqua fides habeatur, jam omnium atrocissimorum scelerum reus est, cui impudens & nequam inimicus obigit. Est tamen non quibuscvis tam candidus animus, nec id probitatis in plurimos mortales cadit, ut quæ aliis inferitur injuria, eam abs se quoque non plane alienam judicent. Alii utut pleraque conficta agnoscant, tamen non omnia plane de nihilo esse suspicantur. Denique qui odio aut invidia in nos flagrant, aut qui ex scriptis nostris oppugnatis laureolam aucupantur, saltem in sinu gaudent, quacunque via molestiam mihi crea-

creari, si non aperte ejusmodi scelus adprobare audent, quod non detestari impuri animi argumentum est. Visum igitur fuit hanc scriptionem publicare, non ut me ab objectis criminibus purgem, quorum vanitatem Deus, cujus notitiam nihil fugit & multi honesti viri, quæ vitæ moresque mei penitus perspecti sunt, norunt; aut quod cum tetrico cadavere hominis jam civiliter mortui luctari velim: sed ut Germaniæ ob oculos ponam exemplum inusitati cujusdam & humanam malitiam supergressi furoris, qui inter prodigia & ostenta hujus seculi referri mereatur. Simul & hæc inde proveniet utilitas, quod adversarii mei, qui tam inficetum mihi bellum movere instituerant, non magnopere crista erecturi sint, in lucem protracto suo antesignano, qui primus incensor fuit omnium turbarum, quæ in me, meumque librum sub signis Inscitiæ, Livoris & Calumniæ surrexerunt. Plurimum autem ad illustrationem totius negotiæ faciet, si Cerberum istum ex antri sui tenebris protractum in aperto velut campo publice spectandum destituam. De quo tamen nihil tradam, nisi quod in notitia omnium eorum inter quos isthæc scribo, versatur, & quod si opus sit, fide actorum publicorum, & literarum authenticarum probari possit. Neque enim ut Beckmannus deterrimus bipedum habeatur, figmentis opus est, qui dum vixit, hoc unicum omni studio egit, ut soliditas & pravitas sua in obscuro ne latiraret.

NICOLAUS igitur BECKMANNUS Heida apud Dithmarfos oriundus, cum eo tempore, quo bellum Svecicum in Polonia & Borussia desagrabat, Regiomonte egisset, ubi miros profectus in Saltationibus Polonicis fecit, nescio qua occasione in familiam certi cujusdam Comitæ Svecici se contulit, ut ejusdem filium prima literarum elementa doceret. Holmiam post finitum bellum delatus nulla alia re, quam stoliditate potuit inclarescere, quæ in faciem ipsi solebat exprobrari. Post sexennium in familia Comitæ absumtum Marpurgum abiit, juris studio se applicaturus. Ubi dicitur *Medulam* suam *Justinianeam* ex privato collegio Manuscripto Professoris cujusdam compilasse, vel potius id paucis in locis interpolatum præfixo suo nomine Parisiis post edidisse. Certe vix triennium est, cum Nobilis quidam Svecus, qui Marpurgi aliquandiu hæserat, præsen-

sentibus quibusdam studiosis, & Professore uno heic loci diceret: Marpurgensem illum Professore Beckmanno plagii actionem intentaturum. Id certe patet, eam Medullam alium præferre genium a *Commentario ad Instituta* aliquot post annos scripto; nec eam spirare ruditatem & vesaniam, qua hic scatet; cum tamen alias intra tantum temporis spatium in melius ire debuissent studia hominis. Quicquid hujus sit, saltem descriptio ejus libri non exiguo labore ipsi constitit, cujus intemperantia icterum Parisiis contraxit. Aureliis titulum Doctoris, qui miros homini spiritus dabat, præsentì pecunia emit. Commendatione Comitìs, cui per sexennium inservierat, professionem juris Romani in Academia Carolina tunc recens instituta nanciscitur. In qua qualem personam acturus esset, ipso inaugurationis die luscumento specimine prælusit, dum processione ad ædem sacram cœpta super præcedentia cum Schwartzio, qui tunc extraordinarii Professoris Theologiæ titulum gerebat, ita acriter contendit, ut ad manus res jamjam deventura videretur, ni ceteri se interposuissent. Et hæc ratio est, quare in libello famoso, dum *viros Magni Nominis* recitat, meos heic loci adversarios, seipsum anteponat Schwartzio, ut vel nunc saltem dignitatem suam adversus istum vindicet. Quid posthæc auspicia rurbarum apud nos dederit, memorare supervacuum est. Quæ me tangunt paucis recensuisse suffecerit. Ab initio igitur bonus ille vir amicum se mihi simulabat, & cum sub adventum meum forte in Fionia abesset, cujus ædibus tantisper uti constitueram, ipse in domo suâ conclave unum atque alterum per sex puto hebdomadas mihi concedebat, donec proprias mihi ædes emissem. Pro quo officio plus ipsi discedens donavi, quam quantis totius anni pensio esse posset. Quanquam autem stoliditatem hominis & pudendam ruditatem primo statim congressu deprehendebam, eo minus tamen collisionis ab eo mihi metuebam, quod & curæ suæ suppellectilis conscium eum crederem, & cum in diverso studiorum genere versaremur, vel Cujacium peritia juris superare posset, ut luminibus meis nequidquam obstrueret. Paulatim tamen deprehendere cœpi, quam profunda invidiæ flamma istius pectus adureret; & quod omnes fortunæ suæ rationes heic loci in eo sitas crediderit, ut  
ego

ego hinc abessem. Cum nondum huc adpulissem, (quod postea mihi cognitum est,) non dubitavit ab Illustrissimo Academiae Cancellario per literas petere, efficeret, ut ego Heidelbergae manerem; se enim cum collega suo facile partes meas suppleturum. Et si responsum accepit, quo non magnopere gavisus fuit. Primis temporibus, dum amicum se adhuc simulat, subinde aures meas obrundebat, laborarem, ut in aula splendidiore munere potirer. Quod quo consilio caneret, facile adparebat, postquam non obicure ægrescere ipsum animadverti, cum videret domum meam a nobilibus adolescentibus magis ac magis frequentari. Apertius sese livor coepit exlerere, cum intellexisset, librum meum jam ad umbilicum deduci, & mox loco debito censuræ subjiciendum. Ipse enim mire ardebat, primus huic loco scriptis suis famam conciliare. Igitur statim quatuor aut quinque commentarios ad Instituta in mensa sua disponit; ex illis novum, si diis placet, commentarium generaturus; & vix paucis paginis utcumque conscribillatis, ejus imprimendi licentiam Holmiae per literas petit. Mox & bibliopolam sollicitat, ut eidem imprimendo sumtus suppeditet, spe praesentissimi lucri facta. Nam confirmabat fore, ut ita cupide iste liber emeretur, sicut calentes a fornace similæ solent; quæ ipsius verba erant: (*Es wurde abgehen, wie warme Semmeln.*) Cum isti persuadere non posset, ut pecunias suas perdere vellet, propriis sumtibus tam nobilem ingenii sui sortum in lucem protrahere constituit. Ut tamen omnino me praverteret, typographum in has leges adigere tentabat; nullam paginam imprimendam susciperet, antequam opus suum esset absolutum. Hoc quoque conatu depulsa miserrima ambitio eo acerbius indoluit, quod mihi postea injungeretur, commentarium ipsius revidere, ne quid legibus hujus regni adversum eo contineretur. Nam ruditatem & stultitiam suo periculo apricari concessum ipsi erat. Interea cum per triennium hominis vesania & pravitas ex variis litigiis ab ipso motis perspecta, patientiam superiorum consumsisset, initio anni 1671. salario privatus est, quo insinuabatur, sedem furoris exlerendi alibi esse ipsi quærendam. Heic igitur judicabat, unicam sibi superesse viam heic locorum subsistendi, si qua me evertere valuisset. Et si ego propalato jam ejus in me livo-



re aperte iactarem; si vel maxime dudum sepultus ego forem, ipsum tamen Beckmannum mansurum. Exinde hoc potissimum paratio conspiratio illa adversus me coepit, de qua in Apologia mea satis expositum fuit. Et ipse, dum in typographiam subinde graditur, aliquot articulos, cerebro suo non quadrantes, annotaverat; sed quos ceteri socii tanquam ad rhombum nihil plane facientes rejiciebant. Ac Schwartzius illibatam gloriam ex confecto Indice Novitatum sibi vindicatum ibat. Spes autem erat fore, ut si *tanti nominis viri* (ex elogio Beckmanni) supercilio me suo notassent, & univ. versus Sveciæ Clerus in me insurgeret, & ego inauditus, indefensusque condemnarer. Sane tam certam victoriam animo præceperant; ut is, penes quem præcipua factionis auctoritas, (*Winstrupius*) cuiuspiam amico his ipsis verbis diceret: *ne Regem quidem servare me posse*. Et idem publice in Academiæ Consistorio, me absente, pronunciaverat; omni mihi ingenio meo opus fore, ut hinc me extricarem. Credo equidem, si Beckmanno iudice causa esset disceptanda. Postea cum adversariis meis silentium foret impositum, Beckmannus nondum sibi quiescendum putavit; sed Indicem istum, abs se quibusdam in locis interpolatum, Giesæ Hassorum typis excudendum curavit, opera ad hanc rem usus cuiusdam bibliopolæ Holmienfis; qui cum interrogaret, quare non nomen suum scripto adponeret? respondit; exiguum id esse, nec dignum, cui nomen præfigatur; eoque duntaxat sine id conceptum, ut Pusendorfius intelligat, alios quoque homines præter ipsum quid sapere. Ita homini persuasit tam turpem operam sibi navare, cum viri candorem proceritate corporis, & titulo Doctoris metiretur. Curavit tamen, ut Beckmanni Manuscriptum sibi remitteretur, quo auctorem suum convincere posset, si forte post eam in rem inquireretur. Ceterum an istud scelus solo Beckmanno auctore susceptum sit, an vero cuiuspiam alterius suasu, consilio, aut adprobatione, liquido asserere nondum possum. Et facile patior, ut Beckmannus solus ex eo facinore nebulonis titulum reporrer. Nec si quis particeps fuit ideo poenam divinam effugiet, utut humani fori severitatem declinaverit. Causa autem istius flagitii suscepti manifesta

ste

ste adpareret. Spes quippe erat, fore in Germania aliquem præcipitis animi, & male oculati Zeli Theologum, qui conspectis istis chartis, nulla disquisitione instituta, statim ad arma clamaret. Ex quo novum prostratæ causæ fulcrum accessorum judicabatur. Quis enim desineps dubitaret, quin Pufendorfius statuisset, quæ ipsi in mentem nunquam venerunt, si doctor aliquis in Germania libellum famosum velut Apostolicum monumentum adorasset, aut Pufendorffii tradita in tabellis suis & dictatis non reperiri assereret. Enimvero uti in eo Beckmannum sua spes non plane fefellit, quod utique infami suo scripto effecit, ut unus & alter tam turpiter se prostituerit; utque adeo juxta Teutonicum adagium unus stultus multos stultos faceret: ita in eo falsus animi fuit, quod aut tanti ponderis apud nos fore putaret unius vel alterius viri cœcū judicium; aut suū se scelus ita occulte instruxisse crederet, ut ejus nunquam convinci posset. Nam cum rescivissem, quis Francofurti id scriptum distribuisset, facile deinde fuit ad fontem sceleris penetrare. Noster autem Beckmannus, cum sentiret, me jamjam ad finem inquisitionis pervenisse, repente Holmiam versus iter arripit, & ex itinere ad uxorem rescribit, ut supellectilem suam, quantum posset, venderet. In aulam delatus missionem suam petere cœpit; sed prævertentibus meis literis dilatus, cum interea Holmiæ Manuscriptum ipsius coram magistratu prolatum esset, & jam lictores mandatum acceperant, ut postera die hominem in carcerem raperent, ipse rem subodoratus, an conscientia vecors, nocte concubia Holmia profugit, & accelerandæ veredariorum promittudini, an occultandæ fugæ comitem sese per hospitia edidit. Et quanquam ad portus hujus provinciæ mandatum erat, ut sisteretur; tamen pro conniventia militum, aut ex litore infrequenti in vicinam Zelandiam evasit. Hafnia mense decembri anno 1673. epistolam ad me scribit, in qua primo me Hamburgum in duellum provocat, eo certiolem sibi de me victoriam pollicitus, quod ipse dexteritatis suæ in arte gladiatoria non obscurum specimen dederat, heic loci cum Lanista quodam circumforaneo, qui licentiam artis suæ exercendæ petebat, in magna studioforum corona tan-

tantus Doctor & Professor congressus, ut ostenderet, Beckmannianam velaniam non legibus solum armatam, sed & armis decoratam esse. Sed quia suspicabatur, ægre me adduci posse, tempore hiberno iter Hamburgum suscipere, ut cum nebulone ibi depugnarem, carnisfici victimam debituro; eadem illa epistola minatus est, ni ab ipso persequendo desisterem, se mediate & immediate me aggressurum, etiam cum dispendio salutis suæ æternæ, & illa ipsa mendacia, quæ jam in recenti ejusdem libello famoso exponuntur, mihi publice objecturum. Quam epistolam ego in Consistorio Academicæ protuli, & quædam ex ea sententias protocollo inseri curavi. Sic ut isthoc scelus, & universus mendaciorum adparatus mihi dudum sit perspectus, qui ex illa ipsa epistola fere ad verbum est expressus, Et si dolendum sit, obscura duntaxat vestigia adparere tam argutæ sententiæ, quam in epistola posuerat: se jam me provocare, *quia nunc in statu naturali absque entibus moralibus constitutus esset.* Quo ipso candide in bestiam se degenerasse profitebatur. Nam in disciplina juris naturalis bestia non aliter consideratur, quam animal in statu quasi naturali absque entibus moralibus constitutum. Ego tamen minas istius flocci faciens, & apud cordatos viros plus innocentiam meam, quam Beckmanni mendacia, valituram confidens, intrepide actionem adversus ipsum persequabar. Demum sententia a Consistorio Academico pronunciata, & in aulam transmissa a S. R. Majestate quidem ratihabetur, ut tamen clementiam suam testaretur, addidit; veniam delicti Beckmannum obtenturum, si deprecatione, qua ego contentus esse possem, me placaret. Sed tantum aberat, ut ille tam insignem Regiam gratiam amplecteretur, ut potius impudentissimas literas, & quales nonnisi a Beckmanno conscribi possunt, ad Consistorium Academicum daret; in quibus post prolixos furoris vomitus demum concludit, se propter evitandam damnationem æternam precibus uxoris hoc dare, ut lis illa utrinque silentio sopiatur. De injuria mihi facta, aut deprecatione nullum verbum. Minæ tandem repetebantur, & quantum incendium adversus me esset excitaturus. Subjecit tamen, fore ut uterque nostrum parum honoris inde sit reportaturus. Quod de ipso quidem verissimum est, Nam licet

pet & mihi parum gloriosum sit, tam tetræ bellæ favorem excipere; tamen apud superiores meos, & omnes honestos atque cordatos viros non magis existimationi meæ detrimentum aliquod ex scelesto illo scripto meo, quam si me furiosus aliquis luto adpersisset. Nam molestum quidem est circa ejusmodi sordes abstergendas occupari; sed quo minus alter insaniat, præstare meum non est. Compositione amica hoc modo abrupta, executionem sententiæ omnibus modis impedire nitebantur, qui Indicem Novitatum hæc enixi erant; quod metuerent, ne aliqua scintilla ex istius infami rogo in ipsorum barbas transvolaret; quorum unus (*Schwartzius*) per vulnera *Jesu Christi* obsecrabat, ne id fieret. Cum ea res in Senatu Regni in utramque partem disceptaretur, S. R. Majestatis effatum dubitationi finem imposuit; *Pufendorfio petenti justitiam denegari non posse*. Igitur mense Aprili anno 1675. sententia in Beckmannum hæc publice in foro promulgata, & *Index novitatum* per carnificem igni perquam luculento datus est; ex cujus cineribus novus jam libellus famosus ad phœnicis instar surrexit. Et inde tutum jam est Beckmanno libellos famosos edere, & citra respectum Dei hominumque mentiri, qui semel in desperatum furorem induruit, ut seipso profitente malit jacturam salutis æternæ facere, quam adversus me non insanire. Et honore jam omni exutus nihil novæ infamiæ amplius capit. Nam ne fustigationem subeat, facile per hos belli tumultus cauturum se sperat.

CETERUM ut eo minus dubium restet illis, qui animal istud penitus non norunt, nullum mendacium tam absurdum esse, quo asserto Beckmannus erubescere possit; age unum & alterum ipsius factum proferamus hæc loci patratum, quo tempore adhuc inter honestos viros censebatur. Ac ne quid jam reperam de scelestâ illâ epistola, sine subscriptione Holmiam missa, de qua mentio fit in Apologia nostra p. 75. cujus Beckmannus auctor laudatur; anno 1669. honorato cuiusdam Viro, (cujus nomen, cum nesciam, an hoc gratum ipsi sit futurum, hæc adponere supersedeo) furti crimen objiciebat. Causa coram Commissariis, magnæ dignationis viris, hæc loci cognita, mendacii & calumniæ convincebatur noster Beckmannus, utut syllogismis in forma  
ador-

adornatis magnos strepitus dedisset. Quo tamen tempore pœnam magis, quam infamiam declinavit, tantam injuriam interpositu amici condonante isto viro; cui satisfactiōis loco erat, quod innocentiam suam demonstrasset, & Beckmannum ad agnitionem injuriæ suæ adegisset. Poterat hoc sufficere, ne inter honestos viros luridum suum os amplius ostendere auderet. Audiamus aliud ejus factum non paulo scœdius. Per longum satis tempus domi suæ mola manuarum instructa Regis reditus defraudaverat Beckmannus. Re tandem per telonas deprehensa, furtivo molitori multa centum thalerorum simplicium dicitur. Hic ut telonam ulcisceretur, publicæ ipsi peculatum, furtum, homicidium, aliaque crimina atrocia objecit. Res coram Commissariis examinatur: Domino Doctori aqua ubique hæret. Quid heic tanti nominis Jurisconsultus ageret? qui ut unius delicti pœnam effugeret, pluribus se per vesanam malitiam induerat. Nihil jam restat, quam ut pudoris & existimationis jactura, ipsi vilissima, graviolem pœnam declinet. Interventu amicorum Sueno Jonæ filius (id telonæ nomen est,) utcunque placatur, postquam egregias Doctor literas reversales scripsisset in hanc sententiam: se crimina illa, quæ longo ordine enumerantur, ipsi objecisse, non quidem animo ea probandi, sed ut suspectum ipsum redderet, quasi & sibi ab eodem facta fuerit injuria. Sed cum jam deprehendat, hanc rem sibi ad effugiendam multam prodesse non posse; igitur se ista retractare, & telonam ab omnibus objectionibus immunem declarare. Telona vicissim injuriam ipsi condonat, salvo tamen superiorum jure. Quomodo tantus Jurisconsultus malitosum calumniatorem & mendacem disertius describere poterat? Aut quem sibi amplius locum inter honestos viros reliquerat? Extant adhuc illæ litteræ Beckmanni manu subscriptæ, & exempla earundem in multorum manibus versantur. Quam facile ergo fuerat, post hæc specimina famosum libellum procudere, insulsis refertum mendaciis, homini desperato, infami atque intestabili, cui unicum hoc vitæ pretium restabat, quacunque via ardorem vindictæ in me expromere? Nec est quod aliquem moyeat temeraria illa asseveratio, qua mendaciis suis fidem adstruere conatur impurissimus bipedum. Cui enim erectis digitis & conceptis verbis post

præmissam de pœna perjurii admonitionem juranti de re, quam oculis se suis vidisse diceret, juxta leges hujus Regni fides haberi non deberet; illius execrationi aliquod pondus tribueretur ex infamibus suis tenebris crocicandi in tali actu, qui meri sceleris causa susceptus est? Perinde ac si quis magnifice de pietate alicujus furis sentire velit, ideo quod dum ad furandum se accingit, super successu Deum invocat.

QUANQUAM autem æqui rerum arbitri ex dictis facile judicaturi sunt, quo numero habendum sit ovum abs ejusmodi corvo exclusum: ne tamen Alastor voto suo ulla ex parte potiatur, neve ex mendaciis ipsius vel minima suspicio hæreat, quædam ad libellum famosum annotare placet, quæ ad impudentiam calumniæ illustrandam aliquid videbuntur facere. Ac levicula quidem illa & prope puerilia prætereo, quibus tamen Alastor putavit sese animo meo ægerrime facere: quod tam sollicitè *magistrum* me, & *philosophum*, ac *philosophiæ professorem* vocitet. Ea enim erat non minima invidiæ causa in me, quod ego loco, & salario, quam ipse, gauderem splendidiore, cum tamen titulum Doctoris nunquam appetivissem; nec me purum putum Legistam tulissem. Quasi omnem eruditionem titulis scholasticis metiri necessum esset; aut quasi inter eruditos opprobrio foret, aliquid præter aridas legum allegationes nosse. Sic & ridicule *risus* meus notatur a gravissimo scilicet viro, qui repente jam tertius e cœlo cecidit Cato. Quod vocabulum nescio qua instinctu jam invaserit homo, qui per totam vitam risui aliorum præbuit materiam, nisi quod bona fide Porcius sit. Etsi quod risui tam infestus sit, minus mirum videri jam debeat, utpote qui vesania se sua eo redigit, ut ringendî potius quam ridendi causam habeat. Eoque jam, si Diis placeat, nobis comminiscitur novam *Academiæ Catonianam*, cui ipse in Apollinis vicem præsideat, non quidem Musis Gratiisque, sed Infamia, Furore, Flagitio & Barbarie stipatus. Quo ipso collabuntur amicorum ejus magnificæ fabulæ, heic magna asseveratione sparsæ; eundem ejurata vita literaria Fuldæ Cancellarii munere potitum; postea Marti se consecrasse, & tribunum militum, mox præfectum equitum factum; quasi ad utrumque officium sat commendationis habeat cum in-

famia

famia relegatum esse, aut a lanista circumforaneo vapulasse. Sed isthæc leviora mittamus. *Athei & atheismi* convitium & in libello famoso, & in epistola encyclica utramque paginam implet. Quod cur Alastori potissimum placuerit, cum ad mentiendi impudentiam nihil interfuerit, an parricidium mihi & latrocinium, & piraticam, & veneficium, & plura alia objecisset, in promptu causa est; ut nempe ejus vocabuli atrocitate sacerdotes in me irritaret. Enimvero improbe plane de sacro ordine sentit Alastor, si credit, apud eundem vesani hominis maledictum in libello famoso eructatum ponderis aliquid habiturum adversus virum bonæ temper famæ, ipsumque statim ad nutum impuri calumniatoris in iras abiturum. Sane ego longe prolixius mihi polliceor de prudentia & circumspectiōne istius ordinis: nec facile spero ullum cordatum tam prodigum fore exiltimationis suæ, ut sub auspiciis Beckmanni tam infami militiæ nomen sit daturus, in qua nihil aliud quærat, quam ut innocentis viri fama variis mendaciis & calumniis maculetur. Sed excutiamus potius argumenta, quibus Alastor probare instituit crimen tam atrox, & tantopere abhorrens a professione & vita mea, & a præsumptione illa, qua dum vixi apud omnes bonos, qui me norunt, gavisus sum. Arguuntur primo *pestifera, nova & inaudita principia*: quæ scilicet, ex consideratione rerum & hominum, operum utique divinorum, hausta, quam proxime ad sana tradita Stoicorum, ad religionem autem Christianam examussim quadrant. Circa quæ excolenda laborem a me susceptum profiteor eo fine, ut quantum in me quibusdam Protestantium scholis exturbarem jejunam illam Aristotelis Ethicam, circa evolvenda undecim virtutum vocabula satagentem; & politicam ejusdem inutilem, ac quædam dogmata reipublicæ perniciosa continentem integritati & sanitati restituerem; utque nostrates ex sana ratione, quam lacunis Moralistarum, quod justum & injustum sit eruere mallet. Quem meum laborem & scopum rei literariæ & publicæ salutarem existere, vel hoc argumento non parum confirmor, quod sentiam Satanam, per primum suum satellitem tantum furorem in me effundere; utpote cui dolet, regnum tenebrarum detrimenti quid capere. Qui & ipse non alio modo usus est in persequendis

puræ religionis instauratoribus, quam ut doctrinam ipsorum juxta & vitam pessimis calumniis oneraret. Et sane si Dei & veritatis causam ageret Alastor, ejusmodi artibus, quales in me sunt usurpatæ, haud quidquam opus erat. Jubentur quoque ab Alastore signum atheismi esse *entia Moralia*; quæ utique fuerunt, quamdiu genus humanum extitit. Sed quod eadem antehac in ordinem non sunt digesta, nec ipsorum indoles curatius tradita, philosophorum incuria in culpa est. Quæ & ipsa jam a Viro ingeniosissimo D. Erhardo Weigelio, Mathematicum apud Jenenses Professore, lingua Teutonica ita perspicue sunt exposita, ut ne a rusticis quidem obscuritatis amplius accusari possint *indifferentiam omnium actionum humanarum* a me traditam scædum est mendacium, ut crediderim, ipsum diabolum eo prolato erubescere posse, quippe quod plane belluinum stuporem arguit. Quid enim rationis illi inesse queat, qui discernere, nesciat actionem humanam & moralem a nudo motu physico a lege abstracto. Inprimis velut sedes novi atheismi in epistola insinuitur *liber primus*; quem cum Beckmannus a se non intelligi ipse fateatur, quo atrocius contra istum exclamat, eo gravius furere est censendus. Per *Novitates* meas nihil in jure naturali immutatum est, cujus præcepta perpetuo sunt & fuerunt eadem: sed disciplina ejus juris, modusque tractandi & demonstrandi culturam atque polituram capit. Et erroribus ac næniis ejusdem facies explendescit. Sed nec illud ad atheismum pertinet, si quis contra ignorantiam, malitiam & invidiam apud superiores suos præsidium petat & inveniat; aut si cordati Principes suorum hominum maleconsultum fervorem temperent, ne per inania litigia existimationem suam prostituant. Id porro commentum non minus scelestum, quam absurdum est, quod odium, quo HOBBSII nomen apud multos laborat, in me transfundere studet Beckmannus, & ceteri, qui me allatrant. Cum tamen non ea modo, quæ iste in religione novavit, expresse a me improbentur; sed & meum fundamentum, ex quo ego juris naturalis præcepta deduco. Hobbesianæ hypothese directe contrarietur. Ego enim Stoicorum sanæ sententiæ proxime accedo; Hobbesius autem Epicureorum hypothesein recoquit. Et si quis Richardi CUMBERLANDI scriptum eodem anno in Angliâ,

quo



quo meum opus in Suecia editum, cum meo accurate conferre velit, videbit omnia fere, quæ iste in Hobbesio reprehendit, a me quoque fuisse notata; cum tamen idem ex professo hoc egerit, ut Hobbesii hypothesin destrueret, ego autem in accessorii duntaxat loco habuerim ejusdem errores notasse. Id tamen non diffiteor, me quædam Hobbesii loca conatum explicare; ex dextra interpretatione emollire; multa, quæ cum recta ratione congruunt, retinuisse. Quod cur mihi non liceat, nondum adparet; nisi forte illud vehementer ad rem facit, quod Alastor istum *religione Calvinianum* (quem mox *atheum* designat,) & *natione Anglum* tam solícite inculcat. Quasi non infinita Christianorum multitudo tantum non in verba Aristotelis juraret, qui & religione ethnicus, & natione Græcus fuit. Id tamen valde argutum; quod Beckmannus, ut eruditus orbis jam tandem quid de Hobbesio sentiendum intelligat, ad *præfationem commentarii sui ad Instituta* lectorem remittit. Id enim non ex ambitione tantum fit, ut *tanti nominis vir*, quem seipsum vocat, propria commendatione scripto suo auctoritatem conciliet; sed & hac ratione unius, vel alterius curiositatem irritaturam se sperat, ut eum librum emanet, Beckmanni sumptibus impressum. Sed videte, quam non invideam homini extremum famis remedium. Ipse ego quantum possum suadeo, horrore, oro obsecroque omnes, qui Asinii Tenebrionis sectam sequuntur, emanet sibi istum Patriarchæ sui fortum, & sacrosanctum habeant tanti viri monumentum, ex quo nostra ætas videre potest, quid ultimum sit in stoliditate. Nescio etiam an multum ad rhombum faciat putida illa fabula de pugna duorum Studiosorum, mirandum specimen acuminis Beckmanniani: in qua illud eleganter ex ingenio Beckmanni est expressum, quod ea disputatio *inter pocula* feratur suscepta. Nam id habet noster. Post tertium poculum Syllogismi in forma rupto velut repagulo qua data porta ruunt, & mensam turbine perflant; ac totum tectum nil nisi Quicunque Atqui, Ergo resonat. Sed id valde præter decorem, quod illi, qui a meis partibus steterat; victoriam tribuit, non sine scævo omine pro Beckmanno & ceteris, qui ipsius novæ militiæ nomen dederunt. Circa *Monzambanum*, de quo magnam vim mendaciorum cumulat

lat Alastor, quæ alio loco a me dicta sunt, repetere  
tacet. Quem usque adeo non capit stupor Beckman-  
nianus, ut audere non erubescat, eo libello *eversionem  
status publici per Germaniam quari*: cum tamen Seve-  
rinus fundamenti loco subternat; statum Germaniæ,  
pace Westphalica constitutum esse conservandum, nec  
contra eam quidquam novandum. Quo ipso & liberta-  
tem Ordinum Germaniæ, & securitatem religionis Pro-  
testantium inniri, cæcus sit, qui non videat. Ut mi-  
rari satis non possim, illos potissimum id scripti impu-  
gnasse, qui hucce partibus favere tenebantur. Audiamus  
tamen argumenta, quibus me istius libelli auctorem in-  
stituit. Ait, in tota Suecia *juxta propriam confessionem*  
a Magnatibus me auctorem haberi. Ast ea confessio  
nuspian extat. Eum *Magnatibus in Suecia & aliis in  
fidei & amicitia tesseram a me datum esse*, impuden-  
tissimum est mendacium. Nulli mortalium unquam li-  
bellus iste a me dono datus fuit. Imo ille ipse codex,  
quo ego utor, ab ornatissimo viro Antonio Christiani  
Rigenfi, tunc meo Heidelbergæ contubernali, ex nun-  
dinis Francofurtensibus dono mihi afferebatur. Quam  
ficulneum porro est ratiocinium inde desumptum, quod  
ego *omnia* illud politicum de republica irregulari, ad  
statum Germaniæ adplicatum, exercitii causa defende-  
rim? De stylo nemo minus quam Beckmannus judica-  
re potest, quo nemo unquam stolidius scripsit. De *Spha-  
ra cælesti* Severino & Apologiæ meæ præfixa ridiculum  
est, quasi nulli alii libri hoc insigne præferant. Apolo-  
gia mea Lipsiæ impressa est. Interroget Alastor, num  
& Monzambanus ibidem impressus sit. Par ceteris men-  
dacium est, *me ambitiose eo nomine gloriatum; quod  
Monzambanum scripserim*. Quis audivit? Denique ad  
duorum Virorum testimonia provocare nulla alia occa-  
sione Alastori in mentem venit, quam quia norat, Per-  
illustrem quondam Baronem Boineburgium insignem fuis-  
se studiorum meorum fautorem; & cum altero me olim  
Francofurti frequenter conversatum. Sed mittamus Mon-  
zambanum, cui utique aliquis in Germania locus relin-  
quetur, quoad libertas Ordinum, & religio Protestan-  
tium ibi firmo stabit talo. Pergit seipsum mentiundo  
superare Alastor, dum scribit, *me nullam Religionem  
cum Platone*, (agnoscas hominem in omni antiquitate  
ver-

versatissimum , ) aut plane gentilem Romanam fovere . Quippini ? Nam inter alia in opere meo publice scripsi , religionem statui reipublicæ esse accommodandam , & quasi pro instrumento ad conservandum statum publicum habendam . Quid impudentius unquam orbis audivit ? In manibus multorum versatur liber meus , versatur Apologia ; postquam peculiaris adhuc dissertatio a me conscripta est eradicandæ penitus isti calumniæ : ubi ad oculum monstratur , id a me tantum doceri : providendum esse rectoribus civitatum , ne sub specie & obtentu religionis falsa & perniciofa dogmata politica disseminentur . Et tamen non veretur tantum mendacium revomere Alastor , cujus falsitatem deprehendere possunt omnes , qui legere norunt . Par mendacium est , a me resurrectionem mortuorum non credi . Si Beckmannus producere possit ullum mortalium , qui Deo teste asserere possit , se publice aut privatim audivisse , me ullo verbo articulum istum in dubium revocasse , tunc optimus & veracissimus virorum Beckmannus a me declarabitur . Sic non credam ego diabolum dari , qui ejusdem satellitem tanta rabie in me sævire sentio ? Nam quæ Beckmannus in me patravit : humanam malitiam longe excedunt . Sed quod spectra peculiarem articulum fidei constituent , nondum audivi . Super quibus si quis ad Inquisitionem me trahat , ita respondebo : me nunquam spectrum vidisse , nec ut videam cupere : Ab imperitis hominibus multa nocturno metu & errore caliginis , aut illusionibus aliorum fingi putare : Omnibus promiscue fidem detrahere temerarium censere . De aternitate mundi nemo me vel differendi causa pro Aristotele loquentem unquam audivit ; & in libello meo de Officio eadem a me expresse damnatur . Porro ut ego plura sabbata celebrem , quam lex divina & antiqua Ecclesiæ consuetudo jubet , ratio muneris & studiorum meorum non patitur . Quod si autem in eodem templo duo Sacerdotes alternis diebus dominicis concionentur , quorum alter cathedra sacra abutatur ad evomendum in me succum nigræ loliginis , ac omnes occasiones aucupetur me vellicandi & traducendi ; num ullo jure teneor istius hominis virus , quod de suggestu in me evomit , hianti ore præsens excipere ? Aut quis me prohibebit tantisper in alio templo concionem au-

dire? Crassissimum porro est mendacium, quod ego unquam *duos delegatos meo nomine* ad ullum heic sacerdotem miserim. Omnes, si opus sit, vel jurato falsum id esse testabuntur. Sed circa *Secretarium Academiae* ita res habet: Quando primum heic loci bellum contra me movebatur, ut etiam fex vulgi, quæ alia non capiebat, materiam garriendi acciperet, spargebatur, a me doceri, debere unum virum duas habere uxores. Istas nugas ad aures Concionatoris primarii M. Johannis Ernesti pervenisse, ex quibusdam verbis ipsius colligebam. Itaque ne optimus vir in eo errore hareret, Secretarium Academiae, qui tunc domo mea utebatur, ad eum misit, ut ex meo libro illi ostenderet, mihi eam sententiam a malevolis falso affingi. Quod uti amico animo a me fiebat; ita & in bonam partem id iste accepit, & ex eo tempore nullum amplius verbum ea de re fecit. De *cantatione Missarum* sine dubio per somnum Alastori in mentem venit. Nam quid istæ nugæ sibi velint, ego plane non capio. Inde aliam mendaciorum seriem orditur Satanæ satelles. De quorum falsitate etsi Deo omniscio, & plurimis honestis viris, qui adhuc vivunt, & decursum vitæ meæ norunt, constet; pauca tamen addam in gratiam eorum, quibus nulla proprior mei est notitia. Ac de abominabili crimine primum videamus, quod anno 1657. & 1658. Soræ a me patratum scribit. Annum 1657. ego a principio ad finem Jenæ in ædibus D. Weigelii exegi. Anno 1658. ab Illustri Viro D. Coyeto Lipsia, ubi tunc mensa D. Johannis Bornii Jureconsulti utebar, evocatus fui, ut studiis filiorum ipsius præessem. Nam quod ego nunquam isti viro *ut scriba inservierim*, ipse Alastor optime novit. Ad memoratum Virum Hafniam perveni, ubi is tunc Legati munereungebatur, labente mense Aprili. Cum negotiatio Legatorum Svecicorum extraheretur, Hafniæ subsistendum mihi erat usque ad mensem Augustum. Quo mense cum repente bellum recrudesceret, cum altero Legato Illustrissimo Barone Stenone Bielke, nunc Regni Sveciæ Thesaurario, (nam Dominus Coyetus paucos ante dies ad Regem Sveciæ excurrerat, me Hafniæ relicto) ac omni Legatorum comitatu ac familia in custodiam datus, inque ea per octo menses detentus fui. Ergo quo tempore ista Soræ

a me

a me patrata mentitur Alastor, ego Soram nondum oculis meis videram. Sub finem mensis Aprilis anno 1659. Hafnia dimissus Helsingoram perveni viribus valde afflictis, quod me nondum a febris ptechiali recreassem; quæ paulo ante Hafniæ me morti prope admovebat, in qua Valentinus Caspar Rupitius Magdeburgensis, tunc Medicinæ studiosus, fidelissime mihi Medicinam fecerat. Feito Pentecostes imminente Frater recreationis causa, & præcipue ut D. Henricum Ernstium salutarem, Soram me abduxit. Eo pervenimus die Saturni, quæ festum proxime præcedit. Diversabamur in publico hospitio, in quo tunc temporis quoque agebat Habbeus Secretarius Regius, & N. Mullerus Gedanensis Medicinæ Doctor. Prima feria Pentecostes coenabamus apud Præfectum quondam Soranum D. Georgium Rosencrantz, altera apud D. Georgium Witzleben Theologum; tertio die Abraham Wonchter, pistor, prandium nobis adparaverat. Quarto die iterum Helsingoram versus tendebamus, & in transitu D. Thomam Bartholinum Roschildæ salutabamus, qui tempore obsidionis Hafniensis ibi commorabatur. Hoc modo, & in talium virorum consortio triduum mihi Soræ exactum; quæ ex eo tempore nunquam mihi visa. Ex quibus & quid de carmine in puellam scripto, & de novellis concinnatis sentiendum sit, adparet. Et satis novi, nemini mortalium Soræ tale quid de me ne per somnium quidem in mentem venisse, nedum ut unquam constans aliqua fama ea de re fuerit. Sed ista portenta, ut & cetera omnia, diaboli instinctu Alastor finxit, ut illi cui se devovit, improbitatem suam raro quopiam specimine adprobaret, ac ne perjurium suum vulgari cuiquam mendacio impenderet. De vita mea Heidelbergæ exacta testes excitare possum tum, qui instar omnium est, Serenissimum Electorem Palatinum, tum Collegas meos, & tot florentissimos juvenes, qui eo tempore studiis ibi operabantur, tum omnes ejus urbis incolas. Quibus vitam meam adeo adprobasse confido, ut nihil magis optem, quam Alastorem ibidem deprehendi posse, ubi in mei gratiam virgis publice cædendus, & cauterio signandus sit. Et sane usque adeo vita mihi eo loco non dissolute agebatur, ut citra vanitatem asseverare auserim, præter laborem publice privatimque docendi; plus bonorum

rum librorum Heidelbergæ uno anno mihi fuisse evolutum, quam Beckmannus per totum vitæ suæ spatium inspexit. Quin & ea, quæ vir quondam longe eruditissimus BOECLERUS in *epistola dedicatoria Notis ad Grozii librum II.* præfixa, de me in vicina Argentina scripsit, longe diversa ratione, atque Alastor mentitur, ætatem a me Heidelbergæ exactam insinuant. Sed nimirum præcipuum fontem omnium calumniarum dissimulare non potuit Beckmannus, dum nobilem juventutem contubernio meo tunc usam a me corruptam gannit. Illa enim nobilis juvenus tantam mihi invidiam peperit, & eidem a me alienandæ conspiratio ista in me inita est; de qua satis in Apologia mea dictum. Si nullos ego nobiles discipulos & contubernales heic loci habuissem, ex ipsius Beckmanni judicio, sanctitate, devotione, innocentia nemo superior me existeret. Quod ulterius mentitur ALASTOR, *Serenissimi Electoris Palatini Primogenitum contra Parentis salutem & jus divinum male informatum* a me esse; ea calumnia in ipsos quoque Optimos Principes redundat. De qua ut omnibus constet, pauca hæc sufficere possunt. Anno 1667. cum jam decretum esset de me in Sveciam evocando, Serenissimus Elector Palatinus Serenissimo itidem suo Filio jussit, me certum aliquod pensum extra ordinem explicare; (nam habebat alios ordinarios suos informatores.) Id quod intra tres menses æstivos absolutum fuit. Ac nemo ulterius inquirendum judicabit, ubi intellexerit, id ab Ipso Serenissimo Electore, Principe divinarum atque humanarum rerum callentissimo, fuisse mihi injectum. Atque iste exiguus labor tantum abest, ut *sine premio* mihi fuerit exactus, ut ipse Alastor non semel fauces suas grandi illo poculo, quo præter alia eo nomine donatum me norat, proluerit. Per summam quoque impudentiam testes excitat Dominos Blumium & Boeckelmannum, quos honestissimos viros de hoc negotio ne somniasse quidem constat; quorum nominibus ideo abutitur, quod forte audiverat, eos parum æquo in me animo fuisse. Sane Blumius quo tempore ista informatio fiebat, in ministerio & gratia Serenissimi Electoris Palatini non erat. Boeckelmanno autem nihil unquam negotii cum informatione Principis fuit, cujus directio D. Johanne Ludovico Fabricio, viro mihi

ami-

amicissimo, commissa erat. Par prioribus mendacium est, quod addit ALASTOR: *Voluisse Serenissimum Electorem ignominiose me Heidelbergæ dimittere*. Cum nemo Heidelbergensium ignoret, Serenissimum Electorem, meum discessum ægre tulisse; noluisse tamen incrementa fortunarum mearum, quæ in Suecia quærebam, impedire. Quin post discessum meum Idem clementissimam suam in me propensionem non verbis solum, sed & re ipsa una plus vice testatus est. Eiusdem generis est, quod ALASTOR pergit: *precario me professionem philosophicam juris naturalis in Scania adeptum*. Sane extant adhuc literæ Illustrissimi Regni Cancellarii ad fratrem meum tunc Parisiis Residentem, quibus ab eo requirit, ut mihi persuadeat, ne vocationem Suecicam abnuerem. Et quam precario hoc venerim, testatur salarium, & locus mihi assignatus primarius, cuius invidia Alastorem non parum adussit. Eius quippe stupor digerere non poterat, leges Dei majore dignatione quam Justiniani haberi, & in illis evolvendis non minus ingenii & eruditionis, quam in hisce requiri. Puto jam satis a me ostensum fuisse, abs nullo homine, cui ulla mica honestatis & bonæ mentis restat, tantam *varaginem*, ut Beckmanniana latinitate utar, scœdissimorum & absurdissimorum mendaciorum potuisse consarcinari, ni patris mendaciorum diaboli instinctu ferretur; cui ut eo firmiter se pignoreret Alastor, perjurio tandem in conspectu Germaniæ sese adstringit. Ergo vivit profecto Deus, qui impium hominem, cui salutem animæ suæ immanibus odiis & vindictæ libidini immolare propositum fuit, dignis demum suppliciis mactabit; postquam, quæ hætenus pro sceleribus inflicta est castigatio, malitiam nefarii capitis tantum induravit.

Post eructatum perjurium cetera mendacia securius & languidiore asseveratione expromuntur. Nam quod atrociter in apologiam meam invehitur, facile Beckmanno ignosco. Ibi quippe sub Asinii Tenebrionis vocabulo suis se coloribus non infeliciter depictum conspicit, & quod hætenus ludibrium omnibus, qui cum ipso conversati sunt, exhibuit, jam etiam ignotis debet. Inde Alastor, velut proprio veneno exhausto, a fratre & patrone suo dilectissimo Pontifice Garlebiensi nonnulla mutuo sumit, & solícite enumerat officia erga certos viros

viros *magni nominis* ; inter quos ipse proximum a primo locum sibi assignat, quæ a me violata jactat. Ubi illud ex arte calumniandi, quod plures huic negotio immiscere conatur, qui idem ad se nihil spectare aperte profitentur, Illustres juvenes meos discipulos Dominum Fossium, Cervinum, & Papke. Deinde uti ample nimis officia mea erga istos, quibuscum mihi revera negotium fuit, enumerat, quorum pleraque non agnosco : ita male Beckmannus omisit illa officia, quæ vicissim ab istis mihi debebantur, simulque quales iidem adversus me sese gesserint. De hoc enim nisi constet, durius an mollius justo illi a me haberi sint, judicari non potest. Nec amplius quid dici jam opus est, nisi hoc, ut Deus retribuat illis, sicut de me sunt meriti. Id tantum addo ; inauditum hactenus mihi fuisse, me *ab Episcopo Winstrupio*, aut alio quopiam *publice atheismi accusatum*. Et quanquam alias ab ipso nihil omisum est, quo mihi nocere possit : tamen non eo delirii processisse eundem crediderim, ut Beckmanno tam detestabili maledicti formula præire non erubuerit. Dehinc velut in torrentem se effundit eloquentia Beckmanniana, qua mirifice se jactat, ac subinde ingenii sui stricturas spargit ; velut quod de collisione mea cum diabolo ructat, oblitus, se paulo ante scripsisse, diabolum a me non credi ; item *de Caligula Christianorum persecutore, & communionem uxorum Platonica*, quæ, si diis placet, a me asseritur L. VI. c. 5. §. 15. p. 775. Qua declamatione fauces sibi præparat ad evomendum obscœnissimum mendacium, quo vel ipse Beckmanni choragus erubescit, qui ne mendacia auctores tantum suos maculent, aliquam probabilitatis speciem illis circumdare inter arcana artis suæ habet. Heidelbergæ id factum scribit cum totius urbis scandalo. An per horam mihi subsistere ibi, & in honesto munere versari licebat talia patranti ? Fingit quoque de uxoris meæ senectute, quæ æqualis mecum est ætatis, & duos menses, antequam Heidelbergæ discederem, pulcra me prole parentem faciebat. Ex cujus ore nemo mortalium unquam verbum paulo liberius, nedum tam foedæ rei narrationem audivit. Et quam plane mente moti hominis est fingere, *me ipsam coram multis honestis viris & matronis ad hanc confessionem adgisse* ? Nam flagitia utique ut taceantur, auctores ope-

ram



ram dant. Ut tamen Lectori adpareat, qua occasione Alastori in mentem potuerit venire tam fœdam fabulam fingere, narrabo leviculum quid omnibus heic loci notissimum. Quando in conviviis, uti jam supra innui, syllogismis suis jam prope nos enecarat, ego restringendo disputandi ardori, & quia alias in omni congressu hilariori Beckmannus deridiculo esse sueverat, in sterilitatem matrimonii ipsius joculari incipiebam, qui alias vel Centauris generandis sufficere videbatur, si corporis molem spectares, posse. Ceteris inde pariter cum risu in eum cavillantibus, ita paulatim a syllogismis ipsis respirabamus. Istas facetias tam inficeto modo nunc ultum it Alastor. Dialogum *Sinceri Warenbergii* a me non fuisse conscriptum non modo ipse Beckmannus novit; sed & probe ipsi cognitum est, quis revera ejus scripti auctor sit, quippe qui in Suecia notorius est. Verum isthoc mendacio fraterculus ipsius Gesenius Garlœnus demerendus erat; cui de fide & amore tam egregii viri ex animo gratulor. Inde recoquitur explosa dudum calumnia de religione ad statum reipublicæ accommodanda; cui fulciendæ advocatur Monzambanus, qui utique dogmata theologica ad rationes politicas examinare instituit. De quo etsi meum non sit rationem reddere; obiter tamen addo, omnibus non cœcutientibus perspicuum esse, scriptorem istum præsupponere; religionem Christianam genuinam & sinceram, prout a Salvatore nostro & Apostolis fuit promulgata, nihil continere veræ politicæ adversum. Sed quia pleræque Christianorum sectæ systematibus suis Theologicis, ex quibus singulæ viam salutis æternæ unice hauriri contendunt, aliquid dogmatum humanorum admiscuerunt: igitur uti sapientibus fas est discernere, quid in religione divinum sit, & quid hominibus originem debeat; ita & iisdem licet detorsiones articulorum fidei, & quicquid est assumendorum humanorum, quod in Theologiam irrepsit, sub disquisitionem vocare, quatenus continent aliquid politicæ adversum, postquam Theologi circa demonstrandam talium falsitatem ex Sacris Literis satagunt. Quod tamen idem Severinus de multorum Sacerdotum vitiis ita libere non dubitavit scribere, id & ipse ægero; & dudum optavi, ut vir quispiam cordatus atque eruditus eam accusationem ex historia Ecclesiastica & civili

civili rerumpublicarum Christianarum, tum ex praxi communis vitæ, ipsaque experientia solide refelleret. Nam ut Beckmannus aliquis ejus ordinis advocatum se ferre velit, id oppido quam indignum est. Tandem ut sibi per totum scriptum constaret Alastor, ad extremum fingit, multa me ex libro meo adhuc Manuscripto monitu amicorum & precibus uxoris, (quæ nimirum studia mea moderatur,) delevisse, ne cum Theologis mihi controversia oriretur. Atqui nemo mortalium librum meum manuscriptum evolvit, antequam Holmiæ censuræ offerretur; imo nec post eandem, antequam impressus divulgaretur. Ac eam ansam arripiebant architecti primi Indicis meum librum in suspensionem vocandi, qui tunc temporis heic loci præcipui erant amicorum meorum, aut esse saltem debebant. Qui & ipsi mustasse dicebantur, me post censuram quædam addidisse. Sed utramque criminationem refellere potest manuscriptum meum, quod adhuc mihi asservatur.

Hoc igitur scripto Nicolaus Beckmannus *pios viatores* in Germania contra me excitare potissimum laborat, eadem fere ratione, qua ipsius frater, Pontifex Garlæanus, inter Scanos classicum in me canebat. Quorum auspiciis qui militiam in me suscepturi sunt, successum sibi, prædamque & gloriam pro ducum suorum dignitate liquido augurari possunt. Quamquam adparet, Beckmannum non modicum ad sua signa concursum sibi polliceri Lipsiæ, Wittembergæ, Jenæ, & Garlebiæ. Hoc ipsum enim manifeste conspicitur non solum ex infami libello, sed & ex epistola, quam incluso libello famulo ad Lipsienses, Jenenses, & Wittebergenses, nec non Gesenium Garlebiensem eodem argumento conscripsit. Hujus epistolæ autographa duo, quæ Wittebergam & Garlebiam destinabantur, quomodo in manus meas pervenerint, operæ præmium esse duxi memorare. Commendaverat eas epistolas Beckmannus Francofurti ad Moenum in nundinis autumnalibus civi cuiquam Salfeldensi, cui nomen Michael Gutwasser, ad præscripta loca curandas, qui ex dicta urbe ad nundinas Lipsienses erat profecturus. Hic quamquam alias virum non nosset, precibus tamen ipsius permotus eam operam in se suscepit. Cum Jenam transiret, epistolam unam famulo communi Academix tradidit; cujus custodiam procul dubio statim

statim Velthemius sibi asseruit, draconis in vicem aureo velleri invigilaturus, ut hoc specimen generosi & candidi sui animi ederet, & quam mire suum cum Beckmanni astro conspiraret. Nec dubito, quin idem jam Jubilæum sit promulgaturus, plenariam bonæ mentis remissionem pollicitus omnibus Asinii Tenebrionis sectatoribus, qui ad epistolam illam osculandam peregrinationem susceperint. Nam reliqui Ornatiissimi Viri ejus Academiæ Professores magnopere tantum flagitium detestantur. Quin ipsis bibliopolis Jenensibus tam ingenuus est animus, ut dicant: nebulonem esse istius scripti auctorem, & qui eundem impressit. Inde dum Lipsiam tendit lator epistolæ encyclicæ, forte fortuna in eodem pilento vehebatur amicus quidam meus, fide atque amore mihi conjunctissimus. Ibi ex improvviso iste Mercurius non nimis astutus interrogabat; num Garlebiæ Academia esset? Cum amicus meus quæreretur, quid ipsi negotii cum Garlebiensibus esset; iste statim de commissis sibi epistolis effutiit. Hæc amicus meus, qui jam de Jenensi epistola intellexerat, suspicari cœpit monstri quid subesse; eoque ut rem expiscaretur, multa jactabat de amicitia, quæ sibi cum Pontifice Garleano intercederet. Iste lætus se nactum esse, qui literas Garlebiæ curaret, illas amico meo tradidit, adjunctis etiam iis, quæ Wittebergam spectabant. Hic cum ex omnibus signis sceleris quid subesse colligeret, eas resignavit, & ad me transmisit. Utraque manu Beckmanni scripta est, sed quam omni studio dissimulare laboravit, ut primo obtutu ægre agnoscere queas. Nec Beckmanni sigillo sed affinis, ejusdemque famuli Marci Klinck obsignata est. Quæ ad Lipsienses destinabatur, alia via pervenit. Hæc ideo prolixius retuli, ne Beckmannus exclamet, magicis me artibus adjutum istas litteras interceptisse. Ubi illud primo stultitiæ Beckmannianæ luculentum est argumentum, quod tribus tam splendidis Academiis quartum velut pari gradu adjungat Gesenium Garlebiensem, vanissimum mortalium, & nugacissimum. Perinde ac si quis inter principes Græcorum ad Trojam Thersitem quoque numerare velit. Quanta enim dignatione Gesenius apud ipsos Lipsienses sit, vel inde colligi potest, quod cum aliquot ante annos eidem litis quid cum defuncto Superintendente Lipsiensi ortum esset, & iste pro more suo in deliria effundi cœpisset. Lipsiensis isti

isti per servulum suum, qui spurius erat, responderi curavit, præfixa quoque hujus legitimatione. Qua demum contumelia loquacissimam ranam ad silentium redegit. Deinde illud plane ferendum non est, quod Beckmannus adeo sinistram de tribus illis Academiis concepit opinionem, quasi apud eas potissimum inventurus sit, qui flagitio & furori ipsius sint adplausuri, & apud quos libelli famosi tam pronam inveniant fidem, ut citra ullam amplius disquisitionem ad maculandam famam viri honesti & innocentis dace infami nebulone sint incubituri. Enimvero longe alia mihi de candore, prudentia & moderatione istorum virorum est persuasio, saltem quod judicium suum eo usque suspensuri sint, donec quid revera in controversia sit, ad liquidum fuerit perductum. Nec minus quod tantum scelus, ad infamiam seculi pertinens, quod in me patratum fuit, ex animo sint averfaturi. Sane ullum Wittebergensem hæctenus aliquam tam foedæ fabulæ partem attigisse nondum mihi fuit auditum. Nec universis Jenensibus imputari potest, quod Velthemius deliret; cujus vesaniam plerisque Collegarum ipsius ægerrime ferre novi. Qui & ipse in *Appendice ad dissertationes meas Academicas* responsum ad cavillationes suas accepit, quo non magnopere gavisurus sit. \* Sic & maxima mihi injuria fieret, si universus sacer ordo in se trahere vellet ea, quæ ego solius ranæ Garlebiensis coaxationibus opposui. Sane si unus impudenter pertendat; sacerdotibus competere censuram censura Regia eminentiorem in quævis scripta, eosdem ab omni errore immunes esse, & eruditionem suam ex peculiari inspiratione divina habere, quoslibet ad injurias ipsorum obmutescere debere, & modo zeli & conscientiæ vocabulum crepent, tela eorundem a jugulo suo nemini avertere licere, alter autem tam enormia postulata neget: uter in istum ordinem injurius fuisse censebitur? \* Quæ res ut eo clarius fiat, observari velim, duplicem esse de lege naturali tractationem; quarum una ad Theologiam spectat, quæ ex Scripturis Saceris hauritur, nec ulterius extenditur, quam quatenus locum aliquem in catena velut articulorum fidei habet. Altero autem modo tractatur jus naturale, quatenus peculiarem disciplinam constituit, cujus principium cognoscendi unicum est lumen rationis, ac finis & usus intra terminos hujus vitæ coercetur, postquam per eam probita-

bitatem, quæ ex solis naturæ nostræ viribus jam promanare potest, salute æterna potiri non datur. In posteriori igitur modo tractandi, qui solus meus est campus, quando agitur de fundamentali aliqua propositione (aut quocunque vocabulo adpellare velis,) constituenda, ex qua præcepta legis naturalis liquido deduci queant; quæstio oritur: Num illa thesis Theologica, *quod essentialis Dei justitia sit archetypa legis naturalis humanæ*, idonea sit, ut subire locum fundamentalis propositionis possit in disciplina juris naturalis, soli rationi superstructa, & accommodata ad captum universi generis humani, qua id ratione utitur, quamcunque peculiarem religionem foveat? Hanc quæstionem nos negamus, & nostræ negationis invictas rationes attulimus tum in opere nostro, tum in Apologia. Equidem hæ propositiones ex sola ratione naturali innotescunt; quod Deus sit justus essentialiter, quod nemini injuriam faciat, quod promissa sua firmiter servet, quod verax sit, quodque munus velut judicarium in creaturas legibus obnoxias incorrupte exerceat. Enimvero quod justitia Dei essentialis sit archetypa legis naturalis humanæ, propositio est soli rationi humanæ incognita. Et si vel maxime eam tantisper a Theologia commodato sumere velis; tamen rationi humanæ impossibile est capere vim consequentiæ, si quis ex eadem officia hominum inter se deducere instituat. Si inquam ita velim argumentari: Justitia Dei essentialis est archetypa juris naturalis; Ergo adulterium non est committendum: impossibile est rationi humanæ vim & evidentiam hujus consequentiæ capere, aut investigare propositiones velut interjectas, quibus eadem stabiliatur. Sicut contra si ex nostra hypothese argumenter; homo debet esse sociabilis; Ergo non est mœchandum; plana est consequentia, & interjectæ propositiones facile per solam rationem investigari possunt. Quo accedant difficultates jam expositæ; puta, quod justitia humana respiciat legem & superiorem, & ponat in altero jus ad exigendum; id quod in justitiam divinam non quadrat. Item, quod quædam partes justitiæ humanæ in Deum non cadant, quæ nempe præsupponunt indigentiam humanam; uti est justitia, qua contractus reguntur. Item quod justitia Dei vindicativa longe rigidior & exactior sit, quam justitia hu-

*Pufend. Eris Scand. T.IX.*

*L*

*ma-*

mana, quæ sæpe delictorum veniam facit citra ullam satisfactionem, ex respectu boni publici, aut soli clementiæ ostentandæ: id quod in iustitia divina secus est, quæ citra satisfactionem generi humano in peccatum prolapsæ non potuit placari. Accedit & alia difficultas, quod rationi humanæ sibi soli relictæ attributa divina colligenda sint ex perfectionibus, quæ in creaturis ipsoque homine conspiciuntur, depurando imperfectiones, quæ ex essentia finita, aut materia corporea proveniunt, & ad captum divinæ eminentiæ istas attemperando; quodque adeo notitiæ humanæ, ex solo rationis lumine haustæ, prius cognita sit iustitia humana, quam iustitia divina; & consequenter in disciplina soli rationi superstructa præpostere iustitia divina archetypa juris naturalis & iustitiæ humanæ supponatur. Quod ipsum etiam agnovit RICHARDUS CUMBERLAND *de Legibus naturæ, prolegom.* §. 6. & *cap. V.* §. 13. cui quo minus genuinam jus naturæ tractandi methodum perspiceret, non obstitit, quod natione Anglus sit, & religionem Ecclesiæ Anglicanæ profiteatur; quæ duo attributa Beckmanno tam odiosa sunt. Ergo jam tandem perspicuum satis esse puto, in quo cardo hujus controversiæ volvatur; & ei, qui nobis velit contradicere, hasce difficultates ex sola ratione esse removendas, & liquido ostendendum, utique ex illa essentiali iustitia divina ope solius rationis humanæ omnia & singula præcepta legis naturalis deduci posse, ita ut propositiones intermedias & evidentiam consequentiarum capiant etiam illi, qui Scripturam Sacram plane ignorant. Quod nullus mortalium præstare potest. \* \* *Legem naturæ cordibus hominum inscriptam esse.* Ast quis hoc unquam negavit, cum totidem verbis id ab Apostolo asseratur? Sed quæstio est de genuino sensu Phræseos hujus metaphoricæ; quæ sane, si omnia S. Scripturæ loca, ubi eadem occurrit, expendantur, nihil aliud significat, quam notitiam firmam, stabilem penitissimæ menti infixam, & plane indelebilem. Neque in emphasi istius dictionis peculiaris aliquis modus ejus notitiæ comparandæ insinuat; cum in aliis omnibus Scripturæ dictis eadem extra controversiam notitiam acquisitam exprimat. Et quis clarius emphasim illam eolverit, quam ipse Apostolus verbis immediate subsequens? *Ipsa quippe conscientia eos, qui in legem*

gem naturæ peccaverant, *convincit & cogitationes sese accusantes & excusantes*, sic ut neque ignorantiam ejus juris obtendere possint, neque ejus sensum unquam ex animo delere. Ergo ex locutione metaphorica, nemo unquam *actuales & distinctas propositiones*, de quibus expresse mihi sermo est, exsculperit; quas nemo hætenus in animis infantum recens natorum observare potuit. Et quid me potissimum mordet Schertzerus, cum tamen D. JOHANNES MUSÆUS Theologus Jenensis, Schertzero nihilo inferior, *Introduct. in Theologiam* c. 2. §. 19. anno 1673. edita, diserte asserat: *Notitias naturæ intellectui insitas esse non in actu secundo aut primo, sed tantum in potentia propinqua*. Quo ipso utique *distinctas & actuales propositiones* natura insitas negat. Et hæc, ni fallor, communis Jenensium est sententia. Quare ergo mihi soli tam obscœna dica scribitur? Deinde per summam injuriam mihi hæc thesis affingitur: *Natura nihil esse turpe*, quæ nuspian a me ponitur, nec de ea asserenda unquam in mentem mihi venit. Sed triplex potissimum thesis a me L. I. c. 2. §. 6. adstruitur. Prima est, *honestatem & turpitudinem esse affectiones aut qualitates morales actionum humanarum, ortas ex convenientia aut disconvenientia cum lege*. Hanc thesin si quis impugnaverit, haruspices prodigium nuntiabunt, bovem esse locutum. Altera est, *motum physicum in actione humana absque omni respectu ad legem consideratum, esse moraliter indifferentem*. Nam contraria huic thesis implicat, absque respectu ad legem congruere ad legem vel non congruere. De solo isto motu physico me agere ita crebro inculcavi, ut metuam, ne Lectorem stuporis insinulaverim. Hoc dogma cum inter Theologos hætenus tralatitium fuerit, quando ad id, quod in peccato physicum & materiale est, Deum tanquam conservatorem naturæ concurrere unanimiter docuerunt, verbi gratia, ad extensionem manus in furto: (quod citra blasphemiam dici non posset,) ni motus ille physicus esset res moraliter indifferens; nunc nescio qua maligna mentis febris a quibusdam tanquam monstruosus indifferentismus moralis diffametur. Sane quamdiu genus humanum fuit, solus motus physicus non fuit actio humana & moralis, sed ejusdem duntaxat materiale. Ad actionem autem moralem præter

motum physicum requiritur etiam aptitudo ad imputandum, & respectus ad legem: Unde qui indifferentiam motus physici trahere volunt ad indifferentiam actionum moralium, perinde fallunt & falluntur, ac si in physica Peripatetica nullum inter corpora discrimen agnoscere velint, ideo quia materia prima indifferenter se ad quamvis formam habeat. Inprimis autem \*\* cavillari instituit illa verba mea, quæ extant p. 27. *Quod naturalem* ( eorum quæ turpia habentur ) *indifferentiam multi agre concipere queant, inde est; quod a teneris istorum vitiorum detestatio nobis fuit inculcata, quæ opinio simplici adhuc menti impressa in vim naturalis cuiusdam affectus videtur involuisse.* Ubi primo observandum est, quam malitiose \* de suo parenthesis verbis meis inserat, ( *eorum quæ turpia habentur.* ) Nam verba immediate præcedentia utrique manifesta inculcant, naturalem indifferentiam prædicari non de integra actione morali, non de adulterio, homicidio, furto; sed *de actu physico citra respectum ad legem.* Non inquam dico, furtum, homicidium, adulterium naturaliter esse indifferens: sed hoc dico, motus physicus, qui ad materiale istorum vitiorum constituendum concurrat, est naturaliter indifferens; quia ad illum motum physicum æuctor & conservator naturæ Deus influit. Puto autem ignominiosum fore \* si operose ipsum docere aggrediar, quid in actione morali sit motus physicus, & quid illi ex lege accedat, quæ vel qualitatem aut dispositionem agentis, vel objectum, vel finem, vel certas denique circumstantias determinat, vid. L. I. c. 7. §. 4. De cetero verba mea planissimum habent sensum apud illos, quorum iudicium libelli famosi non corruerunt. Scilicet quia probe educatis a pueritia detestatio vitiorum inculcatur, inde apud multos ipsis affectibus & sensibus quædam istorum adversatio imprimitur, sic ut velut ex naturali quodam horrore ista videantur refugere; quemadmodum objecta sensibus ingrata naturaliter averfamur; utque adeo aduetudo illa & disciplina in naturam velut abeat. Et tali modo educaris vix in mentem subit, originem istius averstationis ab interdicto legis arcessere, aut de motus physici, qui istis actionibus subest, indifferentia cogitare. Sicut & ab aliis jam fuit observatum; quanquam primis mundi temporibus connubia fratrum



& sororum uſitata fuerint ; tamen ea poſt apud pleraſque gentes uſque adeo non lege tantum , ſed & comuni averſatione exoleviſſe , ut apud probe educatos ipſi ſenius velut obſorpuiſſe videantur . Inde & juvenes fratres cum formoſiſſimis ſororibus verſari ſine ulla prava cogitatione aut tentatione ; quæ tamen ſeſe mox circa alias exlerat . Tertia mea Theſis eſt , Deum eſſe auctorem legis naturalis , & ad illius determinationem atque impoſitionem referendam eſſe originem moralitatis , quæ in actionibus humanis exiſtat . Quæ theſis eo minus ſcrupuli movebit , quod is utique legem æternam in Deo agnoſcit . Jam igitur quæro , utrum illa moralitas , antecedenter ſe habeat ad legem æternam Dei , an per accidens tantum & citra dependentiam ad eam congruat , an vero ab eadem tanquam fonte & origine promanet . Si priorum alterutrum aſſerere velit , habebimus jam Theologum , qui Deum primam eſſe cauſam neget . Poſtremum a me aſſeritur . Verum hæc omnia in *Appendice ad Diſſertationes meas* , Velthemii clamoribus oppoſita , ita perſpicue deducta ſunt , ut ſperem , cordatos viros , & a vitilitigando atque calumniando alienos , facile declaratione mea adquieturos . Aſt ego dico , inter ſtatum purorum naturalium , quem Scholaſtici fingunt , & inter ſtatum hominum naturalem , de quo ego tracto , tantum eſſe discriminis , quantum inter ea , quæ Theologi de pœnitentia ſeu converſione hominis , & Jureconſulti de pœnitentia in contractibus docent . Quod qui deprehendere non poſſit , bardum & blennum , ac politices ignariſſimum eſſe oportet . Sicuti & iſtud ſpectrum heic loci jam plane diſparuit , poſt publicatam meam diſſertationem de ſtatu hominum naturali . Quæ ubi cum ceteris junctim impreſſis in Germaniam perſepta fuerit , non amplius de ſagacitate ſua multum gloriabitur . Iſthæc obiter hoc loco addere viſum eſt , ut omnes cordati judicare poſſint , ſiquidem qui ad me diſſamandum hætenus incubuerunt , citra præjudicium & affectus ſententiam meam penitus agnoſcere , atque explicationem æqua mente admittere velint , nullam mihi amplius cum ipſis , ſaltem circa quæſtiones Theologicas , ſuperſeſſe controverſiam . Sin autem id agitur , ut judicia de bonis viris , eorumque doctrina formentur ex libellis famoſis , qui ex non intellectis , aut mutilatis , detor-

tis, & interpolatis sententiis confarcinati sunt; neque ulla protestatio, interpretatio, & planior deductio locum inveniat: amplius deliberandum erit, quod remedium tali furori sit opponendum.

SED ut ad Beckmannum revertar, confido jam omnes cordatos, etiam qui antea me propius non norant, post lectam epistolam liquido agnituros; hoc seculo non extitisse exemplum scelerioris calumniæ, quam quo me ista orci progenies adspargere instituit: infinitos quoque plus in re literaria præstitisse: neminem autem quam me, ob labores suos peioris exempli insectationes esse perpessum. Si quis tamen adhuc innocentiae favor, si quæ adversus calumnias detestatio, invenientur sane, qui infamem illam belluam condigno malo tandem mactent, aut saltem ab omni honestorum virorum consortio exclusam velut carcinoma nationis Germanicæ, & labem seculi refugiant. Amici autem eo diligentius ad innocentiam meam vindicandam incumbant, quo magis bonorum omnium interest, talia exempla non frequentari. Et Deus justissimus iudex, illud portentum generis humani, quod per vesanum nocendi ardorem animam suam exitio pignorare publico perjurio non horruit, ejusmodi tandem suppliciis, quæ frangendo tanto furori sufficiat, coercerebit.

---

PROPTER COGNATIONEM MATERIÆ  
VISUM EST SUBNECTERE TRIA  
SEQUENTIA SCRIPTA.

PETRI DUNÆI  
PRO TEMPORE IN ACADEMIA CAROLINA  
PEDELLI SECUNDARIÏ

# EPISTOLA

A D

*VIRUM FAMOSISSIMUM,*  
NICOLAUM BECKMANNUM;  
TOTIUS GERMANIÆ CONVITIATOREM  
ET CALUMNIATOREM LONGE  
IMPUDENTISSIMUM.

SUPER NOVISSIMIS IPSIUS SCRIPTIS.

**Q**UANQUAM alias non ita frequens sit, ut Pedelli ad tam ingentes viros scribant: tamen si quis æqua lance expenderit rationes, quæ me ad scribendum impulerunt, agnoscat, a me nihil præter decorum fuisse susceptum. Nam licet tu grandius tibi, quam ego, membrum ejus collegii, quo antea jungebamur, videreris; tamen quoties cernerem, te in quovis congressu pro deridiculo haberi, sæpe me non usque adeo despiciebam, ut non malletm sani capitis Pedellus esse, quam fatuus Doctor. Sed & non vulgariter me abs te diligi sentiebam, quan-

do blandissimo vocabulo *Pelle* me appellabas, & haustulum vini adusti ex Sacrosancta lagenotheca depromti propinabas, cujus dulcedo adhuc palatum meum titillat. Nec illud leve vinculum duco, quod & ipse mihi jure optimo maximo titulum *Antecessoris* vindico, quo tu tantopere tibi placebas: & miro omine ego secundus Pedellus, tu *secundus Rector* fuisti. Denique cum ceteros collegas tuos, postquam a nobis aufugas, tui puderet, ego amicitiae ad ultimum memor, diploma relegationis tuae hisce manibus loco solito quam accuratissime affixi, ut elogium tuum ab omnibus legi posset. Quin & cum canes nostri adeo impudentes essent, ut in cineres *Indicis* tui medio foro mejere non erubescerent, ego illos ab ancilla mea in urnam fictilem colligi curavi, ut in Mausoleo, quod Indici Novitatum b. m. Garlebiae communibus sumtibus tuae sectae extruitur, aurea urna reponerentur. Quo pietatis officio immortallem gratiam ab universis Asinii Tenebrionis sectatoribus iniisse me confido. Facit & hoc spem, scriptionem meam tibi gratam fore, quod in te haud quaquam cadere animadvertam illud tritum; honores mutant mores. Nam non minore nunc vesania agitaris, postquam Cardinalis *Consiliarius Jocosus* es factus, quam cum inter Professores morareris: & ob quod artificium apud nos cum infamia relegabaris, id nunc eo fidentius exerceas, quod fama jam tua nihil amplius detrimenti possit capere.

CETERUM etsi primo omnium multiplici gratulatione apud te defungi debere videar, quod & apud nos carnificis manus effugeris, & in Germania inveneris, qui nebuloni panem dare velit: tamen quia materiam istam carmine aliquo Dielherri Noribergensis celebrari splendidius fuerit, omnia quae speciem adulationis habent, seponam, & nonnulla duntaxat pro jure veteris conjunctionis paulo familiaris monebo circa scripta tua novissima, quibus non singulis modo viris, sed & integris nationibus insultas. Nam generose tu quidem facis, quod omnibus modis hoc agas, ut carnifex aliquando ex te literam longam faciat; indignum tamen est, in tantum te ab ingenio & memoria defici, ut nec unam mendacium ita speciose adornare valueris, quin statim ejus falsitas manifeste deprehendi posset.

NEC

NEC minus cum tam anxie eruditionem ac prudentiam tuam verbis extollere labores, miserandum videtur veteribus tuis amicis, ita inepte id abs te agi, ut ne rideri quidem amplius tua stultitia queat. Dabis autem veniam occupationibus meis, si strictim duntaxat quædam annotavero circa ea, quæ velut pro te, aut in Pusendorfium aliosque scribis. Nam omnia ad unguem exigere, quæ ab homine professi furoris proficiuntur, non multum a stultitia abfuerit.

JACTAS igitur, *te nunquam amasse abundantie potulum*. Nam quæ aliis vix siti restinguendæ sufficiebat potio, tibi cerebrum ita turbabat, ut clamoris primo syllogismis omnes enecares, inde saltationibus quicquid erat sceminarum delassares, & reliquis diffugientibus ancillas demum in vertiginem dares. An *in arenam cum inimicis digladiaturus descenderis* nescio. Vidimus tamen te in aulam Episcopi adscendere, & a circumforaneo lanista non mediocriter vapulare. *Plus æquo te studiis invigilasse* dicis, ut aliquo colore nativam fatuitatem obtegas, velut ex intemperantia studiorum delires. *Optas, ut a Pusendorfio esses liberatus*. Cur igitur libellos famosos in ipsum edebas, & eidem necessitatem imponebas facinora tua publicandi? *Famæ* te nunc cura tangi serum est, postquam sententia judiciali infamis declaratus es: insanum, per novos libellos famosos amissam famam recuperare velle: blasphemum, ob scelera castigatum ad exemplum Christi provocare. *Inter studiosos olim non primum, sed medium saltem locum occupabas*, eadem qua medius digitus inter ceteros dignatione; & quia in medium protrudi solent, qui in circulis exagitantur. Recte quoque *primariis studiosis amulus quoad victum* fuisti, quia gladiatores non tenui cibo alendi sunt. Dicis, *te ebrietatem semper ut venenum cane pejus & angue natura avversatum esse*. Id quidem ut faceres uxorem tuam subinde tibi ingerentem audiebam, quando in conviviis ira te deridendum propinaveras. Quid porro sanos homines cogitare credimus, quando legunt te scribentem; te quia *horas subcissivas exercitiis gloriose tribuisti*, inde Pusendorfio harum rerum experto usque adeo esse insensum: & quia *ars non habet osorem, nisi ignorantem*, pro hisce corporis dotibus eum ridere & cachinnari artificiose scire ac praticari. Sufficere isthæc possunt, ut judicemus, qui-

quid sapientiæ atque elegantiarum generosus discipulus abs te præceptore discere potuerit . Etsi non adeo gloriosa res sit , prima literarum elementa puerum docere , nec mirum etiam *feminas faventes experiri* , qui omnibus est deridiculo . Sic ut licet trecenti Proceres pro testimonio dicant , te & diligenter opus Ælii discipulo prælegisse , & vernibus tuis sæpe totam heri tui domum exhilarasse , nondum tamen adpareat , quare ea res ullum mortalium *miserrime angere , torquere , excruciare* queat . Commensales porro tui cur non pro lauto convivio , quo discessurus eos excipiebas , carmen reponerent , enormibus elogiis adornatum , quibus vanitatem tuam tantopere capi animadverterant ? Ex *Medulla Justiniana* nihil tuum est præter laciniosum titulum , & præfationem ad lectorem . Dedicationem amicus quidam composuit ; ipsum opus plagio subductum : quod cuivis ex stylo patere potest . Et mirum tamen est , quare tantis elogiis commendatus liber tam raros invenerit emtores , ut gratis tibi pleraque exemplaria fuerint distributa . *Primus* literas vocationis accepisti , ut secundus ordine esses : primus etiam ordine motus es , ut infamis fieres . Ridiculum est , quod iactas , Rectorem te creatum *approbante Rege Carolo* . Id Rex curat scilicet , præcipue adhuc minorennis . Suffragia facile obtinentur , ubi ordo succedendi legibus præscribitur ; & primo absente , secundus in ejus locum succedit . *Prudentiam* tuam non extolles , si micam prudentiæ haberes . Hoc faciunt stulti ; nosti cetera . Non diffiteor tamen *Studiosos* tibi *perpetuum rectoratum optasse* ; quia sub fatuo rectore plurimum istis licentiæ est . Ne tamen nimis tenellam tuam conscientiam excruciet , quod Pufendorfius , tantus amici tibi Numinis Barbarici hostis , sub Rectoratu tuo professionem suam Lundini auspicatus sit , Nam eo in negotio tu nihil amplius præstabas , quam ego , qui sceptrum præferebam ; & ipsum programma ab alio Professore , tuo tum domestico , conscriptum est ; quod stylus satis arguit . Inhumanum enim videbatur , dictionis tuæ gangræna nondum talium adsueto nauseam excitare . Credis porro tu , fuisse in Suecia , qui epistolam Commentario tuo ad Instituta præfixam , quam *in lucem edere , Regique dedicare curasti* , præ scetore , quem exhalat , perlegere potuerit ? nedum ut quis curaret , quid

tu ibi de Hobbesio & Monzambano gannires, qui ne grammaticam quidem calles. Quæ circa librum Pufendorffii in Suecia gesta sunt, ipse ita exacte in Apologia retulit, ut malevoli ne minimam quidem circumstantiarum inficiari potuerint. Ut nihil impudentius excogitari possit hoc tuo mendacio; *omnes in Suecia Episcopos, Doctores & Professores isti libro se opposuisse, eumque damnassee*. Id enim Deus avertat, ut quod unicus Schwartzius deliravit, universus Sueciæ Clerus pro suo habere velit. Is solus te chorago in Suecia fabulæ hujus actor fuit. Winstrupius mutam fere personam egit, & quæ a Schwartzio asserebantur, cæca fide amplexus est. Quicquid machinarum adhiberetur, duos Theologos Schwartzii collegas permovere non poteratis, ut Indici subscribere vellent. Et cum Schwartzius ad nuper defunctum Archiepiscopum Upsaliensem prolixam eo nomine dedisset epistolam, & quantum posset, in Pufendorffium classicum cecinisset; iste statim agnovit, ex mera malignitate animi, & calumniandi libidine omnia provenire, ac responso illum nunquam est dignatus. Negas, *te eo tempore litem illam voluisse facere tuam*, ne aures tuæ satyrico sale perfricarentur, et si conscientia tua tergo elephantis tenerior, &  *Professio Juris* reclamaret. Atqui te earum turbarum primum auctorem fuisse, & aliquot paria calceorum circumcursum contrivisse, ut furori tuo socios quareres, apud nos notorium est. Et ut aliquam rationem allegares, in Consistorio ad protocolium dictabas; tibi querendi causam esse; quod Pufendorffius tuam Professionem (Juris Romani) *indignam* pronunciasset. Scilicet quia Pufendorffius in dedicatione libri sui scripserat: *Indignum videri, Ulpiani decretis omnia pulpita resonare; Creatoris leges incultu obsolescere*. Et cum iste juxta assidens sensu communi te gaudere negaret, & ruditatem tuam in os tibi exprobraret, quod reponeres nihil habebas. Denique usque adeo litem illam fecisti tuam, ut cum Schwartzio silentium fuisset impositum, tu illum Indicem, proprio ausu an alieno instinctu nescio, libelli famosi schemate adornatum typis excudi curaveris, ob quod facinus relegationis infamis poena affectus es, cum graviolem castigationem fuga declinasses. Metus ergo carnificis Suecia te expulit, non defectus pietatis, cum ob frustum panis, & ut mendi theatrum haberes, religionem abjuraveris; nec

desse-

*defectus justitiæ*, quam mox tergo fueras sensurus. *Professionem* te æquo animo *relinquere* potuisse non mirabitur, qui noverit jam Anno 1671. te ob turbas hic motas salario privatum; ut tunc demum *luxus* Sueciæ tibi displiceret, cum ipse esurire inciperes. *Solemner* quoque *valedixisti Regi & Proceribus*, uti fures solent domo expilata. Debebas Holmiæ expectasse, quoad dilu-cesceret, & mox vidisses te in carcerem a lictoribus rapi, & post tergo carmen propempticum a carnifice inscribi. Sic ergo rebus in Suecia gestis deinceps Cardinalis lateri *tanquam consiliarius* jocosus *adhæxisti*; qui tamen & ipse, ubi elogia tua penitus intellexerit, mox foras te ire jubebit. Inapte quoque & impudenter contra sententiam adversus te latam disputas. Statim atque *Index* Londini comparuit, nemo erat, quin te ejus auctorem agnosceret, cum aliis indiciis, tum fosculis illis tuis passim aspersis. Nolebat tamen Pufendorfius actionem prius in te instituere, quam talia argumenta deprehendisset, quibus tu nihil plane contradicere posses. Ubi demum ipsum & omnes impressionis ministros, & manuscriptum tuum invenisse cognoveras, & crastina luce Holmiæ in carcerem te trahendum præsenferas, nonne aufugiebas. Quanquam autem satis hoc modo te nebulonem declarasses, expedire tamen visum Pufendorfio, ut causa in foro competenti decideretur; neque apud Regiam Majestatem, uti tu mentiris, sed apud Consistorium Academicum ab initio ad finem eadem acta, & ab hoc pronunciata sententia demum a Regia Majestate confirmata est: quæ sub novo imperio clementiæ ostendendæ veniam tibi, si Pufendorfio idonea deprecatione satisfacere velles, offerebat; cum id abnueres, executioni illam dari mandabat. Neque vero opus erat, ut muneribus & aliis artibus Proceres Pufendorfio conciliarentur, cum delictum tuum esset manifestum, & omnibus intolerandum videretur, interdicti Regii auctoritatem ita petulanter abs te proculcatam. Et sane Illustrissimi illi proceres, quos tu nominatenus foedis calumniis, & mendaciis adspergis, ideo quod, ut flagitiis & furori tuo patrocinaurentur, inducere ipsos non posses, fortasse aliquando tibi crurifragium parabunt, si modo non indignum fastigio suo judicabunt, ad latratum scabiosi & rabidi canis commoveri. Sic & falsissima sunt, quæ de Pufendorfii genero gannis. Nam Se-

nate-



matoris Regni Sueciæ præfectum aulae fuisse, & inde  
 senatorem urbis Holmienfis factum, in se nihil plane  
 ignominiae aut sordium habet. Et quid nuptiae istae ad  
 eam rem facere potuerunt, cum jam mense Septembri  
 An. 1672. vitiligatoribus Lundensibus silentium foret in-  
 junctum; privigna autem Pufendorffii mense demum No-  
 vembri Anno 1673. ambiri coepisset? Inde dum argue-  
 re conaris, injuste te in Suecia injuriarum damnatum,  
 impudentiae & ruditatis illustre edis documentum. Ne-  
 gas Indicem primitus a Schwartzio conceptum, abs te  
 interpolatum atque editum? Atqui propria tua manu,  
 & testimonio illorum, quorum opera in eo imprimendo  
 usus es, convincebaris; & cum socii tui omnia pro te  
 tentarent, nemo tamen adeo effrons erat, ut negare id  
 auderet. Libellum famosum fuisse negas? Atqui senten-  
 tia juratorum judicum pro tali declaratus & combustus  
 fuit. Et credo satis jam a Pufendorffio ostensum, qua-  
 le scripti genus is Index sit. Nunquam *confessus es te*  
*auctorem ejus Indicis?* Atqui pro te & manus tua &  
 fuga, & testes, & stylus confitebantur. Nisi forte in  
 vocabulo *auctoris* pro acumine tuo ingeniose cavillaris.  
 Nam Schwartzius eum primus concepit; tu a Regia  
 Majestate damnatum interpolasti & edidisti. *Non es ac-*  
*cusatus publice eo nomine ante abitum tuum e Suecia?*  
 Nimirum mense Junio Anno 1673. Index Lundinum  
 afferebatur. Antequam inquisitio Gieslæ, Hamburgi &  
 Holmiæ locis tam diffitis absolvi posset, November ade-  
 rat, quo te, quantum poteras, in pedes dabas. Mox  
 & publice per legitima intervalla citabaris, & exem-  
 plum citationis uxori tuae a me ipso in manus tradeba-  
 tur; quod te accepisse ipse literis ad Consistorium scri-  
 ptis fatebaris. Sed quod scriberes, te malle aeternæ sa-  
 lutis jacturam facere, quam Pufendorffio deprecari, ad-  
 debas: te curaturum, ne ista infamia tibi in Germania  
 noceret, quod facinore licet coopertus apud Monachos  
 pabulum inventurus eras. Forum fuisse competens, quo  
 damnatus fuisti, negas? Atqui juramento, quo Regi &  
 Academiae eras devinctus, nondum solutus eras, nec  
 missionem obtinueras, sed ipse conscientia vecors clam  
 aufugerat; domicilium quoque adhuc Londini, Uxorem-  
 que & familiam habebas. Et an nunquam, qui Pari-  
 sis Aurelias *peregrinasti*, desertorum nomina patibulo  
 affigi

affigi vidisti? Et sane si apud *Regem Hispanie natione Danus*, qui Sacramentum ipsi dixisset, scelere patrato in Daniam refugeret, non minus, quam tu in Suecia, jure optimo maximo nebulo declararetur. Quod porro manifestius indicium furoris, quam quod causam rerum adversarum, quas Sueci experti sunt, ad hoc refers, quod illi virum bonum & eruditum vesaniæ duorum Te-nebrionum dedere noluerunt? Quam ergo causam allegabis, quod & Hispani, & Hollandi vapularunt, & quod Dani intra annum vertentem ter acie victi sunt?

HACTENUS famam tuam mendaciis & calumniis defendisti; nunc eruditionem ineptiis & barbarie adstru-ctum is. Quare tamen negas, te omnium eruditorum ac doctorum esse sapientissimum? Nam sera tibi nunc stoliditatis parsimonia, & inglorium nimis est, quod tan-tum *inter mediocriter doctos viros, & juris Doctores* (tui consimiles,) *nunquam loqui & ratiocinari inter pocula erubisti*. Et facile crediderim, *Pufendorsum nunquam ratiocinando te hesitantem reddidisse, aut ta-centem*; nam illi absurdum videtur, cum morione ra-tiocinari velle. Et quid tu illum virum inter disputan-dum ad angustias redegeris; cum tu scabiosum syllogis-mum trepidus & pallidus vix multa cum hæsitacione pos-ses exscreare, quod nondum poculis incaluisses? Nec sane honoris tui gratia Pufendorsius & in Apologia, & in Epistola ad amicos te depexum dedit, aut *scriptis te-cum certare voluit*; nec te unquam velut iustum adver-sarium, sed ut infamem nebulonem & rudissimum asi-num tractavit. Circa 14. *rusticos*, quos pro dedicatione Commentarii tui ad Inititura accepisse te mentiris, ita se res habet. Postquam per octo amplius menses Hol-mix circumcurstaveras, & exemplaria libri tui elegan-ter compacta passim distribueras, forte fortuna accide-bat, ut Vicariatus aliquis morte prioris possessoris ad Academiam devolyeretur. Cui cum eo anno de rediti-bus jam esset prospectum, Proceres quidam efficiebant, ut tibi de isto vicariatu proventus ejus anni daretur, quo mercedem bibliopecto exsolvere posses, & ut impor-tunum hospitem mensis suis aliquando amolirentur. De cetero nihil ad te spectasse istos rusticos vel hoc indicio est, quod neque locum, neque numerum eorum satis nosti. Nam hic 14. alibi 13. fuisse scribis; eosque *circa urbem*

*urbem Christianopolim* locas, cum supra quatuor millia ista prædia inde distent. Quos fabularis te circa tuum discessum e Suecia Regi obtulisse sub spe compensationis, eodem scilicet modo, quo Professorium munus offerebas. Nam per carnificem non stabat, quo minus quam merebaris paratissimam solutionem tergo exciperes. Male vero sit illi, qui arithmeticam te docuit, ita ne tria quidem numerare nosti. Dicis te octo annis extitisse Professore Juris. Atqui Anno 1668. Academia Carolina inaugurabatur. Initio 1671. propter turbas, calumnias, & privatæ molestrinæ furta honoris gratia salario privabar. Per triennium sterile id tamen opere pretium feceras, ut An. 1673. nocte intempesta tibi foret aufugium. Arrige jam digitos, & numera; & ubi ad discessum tuum perveneris, noli nimis gloriari, te Professore fuisse. Sed nimirum *Doctrina Juris* infallibile exhibet argumentum eruditionis tuæ, & te non minus utilia opera elaborare, quam alios Jureconsultos, paris pretii cum Syndici Goerlicensis abortu, vix grano cassæ avenæ digno. In qua, si removeas ridiculam dedicationem, & nefaria maledicta in nationem Svecicam & Pufendorfium, quid tuum est? Nisi id omne pro tuo haberi vis, quod ex aliis ad verbum descripsisti. Fateor tamen, isti operi non parum splendoris conciliari tua imagine æri incisa: quæ uti torvitatem tuam sic satis repræsentat, ita minor, nihil rugarum & cicatricum apparere. Balthei vallitas non parum terroris Gallis videtur incussura, quibus tam infensus es. Agnosco quoque vestem holosericam, quam apud nos gestabas, valde jam detritam, & formæ antiquioris; & satius fuerat, novam commodato sumere tantisper, dum a pictore delinearis. Carmen quoque subjunctum plane est ex tua vena. Nec minus mirum acumen spirat emblemata titulo præfixum, casus & studia tua non obscure exprimens. *Concussus surgo*; id est, ex Suecia relegatus religionem muto, ut panem apud Monachos inveniam. *Scribis in marmore læsus*, id est, quos calumniis & maledictis appetiisti, perpetuum furoris & sceleris tui monumentum statuent. Tandem ipse in terribilem deformatus draconem, assultantibus ventri sectatoribus tuis, eructas; *Ingratis servire nefas*: malum credo minitatus Monachis tuis, ni esuriam tuam affatim exsatiaverint, quod usum Rosarii ipsos docuisti.

Car-

mentis satis notum est, qualis & quantus sit M. Samuel Pufendorf, Professor Londinensis in Schania, in quantum hic perversi cerebri homo veram jus naturæ & morale, & per consequens decalogum, Deique leges novo excogitato suo jure naturæ & fictis entibus moralibus malitiose ac impie evertere studeat; & in quantum is vulpis instar laudabilem omnium Eruditorum conatum, inordinatæ Magnatum intercessione, & auctoritate a se suisque scriptis avertere conetur. Ea propter tibi, ut Viro animoso ac Religioso inclusa præ aliis pie transmittere volui, ut inde quasi per indicem primo statim intuitu percipere possis, quantum mali in tota Europa & universo Christianismo novus atheismi novi Magister Samuel Pufendorf fraudulentis ac diabolicis suis novis entibus moralibus, actionum humanarum indifferentia, Religione statui Reipublicæ accommodanda, & sexcentis aliis in statu suo naturali (quem convenientius bestialem voco) pessime disseminarit, inque juvenum novitatis avidorum animis jam dolose implantare cœperit, quo totum jus naturæ, Dei leges, & præcepta Decalogi pro viribus clandestine evertere machinatur. Per Deum & conscientiam te rogo, & exhortor, exulet in te animarum Pastore omnis metus, personarumque respectus, ne diaboli regnum per has clandestinas machinas magis magisque extendatur. Si eadem mecum deprehendas atheismi principia ex Hobbesio Anglo hausta, ut contra hujus pestiferi hominis principia amore Christianismi conservandi heroico animo mascule insurgas, juventutem studiosam aliosque probos & incautos publice ac privatim serio admoneras, ne Pufendorfi jus naturæ in sui perniciem legant. Rem sane Deo gratissimam Reipublicæ literaria utilissimam, ac Christianismo quam maxime necessariam, juxta tuum officium præstabis. Si tibi forsitan non vacaverit totum lubrici Pufendorfi jus naturæ & gentium vere gentile relegere, attente saltem legas librum primum, in quo adeo obscurus, & obscure ac lubricè omnia ad fallendos incautos tractat, ut nullus Eruditorum eum percipere possit, nisi quod velit atheismum sub aliquo pietatis colore vulpium instar indirecto introducere, sive cum Mahomede per fallacia & ficta sua entia moralia immortalem reddere. Plura non addam, sed ea exquisito tuo judicio, prudentiæ ac pietati amice examinanda.

Pufend. Eris Scand. T.IX.

*relinquo, qui sum & ero Reverendissimi ac praeclarissimi Domini ad aras devotissimus Veridicus Constans in Academia Catoniana, sis meis cum Catones probi ac veri rerum Censores, Valete.* Judicet nunc quilibet, an non hæc literæ Nicolaum Beckmannum, eundemque nebulonem prodant auctorem. Damneris ergo voti tui, & ita malefiat tibi, sicuti hæc literæ abs te primum conscriptæ sunt. Sed & valde metuo, ne Monachi tui neophyto Catholico parum convenire censeant, quos ipsi tanquam hæreticos & seductores animarum damnant, veritatis patronos & fratres in Christo indigitare; neve mox agnoscant, te non religionis amore ad eos accessisse, sed quia nemo ex Prorektoribus tam scabioso molosso pabulum & locum impune larrandi concessurus erat. Illud quoque imprudenter, quod cum ipse de impotentia suspectus sis, tam effuse in laudem uxoris tuæ declamites, immemor inter Monachos te degere; nimis quam facile prurientes. Quin plane barbarum erat, maledicentiam tuam ab honestis matronis sibi temperare non potuisse, ut adversario tuo necessitas imponeretur & in tuam aliquid dicendi, quæ Holmiæ memoriam sui reliquit valde inquinatam. Sed infra generositatem iræ virilis est, istam camarinam movere; & miserandum alias fatum est mulieris tot procis expetitæ, te maritum accepisse. Atque hæc fere sunt, quæ velut in defensionem tui delirare voluisti. Sed cum non pauca præterea facinora tibi sint objecta, simulque plurimorum mendaciorum, quæ in Pusendorhium priore libello famoso jactaveras, fueris convictus, de quibus ne verbum jam amplius mutire audes; non obscure silentio tuo ista agnoscere videris. Præsertim cum id brevitatis causa factum dicere nequeas, utpote qui easdem nœnias cuculi instar centies reiones.

VIDEAMUS nunc paucis, quid convitiatorum ac mendaciorum in Pusendorhium eructes. Ac primo quidem rabiem tuam excipit *familia*, ex qua oriundus est, quam tu vaccimulgorum progenies fœdis maledictis adspergis, nullo alio argumento, quam quod te & sub Asinli Tenebrionis schemate in Apologia, & post in Epistola detracta larva pro merito depexum dedit. Sane nullus mortalium capere potest vim hujus ratiocinii: Pusendorhii Asinium suis coloribus depinxit, igitur ipse ex  
sordi-

sordida familia ortum ducit. De cetero nec te ipsum bubulcigenam, nec quenquam Londinensem Professoremlatebat, Pufendorhium in Misnia & Patrem, & avum, & patruos, & avunculos habuisse Verbi Divini Ministros, viros honestissimos. Quali prosapia ortum esse nemo cordatus erubescendum duxerit. Quare ergo Aleſto te in mortuos ſavire adegit? In Pufendorſii porro familiari ſermone ceteri, qui ejus conſuetudine uſi ſunt, nihil adeo indecori obſervare potuerunt. Etſi alias mirum non ſit, tecum verſanti de ſtercore in mentem veniſſe. Eruditionem Pufendorſii ut contemneres graviffimas utique cauſas habebas. Nam neque iſ unquam pauca verba Gallica & Italica Latino ſcripto per ſtultam oſtentionem, ſicuti tu, immiſcuit; nec eos in Theologia ſub Huſſemanno præceptore fecit profeſtus, ut Tractatum *de ſalutari uſu ſancti Roſarii* noſſet conſcribere, qualem nuperus Catalogus Francofurtenſis ſub nomine Nicolai Beckmanni refert. Cujus ſi tu auctor es, procul dubio te aliquando inter Divos proximus a S. Marculſo manet locus. Alias Pufendorſius neque Theologiam, neque doctos & cordatos Theologos unquam ſpexit; ſas tamen ſibi credit eſſe, Schwartzium & Geſenium, & ſi qui ſunt alii calumniarum architecti, pretio ſuo æſtimare Jurisprudentiam uſque adeo non neglexit, ut non parum operæ poſuerit, quo ipſa ſolidis nixa radicibus exſurgeret. Soles tamen Goerlicii *reſplendefcentes* pro ignibus fatuis habet, ac dolet tui ſimiles aſinos pro triginta uncialibus titulum ſibi Doctorem poſſe emere. Id plane ſativum, quod nugis tuis aliquid auctoritatis conciliare voluiſti ex effato *viri illius eruditi, ex Indice Novitatum*. Male tibi ſit, qui vetus nobis proverbium corrupiſti; mutuum muli ſcabunt, nam tu jam teipſum ſcabis. Tu quippe es iſte vir, ſi Diis placet, eruditus; tua eſt iſta gemma, qua fuliginem Schwartzianam interſtinguere voluiſti. Loca Biblica a Pufendorſio ſæpe quidem in rebus ſeriis adduci, nunquam in pravum detorqueri ſenſum audivimus. Sed ut in frigidum & maleficiatum Doctorem regula juris Canonici per cavillum adplicaretur, non adeo grande piaculum fuerit. Dum Pufendorſio contemptum *Ariſtotelis* objicis, miſer prodis Ariſtotelem tibi nunquam inſpectum. Alias enim libros ad Nicomachum Magnis Mo-

ralibus non postposuisses. *Novus atheismus*, quem singularis prope lineis cuculi ad instar importune ingeminas, cum vetere illo & vero atheismo nihil cognationis habet; sed est peculiare maledicti genus, in improbo tuo ore enatum, furoris & malitiæ tuæ luculentum argumentum præbens. Ille inauditus atheismus ex tua definitione duobus capitibus absolvitur: quorum primum est, ut quis accuratius quam vulgo factum, moralia a physicis distinguere norit? alterum, ut quædam ipsius sententiæ non intellectæ aut malitiose detortæ ab aliquo Tenebrione calumniis impetitæ sint. Huc enim omnia, quæ super atheismo cuculas, redeunt. Quid entia moralia sint, te non capere ipse in epistola tua cyclica fateris. Num igitur ideo atheismus sub istis latitat? Græcam linguam Beckmannus non intelligit, igitur qui Græce novit atheus est. *Religionem pro frano tantum populi ac fructuoso Politicorum figmento in gratiam Principum Pufendorhium censuisse*, aut *Religionem statui Respublicæ esse accommodandam*, eo impudentius est mendacium, quod ejus falsitas ab omnibus, qui legere norunt, deprehendi possit. Aut si vir es, ostende paginam & lineam, ubi illud dogma extet, postquam tam importune crocitas; *litera scripta manet*. Obiter aliud mendaciam adspargis, quando scribis, quod Pufendorhium in Schwartzii disputatione inaugurali anno 1672. die 22. Maji habita in auditorio *personatum se stetit*. Nam anno 1672. Pufendorhium mense Aprili Holmiam proficiscebatur, & sub finem demum Junii Lundinum redibat; quod hic loci notorium est, & ex Protocollo Academiæ demonstrari potest. Ubi nunc artificium tuum mentiendi? Sic & inficeta est calumnia *de indifferentia actionum moralium*, de qua quo plura gannis, eo minus te intelligere, quid in controversiam proprie venerit, testaris. De cetero Pufendorhii vita, pietas, moresque cum aliis quibuscvis, tum præcipue sacerdotibus, quorum ministerio diversis in locis, ubi ætatem exegit, probati sunt probanturque. Nam Schwartzii malignitatem etiam vulgus apud nos detestabatur, quod cum Pufendorhii hætenus Collega & amicus fuisset, ac pridie quam Anno 1672. iste iter Holmiam ingrederetur, Confessionarii munere circa ipsum functus eundemque, quando currum conscendebat, prolixa benedictione prosecutus esset; mox tamen tuo fu-

rore

rore imprægnari pateretur, ut tam deformem foetum abortiret, prodigii averruncandi causa flammis ustulandum. Ex eo tempore quomodo Pufendorfius Schwartzium pro bono viro habere potuit? cum præsertim hic in malitia sua ita obduruisset, ut, licet Consistorium Academicum semel atque iterum ipsum in gratiam cum Pufendorffio reducere studuerit, & hic ad omnem injuriam ei condonandam facilem se præbuerit, & nihil aliud satisfactionis postulaverit, quam ut uterque profiteretur, ipsos sententias suas mutuo non satis percepisse, (*es sey ein Mißverständnis unter ihnen gewesen*), præfracte reconciliationem abnuerit. Hinc cum postea Pufendorffius Laurembergium alterius templi pastorem sibi confessionarium adscisceret, & hic ejus rei veniam ab Episcopo Winstrupio peteret, quod alias Pufendorffius extra ipsius parochiam habitaret, Episcopus non solum libenter id indulgit, sed & expresse dixit: non congruere, ut Pufendorffius Schwartzii ministerio utatur. Et cum Laurenbergius postea Malmogiam evocaretur, Pufendorffius M. Joh. Ernestum in ejus locum adscivit, quousque Holmiam ipse migraret. Puto hæc sufficere ad ostendendum, quæ de sacerdotibus in Scania & Suecia gannis, mera esse mendacia, & non nisi duos in Scania ex tuo contagio scabie Tenebrionistica infectos fuisse, qui eam ob rem jam puto sat ludibrii debuerunt. Mirum tamen est, quare de religione aut pietate mutire ausus sis, qui ob flagitia infamis declaratus religionem, cui innutritus eras, ejurasti, ut ventrem latrantem placares, & latibulum invenires, unde in alios saniem pectoris tui evomeres. Nam quare ad Principem aliquem Protestantem te non conferebas, si tam splendidis animi corporisque dotibus polles, quales in te jactas? An quia neminem concessurum prævidebas, ut apud se maledicendi theatrum extrueres? Si porro propter Rosarii sanctimoniam ad Monachos te contulisti, quare more adeo meretricio illis adularis, quos ex nostratibus lues Tenebrionistica afflavit. Cum ceteri omnes, qui a nobis ad Monachorum offas transfugiunt, priores suos sacerdotes tanquam animarum seductores detestari soleant; nec alio fere Sacramento Monachi novos istos combibones æstimant. Igitur crede mihi, ne Gelsenius quidem, quem undecim parochia-



rum rufesrium Inspectorem tu *Reverendissimum* vocas , vel teruncium pro anima tua dederit . De ineptis illis cognominibus, quorum pleraque nullum sensum habent, nemo apud nos unquam audivit , nisi quod Asinii Tenebriionis vocabulum tibi jure impositum omnes novimus ; ac si ex illis, quæ fingis, quintum quoque & sextum tibi vindicare velis , nemo repugnabit . Denique quam illa se mutuo destruunt , quod cum antea Pusendorfium temper ridentem dixisses , nunc eundem *lupo & tigride immanitorem* clamas . Nam de studio illo longe aliter se res habebat, ac tu fingis . Iste a Pusendorfio super aspera nimis tractatione discipuli sui admonebatur ; qua re importunus juvenis offensus tota die poculis se ingurgitabat, & sub vesperam domum reversus furenti similis multa in hospitem & bene meritum per violentiam jactabat . Nox furori illius indulgebatur ; sed postera luce orta accusante Pusendorfio ego tanquam secundus pedellus jussu Rectoris cum præfecto Vigilium ingratum hominem ædibus Pusendorfii extrahebam . Et parata erat relegatio , ni aliorum intercessionem iste indulgens deprecatione scripto concepta & Rectori Cervino tradita adquievisset ; cujus autographum adhuc superest . Quid ergo jam fiet de fabula tua , quam insuper loci & temporis conditio plane destruit ? Pariter anile commentum est de ancilla . Nam Pusendorfio nunquam curæ fuit, quid in sua culina gereretur . Neque frigidius quid poteras comminisci , quam quod de sagis blateras . Nam præfultore illis opus est, qui saltandi peritia se jactant . Quid autem tu duobus illis Proceribus, magnis Pusendorfii patronis , aliquid affingere erubesceres, cum mox subjungere non dubites : Pusendorfium in præloquio Apologiæ confiteri ; *sibi a Magnatibus Sueciæ esse suasum, ne controversiam hanc amplius moveret, sed eam tacito pede silentio præteriret* . Sane nec vola nec vestigium ejus sententiæ dicto loco extat . Tandem quoque non immunis debuit discedere Petrus Hauboldus bibliopola Hafniensis, qui arguitur operam navasse in Monzambano imprimendo , qui jam biennio antequam Pusendorfius in Scaniam veniret, diversis locis impressus extabat ; & in epistola ad amicos , quæ Anno 1676. lucem adspexit, cum jamdudum bello oborto nulla inter Scaniam & Hafniam literarum commercia

cia essent. Causa autem, quare bono viro malum mendacio tuo conciliatum cuperes, duplex est; una, quod ex ipso Pufendorfius primum rescivit, quis Indicem Novitatum Francofurti distribuisset; ex quo initio ad fontem sceleris penetratum fuit: altera, quod cum tu multa exemplaria *Medullæ*, & *Commentarii ad Instituta* obtrudere ipsi velles, is negaret, illa emptorem invenire. Quod crimen morte piandum tibi videtur. Sed quare Pufendorfius ista dicta in Danos affingas, facilius ratio patet, si quis belli tempora cogitat. At perit tibi fructus mendacii: Pufendorfius Holmiæ est, & te plorare jubet. Nec est quod Deo gratias agas ob unum atque alterum vesaniam tuam socium inventum, qui sub auspiciis tuis ludibrio se cordatorum exponere voluerit. Nam & quo isti defricentur sal non deerit; & tu, si verbum addideris, ita accipieris, ut ad restim demum tibi sit confugiendum; quo facto pessimus nebulo a fœdissimo carnifice suspensus dicetur.

HÆC fere sunt, quæ pro jure veteris conjunctionis amice monenda judicavi, ne in tanto fortunæ famæque splendore veteris clientuli oblivio te plane subeat. Interim vale ut mereris, & si quid novæ scriptionis a Domino Rolleto acceperis, communicare nobis ne gravare. Dabam Londini Scanorum e Museo meo, ne in stabulo me scribere arbitreris, pridie Calend. Octobris, Anno 1677.

---

**JOHANNIS ROLLETI,****PALATINI,****DISCUSSIO CALUMNIARUM,****QUAS ABSURDISSIMAS****D E****ILLUSTRI VIRO****SAMUELE PUFENDORFIO,****RELEGATUS E SUECIA****NEQUAM****NICOLAUS BECKMANNUS****PER CAUSAM DEFENDENDÆ FAMÆ****NON ITA PRIDEM IN VULGUS****SPARSIT.****AD GENUINUM EXEMPLAR MANHEIMENSE.**

**S**I malevolorum fabulæ oracula essent, aut mendacia pondus aliquod, ullamque probandi vim haberent, non facile inveniretur vir eruditus & publice utilis, quin locum in perditissimis obtineat. Etenim in usu venire solet, ut quo quis doctior ac meritis in publicum major est, hoc pluribus vulgo calumniis traducatur; stimulante invidia, vel quia Satanas non meliorem modum novit suspectos reddendi, qui progressus ejusdem sistere, & regni tenebrarum auctus morari possunt. Cujus fundamenta vitro corruunt, exculta ratione, sique nullo deinceps numero sint scriptores,

ptores, quorum somnia prodigiosam orbi barbariem pepererunt, qua postmodum ipsa etiam religio infecta fuit. Sed barbaries quidem illa, tametsi ita late amplius non regnat, haudquicquam tamen usque adeo suppressa videtur, ut omnino apud nos emergere, & vires iterum resumere nequeat; postquam luce Evangelii restituta, Academiae, quae tum erant, pristino in statu, mansere, reliquae ad illarum exemplum erectae sunt. Eo felicius autem haec Zizania e quibusdam radicibus suis magno Ecclesiarum malo alicubi progerminant, quod adversarii arte illorum proventum juvant; quorum interest, fabulam in tenebris agi, ne quis tertius spectatorem se offerat. Sane enim dum formam quam vocant, distinguunt, & reliquas scholarum suarum tricas urgent, quid aliud agere censendi sunt, quam ut nostrates in oppositum delapsi, Erasmi & Lutheri arma exuant? Ultra quorum victorias nihil hactenus promovimus. Quo astutissimo stratagemate deceptos esse manifestum est, qui exemplo suo juventuti ad barbariem praevincunt, eo praetextu quod alioquin nemo cum adversariis congregi posset. Quasi aliqua obligatio sit, cur eodem, quo hostes telorum genere pugnari oporteat; & nunquam Erasmo cum Scotistis negotium fuerit: e quibus illi omnibus Scholasticorum machinis adhibitis nondum aliquem in castra sua pertraxerunt. Et si quod nascente ex iisdem nugis pertinacia Ecclesia nostra propemodum in partes ivit, non omnino nullum eorum adversus nos meritum est. Ceterum ut maxime haec & plura nos indicia deficerent, illud tamen abunde testari potest, omnino semina quaedam veteris barbariei in plerisque locis superesse, quod prodeunte in publicum scriptore, abs quo, ne barbaries detrimenti quid capiat, periculum sit, vel ut ex composito integræ stultorum legiones clamorem tollunt; plane exemplo Monachorum Reuchlinum impetentium, quos ad extremum satyra & consatus ex eorum flosculis libellus compescuit. Ubi observare licet, longe majori zelo & contentione negotium geri, si religionis velum simplicioribus obtendi potest, aut res ad illos præterea spectat, quorum interest, cum aliis, cum præcipue vulgus eruditorum quam minimum ex se sapere. Eoque quod culturam *Juris Naturalis* utrumque hominum genus tantis vociferationibus petit, nemo cordatus

eus mirabitur : quippe quo luci suæ restituto nec conscientia a sacerdotum libidine suspenditur , & formulariorum mysteria agricolis deinceps ludibrium debent . Sed ut in Papatu quidem sic satis felices sunt , qui hanc disciplinam æternis sepultam tenebris optant : ita per seculum inter nos multum ipsa splendoris nacta est , nuper adhuc felicissimo successu manum eidem admovente Viro illustri SAMUELE PUFENDORFIO ; in quem jam Satanas , quicquid calumniarum orcus habet , per juratos quosdam sycophantas evomuit , non alia de causa , quam quod ipse latentis barbariei sententiam movit . Quæ contumelia tantum abest , ut ejusdem animum dejiciat , ut potius hoc ipso confirmetur , personam impostoribus illis detractam esse , quorum illusionibus Satanas ad reducendam barbariem utitur . Præsertim cum omine non careat , quod penes plerosque dolor dissimulationem vincit ; & illi optiones , ab auxiliis destituti latibula jam circumspectant , postquam nihil aliud , quam ludibrium pro navata mendaciorum patri opera sperare licet . Sane enim niger ille corvus , quo crocitante tot inauspicatæ aves advolarunt , cum risu orbis inter Sanctos , aut quemadmodum consecrationis formula habet , *gementes pro Ecclesia columbas* reponitur . Et ceteri etiam miselli socii , quos nondum mores sui ulciscuntur , stultitiæ suæ præmium in tempore ferent . *Nicolao* interim *Beckmanno* , cujus auspiciis ventres quidam per Germaniam clamare cœperunt , non opus est , per quem stultitiæ moneatur , quam forti exorcista , quando hominem revera complures cacodæmonum manipuli obsessum tenent . Abs quo jacta nuper in vulgus *Defensio* stolidi , absurda , aut si mollius loqui velimus , miseranda , quanquam soli Asinio nocere queat , quippe qua suum ipse nidum prodidit , nemo quoque futurus sit stomachi tam patientis , qui ad eandem non nauseat : visa tamen nobis digna est , quam paululum depexam demus , non sane in gratiam Beckmanni , qui ter injuriarum convictus , spurcis etiam , quas olim sparserat , chartis per carnificem crematis frustra cuiquam fidem se facturum credit : neque quod Pufendorfius nobis hyperaspittis indigeat : Sed quia hostis humani generis Alastore parario studia viri omni calumniarum genere turbare tentat , quæ regno ipsius , si quicquam aliud , mirum in modum nocere possunt , effi-

cie-

ciemus, ut & in hoc voto suo excidat Satanas. Simul-  
que cum Beckmannus tam ferox sit, non quidem, quia  
habet imperium in belluas, sed quod interclusis itineri-  
bus scelerum ejus documenta e Suecia transmitti ne-  
queunt, & ipse interim persuasus est, Pufendorffo nul-  
los per Germaniam amicos esse; nos autem optimo vi-  
ro, qui cum informatione, tum scriptis suis qualescun-  
que nostros in literis profectus juvit, multis nominibus  
devincti sumus: levi & festinato saltem specimine osten-  
demus, utique adfuturos in Germania, qui ad Beckman-  
ni mendacia aliquid reponere queant, quosque hæc vi-  
ctima carnificis ab ara profugiens percussoribus cervicem  
subdet. Neque enim id tutum præstabit nebulonem,  
quod postquam orcus eundem recipere noluit, in mona-  
sterium concessit; videlicet præ desperatione, quæ vel  
militem vel monachum facit. Quanquam inter bonos  
illos Fratres non desunt aliqui cordati, qui cognitis fa-  
cinoribus Beckmanni rabiem hanc & effrontem maledi-  
centiam ex animo detestabuntur. Præsertim cum jam  
illi ipsi, in quorum casses ea bestia primum incidit, ve-  
natione sua paulatim erubescant; quod votis suis damna-  
ti Dictynæ non leonis, sed asini duntaxat exuvias su-  
spendere possunt.

ILLUD igitur manifestum est, Beckmannum tamdiu  
nebulonem & infamem calumniatorem mansurum esse,  
donec non carminibus per ludibrium, & ut ipsius stul-  
titiæ adolescentes etiam flagellarent, diu ante hoc ne-  
gotium fuis, sed rationibus ac testimoniis bonorum vi-  
rorum omnia illa argumenta diluet, quibus de *Indice*  
*Novitatum* edito in Suecia convictus fuit. Quæ argu-  
menta fidei actorum publicorum, & profecto noctu ne-  
bulone, ipsius confessioni superstructa effecerunt, ut iussu  
*Sacra Regia Majestatis* facerrimus ille Index Londini a  
carnifice flammis datus sit, Beckmanno in præmium la-  
boris pro infami declarato, postquam ipsum nebulonis  
Manuscriptum publice in Senatu Regni productum esset.  
Atqui tantum abest, ut ista ratione Beckmannus se pur-  
get, ut potius de scelere isto contra seipsum nulla re,  
quam defensione sua manifestius & majori eam pondere  
testari posset. Præterquam enim quod torus liber pro-  
fus iisdem flosculis vernat, quibus & Index novitatum  
& alter libellus famosus refertus est, ut vel ex tanta

aviculam agnoscere queas, etiam nihil aliud hic ingerit lectori, quam quod in illis operibus suis nulla cum specie veritatis mentitus erat. Et si atrocita illa, quæ in posteriori libello famoso perjurio confirmabat, in hoc carmine omissa sunt: quod ipse nebulo remittente paululum furore mendaciis suis erubuit, nec male, minimum uxore monente, opinatus est, neminem tam stolidum fore, qui tot scelera, quæ gentiles etiam detestantur, in republica Christiana a viro integræ semper famæ palam & citra pœnam patrata credat. Quo ipso & his mendaciis omne pondus detractum est: cum Beckmannus se fatente perjurus, & semel in mentiendo impudentissimus fuerit. Sed & expressius scelus istud in Suecia se commisisse agnoscit, dum initio defensionis suæ citra figuram eloquitur, quod Pusendorffium *arctissima censura iterum perstringere velit*. Ergo Pusendorffium censura sua nuper, opinor, perstrinxit, & ubi, nisi in Indice novitatum & altero libello famoso, qui a Pusendorffio posteriorem epistolam elicit? Quin illud quoque Beckmannum infamis illius Indicis auctorem ostendit, quod etsi aliquoties rem neget, nunquam tamen id illustre monumentum sine elogio nominat. Ita enim alicubi: *Prodiit sine certo auctore Index Novitatum, oculos multorum valde claros efficiens. Sine certo auctore*, inquit. Atqui is auctor omnium confessione est vir scelere & infamia nobilissimus *Afnius Tenebrio. Oculos valde claros efficiens*, dicit. Nimirum ut quidam sycophantæ *indifferentissimum moralem* inter spectra reliqua prodeambulantem viderent; *Velthemio* autem aliquot modii squamarum ex oculis deciderent. Denique quantumcunque dolorem suum dissimulet Beckmannus, arguunt tamen universa, quam ægerrime ipse pater prolis suæ ustulationem tulerit. Cetera quæ toto opere non sine tragica verborum atrocitate solita sibi eloquentia deblaterat, omnino a defensione aliena sunt. Cum enim Beckmannus diffiteri nequeat, auctorem Indicis infamiam commeritum esse; (nam alioquin cur tam impudenter negaret, ejus confessionem jure sibi impactam?) & vero illa argumenta, quibus se de eodem edito convictum novit, ab ipsomet hac descriptione adstructa sint, manifestum est, Beckmannum infamem & nebulonem manere, etiamsi nondum in pueritia ex tali scelere reatum

tum contraxerit. Neque hoc titulo privabitur, si maxime ponamus Pufendorhium tota ætate sua aliqua in re lapsum fuisse. Ergo si citra pertinacem vesaniam Beckmanni foret, jam hæc causa nobis perorata erat: Placeat ramen & aliena illa, quorum alteram partem facinora Beckmanni, alteram mendacia de Pufendorffio constituunt, paulo plenius excutere, saltem eum in finem, ne forte Beckmannus semel in vita sapuisse se pueret, cui Holmiæ viventi ad morionem nihil, præter tintinnabula deerant.

PRIMO itaque ut a vitiis mundanis immunem se probet, (*mundana* vitia dicit in oppositione ad vitia cœlestia) amissa existimatione cum omnium bonorum applausu laudum suarum testimonia ab emendicatis quibusdam carminibus petit. Quasi vero ignotum foret, tanto meliorem esse Poëtam, quo plura fingat. Et qualem *applausum* esse credimus, si quis ex una Academia in aliam abeat? Imo vero cui abeunti applaudunt commensales ideo duntaxat, quia abit, eo præsentem non admodum gavisi fuerint, oportet. Sed & ipsa illa carmina indicio sunt, Beckmannum jam tum in Academiis ludibrio fuisse habitum. Sane enim in Germanico *mutillare* saltem adducto hyperbolæ nimis quam evidentes sunt. In Ode autem Latina, quam Flaccus Marpurgensis enixus est, *Nicolaus Beckmannus* comparatur Sancto Nicolao, quem Moscovitæ nautis patronum adfociant. *Ibis profunda navita gloria Nicolæ!* Atqui dum bonus noster Nicolaus scelere ad gloriam navigat, non prohibente Sancto Nicolao, famæ & fortunarum naufragium fecit. In *Gallia* autem uti neminem usque adeo simplicem fuisse putamus, ut eidem Beckmanni eruditio probata sit, ita si maxime aliqui de *Medulla Justiniana*, quam vocat, benigne senserunt, id vero Beckmannum nihil juvat. Quippe medulla illa a Professore quodam Marpurgensi est, cui eandem plagio subduxit Beckmannus. Imo alter Antecessorum Aurelianensium satis animadvertit, abs qua virtute id pecus commendari oporteat. *Cui sic Romani Juris fuit ore medulla*; id est qui tantis lacertis est, & simul juri Romano operam navans, in tam stolidum legulejum abiit, uti Beckmannus; *Olli Romanis viribus ossa vigent*, id est: ille non ablimilis est rudilaniæ & robusto cuipiam pugili Romano. Judicium porro,



porro, quod de labore illo in *Ephemeridibus* eruditorum legimus, in quodvis compendiolum juris quadrat. Et si satis stulte Beckmannus, quod ita postmodum de opere suo loquitur, quasi Rex Christianissimus intuitu illius iudicii ultro & proprio motu bibliopolæ Parisiensi diploma aliquod obtulisset. Nam id saltem egit bibliopola, ut in *scro Beckmanno* id privilegium impetraret, eo facilius quod qui isti curæ Regia auctoritate præerant, animadverterent, periculum non esse, ne quis in hoc libro medullam Justiniani latere putet, pridem situ & putredine absumptam. Mirum vero, Beckmannum non gloriari, mandasse Regem, ut filio suo primogenito, quam primum præter lac & mollem cibum aliud quid digerere posset, singulis diebus eadem medulla jentaculi loco apponeretur. *Rebhanium* denique Argentoratensem qui noverit, non mirabitur ipsum Beckmanni objectionibus gavisum fuisse. Cujus rei fidem facere ignotis potest censura programmatis Argentoratensis *Boeckleri*. Dein Beckmannus multis verbis titulum *Doctōris* jactat; quem sibi maxime digno collatum ait, postquam & examen *rigorosum* sustinuisset, & *magnam* de judiciis disputationem conscripserat. Atqui ut ab ejusmodi sociis multis ex libris magnum volumen compileretur, nihil novi est, & Galli his examinibus non admodum rigoroſi esse solent. Quin pueris notum est illud vulgatum: *Sumimus pecuniam, & mittimus asinum in patriam*. Ceterum hunc titulum nemo unquam Beckmanno adimere voluit, (et si quid hætenus expectare debeat, infra audiet,) de quo neque *Diabolus* sollicitus fuit. Et valde ridiculum est, quod scribit, carmina illa & testimonia poetica *miserrime livore corripere, angere, torquere, imo macerare & excruciare* Pufendorfium; per quem licebat Beckmanno eadem vel nundinarum tempore peculiari in theatro rusticis canere, adsumpta in auxilium uxore, quæ plures spectatores allicere poterat, quam simia, aut cercopithecus. Sicut penes nullum literatum, cognito acumine Beckmanni *periculosa æmulatio* oriri potest. Nihilominus noster Beckmannus jam velut triumphans verbis Teutonicis præana canit. Quod nulla alia de causa fecisse censendus est, quam quia cachinnum se provocaturum animadvertebat, si latine loqueretur, cum ipse tragicum quid spirare vellet. Sane enim utut & Ger-

Germanica sic satis faceta sunt, imprimis tamen quoties latinis verbis paulo magis pathetice furit, nihil aliud, quam risum movet. Præsertim si quis attendat ad epitheta illa sane in loco adhibita: *male*, *impie*, *scelerate*, *pie*, *glorioso*, *laborioso*, verbi gratia. Ubi flagitium aliquod commissum mentitur, plerumque id *impie* commissum ait. Quemadmodum quicquid ipse boni fecit, *pie* videlicet. Quasi aliquis *pie* & *glorioso* malus aut *impie* bonus esse posset. Ut sic mediocriter adhuc profecerit Beckmannus in Schola Velthemii circa doctrinam de vocabulis, quæ in se ac sua natura actum vel honestum vel turpem, exprimunt. Et si pius ille mendax jam admittit *mendacium pium*, de quo non ita pridem disputatio ejus auspiciis prodiit, ab amico nobis missa. Quo & illæ Beckmanni blandissimæ preces spectant, ut epistolam Pufendorffii, priusquam de sua defensione judicium ferant *remotis omnibus corruptis affectibus pie perlegant* Germani. Ergo si Pufendorffii epistolam *remotis omnibus corruptis affectibus pie* legere possumus, Beckmanni defensionem *impie* legamus oportet; quippe quæ illi opposita est. Denique ne lectoribus ignotum sit, quo factorum ludibrio e Suecia in Germaniam venerit, illud quoque, *dum vitam suam deducit in sui dispendium præteriri noluit*, se professionem juris reliquisse *ob maximum pietatis & justitiæ in Suecia defectum*, summumque luxum & latentem amorem Germaniæ ceu nativi soli. Jam nemo mortalium de pietate Beckmanni dubitat. Addit quod Fulda eminentissimum Cardinalem Badensem accesserit, ut *decretatus Consiliarius*, postquam Regi Regnique Proceribus *solemniter valedixisset*. Nimirum quia hodie in Germaniam consilarii vocantur nebulones, bis terve injuriarum convicti, & ita sollemnis valedictio nocte concubia ideo fortasse facta est, ne ob discessum tanti viri juvenes pariter & senes nimia effusione lacrymarum oculos corrumperent. Quare autem hic nullum carmen recitat; quod viro tam celebri ad principem tam longinquum profecturo & solemniter valedicenti omnino a clientibus offerri par erat? Sed nimirum eadem absurditas est, qua anno 1671. ante hos furores in Pufendorffium, cum ob turbas & scelera quædam salario privaretur, persuadere nobis volebat, se *Professorem honorarium* esse factum.

Etum. Et si lippis & tonsoribus tum notum erat, Ihu-  
 strilimos Regni Proceres id egisse, ut dæmonem huic  
 per jejunium ejicerent. Quod genus multa alia comme-  
 morare possemus, si quidem hominis fatuitas finem ali-  
 quem ac modum haberet. Illud tamen ingenium in  
 Beckmanno, quod fatetur, se non esse *Tullianā puri-  
 tate puriorem*, Cujus sane rei vel in hac defensione lu-  
 culentissima aliquot exempla occurrunt. Quo magis mi-  
 ramur, absurdum istud ingenium deinde non erubescere  
 gloriatione ista: *ipsas leges doctrinam suam juris ob lin-  
 guæ Latinæ puritatem & elegantiam rarissimam venerari  
 & adorare*. Quod si Dietherrus ita serio sensit, fortasse  
 eadem Venus in utriusque labris sessitat. Quanquam  
 potius est, ut dicamus, Poëtam simulasse Dietherrum,  
 ut citra ruborem mentiretur. Quia illud vaticinium,  
 quo elegiam suam finit, *Indici novitatum* etiam præfi-  
 gere poterat, a carnifice in rogam conjecto. *Flammam  
 perpetuam mox dabit iste liber*. In verbis autem carmi-  
 ni subscriptis proficitur *se purpure tanti auctoris pannum  
 suum adsuere voluisse, & rogatum debuisse, ut id opus  
 tanto magis niteret (fulgore panni adluti) & in Aula  
 Cæsarea imprimis explenderet*. Utique sane operi  
 Beckmanniano a Dietherro nonnihil splendoris mutuo  
 sumendum erat, minimum ob dedicationem stolidissi-  
 mam; cujus revera hic sensus est: Sacram Cæsaream  
 Majestatem isthuic bello contra Regem Christianissimum  
 se immiscuisse, ut defenderet Corpus Juris. Quanquam  
 alias Phœbus Goerlicensis, cujus facula *resplendescens*  
 nuper in æthere se stitit, plus radiorum in Beckmanni  
 lucubrationes projicere poterat. De Epigrammate autem  
 illo, quod Icon Beckmanni præfert, moriar, ni idem  
 a Beckmanno confictum est. Minutiora persequi super-  
 vacuum fuerit. Sane enim, ut demus, Beckmannum  
 ex honestis parentibus natum aliquantisper in Acade-  
 miis vixisse, dedisse se præterea peregrinationi seu de-  
 cursationi potius, Doctorem etiam fuisse creatum, tum  
 panegyricos quosdam eidem dictos extare, denique scri-  
 ptis editis professioni Juris meritissimo admotum esse;  
 tamen per hæc omnia, velut supra diximus, Beckman-  
 nus a scelere postea commisso nequaquam excusabitur.  
 Et cui ignotum est, quomodo paucis ab hinc annis in  
 vicinia nobis reipublicæ Jureconsultus eruditione & meri-  
 tis

tis suis Beckmanno infinitis partibus major Satanæ suggestionibus seductus eodem crimine se alligaverit. Abs quo septuagenario licet, & cujus canities ipsis iudicibus miserationem incutere poterat, magistratus supplicium quod Beckmannus jam meretur, sumpsit. Ut omnino ridendi sint; qui Doctorem juris cuiquam tam enormem fecisse injuriam credere nequeunt.

VIDEAMUS igitur quæ Sycophanta iterum de Pufendorfio mentiri voluerit; de quibus in universum difficile est pronunciare, malitia an stultitia in iisdem prævaleat. Cujus nomini quod tam solícite titulum *Magistri* apponit, ideo potissimum factum videtur, ut Pufendorfius vicissim nebulonem Doctorem vocet. Alioquin eadem auctoritate Magistri creantur, qua Doctores. Sed non moris amplius est Doctores vocare nebulones a carnifice mactandos. *Entia autem moralia*, quæ bestia toties *bestialia* vocat, ne quis ignoret, alias dicuntur res morales. Et videtur ista appellatio manere posse, non obstante Commentario Velthemiano ad Grotium, quamdiu res & ens synonyma erunt. Neque metuendum est, ne Pufendorfius *eadem in lucem prolatura*, ut Solæcista loquitur, *defendere* non possit. Ceterum primo omnium tristissimus noster *Porcius risum* Pufendorffii notat; quem eundem tamen in fine carminis sui *tygride saeviores* facit. Verba suo cum flore adscribemus: *Pufendorfius cachinnari ac ridere artificiose practicatur*. Cur non potius *practicat*? Aut quodnam est illud *artificium ridendi*? Cujus plenariam descriptionem fortasse a Beckmanno nobis polliceri possumus, quippe qui tot annis stultitiam suam Holmiæ rideri vidit. Sed num ridere & hilari animo esse crimen est? Pergit accusator, quod *loca biblica, canonica & juridica in prævum sensum detorqueat*. De locis Biblicis more suo mentitur Beckmannus. Illud vero nequaquam est canones in malum sensum detorquere, si quis Beckmannum alioquin scripturientem roget, ut ad titulum decretalium de *impotentia coeundi* commentariolum edat. Longe denique a rabularum malitia abest, aliquid ex jure civili ad ridiculum faciendum in loco adferre, & ut alterum levi joco adspargere possis, *Jureconsultos anserum instar idem semper canere*, verum est de Jureconsultis Beckmanni geminis germanis. De universo ordine idem as-

*Pufend. Eris Scand. T.IX.* N fir

firmare nunquam cuiquam in mentem venit. *Ebrietatem* scripta Pufendorffii satis refutant; quæ cerebrum hominis vinosi non redolent. Ceterum si qui Norimbergæ stultitiæ Beckmannianæ documentum capere velint, apponant homini cantharum vini, & comœdiam videbunt. Quid vero dicemus de illa exprobratione Beckmanni? *Nec exercitia corporis nobiliora didicisti, nec peregrinasti.* ( Hinc sine dubio *leges virgines* in genua procumbent, & adorabunt ). Quasi necessum sit Professore saltationes Polonicas nosse, aut a lanista circumforaneo vapulare. Nam Beckmannus olim usque adeo non *gloriose* digladiationibus *tempus tribuit*, ut potius cum Londini Professor Specimen profectuum in publico edere veller, plagis in cornua acceptis mire intra testam se contraxerit. Verba interim hunc flosculum proxime sequentia indicant, penes Beckmannum ejusdem turpitudinis vitia esse, *inter libros & inter scorta sedere*. Nam hæc ille conjungit. De *Aristotele* aliquid addere nihil attinet; cujus Metaphysicam dum ipse impugnat, impetum in lociorum cohortes; & præcipue dextram Velthemii alam facit. Equidem olim credebamus, Beckmannum nunquam pictum, quod dicitur, Philosophum vidisse; nimirum ob *morosas Themidis Camænas*, ut ipsius encomiasta loquitur. Et nuper adhuc in frontispicio operis sui imberbis, terribili saltem cum machæra sculpi voluit; videlicet in recordationem plagarum, quas pugil circumforaneus eidem inflixit, & ut Pufendorffius solo adspectu exanimatus duellum recusare pergeret, in quod illum peculiari epistola Hamburgum vocabat. Nunc de repente peripateticus nobis prodit, pallio & barba ornatus, quali vix Cratippum fuisse putamus. Felicem hoc ipso Aristotelem, qui Politicæ suæ patronum nactus sit, cujus non calamum modo, sed & gladium latissimo e corio pendentem metuere oporteat. Et si frustra hic ad pugnam se componit loricatus noster Beckmannus; cum Pufendorffius nunquam modum accidens esse negaverit. Quantum porro piaculum esse credimus, quod Pufendorffius de uxore *Beckmanni* talia scripserat, quæ pueris in Svecia notissima sunt. Et sane ut mulierculam illam revera *in sui solatium duxit*. Noster; ita quæcunque de ipsius forma, probitate ac divitiis somniat, itidem *in sui solatium* scripsisse videtur. Nam ipse quidem

dem rarissime Junone sua vel tantillum sibi favente utitur; quæ si commotior est, etiam si nulla Beckmanni culpa fiat, auctoris conviciis in eundem detonare solet. Nisi forte postquam columna illa Romanæ Ecclesiæ inter crassos & bene vasatos monachos versatur, uxorem paulo minus molestam sentit; quæ sane per modestiam tam facilis est, ut omnes cujuscunque conditionis eam non satis laudare possint, Beckmanno videlicet præsentē. Quod autem ipsa ejusdem verba Germanica, quæ dolore animi commotam protrudisse ait, satis equidem emphatica, & quibus uti inter piscatores eductam decet, defensionī suæ inseruit Beckmannus, ideo factum est, ut licentiā ab illa impetraret pecuniam perdendi. Scilicet quia *Commentarius ad prima fundamenta* a nemine emitur, in quem ipse tamen universam dotem & præterea non modicum æris alieni prodegit, eoque Beckmanno de libris edendis ne verbulum mutire licet, hic quidam eo prætextu usus est, opusculum scriptum esse causā illius, non suā. Quod ne frustra caneret, adspargenda utique quædam Germanica erant, etiam quæ mulieri suo more fabulanti exciderant, ut opere impresso inveniret ipsa aliquid, in quo phrasin suam agnosceret. Ceterum ne uxoris causā Beckmanno ullus mortaliū invidet, metuere non debet; quæ jam vetula propemodum non facile cujusquam spiritum excruciare potest, ut cum Tullio nostro Heidenſi loquar. Post frigidissime peroratam causam uxoris, etiam crimen læsarum Majestatum Pufendorſio impactum it Beckmannus: *Propositum Pufendorſio esse denigrare non modo Schwartzium* (qui jam antea quovis corvo nigrior est) *sed & maxime venerationis viros in Germania, ut Reverendissimum* (addendum erat: *& serenissimum*) *Dominum Superintendentem Garlebiensem, celeberrimum Veltheimium Jenensem, & illustrem* (ohē jam satis est, ohē Niclaë!) *Scherzerum Lipsiensem, contra novum atheismum fortiter insurgentes*. Sed nimirum de Scherzero gestiunt jam eruditi istud novi generis prælium Lipsiense videre, nosque pridem serio optavimus, tandem aliquando copiolas suas educat, quarum fiducia Pufendorſio tam inanem movere litem non erubuit. Sane enim Sacra Regia Majestas Sueciæ nunquam per literas a Serenissimo Electore Saxonie petiit, ne cui Theologorum suorum permitte-

ret facultatem scribendi & ratiocinandi contra Pufendor-  
fii principia ; quod Beckmannus comminiscitur ; cui do-  
let, neminem Theologorum Electoralium se præcento-  
re clamorem tollere . Equidem id sæpe numero e repu-  
blica est, sacerdotibus facultatem scribendi non permit-  
tere . Ut tamen iidem prohibeantur facultate ratiocinan-  
di, hoc quidem tempore supervacuum videtur ; quo ple-  
rique Sacerdotes usu rationis citra omnem prohibitionem  
religiosissime se abstinere , Velthemii autem cavillatio-  
nibus non habet Beckmannus , cur exultet ; qui famæ  
jejunio bona fide gloriam in scelere quærit , novus vi-  
delicet hoc seculo *Campester*, mire cognominis Domini-  
cani , Erasmm adorti , impudentiam nobis referens .  
Ceterum quæ elogia Velthemium merere putamus , qui  
non erubuit e libello famoso , ab Alastore quibusdam  
Academiis oblato , spurcissimo , & quo foedior ne ab  
ipso quidem mendaciorum patre consarcinari poterat ,  
obscenissima quæque in indoctum illud , & plusquam  
barbarum opus suum transferre , quod introductionem  
ad Grotium vocat ? Nam illa quidem civilitas nihil  
sublevat Pufendorffium , quod memorato in loco , cum  
libri mentionem faciat, nomen ipsius reticuit . Reliquæ  
autem sycophantiæ ingenium produnt stupidum , agreste,  
malitiosum , & quali omnino opus erat reducendæ bar-  
bariei , quæ ab exteris impulsæ , quemadmodum in vor-  
ticibus Cartesii materia primi elementi corpora alia ad  
centrum suum ; ita quicquid ipsa difficillimum nugarum  
habet , versus meditullium Germaniæ premit . Et ne le-  
ctoribus ignotum sit , quæ demum in Pufendorffio desi-  
deret Velthemius , paucis monere juvat , causam tam  
effrenati furoris revera non aliam esse , quam quod Pu-  
fendorffius Scholasticorum flosculos & Moralistarum so-  
mnia rejicit ; quos utrosque tamen a Grotio magnope-  
re laudari ait . Eoque quemadmodum metuit Velthe-  
mius , ne se *senem decrepitum de ponte asinorum* aliquis  
*dejiciat* ; ( vide *Disputatio posterior de actibus per se*  
*honestis* §. 18. ) ita Thomam , magna Pufendorffii invidia,  
solicite *Principem Moralistarum* vocat , præsertim sicubi  
lector *Metaphysicorum Patres* Conscriptos ingerit ; &  
inter illos nescio quem *de S. Porciano*, ne non credamus,  
ipsum *magis versatum esse in studio Metaphysices , quam*  
*vanas vires in nucibus arboribus*, ( add. *Introduct. ad*  
*Gro-*

*Grotium Part. I. p. 62. & 42.*) Ubi quidem de Grotio fatemur; deprompsisse ipsum nonnulla e Scholasticis; quædam etiam Moralisticis non pessime animadversa esse concedimus. Sed Grotii ingenium profecto Velthemius non habet, ut scorias in aurum convertere possit, qui contra disciplinam istam his sordibus iterum coinquinat, quibus tot vigiliis a Grotio purgata est. Et cur non Ennium juventuti commendamus, e quo itidem Maronem aurum collegisse constat? *De actibus per se honestis* aliquid addere nihil opus est; circa quos Pufendorfius illud revera docet; Jus naturæ, quo genus humanum utitur, a Deo optimo maximo originem trahere. Nam quod Velthemius sophisticatur, moralitatem in actionibus hominis saltem *in puncto rationis* divinam voluntatem antecedere, nemini persuadebitur, cui quidem paulo plus, quam punctum rationis sit. *Peccatum autem transgressionem legis esse, ut est offensa Dei, non ut est malum morale*, ultimum in barbarie videtur. Primarius interim elenchus huc redit. Scripserat Pufendorfius, Deum legem naturæ mutare non posse, non propter vocabulum *per se*, sed ob necessitatem hypotheticam. Cum enim lex naturæ arctissimam cum natura humana congruentiam habeat, posito Deum velle, ut homo sit homo, quod utique vult, & semper volet, homini contrariam huic legem naturæ ferre nequit. Si enim Is ad contraria officia fuisset adstrictus, non sociale animal, sed alia feri & horridi species animantis fuisset producta. Hic fingit Velthemius, Pufendorfium respondisse: *Hominem dupliciter spectari, 1. quatenus Deus eum condiderit animal ratione & sociale, 2. quatenus Deus eum condere potuisset animal horridum & ferum*. Cum res ipsa loquatur, Pufendorfium hoc dicere, hominem, si ad contraria officia adstringeretur, eoque animal horridum & ferum esset, hominem non fore. Quod ex conditionali hac propositione colligere licet, creati potuisse hominem animal horridum & ferum, nimirum eodem Scotista ratiocinante dari poterunt asini alati, qui nobis Velthemium ad sidera ferant. Quippe id tritum Scholasticis exemplum est: Si asinus volat, IS habet pennas; ut doceant, orationem subjunctivam consiliteri, etiamsi neutra pars in se vera sit, aut esse possit. Imo vero nova hac Velthemii dialectica admissa, abesse non



potest, quin ipsa etiam scriptura sacra somniam Velthemio sententiam foveat. Sane enim in illo Apostoli, Rom. IX. 20. *Num intetrogat plasma (verbi gratia, homo) factorem suum, cur me facis tale?* (verbi gratia, rationalem ac socialem, & non potius animal horridum & ferum?) particula ME prorsus eidem calumniae patet, qua ob voculam IS, Velthemius se jactat. Terminum autem, *Necessitas hypothetica*, cavillari, puerile est; cum eodem res redeat, necessitatem absolutam an hypotheticam certos gradus habere dicas. Sed nimirum quia animadvertimus rem in se manifestissimam sycophantam per malitiam capere nolle, (quanquam citra omnem adfectionem stuporis sat stolidus est,) siquidem Velthemius ab ejulatu & clamoribus suis non desistet, omnino e disputationibus & ejusdem nobili illa introductione ad Grotium extantiores flosculos peculiari opere æternitati consecrabimus, quod certum est, parum concessurum fore Epistolis obscurorum virorum, aut Frischlini Prisciano vapulanti. Nam ubi ratio ejuratur, & alia remedia consumpta sunt, nihil aliud, quam satyra superest. Quæ hic quidem non illud modo efficiet, ut Velthemius velut in speculo sibi ostensus ruditate sua paululum erubescere incipiat, sed & eadem opera antiquæ barbariei genium deformabimus; quæ jam mirum in modum certis hominibus placere cœpit, postquam non pauci papalium tenebrarum memoriam perdidierunt, & juventuti ignotum est, quæm Velthemius, & alii ex iisdem hortis philosophi lactent, communem naturæ sensum amittere posse. Eo lepidiores autem nobis in his nugis futuri videmur, quo majori tristitia prolata sunt; etsi inter venteres ac delicias istas non omnino nihil scurrilium jocosum emineat. Neque vero metuendum est, ne verba Velthemio invertamus, quemadmodum felis invertit ollas; quæ invito coquo carnes eripit, ut pisciculos minores eripit, magnus accipiter, devoratque; quæ lepidissima similitudine ipse nititur in *Ætioscopia practica* §. 6. circa fin. Nam ut barbarissimi non solum in forma, sed & in materia adscribantur, curabitur; additis & portentis aliis, quorum si lectoribus gustum aliquem hic dare vellemus, ultro faterentur, barbariem terras relictæ in operibus illis extrema sui vestigia posuisse. Denique Pontifex Garlebiensis, somnium hominis, vix pilum

pilum viri boni habere videtur . Quod si Sua Sanctitas deinceps more suo delirate , ac brutis fulminibus sævire perget , peculiarem quendam modum videbit accipiendi lymphatos sacerdotes , liberum hominum genus , quod nullis omnino legibus parere novit . Et ejurata religione Lutherana Beckmannus spe sua omnino frustra est . Sane enim quemadmodum Pontificii nequaquam Theologis nostris ex animo favent , nisi qua horum aliqui communem barbariei causam juvant ; ita non temere Vigil frontem ac linguam Beckmanno locabit , qui nullum allegare meritum potest , quam quod ipse patronus defensione sua Gesenium gravet . Sed ad Beckmannum revertimur . De *atheismo* impudentissimum est mendacium . Ni tamen illa *communis sacerdotum accusatio* attenditur ; de qua paulo post videbimus . Si pietatem stoliditate meriti debemus , & illico Sesquiatheus est , qui Monachorum deliria in dubium vocat , nimirum Beckmannus magnum Ecclesiæ Christianæ fulcrum erit . Quod si ab atheismo parum absunt , qui quamvis religionem ejusdem valoris esse , ac pretii putant , tum vero certi homines meritissimo hic accusantur , quippe quæ nemo propendenti in syncretismum seculo majus scandalum , & plausibiliorem prætextum affert . Scilicet infirmi illi & in religione nostra non omnino inconcussi , si vident , quantis strophis ac cavillationibus unus alterve theologus viro optimo , & qui ejusdem cum ipso religionis est , crassissimos errores impactum eat , quantaque pertinacia , de injuria evidentissime convictus , malitiæ suæ progressum juvet , quid fieri hi dicent de illis , qui extra ecclesiam nostram sunt ? Num quisquam ipsis persuadere poterit , talem theologum in adversariorum scriptis bona fide versari , qui in Lutheranum palam injurius est ? Sane sunt non pauci , qui hac ipsa quorundam pertinacia moti , quidquid vulgo de sententiis adversariorum Theologi memorant , in dubium vocant ; quod nunquam horum similes defuerint , quædam etiam dogmata adeo delira videantur , ut impossibile sit , eadem a quoquam defensa fuisse . Quale monstrum hodie revera est *Indifferentismus moralis* , ingeniosissimum illud figmentum calumniatorum , quem demiror , si Logici inter entia rationis deinceps non referent , quæ nec sunt , nec esse possunt . Nam æque contrarium sibi ipsi sensum habet ,

*Indifferentismus moralis*, atque si dicas, homo irrationalis, vel asinus alatus. Quippe morale est bonum vel malum, id est, lege præceptum vel vetitum esse. Jam qui cohæreat, ut quod indifferens, id est, neque bonum neque malum est, sit simul morale, id est, vel bonum vel malum? Et pessime profecto de ingeniis hominum sentit, quisquis etiam sit, si credit, ulli mortalium persuaderi posse, viro tam erudito, rem usque adeo & palam absurdam somniare in mentem venisse. Quin jam ita clare ostendit Pufendorffius, se nihil aliud dixisse, quam motum physicum, materiale actionis humanæ, ad quod Deus, tanquam conservator Naturæ, concurrat, esse actum in se indifferentem, ut nemini dubium superesse possit. Nam quod Beckmannus ait: *Quære lubet, salva venia, domine vulpes, in quo foro jam versaris, num in civili vel physico?* asini vox est, nescio ex quo Æsopi apologo desumpta. Quasi qui monet, quod physicum in actione humana est, esse rem indifferentem, materiam moralem tractare non posset. Par priori mendacium est, Pufendorffium religionem pro freno tantum populi & fructuoso politicorum figmento habere. Quam absurdissimam calumniam toties a Beckmanno eructari posse, eo minus miramur, quod ipse eodem loco indistincte in omnes principes injurius est, dum ita docere Pufendorffium in gratiam principum ait; quos utique tali impietate delectari oportet. Usque adeo nebuloni nihil frontis ac pudoris restat. Nisi forte alia ratione orbi literato suam in Politicis peritiam ostendere nequibat, & quantum in lectione Machiavelli aut Platonis profecisset. Quemadmodum in nupero libello famoso, ut Historicum se probaret, Caligulam inter Christianorum persecutores retulit. Quanquam id nomen ea potius occasione Beckmanno excidisse videtur, quod tum forte fortuna laceras suas caligas consuebat, irata Junone sua, quam illo tempore exul præ miseria compressu lenire, vel ut Beckmanniana phrasi utar, *physice* examinare non poterat. Schwartzium interim initio istarum turbarum tragico Oreste dementiorem fuisse, satis confirmatur per id, quod Beckmannus de illius disputatione inaugurali, nobis pandit. Sed illud omnino falsum, quod ait; Pufendorffius in illo actu personatum se sistitis. Ita enim loquitur Idiota, cui ne prima quidem lit-

literarum elementa insunt. De *Monzambano* nihil hic addimus, qui multum supra Beckmanni captum est. *Hobbesii* autem principia Pufendorffium probare, qui hætenus collatis signis cum eodem bellum gerit? Verba *Mevii* verissima sunt, quibus Pufendorffius nihil contrarium docet. Sed nimirum illa huc transcribenda erant, ut vel inde colligeremus, Beckmannum & Indicis Novitatum, & alterius libelli famosi auctorem esse; quippe quæ illic etiam non sine legentium risu recitat, *Concionibus sacris* Pufendorffius revera nunquam *sub specie Christiani* interest; sat frequenter autem ut verum Christianum decet. Illud quoque glossema peringeniosum est: *Quis me prohibebit*, inquit Pufendorffius: *tantisper in alio templo concionem audire?* Addit Asinus: *per ens scilicet rationis.* Domino M. Ernesto ita deinceps noster Beckmannus: *Alter sacerdos, qui est M. Johannes Ernestus aque vehemens erat in atheismo publice e suggestu reprehendendo; sed eum perstringere non audet, ne sic ipse ex communi sacerdotum accusatione innuat ac prodat atheismum suum.* Ergo qui atheismum publice perstringere audent, ex communi sacerdotum accusatione innuunt ac produnt atheismum suum. Et sic cordatissimi e nostratibus Theologi Spizelius & Weberus atheum non mediocriter redolent. *Sacerdotes*, non omnes quidem, sed tamen non paucos regis suis incredibilem regere nequitiam etiam Lutherus confirmat. Qui & illud præterea addit, sibi videri ex nullo hominum genere plures in tartara detruum iri, quam ex sacerdotibus. Quibus magnopere exosos fieri qui illorum vitia taxant, citra flumen illud eloquentiæ Beckmannianæ facile credimus. *Polygamia* nulpam a Pufendorffio defensa est. Obscena autem illa cognemina neminem nisi Beckmannum auctorem habere possunt; quem illud, opinor, ad vivum pungit, quod virtutes *Asinii Tenebrionis* & *Alastoris* vocabulo tam plene tamque concinne notatas videt. Quibus appellationibus non amplius cohonestabitur, quam primum reperta nobis vocabula erunt, quæ significantius nebulonem omni modo deterrimum juxta & stolidissimum expriment. Sed *Scherzerum* quidem Pufendorffius haud quicquam *Dictatorem Lipsiensem* facit: quin potius negat, cum Lipsiæ usque adeo Dictatorem agere, ut ceteri in ipsius

ipſius gratiam proſtituere ſe velint. Quo alio etiam, quam *Pontificis* nomine veniat ſacerdos, qui, ut *Vigil Garlebiensis*, univerſæ Eccleſiæ curam ſibi vindicat, & tam curioſe, quid in aliena republica geratur, exquirat; adſcito inter purpuratos ſuos *Alinio Tenebrione*, Sedis *Garlææ* per Germaniam legato a latere. *Velthemius* interim omnino Beckmanni ſectarius eſt. Et ſane ni inter genios illuſtris hujus nonnihil arcanæ cognationis intercedit, in amborum tamen geneſi mire ſidera conſenſiſſe oportet, ut *Velthemius Beckmanni* cauſa malum ſibi accerſat. Neque enim prior laceſſitus a *Pufendorſio* eſt: qui adeo ſtridore non delectatur, ut crabrones citius irriter, quam cicadam, quod Græci dicunt, ala corripiat: Ceterum dum *maculam* eſſe fatetur Beckmannus, ſi quem ejus ſectatorem dicas, nimirum nebulonem ſe agnoſcit, qui ſectatoribus ſuis ad nequitiam præeat. Nam alioquin viri boni ſectatorem vocari, macula non eſt. Attexit quoque Beckmannus par hitoriarum, quæ ſimiles ſunt illi, quam in poſteriori libellò famoſo magna legentium miſeratione referebat, de pugna duorum Studioſorum prope *Erfurtum*, & revera, ut ipſe loquitur, *omnem humanam rationem ſuperantes*. Ubi miramur, nebulonem non animadvertere, dum omnium, quæ nominari poſſunt, criminum *Pufendorſium* inſimulat, & ſingula fabulis nuſquam ailibus probatum it, ſe mendaciis ſuis, quod alioquin habere poterant, pondus detrudere, ut nihil omnino hæreat. Et eadem impudentia dicere licebat Beckmanno, *Pufendorſium* patrem aut matrem occidiſſe. Quam illud vero præter decorum, quod rei tam atrocis cauſas nullas, aut nullam prorsus ſpeciem habentes affert; Equidem de *Caffelio* illo nemo mortalium unquam verbum audi- vit. Sed quantum ad periculum *ancilla*, abſque dubio ita ſecum cogitavit Beckmannus: Si ego ab uxore mea propter acum amiſſam vapulo, non abſurdum erit menti- riri, *Pufendorſium ancillam ſuam ob fractam in culina ollam cultro occidere voluiſſe*. Fabula non paulo lepi- dior, quam *Aulularia Plautina*. De *Apologia Pufendorſii* ſane credimus, ſi qui ſycophantæ eandem cum men- tis ſtupore & conſcientia laſione perlegerunt, quemad- modum Beckmannus, eos non nimium gaviſos fuiſſe. Prudenter tamen illi, qui *emptam Ulcano obtulerunt*, ne  
in

*in liberorum manus incideret* ; eoque nepotes avorum suorum stultitiam ridere possent . Et si quod illic nigri salis adpersum est , ad solum Beckmannum ejusque præcentorem Schwartzium & clientem Gelenium pertinet . Nam tunc quidem *magna illa & excellentia ingenia* nondum observationes suas in vulgus sparserant . Frigidæ adhortationes Beckmanni Sacram Regiam Majestatem Daniæ non facile permotam dabunt , ut civem suum propter amicitiam cum Pusendorfio velut perduellem tractet ; in quam injurius est nebulo , dum eandem Reges Principesque conviciis insectanti sibi ullo modo auxilio futuram credit . Adsimilat se ad extremum *generosa aquila* Beckmannus ; quam non quidem bicipitem ; sed longipedem sectatores Asinii Tenebrionis brevi inter insignia sua recipient ; & denique tragoediæ catastrophæ imponit , lepidam profecto , & qualem omnino a Beckmanno confingi decebat . Ubi dum facetiis lascivire cœpit , nondum fortasse vini poculum hauserat : adeo frigent illi joci , quos ipse tamen sine dubio falsissimos , & mire præterea acutos credit . Sed nimirum , si literam amplius a Beckmanno videbimus , ejus sane martyrium æri insculpetur , quantumcunque sumtum impendere oporteat . Hoc minus autem artificis manus aberrabit , quod Beckmannus suam ipse imaginem orbi exhibuit , & facile cogitari potest , quis sit status , gladium tenere hunc asinum tantum . Repræsentabitur enim congressus cum lanista , & sacrificium Beckmanni , ubi nigram illam victimam absque sale & thure masculo Diis inferis per carnificem obtulit . De Pusendorfio interim non est periculum , ne Beckmannus ab eodem aliquod responsum ferat ; cui non vacat , hominis perjuri atque instabilis absurdæ fatuitatis mendacia discutere . Sed illi amici Pusendorffii per *Germaniam* , quod toties *scabiosos* vocat morticinus , cui anima fœtet , ita Beckmanno caput scabent , ut non facile similem tractationem amplius desideraturus sit . Et quia carminibus tantopere delectatur Beckmannus , scito , esse in Germania juvenem festivissimi ingenii , quem non pigebit , cothurnum sibi aptare , ut versu Heroico stultitiam & prælia Beckmanni canat ; exemplo Homeri , cui mores etiam ac rancæ hoc genere carminis celebratæ sunt . En initium illius novæ Iliados ;

Arma

*Arma virumquecano, Svecis qui pauper ab oris,  
Carnificem fugiens, & justam Regis ob iram  
Teutonium venit; multum vexatus in aula  
Virginibus, quandoque jocos uxore juvante.  
Musa mihi causas memora, quo turbine mentis,  
Quidque dolent Garlaa captum jam mulgeat, aut  
quid.  
Illius ad cantum juvenem clamare cicadam  
Impulerit. Tantosne fovet Germanica stultos?*

UTQUE uxor etiam Beckmanni maritum suum recitatione carminum de vesania monere possit, qua super alioquin in Senatulo frequentissime quæritur, alius iterum versibus Teutonicis stultitiæ Beckmannianæ encomium ludet: adjectis sub finem & literis reversalibus telonæ datis, & comminatione illa Beckmanni, se *Pufendorfium* mediate & immediate aggressurum, etiam cum dispendio salutis æternæ, prout in protocollo Consistorii legitur; de qua nunc quidem mendax confiteri non vult. Simul & ex archivo Academiæ describi curabimus, quæ olim inter ipsum & Venerabilem Virum *Dominum D. Bernhardum Oelreich*, *Superintendentem Bremensem*, tum Academiæ Carolinæ Procancellarium gesta sunt: cui itidem, orta ex levissimis causis rixa furti crimen objiciebat nebulo; ne quis Beckmannum hac saltem in controversia furere putet. Quæ omnia ex actis & documentis publicis desumpta, & quorum singula jurejurando bonorum virorum, si opus sit, confirmari possunt, plus utique fidei invenient, quam universus mendaciorum apparatus Beckmanni, quem retulisse est refutasse. De cetero utut nullam pro malitia sua *premiu*m expectet Beckmannus, sed *gratis* etiam furere velit, quam primum tamen per hos bellorum tumultus licebit, inveniet profecto viam aliquam & modum Sacra Regia Majestas Sveciæ, gravioribus jam curis distracta, animadvertendi in nebulonem e carcere profugum, qui pro insigni clementia gratiaque tam foedis in Eandem conviciis ludit. Saltem Regia Majestas Galliæ, atrocissime & ipsa attracta, non facile a sua Eminentia Cardinali Badensi repulsam feret; cujus non minus quam aliorum per Europam Principum interest, mutuo Beckmannos non foveri, qui scriptis publicis omni ludibrio-

briorum genere refertis in Regum Principumque capita deserviant. Qui idem Rex Christianissimus a Sacra Regia Majestate Sveciæ de Beckmanni sceleribus certior, Academiæ illi, abs qua Beckmanno Doctoris titulus collatus est, non frustra mandabit, ut adempto Doctoris elogio Beckmannum publico programme infamem renuncient; & nomen ipsius carnifex Aurelianensis frequenti hominum concursu solemnissime in patibulum efferat. Sed jam horas aliquot perdidimus in nugis Beckmanni, quæ id tamen peculiare habent, quod æqualem ad fletum & ad risum efficaciam obtineant. Qui si deliramentis suis denuo in publicum provolabit, quanquam nihil frontis ac pudoris homini superest, acuemus tamen stylum, quæque hic tacuimus humanitate quadam, & quia scelus omnino ad suspendium adigere religio erat, non una scriptione deinceps effabimur, quousque publica Nemesis de cadavere hoc supplicium sumet.

Tu interim, Optime PUFENDORFI, ut aliarum vellicationum & hujus potissimum injuriæ sensum fallas, animi tui magnitudine efficitur. Quæ vel ideo concidere nequit, quod ingens Tibi solatium recte factorum memoria præstat, & eodem fato usos esse nosti, quos itidem de studiis in lucem adferentis cogitatio exercuit. Noster vero hic dolor, quod cum seculum plura tibi & majora debere posset, viles animæ & sordida quædam ingenia meditationes tuas morantur; quæ aliqua sui parte literis proditiæ pridem nos in admirationem rarissimæ eruditionis tuæ rapiunt. E quibus, quicquid malevolorum ignaviam urit, mansurum est in animis hominum, & virtus tua invidiam supergressa olim inter exempla erit; ut quæ decus & perennem ex seipsa gloriam habet.



---

JOHANNIS ROLLETI,  
PALATINI,  
SCARENSCHMIDUS  
VAPULANS.

IN

MONSTRUM LIBELLI  
CAROLI SCARSCHMIDI,  
JURIUM STUDIOSI VETERANI,

EPIGRAMMA.

**J**UPITER indomitos ut vidit quærare prolem  
Centaurus, homines, horreo, quadrupedes.  
Resistit, & nutu totum tremefecit Olympum,  
Divisosque mares fulmine membra dedit.  
Juno vicem miserata rogat, num perdere vellet,  
Quæ se cunque suo sanguine multiplicent?  
Ille negat, pariterque Dea, postquam ira quievit,  
Insusus gremio talia dicta refert:  
Nulla mihi terram monstris opplere libido est,  
Nulla giganteo scommata ab ore pati.  
Nec ego semihominem Cacus generasse probabam,  
Cujus erat monstri Mulciber ipse pater.  
Qui quoties Siculos jubet efformare cyclopes,  
Aut majora Jovi tela trisulca facit;  
Monstra etiam quoties iterato effingere tentat,  
Frustra equidem Superis sic placuisse cupit.  
Nam si terrigenas monstris terrere necesse est,  
Aut si Cælicola cernere monstra velint:  
Luridus effosso jam pridem lumine cyclops  
Sat mihi Scarschmidus cadere monstra potest.

H. a M.

EQUES LIVONUS.

JOHAN.

# JOHANNIS ROLLETI SCARENSCHMIDUS VAPULANS.

**Q**UOTIES ingenia nostri temporis cum veterum torpore, & diffusa olim per Europam barbarie comparamus, illud se nobis offert admiratione dignissimum, quod qui post reductam bonarum literarum lucem in antiquam barbariem relabuntur, multo, quam illi simplicius, & majori fere cum stultitia ineptiant. Nam uti superioribus seculis cultus politiorum literarum tantum non penitus ignorabatur, ita ab illis, qui sua sibi barbarie placebant, ea tum persuasio aberat, qua horum temporum nugatores cum maxime impelli arbitramur, ut nobis lascivorum asinorum coram orbe literato spectaculum exhibeant. Quibus merita, eruditio, dignitas, adeo non attenduntur, ut vel impri-  
mis calcibus petere, & morsibus proscindere instituunt, quorum virtutes seculo in exemplum patent; præsertim quando ipsi alia ratione inclarescere non possunt, & facinora sua, foeda licet, a quibusdam utroque pollice laudari sciunt. Et tale animal jam (ne longe abeamus) in Academia Lipsiensi publicis opinor sumptibus alitur, non tam ut peregrinantibus inter alia ejus urbis cimelia & admiranda ostendatur, quam ut prodigiosæ cujusdam stultitiæ semina spargat, ne forte juvenus ultra Magistrorum aliquot dictata quid sapere incipiat. De *Scarenschmido* nobis sermo est, novo illo sidere inter cyclopes & fabros sandapilarum. Qui solidissimus asinus diducto in immensum rictu primum tamen rudere duntaxat cœpit adversus Virum incomparabilem, Patronum nostrum: postquam autem leviter id propter vapulasset, nuper omnino dentibus sibi agendum ratus est, edita miserabili *Defensione Disquisitionis* suæ, in qua ne beluini quidem sensus vestigium conspicitur. Nunquam adeo foedis, adeoque pudendis utimur exemplis, ut non  
pejo-

pejora supersint. Sane Ipsi Beckmanno stoliditatis pal-  
mam ambiguum fecit, quem tamen omnium, qui un-  
quam existerent, sycophantarum impudentiam supergres-  
sum fuisse, non citra causam credebamus. Cujus vesania  
quemadmodum nuper castigavimus, ita nunc hu-  
jus quoque deliria excutere animus est: ut stultissimo  
adolescenti vanam scientiæ persuasionem de pulmonibus  
depellamus, simulque ostensum demus, quale portentum  
hoc cyclope Germania foveat. Quamquam ut Scaren-  
schmidus meliorem deinceps mentem sumat, sperare non  
licet, quod pridem ipsi nihil mentis aut animi fuisse  
constat, & belluas in homines transformare ne Dii qui-  
dem videntur posse; saltem talis metamorphoseos exem-  
plum in perpetuo Ovidii carmine non legitur. Sufficiet  
interim nobis effecisse, ut Vir Illustris SAMUEL PÖ-  
FENDORFIUS, quantumcunque id dedecus naturæ Scaren-  
schmidus insaniat, studiis suis libere vacare queat, ne-  
que in nugis convellendis bonas horas perdere cogatur,  
erudito qui orbi alia ratione prodesse cupit. Præsertim  
cum & Regia Majestas Sueciæ Viri cogitationes ab his  
controversiis avocasse videatur. Quæ non ita pridem,  
morte abrepto Loecenio, Consilarii Ipsum & Historio-  
graphi sui munere dignata est. Quam operam aggressus  
magnam inde spem concipimus, non omaino frustra fo-  
re conatus nostros, quod plerique Lipsiensium, & cor-  
datiores quidem omnes, jam antea Scarenschmido pri-  
mum inter stultos locum attribuunt; ut qui exemplo  
Phanaticorum hominum tota die lectulo adfixus nescio  
quas inspirationes capteret, & postquam recitatione tri-  
stium nugarum non sine screatu universo orbi per horu-  
lam leges dictaverit, affectato gressu Hispanico ad cæ-  
naculum moveat. Sicut & illud de feroculo hoc referri  
solet, cum Generosissimi Baronis, cui præfectus fuerat,  
studia moderari non potuisset, eoque Witteberga Lipsiam,  
comitante gloria rei bene gestæ, reverteretur, prælectione  
Institutionum juris victum quæsiturus, Ipsum illico  
commensalibus suis de προαδρίαις jure litem movisse; imo  
clarissimum hospitem suum, in hanc conditionem adi-  
gere voluisse, ne quem priorem præ se locum occupare  
pateretur. Ut actum pene agere videri possimus, quod  
vanitatem adolescentis depingere animum induxerimus,  
quem illi ipsi, quorum gratia potissimum id fieri par  
est,

est, pridem in Cæritum tabulas retulerunt.

CETERUM priusquam ad castigandam cyclopis nostri stultitiam accingamur, operæ pretium fuerit thesin præmississe, quam Scarsenschmidus inficeta sua dissertatione impugnandam sibi sumpsit, ut Lectores, quid revera in controversia sit, eo liquidius perspicere queant. Præsupponimus igitur, & ex se ipso satis manifestum arbitramur esse, si quidem in civitate summum Imperium ita reperiatur unitum, ut illud indivisum & inconvulsam ab una voluntate (hominis aut concilii) per omnes civitatis partes, atque negotia se dispenset, rempublicam emergere, cui ad formalem suam perfectionem nihil desit. Qualem Rempublicam regularem vocare placuit, non modo, quia id vocabuli alioquin perfectioribus applicari suevit, sed & quia tales potissimum Respublicas Aristoteles nobis descripsit, præcipuus sane inter eos, quorum circa Doctrinam Civilem, Architectonicam putata, & quæ indolem rerumpublicarum in genere contemplantur, tradita ex antiquitate nobis superant. Receptum enim est, ut, quæ cum artificum Regulis & delineationibus conveniunt, aut juxta communiores, notumque jam modulum efformantur, Regularia audiant: sicut contra irregulare nuncupatur, in genere, quicquid præter solitum sit, aut contingit; imprimis vero quod artificum ideas, & designatos semel ab iisdem limites egreditur. Sic irregulare vocamus, verbi gratia, si aliquando solita nobis hora non prandemus; si tabellarius justo tardius, citiusve adveniat; si actus non legitimus die nefasto expediatur; & ita in ceteris. Sic irregulare pronuntiabit Vulcanus, quod cum reliqui Cyclopes præcipue matutino tempore tenaci forcipe massam versent, Scarsenschmidus non nisi multa die, & quinta cum lineæ tangitur umbra mollioribus e stratis opera ad fabrilis surgat. Et cui ignotæ sunt munitiones irregulares, quibus sane præstantissimas per Europam Mathematici annumerant. Ceterum quemadmodum fieri potest, ut quod irregulare est, idem quoque vitiosum sit; nempe si per structuram, aut insolitam dispositionem partium res finem, cui destinatur, omnino assequi nequeat: ita irregularitas semper, ac per se vitium aut labem non infert: cum naturalium quidem rerum formæ necessario bonæ sint, quæ vero hominibus irregularia producuntur,

*Pufend. Eris Scand. T.IX.*

**Q**

eti

etsi respectu habitudinis ad eundem finem magnopere inter se variant, communem tamen illum finem pari saepe felicitate consequantur. Aliunde enim, quod per formam fieri nequibat, pensari potest. Eoque irregulare & vitiosum nequaquam nobis Synonyma sunt, multo minus id vocabuli inter convitia referimus, qualia dicacitati Scarenschmidianæ, vel potius laboranti ejusdem ex furore animo affectantur. Quanquam disceptatione de formarum præstantia exorta, si cetera omnia sint paria, secundum regulares formas litem dari oportere indubium est. Quibus præsuppositis in proclivi fuerit concepisse Rempublicam irregularem; quæ scilicet unionem illa, ad robur & essentiam civitatis regulariter necessaria deficitur; idque non per modum morbi in administratione Reipublicæ hærentis, sed ut publica lege vel consuetudine ea facies tanquam legitima sit recepta. Quale Corpus Germaniam constituere nostro quidem iudicio solidissime ostensum dedit *Severinus de Monzambano*; cujus admirandæ eruditionis libellum hætenus impugnandum sumpsere non viri docti, & quorum lucubrationibus apud externos etiam aliquod pretium ponitur, sed illa seculi incommoda Publicistæ, quos nobis rabularum per Imperium examina pariunt. Et sane ne nunc illa heic argumenta repetamus, quibus ipse rem ita evicit, ita exposuit, ut nemini cordato dubium superesse possit, vel sola Principum Germaniæ libertas, qua hoc etiam bello quidam ex ipsis non timide usi sunt, ostendere poterat, utrarum in censu eadem Respublica sit reponenda. Neque enim si regularis Respublica est, (in qua omnia ab una voluntate gubernari regique jam diximus) fieri potest, ut dum alii bellum ad se pertinere contendunt, reliqua ejusdem reipublicæ membra operam & auxilium suum ipsi etiam reipublicæ capiti jure denegent. Sicut illa sententia non rationibus modo, sed & ipso rerum actu omnibus, qui extra partes remoti sunt, jam pridem probetur. Licebat tamen Scarschmido quantiscunque clamoribus eandem incessere, & illo stupore, illaque mentis coecitate æternum laborare, modo Pusendorfiurn tam proterve non vellicasset. Cui quominus criminationes Scarenschmidi a se amoliretur, nullo Jure, nulloque privilegio prohibebatur, per quod cyclopi nostro viris eruditis, & quorum in publicum me-

rita extant, impune, tanta cum acerbitate insultare licet. Præsertim cum quæ in Severino Pufendorfius exercitii causa, & potius ut Rempublicam irregularem in genere delinearet, quam ut tradita Monzambani super Imperii Germanici forma defenderet, asseruit, adeo non obscura, aut tenebris involuta sint, ut & ipse Scarschmidus in lepida illa *Dissertatione de Republica monstrofa* fateri cogatur, Imperium Germanicum recte dici posse *irregularem Monarchiam*. Quod si Imperium, faterente Scarsenschmido, irregularis Monarchia est, sine dubio, idem quoque Respublica irregularis erit. Nisi forte non amplius inferre licet: si Lipsiæ reperiuntur Doctorandi, necesse est, ibidem reperiri homines. Sed nimirum ne hac consequentia admissa nihil amplius controversiæ superesset, vel potius ut noster Cyclops monstrofæ suæ Dialecticæ emblemata aliquod promulgaret, eam illationem ita limitari vult: Irregularis Monarchia est; Ergo & irregularis Respublica scilicet *sub concepta specie Monarchiæ*. Quod perinde est, ac si dicerem, Scarsenschmidus homo est; ergo & animal sub concepta specie hominis. Ne forte quis putet, ipsum animal esse sub concepta specie asini aut bovis. Qualem cogitationem non posse non eruditorum animis obversari, facile agnoscet, qui monstra illa Scarsenschmidiana, quæ ipse tamen non citra gravissimos dolores, & postquam totis decem annis uterum gesserat, enixus est, eminus duntaxat conspexerit. Imo contra si datur monarchia irregularis, & Aristocratia irregularis, & Democratia irregularis, nemo mortalium tam stupidus erit, quin agnoscat, etiam dari Rempublicam irregularem. Id quod probasse Pufendorffio satis est; quippe qui non tam formam Imperii Germanici definire, quam Reipublicæ irregularis naturam in universum scrutari constituerat.

EXCUTIAMUS jam paulo pressius, quæ pro defendenda stoliditate sua Noster asserit; ut adpareat, quanta hellebori caritas instet, si Scarsenschmidus laboranti e stultitia capiti medicinam facere incipiat. Ac proloquium quidem, quod ea prorsus Majestate orditur, qua Parasitus Gnatho apud Comicum elementa artis suæ tradit, nihil ad Pufendorffium. Neque enim quod Idiotæ, qui adscito Polyhistoris vocabulo superbiunt, quandoque extra oleas vagantur, ideo aut Imperium irregularis Re-

publica non est, aut Scarschmidus deinceps primum  
 inter Politicos locum sortietur. Quanquam alioquin  
 ipsum columnam esse non diffitemur *gigantei sui orbis*  
*literati*, in quo, prædominante paulatim tyrannide sa-  
 cerdotum, Affectare ferunt regnum cœleste Sophistas,  
 Altaque congestos struxisse ad sidera pontes, quos vo-  
 cant, asinorum, aut tabellas Metaphysicas, ut quæ cra-  
 ticularis & harpagonibus suis scalæ cuiusdam Jacobæ vi-  
 cem commodissime subire possunt. Neque quod non  
 omnes eruditi Sacrosanctum Corpus Juris pari reveren-  
 tia æstimarunt, aut quod *Angelus Politianus* (quem li-  
 quet mihi dejerare, ne inspectum quidem esse Scaren-  
 schmido) quid revera olim fuerit *suus heres* ignorare  
 se fassus est, ideo Imperatoribus leges fundamentales,  
 quæque peculiariter a singulis in Capitulatione, quam  
 vocant, promissa sunt, negligere licuit; per quæ status  
 Germaniæ multum supra conditionem subditorum, pro-  
 prie dictorum, constitui, cœcus sit, qui non videat.  
 Quibus tamen cum adhuc aliquid ad summum Impe-  
 rium desit, neque obligatio, qua Cæsari, tanquam ca-  
 piti obstringuntur, ex fœdere aliquo expresso originem  
 trahat; etsi illa non plus fere virium habet, quam vin-  
 culum pacti inter fœderatos inæquales: id propter Impe-  
 rium recte dici Republicam irregularem arbitramur,  
 quicquid de *Polyhistore* Scarschmido, aut *antiquo Pa-  
 trum Romanorum urinario* fiat; e quo delibato chrisma-  
 te in vicem opobalsami principio statim lectorum suorum  
 nares ungit scurra. Neque vero ideo Germania *campus* vo-  
 cari non potest, cui quisque *Scholasticus papiliones cerebri*  
*sui immittat*; quæ Grobschmidii nostri sententia est.  
 Nam & in civitatibus, quæ regularem formam manife-  
 ste præ se ferunt, non minus quam in irregularibus Re-  
 buspublicis sæpe omnia stultorum plena sunt; & ipsi  
 nos, implicata his bellis Germania chimæras, ac nescio  
 quos cerebri papiliones, (velut animas Platonicorum  
 per inane volitantes,) magno numero, in Imperio va-  
 gari & errare conspeximus, agmen ducente progenie  
 Scarschmidiana, terribili illa, & quæ conspecta Tur-  
 cas de Hungaria abdicanda consilia captasse dicunt,  
*Mars Germania perpetuus*. Quorum infinitam multitu-  
 dinem densam in æthere nubem referre, quæ Germaniæ  
 lucem suam non minima ex parte eripiat, jam pridem  
 apud

apud cordatos in confesso est. Sic quod ad abstrusissimam illam quæstionem de *Austregis* non nemo auditorum Scarschmidi *barbam & nasum instar galli gallinacei demiserit*, putaveritque præceptorem suum loqui de *ostreis*; quod instante merenda, circa quam Scarschmidus fere e plumis prospicere, sensimque ad profitendum accingi solet, animum in patinis haberet; & alioquin Ostrea calleret primo deprehendere morsu; id quidem arguit, miræ simplicitatis adolescentes esse, qui Scarschmido se in disciplinam tradunt. Sed num Austregæ eam in Status potestatem Cæsari largiuntur, quæ alibi locorum Regi in subditos adest? Aut num Principum libertati per id derogatur, quod ipsi inter se controversias suas componere possunt? Num denique nexus ille feudalís, quo Status Cæsari & Imperio obstringuntur, ideo plus virium habet, quam vinculum pacti inter fœderatos inæquales? Atqui contra, si maxime Cæsar citra discrimen causarum ubique primus ac necessarius Imperio Juxta esset, cui per ipsas tamen Austregas potestas judiciaria ita illimitate non competit, id solum quidem regularem Rempublicam haudquidquam argueret. Neque enim, ut Grobschmido persuasum est, qui necessario hunc, & non alium controversiarum suarum Judicem habent, cui tamen, reliquas Majestatis partes in eosdem exercere non liceat, illico in subditorum proprie dictorum classem compingentur, aut ea infallibilis *nota est discernendi imperii a sociali systemate*. Cum etiam inter fœderatos, præsertim inæquales, necessarium Judicem vi pactorum conventorum dari nihil repugnet, & ejus rei hodie adhuc exempla extent. Sane Grœcingæ, extorta non ita pridem cum Omlandis controversia, Delegati reliquarum Provinciarum Belgicarum necessario judices erant, neque coram arbitris ea causa disceptari poterat, ad quos tamen eandem deferri altera pars magnopere videbatur velle. Sic ut comparatione cum Provinciis Fœderati Belgii facta, quibus singulis Majestas propterea non deest, hætenus Statuum Germaniæ libertas, quam illarum, fere major sit habenda: utcumque vulgus Belgii libertatem suam non sine contemptu Germaniæ jactet. Denique nec *Camera Spirensis*, nec *Judicium Aulicum* impediunt, quo minus Ordines Germaniæ potestate ac Juribus suis frui queant; quæ cum con-



ditione subditorum proprie dictorum consistere posse, nemo temere affirmaverit, qui genuinæ politicæ modicam duntaxat notitiam habet. Nam multum falleris, Grobſchmidi, qui putas, dijudicandæ Imperii formæ satis esse, *Jus civile*, *Feudorum Consuetudines*, *Sanctionem Carolinam*, & *Recessus Imperii nosse*; sed ad regulas disciplinarum Universalium sententias suas exigere debent, qui de forma Reipublicæ judicium ferre instituant. Et vel hoc nomine paulo magis reverentem adversus *Magistros* esse, quos subinde vellicas, & coram quibus Lipsiæ nudato capite, si quid controversiæ tibi cum civibus sit, sententiam audire cogeris, te decuisset; ut quorum aliqui te stolidissimum animal, modo id pridem non reculasſes, e bestia iterum in hominem refingere poterant.

Quæ cum ita sint, nihil aliud superesse videbatur, quam ut Scarsenschmido æternum valediceremus, ni convicia, scommata & sycophantiæ hominis prolixius animadverti mererentur. Quorum absurditatem si qui mirari incipient, illi cogitare velint, in patria Scarsenschmidi *nares & nates cavillari*. Nam id nobis emblemata promulgat miser, ac vere deplorandus Idiotæ, cujus agrestes pariter & scurriles joci, quos adſectat, tantum abest, ut cuiquam risum movere possint, ut potius ex animo lachrymentur, qui agnoscunt, quam seculo infamiam Scarsenschmidus, & reliqua id genus carcinomata impegerint. Neque vero illud hic magnopere attendimus, quod noster Grobſchmidus velut summi acuminis convicium præmittit; *in novellis Academiis Cathedra adhiberi*. Quem enim fugit, in novellas Academias evocatos hætenus non fuisse Magistros nostros, quos fama obscura recondit, aut qui non nisi suis Ortwinis Gratiis noti sunt, sed clarissima quæque ingenia, & primariæ eruditionis viros, quorum vel sola præsentia celebritatem loco adferre potest. Et frustra est Scarsenschmidus, si metuit, ne erecta alicubi nova Academia ipse cum *cerebri sui papilionibus* primus cathedræ politicæ admoveatur. Et si plerisque nondum liquet, quid doctrinæ aut dexteritati docentis conferat, Academiam, in qua vivit, veterem vel recentem esse. Si tamen antiquitas Scholarum omnino ad augendam eruditionem facit, tum quidem suaserim *Valentino Velschemio*, ut cum dis-

disertationes, quas evomit, & Epistolæ obscurorum virorum alioquin magnam inter se convenientiam habeant, hauriendæ velut ex ipso fonte toti barbariei; simulque ne tantum temporis sophisticationibus utcumque addiscendi impartiat, Coloniam quantocyus proficiscatur, & collectum ibi in operibus Doctoris Angelici, & MSCris Ortwinii Gratii plane sacrosanctum pulverem solita humilitate osculetur. Qua antiquitatis vi admissa profecto non mediocriter sapuit Scarschmidus, qui relicta Academia Salana in Lipsiensem sese contulerit, quæ & illa antiquior est, & in qua olim vixit *M. Irus Perlirus*, cujus stultitiam ipse haud dubie jam imitatur. Nam Jenæ quidem bonus noster Grobschmidus sexennio, quo ibi dormivit, modicum in literis profecerat, quicquid interim de *Disputatione sua Inaugurali & summis in Jure honoribus oblati* jactat. Quæ tamen una cum ceteris ineptiis & vanitatibus ne quis in malam partem accipiat, prudenter addit: *intentato ictui, quæ scribo, imputentur*: Quasi non posset non injuriam a Pusendorfio animadvertere, eoque necellum fuerit horribilem & sacrum hunc libellum in vulgus spargi. Ast mi Scarschmidi, si utique tua tibi ignorantia placebas, licebat tibi quantumcunque in conspectu orbis literati nugari, modo Pusendorfium hostem non delegisses, virum, ad quem collatus tu nihil es. Qui dam tuas a se criminationes amoliebatur, quid aliud scribere debebat, quam quod ipsa dabat res. Neque vero aliquid ab ipso contra te dictum est, quo Majestas tua lædi potuerit; quin imo infinita propemodum non tui, sed aliorum causa reticuit. Et vide, ego non vereor illud de te scribere, qui per *duodecim continuos annos* in Academiis delituit, nec meliores, quam tu, in literis profectus fecit, eum ne porcorum quidem pabulo dignum esse. Nisi forte insuliam dicacitatem ipse in te admiraris, qua omnes in trivio scurras vincis. Equidem salibus, jocisque literatis orationem condiri tantum abest, ut improbemus, ut contra arbitremur, acrimoniam dictionis in loco adhibitam magnam rebus vim *ἀπὸ τοῦ* addere. Sed quale istud est acetum, quo tu, insulissime asine, meritissimum & incomparabilem hunc virum perfudisti? Aut Velthemiana tibi facinora probantur? Qui impurissimus homo decerptos e libello famoso flosculos fœtidissimos,

& quales ne rixanti quidem vetulæ exciderent, imo quibus prolatis ipsum Satanam pudere videbatur posse, Commentario suo ad Grotium plusquam barbaro intexuit. (Part. I. pag. 215.) Qui uti nuper stultitiæ præmium pro parte tulit, ita, si nondum acquiescet, a nobis etiam, ut meritus est, deinceps castigabitur, compilatis ex operibus Tenebrionitarum *Epistolis obscurorum virorum seculi XVII.* editoque dramate VELTHEMIUS *Heautontimorumenos*, quod fratri ipsius, chorago histrionum Hamburgensium, tibiis dextris & sinistris, per theatra Germaniæ agendum commendare sedet. Etsi latibula jam circumspiciat, suisque facinoribus paulatim erubescere videatur velle infelix puer, atque impar congresus Achilli. Sic quam turpiter te dedisti, Scarsenschmidi, cum tua insipida detorsione nominis Pusendorfiorum! Quæ locum habere non potest, quamdiu eruditi eum faece Italiæ Conia pro ciconia, aut cum rustico Plautino Rhabo pro arrhabo dicere volunt. Et tamen haud dubie eo invento leporum disertus & facietiarum tibi videris, cum nemo mortalium invita Minerva & Musis collacrymantibus te magis unquam sit jocatus, aut frigidiora ineptiis suis scommata miscuerit. Sic cur non prævidebas, cum politiem stili tui *Lipso, Tacito, Plinioque* comparares; risurum fore, quicquid Lipsiæ est, cachinnorum, & illud tibi ingestum iri: O *imitatores, stultum pecus!* Nam eadem illa Venus, quæ in Javelli labris olim sessitavit, tuum Diis adamatum os irrigasse videtur, nec meliores, quam Ortwinus Gratius stoliculos subinde spiras. Qualis est, dum scribis; *te regularum Mysteria non palpasse*. Quid enim ista locutione tibi vis? An Philosophiam tam arguto axiomate traducis; cui suum apud prudentes pretium fuit, priusquam rabulæ per Germaniam dominarentur, & tu ferulam, natibus male habitis, revereri didicisses. Credo te existimare, mundum etiamnum esse tam stupidum, ut Jcti vocabulo audito omnem omnino eruditionem animo concipiat, simulque, qua potest, veneratione prosequatur, qui cum HABERKORNIO *Gorlicensi* Politicam suam ex *Tractatu OTTONIS TABORIS de Jure Cerevisario* hausere, & novos hoc tempore Bartolos Baldosque parturiunt. Olim isti fuit generi quæstus apud seculum prius. Nunc qui neglectis politioribus literis, rudes historiarum,

nul-

nullaque solidæ Philosophiæ scientia instructi, velut noster Scarsenschmidus, Politicas commentationes enituntur, illi sane quantocyus Anticyras navigent, ni eruditius asini audire malint. Præsertim si pulmonem ventis rumpant, & fatorum ludibrio publice docendi ac nugandi potestatem nacti, viros doctos sædis mendaciis, aut jejunis sophisticationibus provocant. Hos irasci, si digna fastis suis elogia audiant, quod tu facis, dic, quæso, bono fide, an Sapientis putas, Scarsenschmidi? Sane ni gloriatio tua vana est, evolvisi utique *auctores Romanos*, & quidem pluries, quam nos, qui tuam eruditionem non attingimus miseri. Ergo & illud meministi, quod Phædrus exemplo cicadæ ostendit. Illa cum nescio cui avi acerbum sæpe convicium faceret, rogata ut taceret, multo validius clamare cœpit; & rursus admota præce accensa est magis; donec leto admota, quod viva negarat, tandem mortua tribuere coacta est. Nemini, præterquam sibi ipsi, irascatur, qui dignum scelere præmium aufert; & humanitati qui se non accommodat, sibi habeat, si pœnas superbiæ suæ det. Reputabis hunc tecum apologum paulisper Scarsenschmidi; quem si prius attendisses, quam laciniam illam tuam nitidissimis Pusendorfii Dissertationibus asuere animum induceres, nimirum non paulo rectius existimationi tuæ consulueras. Facies interim officium Christiani, si Veltthemium Jenensem e propinquo admonebis, cum aliquin omen in nomine sit, velit cavere, ne, continuatis mendaciis & sycophantiis, idem, quod cicada apud Poëtam in se exemplum statui videat. Nam nuper quidem, cum exercitus Asinii Tenebrionis prope Bambergam lustraretur, & commentarius ad Grotium vicem tormentorum bellicorum subire deberet, hic primam ante aciem digna atque indigna relatu Vociferans, tumidusque novo præcordia partu, Ibat, & ingentem sese clamore ferebat. Ceterum quod eruditionem tuam ipse tam solícite commendas, in eo more vilium animarum facis; quæ postquam aliquas disciplinas vix a limine salutarunt, illico doctrinæ apicem se attigisse existimant. Quanquam in universum stultorum est, sibi ipsi buccinatorem fieri & omnem omnino modestiam egreditur, quod tu tibi, tuisque nugamentis elogium tribuisti. *Ridebam, ais, primo hominis insolentiam, eamque contem-*  

piu

*petu potius transmittere, quam agnoscere induxeram. Et quid ni? Si ego tuo loco essem, ne quidem cum hominibus loqui vellem, tantum abest, ut cujusquam gratia calamum in manus sumerem. Porro igitur, pergis retorquenda erant tela, quæ vel barba vel pallio excipere poterit. Facere. Eat nunc aliquis, & Scarschmidum priscæ simplicitatis hominem neget, qui hosti suo modos præcavendi ictus telorum suppeditat. Naso enim obtuso, ait noster Grobschmidus, certe imperii forma maxime periclitabitur. Ergo salus Imperii a salute Publicistarum tam arte dependet, ut unius ex illis naso obtuso, libertas ordinum, forma Imperii, & præsens Germaniæ conditio vacillare incipiat. Nam tu, & tui similes Publicistæ columnas Imperii esse, multoque quam Pufendorffius rectius vobis sapere videmini. Quanta Germaniæ calamitas instat, si Scarschmidum omnino mori contigerit! Rationis profecto est, ut Principes nostri, patriæ amantes, quique contextum Reipublicæ in partes ire nolunt, naso hominis primo quoque tempore præsidium circumponant, ne militari satellitio defectus, si quando talitra ipsum pati necesse sit, aut famulorum pugnos experiri, integritati marium & quæ inde dependet saluti Germaniæ prospicere nequeat. Nam scutum Ariovisti, quo hætenus utcumque nasum protexit, non videtur impetum tot Magistrorum, quos provocavit, sustinere deinceps posse. Presso prius nomine, dicit, ne quid captasse putarer dederam Disquisitionem de Republica monstruosa, contra Monzambanum. Atqui præscriperas tamen nomen Perillustri Domini a Friesen, Eique id nobile scriptum strenæ loco obtuleras. An hunc tantum virtum tam imperitum rerum humanarum esse credis, ut ignoret, quid sibi id genus salutationes velint? Sane Augustus e vestigio penetrabat mentem tutoris, abs quo educatus corvus Xaïp ipsi acclamabat. In antro Platonis non formantur Respublicæ, inquis. Neque, inquam, formantur Respublicæ in dolio Justiniani, quod tu sub finem Disquisitionis tuæ comminisceris. Nam nobis omnino non liquet, quid rei sit antrum Platonis & dolium Justiniani. Nisi forte, quæ tua ferocia est, Platonem in antrum Trophonii, & Justinianum in dolium Diogenis relegasti, aut illud orbi acumen ostendere voluisti, quo non ita pridem tui similis Jctus publica scrip-*

prio-

prione se *gleba Juris Justiniani adscriptitium* professus est. *Consultius erat nasum suspendere*, habet oraculum Scarschmidi. At illi Prophetæ consultum erat naso helleborum ingerere, si modo cerebrum aliquam adhuc medicinam capiebat. De quo tamen ut dubitemus, multæ nobis causæ sunt. Quantumcunque enim *collegia tuæ ad ff.* & nescio quam reconditam Jurisprudentiæ notitiam jactas, nihil tamen e mysteriis *regnantis in dolio Justiniani* tui deprehendere licet, quod Pusendorfio oblivione semel iterum transmissum non sit, priusquam tu prima Juris elementa degustasses. Et aliis omnino armis indutum te esse oportet, si qui sententias Pusendorffii in animum demiserunt, tibi & sociis tuis credere debeant; de quo interim §. 18. stolidissime conquereris. Quid enim? Num Philosophis sola fide opus est? Imo rationibus hic pugnari oportet, & stultum est in Philosophia alteri incredulitatem exprobrare: cum quod scitur, non possit non credi. Probate sententias vestras vi ac evidentia argumentorum, & credemus. Sed quid asino concionamur, qui ejurato sensu communi, jampridem ea capere non potuit, quæ lipplentibus, sin minus oculis usurpantur, tactui tamen dijudicanda se offerunt.

VIDEAMUS ergo paucis, quid post tam nobile proœmium circa rem ipsam nugetur Scarschmidus. Ubi §. 10. primo loco tradit; *in formandis rebus publicis pro mensura seu regula haberi potius debere, quod materia aptitudo, & populi genius admittat, non quod idea, & regula literalis fingat*. Nam litera occidit. Atqui eadem ratione dicere possumus, in extruendis munitionibus Architecto mensuram, vel potius primum quod attendatur, esse debere genium loci, non ideas, quas nondum conspecto loco ipse animo conceperat, vel alibi delineatas habuerat. Sed num illud obstat, quo minus munitione regularis ab irregulari discernatur? Imo ne quæstio quidem est, quid præcipue in extruenda Republica Politicum respicere oporteat; sed an dentur Respublicæ irregulares, & utrarum in classe Germania sit reponenda, id vero controversitur. Ceterum quod ad istam appellationem, ejusque fundamentum attinet, respondemus; cum ea quæ artificum regulis, quas ipsi fere a communioribus abstrahere solent, conveniunt, usitato passim vocabulo regularia audiant; Aristoteles autem, cujus Politica Architecto-

nica

nica sola propemodum ex antiquitate nobis restat, ejus præcipue respublicas descripserit, in quibus actiones publicæ ab una voluntate diriguntur; quales respublicæ hodie etiam communiores sunt: ideo regulares civitates, quarum voluntas per unum hominem vel unum concilium se exserit regulares vocare placuit. Sicut contra irregularis Respublica nobis est, ut jam sopra ad nauseam usque inculcavimus, in quo unio illa, qua civitas velus animatur, ita perfecte non deprehenditur; idque non per modum morbi, aut vitii in administratione Reipublicæ hærentis, sed ut publica lege, & consuetudine ea facies velut legitima sit recepta. Quo unico observato nullam difficultatem habent, quæ §. II. *Secundo & Tercio* loco monere voluit noster Grobschmidus. Etiam si enim verum sit, *rigorosa regulæ applicationem plus mali habere propter vitiositatem materiæ*, id est, si genius populi non permittat, frustra esse, qui regularem Rempublicam constituere velit: neque istud non concedamus Scarschmido; *regulas istas esse particulares & imperfectas, nec totum objectum, ejusque partes exhaustire*, id est, Politicam architectonicam, quoad enumerationem formarum regularium deficere; quod nemo temere affirmaverit: tamen nullus mortalium, puto, erit, qui inde colligat, inter regulare & irregulare discrimen non dari, & collatione facta Imperii cum traditis Politicorum nullum formæ dijudicandæ indicium suppetere. Neque obstant, quæ addit Noster: *Nam a præsupposito, seu Rebuspublicis in individuo tum existentibus, earumque forma regula ista desumta*, id est, cum Philosophi doctrinam civilem in formam artis redigere molirentur, jam tum Respublicæ extabant; earumque intuitu illi formas Rerumpublicarum describere cœperunt; *quo pacto igitur futuris Rebuspublicis propter objecti varietatem formas proponere queunt*. Nequaquam enim ea Severini mens est, omnes Respublicas debere esse regulares: neque de futuris Rebuspublicis ordinandis disquiritur. Pari etiam ratione dicere possumus, Mathematicos Architectonicæ militari manum admovisse post munitiones quasdam jam extructas. Neque tamen quenquam tam stupidum fore arbitramur, ut Mathematicorum tradita ob distinctionem munitionum in regulares, & irregulares cavillari occipiat, quasi *futuras* munitiones omnes ju-  
beant

beant fieri regulares. Sine dubio certæ cujusdam Reipublicæ formationem, cum ista scriberet, animo agitabat Scarschmidus, ut planissimam Pufendorffii sententiam eo detorqueret, ac si Respublicas regulares orbi pro regula obrudere vellet, ad quam omnes in universum civitates refingi oporteat. Et fallor, ni sub idem tempus somniaverat, a S. Majest. Catholica solemniter se evocatum, ut distributas hinc inde per Americam colonias in justæ civitatis formam digereret. Istiusmodi enim imaginationibus Phanatici, & Melancholici, & qui alioquin tristi arrogantia laborant, sæpe numero distineri solent; & peculiariter Scarschmido talia sibi visa effingere varum non est, qui jam ante sexennium Jenæ dicitur confirmasse, se prius loco non excessurum, quam abs certo Principe Imperii in aulam accerteretur, misso pimento, cum tribus paribus equorum. Si enim alia, pergit Scarschmidus, *Rerumpublicarum formæ tum exstitissent* (nempe cum Aristoteles Politicam suam Architectonicam concinnaret) *plures aliæque regulæ conscriptæ fuissent*. Atqui post Aristotelem non pauci scriptores politici in publicum prodire, neque tamen quisquam novas formas regulares, diversas ab illis, quas veteres jam tradiderunt, commentus est. Habet enim & ipsa regularitas fundamentum suum, & numerus formarum regularium Politicis invidæ apodixi ostenditur. Quod autem noster addit: *Quo animadverso recentiores doctrinæ civilis scriptores plures regulas, scilicet Reipublicæ mixtæ, formasque communiter statuunt*; id non magis sententiæ Severini obstat, quam ideo irregulares munitiones non dantur, quia, ni fallor, Fournierius, Brissaci, Ostendæ, aliorumque oppidorum egregias quidem illas, sed tamen irregulares munitiones singularem depictas exhibuit. Neque enim illi *recentes Politici* propterea mixturas suas se confecisse fatebantur, quod viro illi, cujus Trismegisto nomine audito alioquin attoniti stupent, oblatrare, ejusque Politicam minima ex parte suppletam velint; sed ut Imperium Germanicum lepido quodam vocabulo insignirent, postquam illud ad simplices & regulares formas haud satis congruere vidissent, Aristoteles autem (cui ceteræ quidem formæ plenè descriptæ sunt) non magis irregularium Rerumpublicarum quam systematum mentionem faceret. Præter-

tim



tim cum non pauci pari fere anxietate mixturæ illius vestigia in Aristotele quærant, qua hodierni Alchymistæ modum conficiendi lapidis Philosophici in Raymundo Lullio venari instituunt; neque quisquam unquam adeo desipuërit, ut Respublicas mixtas regulares esse, quæque mensuræ vicem in quacunque Republica ordinanda subire debeant, contenderit.

CETERUM cum Pufendorfius scripsisset, *homines ante Vitruvium ædificasse*; quætionem movet noster Scarschmidus; *An ædes hodie ad regulas Vitruvii non formatae, sint irregulares*. Ad quod problema respondemus: Etsi usu non ita frequentetur, ut ædificia dicantur regularia vel irregularia, quemadmodum munitiones, dubium tamen non habere, quin qui locum turribus, aggeri, aut castellis muniunt, ædificent. Eoque primo non adeo *ridiculum* videri, ædificium irregulare dicere. Deinde discrimen faciendum esse inter Architectonicam veterem & recentem. Quanquam enim utraque in dispositione partium ordinem, certamque Symmetriam observari jubeat: tamen, ut sunt res humanæ, quæcunque salvo ædificiorum fine corrigi aut mutari possunt, non eandem hodie, quam olim faciem obtinere conspiciamus. Nam & hic varietatem delectare constat, & sæpe imperito alioquin homini commoditas quædam observatur, quæ aciem præstantissimi artificis fugerat. Cum ergo comparatione demum cum aliis facta res regularis vel irregularis audiat, siquidem ædificia ad præscæ Architectonicæ leges exigamus, omnino irregularia dicentur, quæcunque Philonis, Democratis, Vitruvii, aliorumque regulis non congruunt. Quod autem Scarschmidus iterum iterumque & præsertim §. 38. super ædificiis irregularibus cachinnum tollit, id sane manifesto indicio est, idiotam vocem irregularis munitionis (loquamur in gratiam fabri nostri Germanice, *Giner irregular Bestung*) nunquam fando percepisse. Equidem si in Junonis gynæceo hætenus puerulus delituisse, ubi lingua artificum non magnopere requiritur; si *dolio Iustiniani*, quod vocat, immerfus nunquam Lipsiam adspexisset, cujus munitio palam irregularis est, si denique inter fabros nomen non profiteretur, e quibus neminem tam imperitum esse constat, quin vim istius appellationis norit; utcunque excusari posset ignorantia homi-

hominis. Nunc cum Vulcani auspiciis plusculos per annos ferrum exercuerint vasto cyclopes in autro, Bronzesque, Steropesque & stultus corde Scarenschmith, pudenda pfecto socordia est, talia ipsum in armorum officina non attendisse, quæ, ne de tyronibus fabrorum, aut gregariis militibus dicam, pueros sane, tonlores, lippos, imo mulierculas non fugiunt. Ut mirer, quomodo Jurisprudentiam profiteri, & Advocatum agere homini in mentem venire potuerit, quem cyclopes velut carcinoma ordinis sui, pridem a se ad stivam & aratrum relegare voluerunt. Usque adeo illud Maronis, levi mutatione facta, hic locum habet: *Excudent alii spirantia mollius aera, Orabunt causas melius, rutilasque dolabunt, Tu modo, Scarschmidi, minus insanire memento. Hæ tibi erunt artes: monstris imponere finem, Parcere Rolletis, & debellare bubulcos.* Denique quicquid de Materia solita sibi eloquentia deblaterat Nolter, omnino supervacuum est. Etsi enim res formam aliquam sortiri non possit, ni materia ad eandem recipiendam apta sit; seu, ut vulgo loquuntur; *nisi forma educatur e potentia materia*, num tamen ideo nullum inter formas discrimen statuetur? Aut num id propter rebus ad antiquum chaos relabentibus unus erit toto naturæ vultus in orbe? Neque etiam de irregularibus civitatum formis egit Pufendorfius, quasi *ipse solus sciat taxare formas Rerumpublicarum*, quæ Grobschmidii observatio est: sed quia inter regulare & irregulare, inter unitum & disjunctum, inter habile & inhabile, ingens in re ipsa discrimenprehenderat.

TANDEM reliquis cyclopis nostri ineptiis diluendis id unum suffecerit notasse, mentem Pufendorffii nequam esse hanc, quod Germania scedere aliquo expresso contineatur, aut quod imperium systema duntaxat foederatorum sit. Sed illam obligationem, qua ordines Germaniæ Cæsari & Imperio obstringuntur, qualicunque eam nomine insignias, non habere plus virium, quam vinculum, pacti inter scederatos inæquales, minimum intuitu Electorum, & præcipuorum Imperii Principum, id verò Monzambanus ait, id Pufendorffio persuasum est, & idem ipse rerum actus palam loquitur. Sunt autem istæ theses diversissimæ; quemadmodum aliud est dicere: Scarenschmidum Licentiatum non esse, sed

sed saltem vetulum Studiosum Juris. Aliud : eruditionem Scarenschmidi majorem non videri, quam tyronis alicujus. Prius in medio relinquimus; posterius autem tam certum est, quam certum arbitramur, Imperium recte dici Rempublicam irregularem. Ac principio quidem, quod *definitionem civis Aristotelicam* attinet, de qua in §. 13. declamat noster, dubium non habet, quin illa sit civium Democraticorum. Quomodo autem differant *jus suffragii*, & *notio suffragantis subjecti*, aut quid illo sibi paradoxo velit, *dari in certis societatibus suffragia*, ut tamen *suffragantes non sint Cives*, istæ, inquam, subtilitates nobis nondum penetrantur. Egregium interim dogma Politicum, quod literato orbi propinat Scarenschmidus *in regno unicum esse civem, nempe Regem, & regnicolas ob defectum juris suffragandi, eura quod, ex doctrina Aristotelis, ut ipse contendit, nemo verus civis sit, nihil aliud esse, quam servos publicos*, quibus tamen, ne hanc compellationem indigne ferant, id solatii loco ingerit: *libertas personalis respectu libertatis civilis minus absurde dicitur servitus*. Atqui eodem argumento ostendemus, Scarenschmidum esse idiotam. Nam quicquid ipse in Jurisprudencia Romana sapit, id quidem respectu Cujacii aut Jacobi Gothofredi non absurde dicitur ignorantia. Quam tandem Politicam comminiscetur nobis ratio Tenebrionistarum! Jam primum *Scarenschmido* unicus in Regno civis Rex statuitur; Regnicolæ autem, quacunque dignatione sint, nil nisi servi publici audiunt: \* *Valentino Velthemio*, citra respectum, quod sociorum aliqui Imperium civile non ordinationem, sed omnino creaturam Dei esse, contendant, quam Deus *immediate* velut olim Manna producat, & postea in noviter electos Reges pluere jubeat, nuper religio non fuit, publica ac solemni disputatione inanditum istud dogma promulgare: *Majestatem esse Non-Ens*. *Gesenius*, Pontifex Garlebiensis, execrabili devotione, imo anathemate fulminare in pleno Patrum confesso decrevit contra omnes, qui fateri recusabunt; expedire, ut in civitatibus perversa, ac fini civitatum repugnans Ethica doceatur. Cui denique ignotæ sunt *κρίσις δόξαν*, quas candidissima illa anima, *Josua Schwartzius*, & ipse sacre militiæ Deus tutelaris *Nicolaus Beckmannus* non citra tumultum Rebuspublicis obtrudere annisi sunt. Neque

que vero si *Imperium regere systema* non est, ideo Status Germaniæ ad plura, quam Fœderati *inequales* tenebuntur; & qui negat, Principes in subditorum proprie dictorum classem compingi posse, is eosdem omnino obligatione liberos solutosque pronunciat. Nunquam enim Pufendorfio in mentem venit affirmare, conditionem subditorum nulla prorsus ratione membris Imperii congruere; sed pleraque Imperii membra pro subditis proprie dictis, & Principes pro meris Praesidiis, quales Romani olim provinciis imponebant, haberi non posse, id ait. Contra quam thesin illa nobis Scarenchmidus opponit, §. 15. *Hæc Juris Publici Interpretes in utramque partem disputant, alii vero distinguunt. Simpliciter cerè classi subditorum status jungi, civilis eorum vetat qualitas, quamvis in nonnullis vix secus censeantur, verbi causa, in judicio Aulico, in Jurejuramento, quod Casari præstant, ne de curialibus dixerim.* Quid ergo impugnas Scarenschmidi? Nam eadem est thesis Severini, & ideo Imperium Respublica Irregularis salutatur, quo minus Principes Imperii *subditorum classi simpliciter jungi possint, qualitas eorum civilis seu libertas obstat*; quæ alioquin populis & populorum Reſtoribus tributa (docente GROTIUS J. B. Lib. I. C. 3. §. 21.) sine summo Imperio non intelligitur. In regulari enim Republica omnia ejusdem membra *simpliciter*, neque in *nonnullis* duntaxat, quæ ad ipsam rei summam parum faciunt, sed in omnibus *subditorum loco censeari solent*. Circa *Judicium Aulicum* vero & quæ §. 17. gruppit noster, tædet toties repetere; Etsi Imperium systema fœderatorum non sit, tamen nihil repugnare, quo minus inter fœderatos etiam detur *Jurisdictio necessaria*. Sicut & illud ineptum est, quod, quia Jure Romano cavetur, *ne quis invitatus in societate manere cogatur*, §. 16. negat, contrahi posse fœdus perpetuum, cui salvis pactis renunciare non liceat. Reliquas absurditates sigillatim percurrere tædiosum juxta & supervacuum videtur. Nam Scarenchmidus, postquam in vitiorum callum obduruit, in furem quidem agi potest, corrigi non potest. Et queis ista nondum sufficiunt percipiendæ menti nostræ, aut injectis sibi a Scarschmido scrupulis emendendis, illi nullius doctrinæ animum capacem gerunt.

JAM epilogi loco compellendus nobis est Vir clarissimus, qui hætenus in Scarsenschmido mensæ suæ membrum sane quam indignum habuit: non quasi stolidissimo huic sycophantæ socijsungi mereretur, sed quia Medicum non novimus, cui tutius hominem biliosum, & extreme spleneticum commendare liceat. Equidem si ea seculo felicitas obrigisset, ut arcanum lapidis Philosophici, tot carbonum clade frustra hætenus quæsitum, cognitum, aut divulgatum haberemus, ipse præstantissimus Medicus minus opinor desperaret, posse valetudinem hominis in melius ire. Nunc cum plerisque tam beatis esse non liceat, & qui divinæ hujus medicinæ conficiendæ modum reperire, juxta Poëtam, bene vivere, qui bene lateat, existiment, nescio qua ratione sensus reddi possit ægrotanti, cui ne candentis quidem ferri ustulatio percipitur. Nisi forte ultimum hic erit, detecta nostris temporibus Transfusio; quæ re desperata Medicis quibusdam non pessime cessit. Cujus adversus melancholiam si prudentissimus Poliater ipse vim atque efficaciam expertus est, nobis perhumaniter rogantibus, non recusabit, vitulo aut porcello venas quantocyus incidere, ac cruorem nulla febris aut trititia infectum cordi per canales instillare; ut sic asinino sanguine purgatus, sin plene restitui non possit, saltem ruditu suo bonis, viris parcius negotium facessat. Quanquam, ut vincula homini parentur, cordatiores expeditissimum sint judicaturi; postquam melancholia magis magisque ingravescit, & Sirius, qui propediem æstus Solis adaugebit, canina id genus capita multorum læpe exitio præcipitat.

SAMUELIS PUFENDORFII  
S P E C I M E N  
CONTROVERSIARUM  
CIRCA JUS NATURALE  
IPSI NUPER MOTARUM.

---

PROPERT. L. II.

*Maxima de nihilo nascitur historia.*

---

REVERENDISSIMO DOMINO.  
DOMINO JOANNI BAAZIO,

S. THEOLOGIÆ DOCTORI ARCHI-EPISCOPO  
UPSALIENSI, EJUSDEMQUE ACADEMIÆ  
PRO-CANCELLARIO,

DOMINO AC FAUTORI MEO VENERANDO.

**Q**UO calumniarum adparatu Libros meos de Jure Naturæ & Gentium malevoli quidam invaserint, apud Reverendissimam Tuam Dignitatem multis exponere supervacuum fuerit, quippe cui dudum istius litigii origo indolesque est perspecta. Ista malignitatis aut incititæ documenta, utut sparsim jam a me discussa, denuo uno velut fasce comprehendere, solidaque responsione adjectæ orbi erudito exponere, exultimationis meæ magnopere interesse judicavi; simul ut aliquando molestæ huic scripioni clausulam imponerem. Nam postquam semel ita perspicue ostendero, quam procul ab illis erroribus absim,

P 2

quos

quos tanta cum importunitate certorum hominum intemperie mihi impingere sategerunt, non magnopere mihi deinceps curandum erit, num alii malignitati suæ immori malint. Ceterum quod isthoc scripti Reverendissimæ Tuæ Dignitati potissimum inscribere sustineam, præter admirationem, qua sapientiam tuam, aliasque quæ præfulges virtutes prosequor, hæc me ratio subegit, ut ostenderem, quanta me causæ meæ fiducia teneret, dum velut arbitrum sumere non vereor, ex eo ordine, cujus unum aut alterum nescio quam splendidum membrum eas lites præcipue excitavit, aluitve. Simulque ut hoc factò demonstrarem, utut malevoli ordinis sacri auctoritate in fraudem meam abusuros sese speraverint, illibatam tamen penes me perstare venerationem, quæ isti ordini debetur, nec injurias unius aut alterius universis a me imputari. Quin potius me confidere, Reverendissimam Tuam Dignitatem, & quibus par animi integritas, quam maxime detestaturam artes oppido quam deformes, quibus ad famam meam maculandam isti homines grassati sunt. Optime nimirum Reverendissima Tua Dignitas perspicit, quantopere a prudentia, gravitate, atque moderatione, virtutibus vestro ordini tam commendatis abhorreat, re non intellecta tumultuari, per calumniam aliis fœda dogmata affingere, vera & innoxia cavillationibus in sinistram partem derorquere, ad rationes denique aurem obstruere. Et qui circa inania aut falsâ tanto cum fervore se jactat, is etiam ubi solida propugnat, impetu potius rapi, quam judicio duci viderur. Sed mihi causam meam asseruisse suffecerit; adversarios pro suo quemque merito cordatorum virorum censura notabit. Mihi post tam acerbis insectationes non modico solatio erit, si Reverendissima Tua Dignitas candorem instituti mei benevole interpretetur, & me, qui virtutes Ipsius ex animo æstimo, favore suo amplectatur. Ita Deus Optimus Maximus Reverendissimam Tuam Dignitatem multos per annos Ecclesiæ & Reipublicæ bono servet.

REVERENDISSIMÆ TUE DIGNITATIS  
Dab. Holmiæ, prid. Kal. Julias Anno 1677.

ADDICTISSIMUS  
SAMUEL PUFENDORF.  
LECTO.

## LECTORI BENEVOLO

## SALUTEM.

**E**st pleraque calumnias & cavillationes, quæ libros nostros de Jure Naturæ & Gentium livor & inicitia incessere hæctenus laboravit, jam antea, quantum cordatis & æquis rerum arbitris sufficere poterat, discusserim; visum est tamen hoc scripto universam illam litium telam retexere, unoque obrutu eam talium rerum curiosis conspiciendam exponere. Nam & dispersa minus ad memoriam valent, & interea temporis quædam istorum hominum schedæ, non modico veneno turgidæ, in manus meas inciderunt, quibus aliquid reponi existimationis meæ interesse videbatur. Simulque otium quantumvis ingratißimum suppetebat, turbatis bello Musis nostris, & intra Malmogiæ munimenta sese abdentibus. Intra quæ claustra dum ceteri connixo studio publicum hostem arcere satagunt, mihi juratos famæ meæ latrones propulsaße muneris instar fuit, postquam nihil operæ a me in Rempublicam conferri poterat. Et sane istos homines condigna virtutibus suis elogia audire, eorundemque artes in manifesta luce constitui non mea magis, quam omnium bonorum ingeniorum intererat, & quibus aliqua ad excolendam rem literariam facultas. Quæ si pro industria sua nullum aliud præmium manet, quam ut tam sordidorum dentium lincinationi exponantur, præstitere barbariem deinceps & ruditatem, quam bonam mentem habere amicam. Equidem id nunquam sperare ausus sum, ut mea sese omnibus adprobarent; quin & oprandum mihi duxi, si cordatus quispiam & eruditus vir discutienda sibi sumere velleret, quæ dubii quid habere viderentur. Nam heic vicisse gloriosum, succubuisse non indecorum fuerat futurum; & poterat fortasse ejusmodi collisio ad illustrandam aut solidandam veritatem aliquid momenti non poenitendi adferre. At quæ mihi mora fuit lis non di-



sceprationis literariæ , sed latrocinii potius indolem habuit ; cum adversariis meis nihil aliud fuerit propositum , quam consumto omni calumniatorum adparatu maculam famæ meæ adspargere , & livori suo , miscellæque ambitioni litare . Qui præter alias molestias hujus quoque tædiosissimi laboris necessitatem mihi imposuerunt , ut elogia ipsorum meo potissimum stylo forent publicanda ; postquam non parum ad illustrandam hancce controversiam facit , istos homines paulo penitius nosse ; & *Apolo-*  
*giæ* meæ nebula potius istos involvere , quam in aprica luce destituere propositum fuit . Ac de *Nicolao* quidem *Beckmanno* , cujus velania primos veluti motus hiscæ turbis dedit , peculiari scripto satis expositum ; nec ut tam infami nomine memorando ulterius immorer , decorum fuerit . Nisi quod hoc prætereundum non est , Alastorem istum usque adeo ab ingenio suo non discedere , ut etiam nupta Danorum in Scaniam irruptione affinem suum cohortis optionem subornarit , ut me cum uxore & liberis trucidaret . Qui sanguinem meum sitiens cum manipulo sicariorum Londinum advolabat , & cum ibi me non invenisset , Malmogia capta facinus sese exsecuturum frendebat . Verum ut illum sicarium sceleris irritum Lundense prælium extinxit : ita sine dubio universa Tenebrionistarum secta ex tanta sui conditoris virtute non parum splendoris mutuatur . Quanquam nescio , an primo huic loco cessurus sit *Josua Schwarzius* , quippe ex cujus cerebro *Index Novitatum* progenitus est , qui solus exprimendo viri animo ingenioque sufficit , & qui novam apud sectam symboli vicem subit . Istum hominem in me impegit genii scævitas turbis serendis nata , & quod hoc velut compendio ad famam singularemque eruditionis opinionem gressari in proclivi duceret , postquam bonas per artes tenebris sese eripere non dabatur . Ac statim quidem cum post absolutam peregrinationem , quam ad exemplum Imperatoris Hadriani pedibus fere obierat , in patriam revertisset , obtentu zeli , aut oestro potius , id rurbarum dedit , ut ni Gedani profugisset , capitis supplicium subiturus fuerat ; Quod totum negotium in Pomerania Electorali notorium est . Cum Gedani satis tutum se non crederet , Holmiam se penetravit ; ubi prima cura erat fami depel-

pellendæ quid circumspicere, simulque bipatentem braccarum portam obstruere. Inde pastoratus indagabatur. Et cum sub id tempus munus Concionatoris Teutonicæ Holmiæ vacaret, magno cum ambitu, & non sine turbis in plebe excitatis ad idem ne quidquam adspirabatur. Sed mox cum de instituenda ACADEMIA CAROLINA agitaretur, ut importunum flagitorem aliquo extruderent, Concionatorem Teutonicum Londini ipsum agere jubent, adjuncto extraordinarii Professoris titulo, ut ansam haberet studia sua ulterius excolendi. Sed postea cum qui vocatus erat celebris Theologus accedere abnuisset, viro, qui tunc gratia quorundam Regni Procerum florebat, adulando adrepsit, quo procurante Professoris Theologiæ vocabulo potitus est. Talem in locum protruso facile quidem erat torhulentæ & rixositatis famam acquirere, mota vanorum litigiorum serie, in quorum præmium parum aberat, quin munere dimoveretur. Sed eruditionis opinionem sibi circumponere difficile fuerat ei, qui ex universa Philosophia præter vocabula elenchorum sophisticorum, & ex Theologia recentes quasdam controversias, crepare nihil poterat. De cetero in linguis orientalibus, Patribus, historia & antiquitate Ecclesiastica, elegantioribus literis ac solida Philosophia plane hospes; ingenio insuper ita infelici, ac tardo, ut ad jejunam concionem consarcinandam integra septimana opus esset, totque annorum spacio vix duæ aut tres misellæ dissertationes procuderentur, modici tyronis specimen; nisi quod aculei calumniarum, quibus posteriores duæ refertæ sunt, insignem artis Sy-cophanticæ peritiam præ se ferunt. Igitur cum mire gestiret ostendi, & dicier, hic est, uno momento ex numero obscurorum virorum emergsurum se sperabat, si quam maculam operi meo mihi que possit adspargere; cum speraret, prætextum zeli Theologici apud imperitos adplausum, & si secus res cecidisset, excusationem sibi pariturum. Prasertim cum nativum ipsius stuporem, & tenuitatem eruditionis singularis quædam facultas suppleret innocentissime dicta detorquendi, & vic quædam, qualis in certo muscarum genere deprehenditur, proluvie sua etiam optimas carnes polluendi. Sicuti & de illius hominis pia & candida intentione hoc testari po-

test, quod cum silentium ipsi aspera cum increpatione & comminatione foret impositum, hoc solatio isthanc ignominiam sibi levavit, quod a suo amico & socio *Nicola Beckmanno* tanta mihi per libellum famosum contumelia foret inferenda, ut ex illa multum detrimenti existimatio mea per Germaniam sit captura. Hisce igitur si jungamus fraudes circa hoc negotium adhibitas, quas in *Apologia* mea satis exposui, & quarum pleraque a *Schwarzii* malitia promanant; Sane nemo cordatus fuerit, quin agnoscat, mitius quam pro meritis *Asinium Tenebrionem* vapulasse. Ceterum, ut, quæ mihi intentabantur calumniæ, majore cum pondere procederent, in partes quoque trahitur *Petrus Winstrupius*, *Scania Episcopus*, qui cum *Schwarzio* nuper atrocissima lite collisus fuerat, cui hicce & errores circa religionem, & neglectum officii & animum Regi infidum objecerat; quæ lites demum, cum in exitium *Schwarzii* erupturæ viderentur, mea potissimum opera compositæ sunt, pro quo officio tam egregiam mihi gratiam *Schwarzius* paulo post retulit. Quod autem *Winstrupius* ille, quæ per quadriennium ego omni observantia & sinceræ amicitiae exhibitione coluissem, tam facili negotio permoveri potuerit, ut in fabula tam inficeta primarum partium actor esse vellet, una quidem causa fuit, quod illi nunquam moris fuit, actiones suas ad sanam rationem exigere, sed cæco potius impetu ruere. Altera autem, quod solo officii sui vocabulo me oppressurum se speraret. Enimvero auctoritatem & munus istius viri calumniis in me jactatis parum ponderis addidisse nemo mirabitur, qui cogitaverit, impudenter sperasse sui ullam rationem habitum iri, cui cum talibus tam foedo in negotio societatem coluisse religio non fuit. Præsertim cum nulli mortalium minus quam ipsi perspectum foret; quid proprie in controversia esset, quippe cui vocabulum juris gentium vix fando auditum foret, & cui nullo alio argumento erronea quædam libro meo contineri constabat, quam quia *Schwarzio* tale quid fabulanti fidem adhibuerat. Sed cum non modica clade istorum copiarum in Suecia conciderentur, ex Germania supplemenrum sibi quaesitum ivere successu non plane irritum. Nam & ibi inuenti sunt alii viri, qui  
tam

tam foedæ militiæ duces se ferrent. Quorum primus *Fridericus Gassenius*, Garlebiensium Præsul, cum sibi a me retorsio iustissime impacta foret, id omnibus viribus egit, ut furoris palmam fraterculo suo *Nicolao Beckmanno* ancipitem redderet. *Valentinus* autem *Velthemius* cum nescio quo fato in cathedram publicam protrusus esset, & omnibus jam occupatis nullum tabellis novis locum relictum cerneret, ac mire tamen aliqua via increscere arderet, expeditissimum judicavit, litem mihi intendere; præsertim cum misere metueret, ne quisquiliæ Scholasticorum, & Magistrorum nostrorum Collegia Manuscripta, quibus innutritus erat, detrimenti quid caperent. Fiduciam autem homini potissimum dedit impudentia, & quæ ignorantiam comitatur audacia, & quod stentoreæ vocis in hoc litigio non modicum fore usum prævideret, simulque quod in proclivi ipsi esset magnam vim inficetarum dissertationum evomere, quarum puto facile me nausea enecaret. \*.\* Ceterum quam pium & candidum isti homines scopum circa movendas & fovendas hæc lites habuerint, artes ab ipsis adhibitæ satis loquuntur. Quibus cavillationibus autem strophisque universam calumniarum scenam adornarint, tum aliis scriptis, tum hoc ipso manifestissime fuit expositum, sic ut cordatum Lectorem nihil amplius desideraturum sperem, quod vel ad depellendas adversariorum criminationes, vel illustrandam meam sententiam faciat: Eoque posthac minus sollicito mihi esse licebit, si qui calumniarum & nugarum definere non velit; cum semel ita perspicue formato controversiæ statu quæ ex adverso afferri possunt ultro collabantur, & mihi parum decorum sit futurum, quibusvis jejunis schedis peculiari scripto occurrere. Qui enim hæc nostra capit, ei facile fuerit, si quid præterea scrupuli movetur, proprio Marte discutere. Sed qui ne nunc quidem inania litium mihi morarum perspicere valet, illius circa negotium literarium nulla ratio est habenda. Et cum ab erroribus Theologicis, quos isti impingere mihi sunt, alienum me esse protestatus sim, ac verbis meis vim illatam ostenderim; si quis ne nunc quidem adquiescere velit, quid aliud præter professum calumniandi studium præ se fert? Denique si cuipiam quid acerbitalis hoc & alia istis hominibus

nibus opposita scripta videantur habere, is facile veniam  
justo dolori dabit, si modo cogitare velit, quid animi  
sibi futurum fuisset, ejusmodi calumniis & injuriis ad-  
sperso, & num mollius tractari mereantur, qui vitam,  
famam, fortunasque meas & meorum insensissimo atque  
implacabili animo perditum & subversum ivere, animæ  
insuper salute me exuituri, si mendaciis & maledicen-  
tiæ aliqua vis Divinum apud Numen foret. Bene  
vale.

## C A P U T I.

DE ORIGINE ET PROGRESSU DISCIPLINÆ  
JURIS NATURALIS.

## § I.

Jus naturale, humano generi cœvum, quod omni tempore populorum mores & negotia ex pleraque parte rexit, quodque actu ipso exprimere optimo cuique semper cordi fuit, hoc demum seculo in justæ formam artis redigi cœptum est. Equidem olim non defuere, qui cultiorum populorum leges civiles, in quibus naturale jus magnam partem faciebat, literis consignatas luculentis commentariis illustrare sategerunt. Uber quoque fuit proventus Philosophorum moralium, quibus circa mores hominum ad dictamen sanæ rationis componendos opera est posita. Verum, qui naturalia jura a positivis accurate discerneret, & ista in pleni systematis rotunditatem disponere aggrediretur, ante *Hugonem Grotium* nemo exitit. Equidem in legibus Hebræorum & origine divina & antiquitate quam maxime venerabili vix ullum est caput Juris naturalis, quod tactum non sit. Sed uti in ipso legum codice, & in commentariis, quibus eas leges istius nationis Doctores illustratum ivere, positiva naturalibus immixta conspiciuntur, ad quæ curiose digerenda sese accinxit *Joannes Seldenus*, honesta, uti adparet, & minime livida adversus *Grotium* æmulatione, & quia alias præcipuas Juris Hebraici partes illustrandas susceperat: sic ut ab hocce in peculiare volumen colligeretur, quicquid ex sententia populi Hebraici Juris naturalis & gentium haberetur, separatim ab eo jure, quod duntaxat inter cives ejusdem reipublicæ valebat. Quo minus tamen eruditissimum & quantivis pretii opus vicem pleni, & ad captum omnium populorum attemperati systematis in jure naturali subire queat, tres potissimum causæ mihi obstat videntur. Prima est, quia ibi non satis exposita reperiuntur ea, quæ

quæ ad prædium juris naturalis pertinent . Per eam autem intelligimus illa velut præcognita , quæ ad præcepta legis naturalis , earumque rationes plene & distincte intelligendas requiruntur , & quidem quæ velut domestica sunt huic juri , nec ex aliis disciplinis mutuo sumuntur . Ex quo genere est doctrina de indole rerum moralium in genere , de principiis actionum humanarum , earumque natura , & affectionibus , de principio moralitatis , de legibus in genere , de statu , conditione & natura hominis in respectu ad actiones morales , de natura & requisitis pactorum , de origine & natura sermonis , & dominii , de modis acquirendi , de pretio rerum . De De natura & varietate contractuum , de origine & natura tam societatum primarum , quam civitatum , de imperio civili , ejusque partibus & affectionibus , & si quæ sunt alia . Deinde *Seldenus* legem naturalem non deducit ex tali aliquo principio aut hypothesi , cujus evidentiam omnes nationes agnoscant , aut ad quam agnoscendam argumentis ex rationis lumine petitis adduci queant . Nam fundamenti loco substernit septem illa præcepta Noachidarum , quorum auctoritas apud Judæos antiqua traditione nitebatur , quam adstruere aut elevare meum non est . Et si mihi quidem valde probabile videatur , primos homines potius ex divina quadam & peculiari informatione , quam propria ratiocinatione præcepta legis naturalis hausisse . Verum ut quis omnibus populis & auctoritas ejus traditionis , & numerum istorum præceptorum argumentis utrinque admissis persuadeat , id vero valde arduum fuerit . Præsertim cum nec circa id sollicitus fuerit *Seldenus* , ut istorum præceptorum necessariam convenientiam cum natura humana , aut eorundem sufficientiam ad regendas omnes actiones hominum morales demonstraret . Denique & illud tantum agit *Seldenus* , ut quid Doctores Hebræorum senserint , exponat ; quam accurate autem istorum sententia cum sana ratione congruat , parum examinet . Quod tamen necessarium erat , siquidem pleni systematis vicem istud opus subire debebat ; quippe cum populus Judaicus seipsum quidem eminenti dignatione , alias autem nationes sat maligna æstimaverit . Cum tamen jus naturale ad gustum totius generis humani adaptaturo necessum sit ponere , omnes homines circa fruitionem juris naturalis esse æquales .

§. II. In libris Novi Fœderis præcepta legis naturalis passim luculentissime inveniuntur expressa, & quidem ut illa non solum jubeantur exerceri citra ullum nationis discrimen, sed & omnibus cum requisitis, quæ perfectam actionem absolvunt. Et ea omnia ut ad unum caput, velut ad legem quampiam fundamentalem, possent revocari, ex qua ceteræ perspicua consecutione deducerentur, ipse Salvator noster eum in finem dilectionem proposuit, quæ cum nostra societate quam amicissime conspirat. Ist hæc porro præcepta omnibus modis illustrare conati sunt, qui in libros divinos commentarios ediderunt tantum non infinitos; sic ut in Theologia Christiana nullum præceptum desiderari videatur, quod ad regendas in universum hominis actiones, moresque faciat. Non eo minus tamen res literaria etiam apud Christianos peculiarem disciplinam exponendo juri naturali requirebat, postquam universum genus humanum, cui utique communi lege opus erat, in religionem Christianam non consensit. Cum enim ea pars religionis Christianæ, quæ de regendis moribus tractat, satis habeat dogmata sua confirmasse ab auctoritate & jussu Dei, qui filium suum Salvatorem mundi misit, in alias eorundem rationes inquirere parum laboret; inde fit, ut hoc modo adornata præcepta legis naturalis sanctimoniam suam iis duntaxat adprobent, quibus divina Christianæ religionis auctoritas agnoscitur; Sed cum hancce non exigua humani generis pars ignoret aut adspernetur, cui tamen & inter se & cum Christianis agenti negotia utique ad legem naturalem attemperanda; adparet sane, ex alio principio, apud omnes æque agnito, & ad omnium captum attemperato, deducendum esse jus, ad quod omnium eorum actiones exigantur, qui tam diversa circa religionem sentiunt. Est præterea religio, prout ex adæquato suo principio hauritur, in sua natura ad sublimiorem finem & usum ordinata, quam qui tantum intra hujus vitæ limites coërceatur. Inde non Christiana solum religio, sed & pleræque aliæ devotis suis sectatoribus præmia, malitiosis violatoribus supplicia post hanc vitam decernunt. Ita tamen, ut non vera solum religio, sed & falsæ cuique abs se diversæ religioni efficaciam ad præmium post hanc vitam nanciscendum detrahant. Sed in eo omnes consentiunt, quod actiones



moreſque ad legem naturalem bene compoſiti ad decus, tranquillitatem & emolumentum hujus vitæ manifeſte faciant. Igitur qui diſciplinam juris naturalis ad captum univerſi generis humani adornare vult, ei ſublimior iſte prioris vitæ finis & uſus velut ſequeſtrandus eſt, & Theologiſ relinquendus, & ad eum duntaxat uſum reſpiciendum, qui apud omnes in conſeſſo eſt, & quem vel ſenſum judicio deprehendere queas. Idque eo magis, quod controverſiæ Theologicæ tanta fere contumacia animorum diſceptari ſoleant, ut ſi quæ diſciplina illis involvatur, non ſecus atque ac incertâ ſyrrium navis adhæreſcat, nec curſum ſuum ulterius tenere queat. Accedit, quod neque in authenticis novi Fœderis libris, neque in commentariis ea inveniantur, quæ ad prædiam juris naturalis pertinere ſupra dicebamus; quippe cum talia tradere, extra ſcopum iſtorum Scriptorum fuerit. Nihilominus in apriſco eſt, plurimum lucis & ſubſidii noſtræ diſciplinæ accedere non ſolum ex divinis libris, ſed & ex commentariis eorum, quibus primæva & genuina religionis Chriſtianæ dogmata unice cordi ſunt. Aſt vero illi Doctores, qui in Epiſcopi Romani verba jurarunt, quæ omnia ad potentiam & quæſtum Sacerdotum vertere labor eſt, legi naturali, & univerſæ de moribus doctrinæ magnam caliginem offudere, dum immenſa voluminum mole id agunt, ut penes ſolos Sacerdotes facultas ſit conſcientias hominum ex ſuo lubitu temperandi, ceteris liquido ſuarum actionum judicio adempto cæci obſequii neceſſitas incumbat.

§. III. INTER veteres populos, quantum nobis conſtat, non eſt, qui plus operæ in illuſtrandis ſuis legibus poſuerit, quam Romani, quibus diſciplina juris plurimum ſane debet. Et dignum admiratione eſt, quantum excelluerint ingenia Romana, ubi ad certum ſtudiorum genus velut imperu quodam incumbere cœperunt. Sic quantum eloquentia, quantum poëſi & hiſtoria valuerint, nemini eſt ignotum, qui literas novit. Poſt cum ſub Cæſaribus peritia juris plurimum commendationis haberet ad nanciſcendas adminiſtrationes aulicas, & provinciales, per duo fere ſecula præſtantiffima Romæ ingenia excolendæ Jurisprudentiæ ſeſe adplicuerunt. Ex quorum ſcriptis longe ampliorem noſtra ſecula fructum potuiſſent capere, ſi illa volumina integra ad

ad nos pervenissent. Verum Justinianus, instituto rei literariæ oppido quam pernicioso, pro integris operibus lacinias quasdam & excerpta nobis transmittit, quæ recentioribus sæculis immensam commentariorum molem pepererunt. Cum utique longe satius fuisset, veterum Juris scripta, erudita sanè & magno studio elaborata, evolvere, quæ universa non unus ex recentioribus scribacitate sua æquavit aut superavit, quam per inexhaustum commentariorum oceanum jactari. Et veterum monumenta integra, sua luce velut radiantia, partem longè recentiorum operam admisissent. Fatendum tamen est, quicquid adhuc Romanæ Jurisprudentiæ superest, juri naturali plurimum lucis attulisse, non solum quia isti magnopere curæ fuisse adparet omnia ad rectam rationem & æquitatem revocare; sed etiam quia plurima ad prædium juris naturalis spectantia ab Juris Romanis luculenter fuere pertractata. Quantamcunque tamen laudem Romano juri tribuamus, fatendum utique est, peculiari adhuc disciplina juris naturalis opus fuisse, siquidem doctrinæ morali suæ constare debebat perfectio. Nam nec omnia, quæ ad prædium juris naturalis pertinent, in jurisprudentia Romana ita accurate, prout par erat, deducta inveniuntur; & cum ibidem naturalia positivis & quæ ex peculiari indole Reipublicæ Romanæ proveniunt, immixta sint, ista utique liquido discernere non poterit, nisi qui aliunde hauserit, qua nota hæc ab illis dignoscantur.

§. IV. VETERUM Philosophorum monumenta non paucas quidem sententias continent ad jus naturæ illustrandum facientes; ut tamen longè minoris sint, quam expectari ab illis par erat, quibus hæc præcipua esse opera debebat, mores hominum ad legem naturalem formasse. Neque isthunc veterum defectum suppleverunt, qui proximis abhinc sæculis Philosophiæ studium professi sunt. Cum enim inter diversas veterum Philosophorum sectas Stoicorum placita, nonnullis emendatis, in solidum juris naturalis corpus facillime videantur potuisse componi, istis neglectis sola Aristotelis dogmata in scholis rerum posita sunt. Cujus viri admiratio nescio quo fato per complura sæcula gentem scholasticam ita velut attonitam reddidit, ut nihil perfectius ab humano ingenio proficisci posse crederent, & summus eruditionis apex

apex haberetur, istius scripta posse interpretari. Equidem quin inter summa ingenia, quæ unquam innotuerunt, Aristoteles sit referendus, nemo talium rerum intelligens abnegaverit. Dicere tamen, ab eo ceteris nihil relictum, quo ulterius progredierentur, & in Creatorem injurium, & in tot secula contumeliosum fuerit. Ne de aliis partibus Philosophiæ quid dicam, sane ipsius Ethica, si seponas, quæ de principiis actionum humanarum traduntur, vix aliud quam officia civis consulpam Reipublicæ Græcicæ continere videtur. Sicuti & in politicis maxime præ oculis instituta Græcarum suarum civitatum habuisse, earumque libertatem cum primis æstimasse ipsum adparat; qui gravis est defectus disciplinæ universi generis humani ulibus inservituræ. Id quod peculiari scripto deducere animus erat, ni ingruens calumniatorum importunitas alio cogitationes avertisset, & alacritatem meam non parum refrigerasset. Cur enim me scribendo defatigem, si nullum aliud laboris præmium apud me manet, quam ut latratores a fama mea depellam.

§. V. Ne igitur res literaria diutius nobilissimam juris naturalis disciplinam desideraret, prius effecit vir incomparabilis *Hugo Grotius*; tunc temporis otio literisque abundans in Gallia, quæ in patria male habitum humanissime exceperat, idque instigante potissimum *Nicolao Petrescio*, celeberrimo illo litteratorum fautore & ἐργασίῳ. Quem tamen ut de ejusmodi opere concinnando cogitationem susciperet, monitum fuisse crediderim iis, quæ a sapientissimo *Bacone*, Angliæ quondam Cancellario, super augmentis scientiarum tradita sunt. Hic enim vir præcipue nostro seculo velut classicum cecinisse, & signum sustulisse videtur, ut in rebus Philosophicis aliquid ulterius & exquisitius investigaretur, quam quo hætenus scholarum parietes resonuerant. Sic ut si quæ est pulchrius nostro tempore efflorescentis Philosophiæ gratia, isti viro non minima ex parte debeatur. Accinxit porro sese *Grotius* ad moliendum opus, in quo nulla priorum vestigia ipsum regebant, admiranda instructus ingenii & judicii felicitate, pari scientia litterarum sacrarum, juris civilis, omnigenæque eruditionis, & infinita lectione. Velut tamen diffusus universam disciplinam primo conatu abs sese exhauriri posse, ita

Ita titulum operis temperavit, ut ne eidem temere imperfectio posset objici. Ceterum quo adplausu istud opus apud solidæ eruditionis æstimatores receptum sit, memorare nihil atrinet. Et quantamcunque alii culturam aut polituram disciplinæ juris naturalis addiderint, *Grotii* luminibus haudquidquam obstruent, ut ut ab ipso spicilegium haud spernendum sequentium ingenio & industriæ fuerit relictum. Neque eo minus illustre opus suos passum est manes. Cum enim vir iste nulli inter Christianos sectæ ita rigide se videatur addixisse, nisi quod ad illos proxime accedat, qui Arminiani audiunt; eoque fuerit ingenio, ut propter discrepantes opiniones non statim in partes discedendum arbitraretur: a sacri cum primis ordinis hominibus sat aspere acceptus fuit. Nam a Pontificiis quidem ejusdem opus inter libros prohibitos est relatum, non tam ob ea, quæ ipsorum placitis circa religionem dissona continet, quam quia in universum solidior Philosophia moralis rationibus regni tenebrarum adversatur; cum alias facile fuisset medicinam facere resectis materiis Theologicis. Sicuti a nostratibus hominibus factum est, qui contenti errores notasse, veris debitam æstimationem ideo non detraxerunt. Cum præterea in opere tam densis sententiis conferto non possint non plurima occurrere, quæ vel dubii quid, vel obscuri videantur habere: istis fulciendis aut illustrandis, simulque emendandis, quæ & illum hominem fuisse arguant, nonnulli commentarios adornare instituerunt. Quos inter præcipue *Boeclerus* judicium attulit & doctrinam Grotiano opere parem. Sed & aliorum unus & alter operæ pretium fecit non spernendum. Ausi tamen sunt etiam in publicum commenta sua protrudere homines adolescentes, aut leviter literis tincti, aut non nisi nugis Sophistarum inpueriti; quos non pauci alii videntur secuturi, qui & ipsi par jus sibi credent perituræ non parcere chartæ. Ut plane metuendum sit, me successu temporis tot in *Grotium* commentarii, quot in *Petrum Lombardum* aut *Instituta juris*, enascantur. Quorum moles tamen neque *Grotio* multum lucis, & disciplinæ juris naturalis plurimum remoræ adfert, collatis inter se ipsis Commentatoribus, & lite orta non tam de veritate, quam de sententia *Grotii*, denique

*Pufend. Evis Scand. T.IX.* Q no-

novis subinde exortis scriptoribus, qui in priores commentarios commententur.

§. VI. POST *Grotium* circa jus naturale operam quoque posuit *Thomas Hobbes*, vir summo ingenii acumine; qui uti ipse studiis mathematicis innutritus erat, ita & *μαθηματικῶν*, demonstrandi mathematicis usitatam doctrinam moralia accommodare, licet non usque quaque modo scholastico adornatum, labravit. Cui fini etiam certam doctrinam suam hypothesein substravit, in quam ultimo demum demonstrationes ipsius resolverentur. Arrisit autem ipsi potissimum vetus *Epicuræorum* hypotheseis, vel genii convenientia, vel quod eam in praxi civitatum, omnia fere ad sui conservationem & utilitatem referentem, conspiceret; vel etiam, quod aliquando suspicatus sum exemplo & æmulatione viri amicissimi *Petri Gassendi*; qui cum in *Physicis* maxime *Epicuræorum* dogmata recolenda suscepisset, *Hobbes* ejusdem in moralibus tradita novo schemate induta in theatrum orbis eruditi producere instituit. Ni malis dicere, ipsam vim ingenii ostentare voluisse, suscepta defensione hypotheseos tam exosæ vulgo, & paradoxæ. A quo non multum abit, quod *Serenissimus Magnæ Britannię Rex* ante aliquot annos *Samueli Sorbierio* de hoc *Hobbessio* dixerat: *se illo viro uti in vicem urfi ad molossorum vires tentandas & acuendas*. Quicquid hujus sit, id sane adparet, hoc præcipue ipsum agere, ut potestatem regiam adversus turbulentos homines, qui tunc Angliam sub obtentu libertatis graviter exercebant, assereret, simulque jus circa sacra summo imperio civili adversus fanaticos vindicaret. Quod institutum uti in se quidem magnopere probandum est, modo isthoc jus legitimis terminis coercetur: ita ferri plane non possunt, hypotheseis ipsius ita crude assumpta, & quæ eidem superstruuntur dogmata quædam, a sana ratione abeuntia, & non exiguam laborem rebus humanis inferre idonea. Ne de iis memorem, in quibus circa religionem Christianam a vero sensu divinarum literarum diversus abit; quibus destruendis operam impendere aliorum est. Neque tamen quisquam rerum intelligens inficias iverit, inter multa mala reperiri quoque plurima exquisire bona, & quantivis pretii; & illa ipsa, quæ ab eo falsa traduntur, ansam præbuerunt scientiam moralem & civilem ad fa-

sti-

stigma perdacendi, sic ut de non paucis, quæ ad perfectionem istius faciunt, vix cogitare alicui in mentem venisset, absque *Hobbesio* si fuisset. Ceterum oppugnatus est iste tum a suæ nationis hominibus, tum ab aliis, qui tamen non omnes parem ingenii laudem eo nomine adepti sunt. Quantum tamen mihi constat, ipsius hypothesein inter Anglos solidissime destruxit *Richardus Cumberlandus*, libro erudito & ingenioso *de Legibus Naturæ*; simulque adversam hypothesein, quæ ad Stoicorum placita proxime accedit, firmissime adtruxit; quorum utrumque & mihi propositum fuit. Et fateor me magnopere gavisum, cum id scriptum in diversa terrarum parte eodem anno prodiiisse conspicerem, dispari quidem facie adornatum, sed quod tamen eandem mecum hypothesein assereret, & pleraque a me in *Hobbesio* notata destrueret. Nec ideo alterutrius nostrum opera minoris est, cum uterque præter illa communia etiam peculiariora quædam habeat: nec minus dexteritatem suam adprobet jaculator, qui eundem cum altero scopum eodem tempore tetigit. Quid præterea intra proximos abhinc annos in nostra disciplina elaboratum sit, insigne momentum eidem afferens, ob itinera bello heic loci, ubi isthæc scribo, fere interclusa nondum videre contigit.

§. VII. Quid causarum me impulerit, ut & ipse circa excolendum jus naturale operam navarem, in præfatione Operis mei satis exposui. In quo id præcipue me egisse adparer, ut quantum ingenio adsequi possem, omnia, quæ ad disciplinam juris naturalis pertinent, complecterer, & in ordinem non hiulcum aut salebrosum digererem. Tum ut omnes controversias Theologicas ab eadem sequestrarem, ipsamque ad captum universi generis humani, quod circa religionem in diversissimas opiniones discessit, accommodarem. Id quod etiam solícite video egisse *Richardum Cumberlandum*, ut ut ipse professione Theologus esset. Scilicet quod nunquam nativo nitore exsplendescere, & tranquilla velut pace læta efflorescere queat hæc disciplina, ni supra istas tempestates subducta fuerit. Præsertim cum viri eruditi iniquissima lege cum talibus congregiantur, qui vel affectibus vel inscitæ suæ tam venerabilis vocabuli auctoritatem circumponere soleant, & non contenti su-

per veritate inquisivisse, omnibus viribus ad opprimendos aut infamandos suos adversarios conitantur, quos rationibus sese superaturos desperant. Eo molestius iniquitatem sortis meæ fero, quod cum omni studio id egerim, ut Theologis amicis uterer, ab illorum uno & altero potissimum initium sit factum calumniarum, quibus loca quædam libri mei exagitata sunt. Neque sermo mihi est de *Jesuitenis Viennibus*, qui librum meum ad ipsos perlatum in publico mercatu Viennæ vendi prohibuerunt, ut ut, cum super hoc facto interrogarentur, nullam idoneam ejus prohibitionis causam asserere possent. Nam id mihi apud sapientes bonosque commendationis efficacissimæ loco est, quod istis hominibus mea scripta invisâ sint, utpote quæ cum rationibus regni tenebrarum, cujus ipsi columnina sunt, haudquidquam congruunt. Sed super importunitate unius & alterius ex nostratibus queror, quibus licet verba ac mentem meam sat perspicue explanaverim, & quam longe absim ab illis opinionibus, quas mihi affingere non verrecundantur; tamen velut aures oculosque ad meam responsionem obturassent, ita cœptam semel criminationem pertinaciter coccyllare pergunt. \* Igitur & veritatis & æstimationis meæ asserendæ causa visum est, hanc quoque operam suscipere, & denuo præcipua quæ adversus librum meum objecta sunt, quantum quidem eorum in notitiam meam pervenit, explanare & diluere. Quo ipso æquos doctosque rerum centiores manifeste perspecturos spero, si qui deinceps in me clamare perrexerint, id non aliam ob causam fieri, quam quod per improbam & impudentem injuriæ continuationem obtenturos sese arbitrentur, ut ne injuriam intulisse videantur. Mihi tamen hac opera defuncto fas deinceps erit, calumnias istas negligere, & qui resipiscere nolint, malevolos livori suo immerfos despiciere. Cum enim in mea potestate non sit, ut isti bonam mentem habeant propriam, causa non est, quare me ulterius torqueam. Quin & infinitus juxta atque inglorius labor foret, tantum scalpere, quantum isti homines pruriunt.

## C A P U T II.

## DE NOVITATIBUS PHILOSOPHICIS.

## §. I.

**R**ECEPTA sunt inter homines certa quædam vocabula, odiosam alicujus rei notationem habentia, quibus istas velut per compendium, & citra allegationem alterius rationis damnari moris est. Ex quo genere etiam vocabulum *Novitatis* est, quo illi qui in magistrorum suorum verba jurarunt, aut receptis semel opinionibus mancipio sese addixerunt, magno cum supercilio proscribere solent, quicquid ab ipsorum sacrosanctis traditis discrepaverit. Cum enim se solos in possessione veritatis, omnibus numeris absolutæ, constitutos arbitrentur, & veritatem uniformem esse tralatitium sit, eo ipso graviter antea sibi incognita notari arbitrantur, si ea nova sibi videri pronuncient. Sic Pontificiis ad dogma aliquod damnandum sufficit, id hereticum declarasse. Sic inter opifices, qui in ipsorum tribum receptus non est, certo convicio notatur, ut ut alias sit callentissimus.

§. II. VIDEAMUS igitur, num ipsa novitas in se aliquid vitii aut falsitatis contineat. Novum aliquid duplici respectu dici potest, vel quod id recens existere cœperit, vel quod nuper in notitiam ejus pervenerit, a quo novum adpellatur. Priori respectu novum esse, in se quidem nihil plane vitii habet; imo novitatem, quæ quidem cum bonitate conjuncta est, peculiaris sua comitatur gratia. Ast qui ideo doctrinam aliquam viriosam velit declarare, quod nova sibi videatur, illi hoc primo demonstrandum fuerit, eam, quam ipse hætenus possedit scientiam, non veram modo esse, sed etiam omnibus numeris absolutam, ita ut nil melius inveniri, aut eidem addi queat. Alias enim tyroni aut semidocto, etiam quæ eruditissimis sunt, nova ac mira videntur. Ast quis erit ita sibi Suffenus, ut tam perfectam rerum philosophicarum scientiam sibi arrogare



præsumat? Quantum est quod scitur! quantum est quod nescitur! Igitur mittamus quærere, quam nova aut vetus aliqua sit doctrina, & illud unice investigemus, quam vera aut falsa eadem sit. Et vero mirum est extare adhuc, qui ex novitate in rebus philosophicis invidiam alicui movere aggrediatur, cum constet, quam multa veteribus ignorata recentium, & nostri seculi felicitas aut industria in Medicina, Astronomia, Mathefi, rebus naturalibus eruerit; imo quam ad plura nova investiganda doctissimi viri sub patrocínio & auspiciis maximorum Regum & Principum quotidie adhuc conitantur. Imo ex novis illis Catonibus libenter quænaverim, si quis loci alicujus ex sacris Scripturis novam interpretationem eruerit; quam genuinam esse liquido demonstrare queat, an non isthæc omnino sit admittenda, & vetus hætenus recepta, repudianda? Sane si quis istam solo novitatis nomine repudiaverit, satis indicat, magis sibi cordi esse hominum errantium auctoritatem tueri, quam Dei & veritatis genuina effata amplecti. Sed nimirum in aperto est, quod nova dogmata, priusquam usu recepta fuerint, gravem sæpe oppugnationem sentiant, id a veteribus Ludimagistris oriri; qui non solum invidia flagrare solent adversus recens inclarescentia ingenia, tanquam luminibus suis obstructura; sed etiam ad auctoritatem hætenus partam defendendam necessarium vident omne illud opprimere, quod ab ipsorum scitis discrepat. Nova enim doctrina recepta, ipsi dictatura hætenus possessa dejiciuntur, & in Caritum tabulas referuntur. Tum ab ipsis prælecta & commendata compendia, manualia, tabellæ, synopses, & quæ vestivo titulo Vademecum superbiebant, ad piper relegantur. Inprimis vero gravissima tunc strages incumbit collegiis manuscriptis, quibus excipiendis miserii adolescentes tantam atramenti vim profuderant. Ex quibus etiam ratio patet, quare novæ doctrinæ apud juvenes maxime adplausum inveniant. Nimirum, quia ipsi non solum gloriæ cupidi sunt, & scientia nondum protrita ostentare se gestiunt; sed etiam quia a præconceptis opinionibus vacui nondum mentem suam in certam partem flexerunt; & præcipue quia existimationis istorum nihil interest, an vetus doctrina collabatur, cui ipsi nondum nomina sua dederunt. Multo minus autem

reprehensionem meretur illa novitatis species, quæ non tam consistit in novis veritatibus eruendis, quam in veteribus expoliendis, ac concinna methodo adornandis, aut quæ disjectæ hætenus & confusæ res in formam artis digeruntur, & demonstrationibus stabiliuntur; modo dignum sit opera, quod hætenus receptis superadditur. Talis enim labor in re literaria eandem laudem habet, ac si a magistratibus viæ publicæ muniantur, remotisque salebris atque ambagibus eadem planæ & directæ redantur.

§. III. ATQUE, reponunt aliqui, qualiscunque novitas non in religione solum & Republica, sed in re literaria & Philosophia motus & turbas solet excitare; eoque satius fuerit, jamdudum tritam viam placito re-nore decurrere. Sæpe enim veteres opiniones & antiqua instituta ita penitus animis hominum sunt inoluta, ut etiam meliora introduci citra graves motus, ingentia mala producere idoneos, nequeant. Enimvero uti per minutæ imperfectionis correctionem gravissima incommoda excitare, & lippitudinem eruto oculo curare absurdum fuerit: ita superiori seculo cum instauratores purioris religionis judicarent, errores, qui receptæ tunc religioni admixti erant, exitiabiles esse, non ideo omiserunt eosdem impugnare & exturbare; etiam si facile prospicerent, isthanc etiam in melius mutationem citra graves motus non perficiendam. Sic in republica rectores quædam vitia inveterata quietis causa sæpe tolerant, sed ubi ea demum in exitium publicum eruptura videntur, periculis per ipsa pericula medicinam facere non dubitant. Quæ autem in re literaria & Philosophica emergunt novitates sæpe strepitum excitant, sed qui fere ultra nubeculam pulveris scholastici, & λογυμαχίας non procedit. Atramenti plus in hitce bellis, quam sanguinis effunditur; & postquam scommata, cavillationes, convicia, clamores, & reliquis adparatus umbratici Martis est absumptus, ultro malacia redit. Et ubi rixæ istæ Reipublicæ molestæ cœperint esse, facillimum est eas injecto levi pulvere, sicut apum prælia, sedare. Quod si a partibus novitatum veritas fiet, multoque magis si emolumenti quid in genus humanum exinde provenire sit aptum, vesanix proximum fuerit, solerti-bus ingeniis torporem imperare, & eximia Creatoris do-

na abdicare ideo tantum, ne alicui veterum *titularum* cantrillatori bilis moveatur. Ac si, qui superiore seculo elegantiores literas instituerant, magnopere cussissent, quid *Magister Ortuinus Gratus* & id genus obscurorum virorum indignaturi essent, barbaries forte in hunc ulque diem Europam sepultam teneret. Quod si alicui grave videtur, tabellas & compendia, tanto adplausu hactenus celebrata, juventutis manibus excuti, receptis novis libellis, ei cogitandum fuerit, valde insolens esse, cum tempus edax rerum & invidiosa vetustas nobilissima humanæ industriæ opera destruat, tabellas istas indignari, si in pulverem, ex quo succreverunt, revertantur; cum & novos libellos, qui veteres nunc ejiciunt, deinceps idem fatum sit mansurum, proveniente felicioris ingenii sæculi.

§. IV. INSTAT tamen FRIDERICUS GESENIUS *Garlebienſium Superintendentens*; Philosophiæ Cartesianæ novitates omnem pæne Europam perturbasse, eoque ex *prepotentiſſima Batavia* & *munitiſſima Helvetia* fuisse proscriptas: idemque meis novitatibus fieri debere contendit. Ad quod repono; si quid in quacunque parte rei literariæ minus recte sese habeat, ejus negotii curam nemini minus competere, quam *Gesenio*: qui quantà dignatione inter suos sit, documento esse potest, quod Superintendentens Lipsienſis ante paucos annos defunctus ad istius nugax & maledicum scriptum sub nomine servuli sui, qui spurius erat, responſum edi curaverit; adeo indignum ipsum ducebat, qui cum honesto viro ſcriptionis commercium intercederet. Deinde non video, quare mihi præjudicio sit, quod in Cartesianum alicubi statutum est. Sane non omnes in Philosophiæ novitates, sed Cartesianæ duntaxat notatæ sunt. Quæ autem a me circa jus naturale expoliendum tentata sunt, e Cartesianis principiis haudquidquam profluxere; neque cum ipsius Philosophiæ quidquam commune habent, nisi quod utrinque auctoritati veterum magistrorum parum deferretur, qua firmis rationibus non subnituntur. Quod si autem nonnulli Cartesianæ Philosophiæ sectatores quædam dogmata civitati Theologiæ hactenus adscripta sollicitare cœperint, ea primo non Philosophiæ culpa est, sed hominum eadem abutentium. Deinde & illud prius dispiciendum erat, num dogmata a Cartesianis in du-

biuna

bium vocata fuerint vere Theologica, seu quæ sedem & fundamentum suum in expressis sacrae Scripturae dictis habeant, an vero ex eo sint genere, quæ ex Philosophia Aristotelica, aut Scholasticorum commentis in systemata Theologica irrepsert, eoque Theologicam sanctimoniam non sua indole, sed per diuturnam usurpationem obtinuerunt. Nam priorem veritatem sollicitare impium fuerit. Quæ autem ad posterius genus pertinent, ubi a veritate abierint, sub examen revocare non magis nefas fuerit, quam quod superiori seculo puræ religionis instauratores magnam vim traditionum & commentorum humanorum e Theologia exturbarunt. Quin si quis cordatus & solide doctus manum admove-  
re velit, non paulo spissius volumen de abusu vulgaris Philosophiæ posset conscribere, quam Samuel Marefius de Cartesianæ Philosophiæ abusu, intra quindecim dies confarcinavit. Facit quoque heic illud BACONIS Novi Organi L. I. c. 65. *Pessima res est errorum apotheosis; & pro peste intellectus habenda est, si vanis accedat veneratio.* Præterea nescio, quas turbas memoret Præsul Garlæanus, per omnem pæne Europam ex Philosophia Cartesianâ exortas. Sane de bellis, aut seditionibus aut insignibus mutationibus in religione aut Rebuspublicis ex eo fonte scaturientibus ne fando quidem auditum est. Ridiculæ autem inter turbas Europæ refertur impotentior rixa quorundam ludimagistrorum, aut pueriles factiones scholarium, pro auctoritate præceptorum verbis, aut quandoque pugnis decertantium. Quod enim tanto cum clamore inter istos homines res geritur, in causa non est materiæ gravitas, sed plerumque inexpugnabilis illa pervicacia scholasticis ingeniis usitata, qualemcunque opinionem adhibito omni iracundiæ instrumento defendendi. Sed neque auditum mihi unquam est de interdicto aliquo ordinum generalium apud Batavos, quo Philosophia Cartesianâ e Republica proscripta fuerit; cum eam unus & alter ibi publice docere aut profiteri non vereatur. Et si maxime tale quid promulgatum fuisset importunitate eorum, qui quod juvenes didicerant, senes dediscere nolebant; tamen nescio quodnam ea res veritati præjudiciûm asferre queat, aut quid decreta Ordinum Hollandiæ, aut magistratus Helvetiorum contra naturam rerum, sanam rationem & experimen-

ea faciant. Equidem facile largimur, Bataviam esse *prepotentiſſimam* & Helvetiam *munitiſſimam*. Sed num aut iſtius claſſes, aut hujus montes aliquid momenti habent ad hoc, ut Sacerdotes earum regionum quam dexterrime de Philoſophia judicaſſe cenſeri debeant? Enimvero quid Carteſianæ Philoſophiæ fiat, me quidem nec tangit, nec angit. Et ſi qua parte illa a rerum natura & ratione abit, recte impugnatur; quæ cum utraque conveniunt, ſuos reperient deſenſores quantoſcumque clamores & Scholaſticorum mancipia tollant. Eo minus autem aliquis abusus in Theologia ex noſtra doctrina metuendus eſt, quod ego non ſolum eandem omni ſtudio a controverſiſ Theologicis removeam, ſed & expreſſe proteſtatus ſim, ea, quæ a me de natura pœnarum traduntur, ad tribunal humanum duntaxat pertinere, non autem ad tribunal divinum; eoque juſtitiam, quam homo in hominem exercet, & juſtitiam divinam haud quidquam eodem modulo meriendam. Seu ut apertius dicam, articuli fidei de lapſu Adami, peccato originis, ſatisfactione Chriſti, fide, juſtificatione hominis, & ſimiles non magis ex diſciplina Juris naturæ, ad captum omnium gentium adornata, dijudicari poſſunt aut debent, quam myſterium Trinitatis ex Phyſica.

§. V. Non minore animi ardore novitates Philoſophicas impugnat *Valentinus Veliſhemius*, Profeſſor Jenenſis, cui magni inſtar piaculi habetur, quod ego id agere videar, ut Moraliſtæ & Scholaſtici manibus juventutis ſtudioſæ excutiantur. Inde acri inſtinctus cœſtro non ita pridem in promotione Magiſtrorum orationem recitavit de *Laudibus Scholaſticorum*, quæ, ſi digna tractatio acceſſiſſet, ob argumenti cognationem locum merebatur inter ludicras illas Eruditorum declamationes, puta, *Majoragii* de Luto, & *Danielis Heinfii* de Pediculis, & ni fallor *Paſſeratii* de laudibus Scabiei. Atque ut erudito ſeculo ſalivam moveamus, locum ex illa declamatione adducemus, ex quo ſimul ſtratagema iſtius hominis, quo ingens cauſæ ſuæ præſidium ſibi comparatum eſt, adparet, dum caniculæ inſtar caudam ſub alvum deſlectentis Theologorum pedibus adrepat. Cum igitur plurima ſuper argumento ſuo acerrima faucium contentione vociferatus eſſet, demum adjungebat: *Sed*  
ne

ne cum turba nobis res sit, demus ei advocatum, & quem alium, quam qui novissime opus de Jura Naturæ conscripsit. Et postquam verba ex præfatione operis mei huc spectantia recitasset, pergebat: Vos venerandi mei Præceptores Theologi, vos inquam rogo, vos obtestor, eloquamini, per Deum eloquamini, an Moralistarum Princeps Thomas, Metaphysicorum Papa Suarez, Molina, Vasquez, Valentia, Conimbricenses, Sanchietz, & beatus Stahlus noster Scriptores æternitate dignissimi, nugæ duntaxat venditaverint. Ubi non possum quin maximas agam gratias Velt hemio, quod ita ingenue arcanam, ac præcipuam causam prodiderit, ob quam tantos clamores isti homines in me susculerunt. Scilicet quia ægre ferunt illi, qui omnem ætatem in Scholasticorum lacunis contriverunt, in votis mihi esse, ab orthodoxa juventute limpidos Doctrinæ moralis fontes adiri. Quid enim in hoc genere præstabilius a me posset effici? De cetero quo minus elogiis Scholasticorum oppido quam frigidis immoriatur Velt hemius, ego quidem minime omnium invideo. Habeat ille secum suas delicias, servetque sepulchro; gaudeant similibus labra lactucis, consenescat in nugis, denique vel vivus ob propagatum barbariei regnum in Beatorum classem transcribatur. Majorem sane mihi adplausum apud solide eruditos polliceor, si Scholasticos dixerim tractare Doctrinam barbaris vocabulis, frivolæ subtilitatis speculationibus adornatam, scientiæ proficue inanem, astutissimo consilio nutritam ad otiosa ingenia vanis disputationibus distinenda, ut a scrutandis divinis literis, solidaque eruditione, simulque fraudibus regni tenebrarum perspiciendis removerentur. Quæ non solum per se nihil ad culturam aut decus vitæ confert; sed & pestilentissima est, dum bonas & utiles literas suffocat, ingenia vana scientiæ persuasione distendit, veræque sapientiæ incapacia reddit. Qua denique sola qui imbuti sunt, ne hilo quidem meliores, prudentiores, rebus gerendis aptiores, aut circa solida rerum dijudicanda perspicaciores redduntur. Quin observatum est, eorum, qui unice istis nugis immergi sunt, ingenia velut sideratione afflari, ut & circa tractanda solida & seria longe ineptiores, & in conversatione actuque communis vitæ longe sint intractabiliore, quam illi, qui sola nativa ingenii bonitate subnixi  
nun.

nunquam literas attigerunt. Sic ut revera præstet omnes literas nescire, quam nihil præter Scholasticos nescire. Et mirum quam misere liberalitatem suam collocent Principes, qui stipendiis ejusmodi homines alant, per quos juvenus nihil sapere discat.

§. VI. Atqui ad venerandos Theologos provocat *Velthemius*, qui sane Scholasticam Philosophiam nauci non faciunt, quippe absque qua negant se cum Pontificiis disputare posse. Ad hoc terriculamentum, quod velut caput Gorgonis mihi ostentatur, repono; mea parum interesse, quam sordida veste illi suam Theologiam adornent. Nam ex eo nequaquam consequitur, disciplinam Juris naturalis iisdem quoque pannis involvendam. Neque enim mihi propositum est cum Pontificiis disputare, sed jus omnibus gentibus commune tradere ex principiis ad omnium hominum captum accommodatis. Neque inventa est nostra disciplina, ut disputandi materiam præbeat, sed ut actiones ac negotia tum singulorum hominum, tum integrorum populorum ad eandem exigantur. Neque tam præclare de morali Philosophia meriti sunt isti Scholastici, ut quia e re ipsorum fuit heic nugari, nobis quoque in eorum gratiam necessario nugandum sit. Denique nulla me causa tam abjecte de me sentire cogit, ut non ex meo potius judicio disciplinam Juris naturalis tractare debeam, quam ex supercilio eorum, quorum sputa *Velthemius* lingit. Præsertim cum nec illa ratio omnibus cordatis probetur, quare in Academiis orthodoxis fovenda & propaganda sint Scholasticorum commenta, quod alias cum Pontificiis disputari non possit, & hoc ipso nativam Theologiæ faciem non quidem suco, sed illuvie & squalore deformari necessum sit. Cui enim fini cum hisce disputare volunt? An ut ex istis suffragia & testimonia pro firmandis nostris dogmatibus petant? Atqui hoc levi & superficialia eorundem evolutione obtineri potest, & quæ haud quam legis animum aut dictionem tinctura sua inficiat. Illis ipsis tamen suffragiis neque nobis opus est ad veritatem nostram adstruendam, neque operæ pretium sit circa convincendos aut convertendos, & velut propriis telis conficiendos Pontificios. Sane *Luthero* nostro, & aliis puræ religionis instauratoribus, de hac methodo Papatum subruendi in mentem non videtur venisse, qui dictis

dictis sacrae Scripturae maluit rem gerere, quam disputationibus Scholasticorum, quos Sophisticarum vocabulo notare solemne ipsi est. Quique satius duxit, Theologiam plano & perspicuo modo ex divinis literis proponere, quam barbarie & obscuritate dictionis, aut Sophismatum importunitate cum adversariis certare, aut disputationem a solidis & perspicuis rebus ad intricata otiosorum aut astutorum hominum commenta ventilanda transferre. Neque unquam videtur iste vir credidisse, ut quis nugatorem convincat, necessum esse cum nugis istius se conformare; aut aciculis in hostem pugnandum, ubi gladii & tormenta ad manum sunt. Et sane superfunctorie admodum rimati sunt compagem regni Pontificii, qui putant, detrimenti quid posse eadem inferri, si quis disputandi & sophisticandi dexteritate ipsorum Doctores Scholasticos excelluerit. Quin & animadversum est, ex quo tempore quidam nostratiam Theologorum istis Scholasticis pretium aliquod ponere coeperunt, neque in universum eosdem cum *Luthero* inter *καθάραι* numerarunt, res nostrae religionis subinde in deterius ivisse, Pontificios contra fines suos promovisse, & ad recuperanda, quae quondam amiserant, non parum spei concepissee. Quod si tamen quis sit Theologus, qui ad perfectionem muneris sui Scholasticis se carere non posse persuasus sit, ei quidem ego suas delicias minime omnium invidēbo, sed unum tantum ab ipso rogo, ne mihi irascatur, si ego vetus & mucidum fermentum ex doctrina morali, ejusque praecipua parte, disciplina nimirum Juris naturalis, exesse jubeam.



## CAPUT III.

## DE

## STATU HOMINUM NATURALI.

## §. I.

**I**NTER ea, quæ a malevolis meis secus intellecta in-  
clamandi & calumniandi occasionem arrepta sunt,  
primum videntur locum occupare quæ super statu homi-  
num naturali a me tradita sunt. Cum enim isti neque  
quid status naturalis a me vocitaretur, aut quibus limi-  
tibus ejus consideratio includeretur, accurate attendis-  
sent, neque de ipso aliquid in libellis moralibus, si quos  
evolverant, legere se meminissent; in eam prolapsi sunt  
opinionem, quasi ex Theologia mutuo sumpta ea dog-  
mata forent, & quasi de primæva conditione protopla-  
storum in Paradiso mihi ageretur. Eoque cum mea tra-  
dita de statu hominum naturali a primæva conditione  
Adami multis modis abire viderentur, gravissimorum  
me errorum esse reum atrociter vociferari cœperunt.  
Enimvero vel ex solo hoc specimine constare potest,  
quam dura sit conditio scriptorum, ad quæ censenda ho-  
mines semidocti, & livore in ipsorum auctores tumidi  
provolant: qui licet apud sapientes turpissime se prosti-  
tuant, apud imperitos tamen & sui similes indignas sæ-  
pe suspiciones in viros innocentes excitare possunt. Ut  
autem malevolorum meorum inscitia eo facilius in apri-  
cum protrahatur, pauca quædam præmittere necessum  
est, quæ ad ceterarum quoque controversiarum enoda-  
tionem multum conferre possunt.

§. II. Ac primo quidem considerare debuissent im-  
portuni isti censores, quod diserte in *præfatione Operis  
mei* professus sum, & in ipsa tractatione passim expres-  
si; me disciplinam Juris naturalis instituisse tractare uni-  
versaliter, seu ita, ut ea foret ad captum omnium ho-  
minum & nationum, quamcunque demum circa divina  
persuasionem haberent. Qua de causa etiam quem ju-  
veni.

venilibus annis delineabam libellum, rudimenta hujus disciplinæ continentem, titulo *Elementorum Jurisprudentiæ universalis* inscripseram. Eoque talia a me fundamenta hujus disciplinæ constituenda fuerunt, quæ ad captum omnium hominum essent, & ad quorum veritatem agnoscendam omnes homines ope solius rationis adigi possent. Hujus spheram quæ excedunt, quæque ex revelatione divina dependent, apud omnes populos non æque probata aut recepta, velut scopo nostro parum inservientia, & ad partem duntaxat humani generis informandam idonea, seposui. Eoque consulto abstinui ab illis quæ in divinis literis, rationis sibi relictae captum superantia traduntur. Cavi inquam sollicitè, ne ullam controversiam attingerem, quæ vel gentiles inter & Christianos, vel inter horum sectas agitari sueverunt. Cum autem doctrina de statu protoplastorum in paradiso ex solis divinis literis hauriatur, & ex solo rationis lumine investigari nequeat; debebant malevoli ex præsuppositis meis, ac præmissa protestatione colligere, mihi de statu paradisiaco sermonem non institui: neque hunc a me vocabulo naturalis status designari. Quanquam enim apud scriptores gentiles, Poëtæ cumprimis de aureo seculo, & recentis adhuc mundi placida temperie quædam jactentur, quæ multi ex felicitate Adami in Paradiso detorta autumant: ista tamen vel ex cerebro Poëtarum plane conficta sunt, vel ex dulcedine otiosæ & dissolutæ vitæ interpolata, quæ priscis Græciæ incolis ante inventas urbes & leges agitabatur. Sicuti & hodie gentes quam maxime incultæ suam barbariem politorum populorum culturæ & disciplinæ longe præferunt. Nam neque in ista aurei seculi felicitate Poëtæ unum duntaxat par hominum, sed insignem jam eorum multitudinem vixisse memorant; & degeneratio morum, de qua illi canunt, non ad intrinsecam velut labem naturæ humanæ, sed ad corruptelam ex prava consuetudine ortam pertinet.

§. III. DEINDE neque hoc insuper habendum erat circa alia plus justò satagentibus, vocabula *natura* & *naturalis* quam maxime esse ambigua. Eoque uti qui istis usus est, in aptecessum peripicue definire debet, in quo sensu ista abs sese accipiantur; ita plane absurdum & malitiosum est, limites, quos scriptor ipse sibi

stituit, migrare, & diversas vocabuli significationes, iisque innixa dogmata nolenti volenti obtrudere. Perinde, ac si quis Ictos hæreseos arcessere velit, ideo quod ipsorum de pœnitentia in contractibus placita toto cœlo discrepant ab iis, quæ Theologi de pœnitentia seu conversione hominis ad Deum docent. Jam autem manifestum est, in quam diversis disciplinis, & quam diverso sensu de statu hominum naturali loleat & possit agi. Physicus statum hominis seu conditionem naturalem caput, quatenus is opponitur monstroso, distorto, mutilo, aut male conformato; Medicus, prout idem morbo contra distinguitur. Quidam ex Interpretibus Juris Romani, quando de statu hominum tractant, divisiones hominum vel secundum statum naturalem, vel secundum statum civilem considerant. Juxta naturalem statum considerant hominem, prout est vel mas, vel fœmina, vel hermaphroditus; & prout in utero adhuc vel extra eum existit. Sic Theologi, si ipsis videatur, statum integritatis poterunt vocare statum hominis naturalem, qui oppositus est statui naturæ corruptæ, seu in quam genus humanum per lapsum Adami devolutum est. In disciplina autem Juris naturalis triplici a me modo status hominum naturalis consideratus fuit. Uno modo, prout opponitur statui & conditioni brutorum, per quem homo spectatur tanquam eximum præ ceteris animal, insignibus a Deo præditum donis, per quæ idoneum sit Creatorem ex operibus suis agnoscere, mirarique, & vitam agere honestate ac decoro ordine conspicuam. Huic statui & conditioni vocabulum naturalis recte tribuitur, quia non ex proprio arbitrio homines sibi ejusmodi vitam elegerunt & instituerunt: sed ad eam agendam obligatio a Creatore per ipsam nativitatem injuncta est, ad eamque cognoscendam solum rationis lumen, quod nunc homini superest, utique sufficit, etsi illa universum hominis officium, quantum ad finem ejusdem supremum requiritur, non plene absolvat. Altero modo statum hominis naturalem consideravimus, prout opponitur illi culturæ, quæ vitæ humanæ ex auxilio, industria, & inventis aliorum hominum propria meditatione & ope, aut divino monitu accessit. Ad quem statum designandum supposuimus naturam hominis, qualis ea nunc apprehenditur

pra-

pravis inclinationibus scatens, & quam summa indigentia, inscitia, atque imbellia comitatur, antequam ab aliis hominibus quid opis ipsi accesserit. Quem statum miserrimum esse propter pauperiem, incultum, inscitiam atque infirmitatem pronuntiavimus, si cum eo compareremus commoditates, quæ postea ope aliorum hominum aut propriam per industriam nobis accedunt. Quæ quidem res ita manifesta est, ut sensu plane destitui eum oporteat, qui ista capere nequeat. Et ne quis arbitretur, in hac doctrina novi quid esse, is expendere poterit dicta S. Scripturæ, verbi gratia, Jobi I. 21. Ezech. XVI. 4. 5. 6. Eccles. V. 14. 1. Timoth. VI. 7. & similia, quæ sane homini nascenti non multum splendoris aut opum circumponunt. Poruit autem & huic considerationi hominis vocabulum status naturalis non absurde tribui, quod utique usus sermonis communis ferat, naturalia, seu quæ per nativitatem adsunt, contradistinguere iis, quæ factò alieno aut proprio post accedunt. Tertio modo statum hominis naturalem consideravimus, prout opponitur statui civili, per quem plures eidem summo imperio civili sunt subjecti. Juxta hanc considerationem illos invicem in statu naturali vivere patet, qui neque communem in terris habent Dominum, & quorum unus alteri non imperat, aut paret, quique adeo nullo alio vinculo invicem juncti sunt, quam quod ex communi humana natura resultat, seu quod alter æque homo sit atque nos. Et isthunc statum naturalis vocabulo insignire nobis placuit non solum exemplo recentium quorundam Politicorum, sed & quia naturale ei, quod ex factò & pactò humano fluit, opponi usitatissimum est. Hæ igitur considerationes naturalis status quam parum pertineant ad statum Adami in Paradiso, de quo ex sacris literis constat, vel pueri nosse poterant, qui nondum aere lavantur. Quod si autem harum litium auctores excipere velint, se de statu naturali in tabellis suis Ethico-Politicis, & in notis ad easdem MStis nihil legisse, & ne verbum de eodem apud Metaphysicorum Papam, Cardinales, Acolythos, Ostiarios & Exorcistas haberi; eoque hoc vocabulo audito statim Paradisum sibi animo obversatum: scire debebant, scdam hanc esse & plane inexcusabilem præcipitantiam, quod ad censuram ferendam provolaverint, antequam quod a

*Pufend. Eris Scand. T.IX.* R me

me & quo fine traderetur, intellexissent.

§. IV. QUIBUS præmissis facile patet, quam malitiose & imperite primus Indicis Architectus *Josua Schwartzius* mea verba in alienissimum sensum torquere conatus fuerit. Quod licet in *Apologia* mea sat perspicue expositum a me sit: tamen pertinax stupor, aut corrigi nescius calumniandi morbus certorum hominum necessitatem mihi adfert eadem denuo inculcandi; & ad veritatis jubar ultro cœcutientibus forcipe palpebras deducendi. Ut igitur repræsentarem indolem status hominum naturalis juxta secundum modum considerandi, ita disputare incipio L. II. c. 2. §. 2. p. 140. *Si concipiamus hominem in huncce mundum projectum, citra ullam curam opemve ab aliis hominibus accedentem, & prout plurimæ partes naturæ rerum nondum per industriam humanam ad usum hominis erant excultæ ac dispositæ, statum ipsius longe miserrimum fuisse, manifestum est: si vel maxime jam juxta prædictum statum ac robore ponamus, quum primum existere cœpisset. Ex hisce verbis Indicis auctor pro candore suo talem propositionem elicit: Docet, illum statum, in quo homo absque ulla cura vel ope ab alio homine accedente consideratur, longe miserrimum esse; ne illo quidem excepto, in quo homo juxta statum ac robore præditus fuit, quum primum existere cœpisset, hoc est, statum Adamæ ante Evam creatam. Quis non videt, vim verbis juxta ac sensui meo inferri, & mihi plane Sermonem non esse de Adamo in Paradiso? Sed ut eo clarius ostenderem, qualis esset homo sibi soli relictus, finxi duntaxat, aliquem hominem undecunque in orbem incultum projici. Idque ipsum satis inculcavi adhibitis vocabulis concipiamus, & ponamus; quæ usurpari non solent loquenti de iis, qui revera existunt, sed qui tantum finguntur, seu melioris declarationis ergo supponuntur. Si enim de Adamo sermo fuisset institutus, non opus erat dicere concipiamus statum ipsius; qui non fingendus, aut per meram hypothesin assumendus est, sed quem revera existentem in divinis literis descriptum reperimus. Neque de Adamo pronunciari poterat, quod sit in huncce mundum projectus, quod de tali dicitur, quem unde venerit nescimus. Adamum autem velut deliberato Dei consilio in mundum huncce introductum novimus. Sic etiam de Ada-*

Adamo absurde diceretur ; *ponamus* eum iusta statura fuisse, cum exsistere cœpisset. Hoc quippe non ponendum est, sed certo constat, a Deo non infantem, sed hominem iusta statura præditum esse creatum. Quam porro malitiose verba mea in aliam structuram tranmutantur ! Cum enim hæc sit mea propositio : Etiam si iste homo solitarius, undecunque in orbem incultum projectus, ponatur fuisse iusta statura, cum cœpisset exsistere, ejus tamen status erat futurus miserrimus ; ex hac *Indicis auctor* talem concinnat enunciationem : Status illius hominis, qui iusta statura erat præditus, cum primum exsistere cœpisset, erat miserrimus. Perinde ac si dicerem : *Schwartzius* etsi togam gerat ad talos descendantem, tamen totus quantus calumniator est : & illud sic invertere velim ; quicumque togam talem gestat, calumniator est. Aut si dicerem : Simia manet simia, etiam si aurea gestet monilia ; ergo qui aurea gestat monilia, est simia. De cetero quod ejusmodi homo, (qualem nos fingimus aut concipimus, ut ostendamus, quid boni homini ab homine accedat,) sit futurus miserrimus, nemo tam stupidus est, qui persuadere sibi possit.

§. V. NEC minus ea verba, quæ dicto loco immediate sequuntur, a *Schwartzio* male habentur : *Inde licet de originibus primorum hominum sacrae litera taceant, tamen ipsa mortalium primæva indigentia & imbecillitas nobis fidem facerent, primam homines stirpem servari non potuisse sine peculiari Numinis cura, recentem & adhuc attonitum orbis incolam mediæ vitæ necessaria adhibere docentis*. Adparet puto vel mediocriter perspicacibus, hisce verbis continuari hypothesin cœptam, ac satisfieri illi dubio ; quomodo iste, qui in mundum projectus fingitur, in tanta ignorantia & indigentia rerum servari potuisset ? Ad quod hisce verbis respondetur ; etiam si quis sacras literas ignoraret, ex quibus constat, Deum ante & post lapsum singulari curâ primos homines complexum fuisse ; tamen si quis solo rationis lumine usus supponat, hominem undecunque in mundum incultum fuisse projectum, simulque consideret ejusmodi hominis ignorantiam & indigentiam, non aliter colligere potest, quam impossibile fuisse eum sine peculiari Numinis cura servari potuisse. Quis non videt,

heic per *primam hominum stirpem & recentem orbis incolam* a nobis non intelligi Adamum, sed illum, qui in orbem incultum undecunque projectus fingeatur seu supponebatur. Scilicet si quis abstrahat a cognitione ex sacris literis hausta, & super originibus generis humani ex solo rationis lumine meditari incipiat; id sane primo deprehendit, genus humanum non extitisse ab æterno, sed aliquando initium cepisse, & quidem orbe terrarum jam existente. Inde ulterius progrediendo alterutrum præsupponere cogitur, primos illos homines vel infantes fuisse cum primum existerent, vel iusta jam statura præditos. Utrisque colligit tanta miseria & inopia fuisse consistendum, ut pereundum ipsis iterum fuerit, nisi Deus peculiarem eorum curam egisset, quousque eo proVecti forent, ut invento adparatu aliquo vitæ, & juncta atque communicata ope suæ indigentia succurrere didicissent. Et ad hoc colligendum inducit primæva mortalium indigentia & imbecillitas, id est, quam indigi jam sint homines & imbecilles, quando recens nascuntur. Quis ita stupidus est, quin intelligat; hæc ad Adamum non pertinere? Quanquam nec huic peculiarem Dei curam defuisse ex divinis Scripturis apertissimum sit, Sic & quod recentem istum incolam orbis terrarum dicimus *attonitum* fuisse, id nequaquam ad Adamum spectat, sed ad eum, quem nos tantisper supponimus, Talem enim siingas repente in hoc mundo constitutum, omnium rerum ignarum prima vice adspexisse clarum Solis jubar, vastissimum cœli spatium, ignotas arborum atque animalium species, mox obortas tenebras, cœlum stellis confutum, se solum inter omnia nova locatum; annon credimus talem ista attonitum adspæcturum, quousque adsueto admirationem minuit?

§. VI. SED & alio ex loco conatur evincere *confessor Indicis*, quasi Adamus in statu integritatis a me miserrimus fuerit pronunciatus. Ego enim cum L. II. c. 1. instituissem ostendere, quare naturæ hominis non congruat, ut vivat exlex, rationes desumo *ex conditione naturæ humanæ primigeniæ aut post superveniente*. Cum enim in natura hominis deprehendantur quædam egregia, quædam prava, & vero per solam rationem firmiter demonstrari nequeat, imperfectionem & labem illam

ex culpa ipsius hominis provenisse ; inde origo ejus labis in medio relinquitur in disciplina , quæ ultra rationem adsurgere non vult . Et si ex divinis literis constet , quæ præclara sunt in hominis natura ex primæva conditione , prava , ex superveniente esse . Unde illi quidem , qui sola ratione agit , non opus est explicare , ex quo fonte bonæ aut malæ affectiones hominis promanent . Sed Christiana religione imbutus etiam me non monente intelligit , ex conditione hominis post superveniente , id est , quæ per lapsum Adami in genus humanum redundavit , esse quoque hominis recens nati imbecillitatem ; quæ tanta est , ut nisi accedat aliorum hominum auxilium , vel pereundum ipsi esset , vel in animal quovis bruto horridius adolendum . Eum locum hisce verbis claudio : *Igitur quod homo non miserrimam vitam inter omnia animantia degit , a conjunctione & societate sui similium habet . Non est bonum hominem esse solum non ad matrimonium duntaxat , sed ad societatem cum aliis hominibus in universum pertinet .* Heic manifestum est , sermonem mihi esse non de Adamo in Paradiso , sed de infantibus in ista , quæ nunc conspiciuntur , imbecillitate natis . Sententia autem illa , *non est bonum , hominem esse solum* , quæ initio a Deo ad significandam necessitatem comparis Adamo adjungendæ proferebatur , a me latius extenditur , & ad præsentem materiam adplicatur . Id quod in materia gravi seriatimque facere fas . piumque est . Hinc patet , quantum specimen calumniæ sit , quod *Index Novitatum* , verba mea hoc modo adducit : *Illud autem , quod primus homo extra societatem sine lege , ordine ac decore fuerit , probari illo posse dicto putat : Non est bonum , hominem esse solum .*

§. VII. ALIA quoque corradit Auctor Indicis , quæ cavilletur , tanquam pugnantia cum dogmatibus , quæ super primævo statu hominis in nostris Ecclesiis recepta sunt . Dicit , me p. 140. *primos homines , prout in origine & statu suo primævo se habuerunt , non tantum mortalium nomine appellare , sed tantam etiam imbecillitatem illis tribuere , ut sine peculiari cura servari non potuissent .* Atqui jam abunde ostensum fuit , mihi dicto loco sermonem non esse de statu Adami paradisiaco ; sed unice mihi propositum fuisse quadam fictione repræsentare conditionem hominis ab omni ope aliorum ho-



minum in orbe terrarum adhuc inculto destituti, indicio capto ab illa imbellia, ignorantia, & incultu, quæ nascentes jam mortales comitantur. Hæc quippe illo loco nobis est *primæva indigentia & imbecillitas*. Igitur nullo modo a me Adamo in statu innocentie mortalitas tribuitur; neque negatur mortem demum per peccatum in mundum intröivisse. Sic & manifesta calumnia est, quod ulterius arguit, me asserere: *Mortalitatis causa genus humanum diversitate sexus, propagandique se facultate creatum esse*. p. 750. Ita enim mea verba sunt: *Postquam igitur morti obnoxium fuerat redditum genus humanum, ne aut nova semper stirps creando esset sufficiens, aut tam nobilis speciei duratio unius ævi spatio extingueretur, sapientissimus Creator prospexerat discrimine sexus, & naturali facultate indita commixtis corporibus sese propagandi*. Heic sane imprudentissime mihi tribuitur hæc propositio: genus humanum ab initio mortale creatum, eoque fine datam ipsi diversitatem sexus. Sed dum verbis plusquamperfecti temporis utor; *genus humanum morti fuerat redditum obnoxium, Creator prospexerat*; satis innuo, ab initio genus humanum morti non fuisse obnoxium, sed ex facto post accedente tale redditum. Et quia omniscius Creator illum casum utique præviderat, eidem quoque velut eventualiter prospexisse per discrimen sexus, & facultatem propagandi, ne genus humanum ultra ætatem unius hominis non duraret. Eoque per sapientiam Creatoris generandi mediante sexus diversitate usum habuit in statu hominis tam integro, quam corrupto. In illo enim statu proventura erat soboles primæ integritatis heres, ut plures Deus haberet cultores; in altero autem statu proventura erat soboles corrupta, ne per irrepentem ex peccato mortem intra unam ætatem genus humanum interiret, postquam Deo visum non fuit, extincto priore novum genus hominum innocentium denuo creare; eoque maluit orbem terrarum a corruptis hominibus incolî, quam plane desertum jacere. Patet ergo *Auctorem Indicis* ejusmodi errores in meo libro non invenisse, sed de suo intulisse, ac postquam decreverat omnino quosdam errores mihi impingere, verba mea quovis modo ad scopum suum detorsisse; quæ sane lectori æquo & erudito, & qui ex calumniis, vanisque litigiis gloriam non capat,

ptat, tale quid ultro non insinuant.

§. VIII. Non erubescit quoque *Auctor Indicis* aliam non paulo atrociorē calumniā circa hoc caput mihi impingere, dum hanc mihi sententiā tribuit: *Quod homo prout ex creatione physice perfectus extra societatem existit, sine lege, ordine & decore reluctantem habuerit voluntatem, brutisque ipsis inferior ac pravior fuerit, quæ causa, quomobrem lex illi superaddita sit.* p. 3. 4. p. 136. 138. Si hoc artificium viris cordatis probatur, ut ex diversis locis non quidem integræ sententiæ, sed singula verba combinentur, & nonnulla de alieno infarciantur; tunc sane facillimum fuerit, vel sanctissimis sententiis diversos, eosque foedissimos sensus tribuere. Nullibi enim in omnibus meis scriptis hæc propositio extat: *hominem physice perfectum sine lege, ordine & decore unquam extitisse.* Quin potius contrarium doceo p. 6. ubi itatum hominis naturalem ex primo considerandi modo, per quam tenetur esse creatum auctorem suum agnoscens, colensque, & opera ejusdem admirans, & cui vita sit diversa a brutis exigenda, expresse trado hominem comitari *ab ipsa nativitate.* Et p. 312. ex professo explico *de obligationibus connatis, seu quæ omnibus eo ipso, quod prædita ratione animalia sunt, inherent; seu quæ ipsam naturam rationalem ut talem comitantur.* Quomodo igitur in mentem mihi venire potuerit, asserere, hominem physice perfectum unquam sine lege, ordine & decore extitisse? Si obligationes insuat homini ut tali, quomodo lex unquam ab eo abesse potuit? Sic & nullibi in meis scriptis doceo, *hominem ab ipsa creatione reluctantem rationi habuisse voluntatem, brutisque ipsis miseriorem ac praviorem fuisse.* Quin potius etsi meum non fuerit de hominis integritate aut corruptione tradere, cum ea doctrina Theologiæ sit propria; tamen ut omnem cavillationibus ansam præscinderem, disertis verbis *conditionem naturæ humanæ* dixi *esse primigeniam aut post supervenientem.* Quo ipso utique satis pro ratione instituti mei, quod nequaquam fuit locos Theologicos conscribere, insinuavi, quicquid miserix aut pravitatis in natura humana jam deprehenditur, non ad primigeniam ipsius conditionem, sed ad postsupervenientem, mediante Adami lapsu, referendum. Et valde lippum esse oportet, qui cernere

nequeat, ea quæ dicto loco l. §. 5. traduntur, ad conditionem hominis primigeniam, quæ §. 6. 7. 8. ad post supervenientem statum pertinere. Sed & in eo insignis stupor *Schwarzii* conspicitur, quod putarit, quia dicto loco ex contemplatione naturæ humanæ colligo, non congruisse homini, ut viveret exlex; igitur me statuere & præsupponere hominem unquam a lege immunem extitisse. Nullo inquam modo sequitur: Quia incongruum est homini, si conditionem naturæ ipsius contemplerur, ut sit exlex; igitur homo ullo temporis momento sine lege extitit. Sane enim & Medici, quando de usu partium in corpore humano commentantur, non solum positive ostendunt, cui usui quævis pars in corpore humano inserviat; Sed & quam incommodum, noxium, aut indecorum fuerit, si illa pars deesset. Num idcirco statuunt aut præsupponunt, istam partem aliquando abfuisse, & post deprehensa ea incommoditate superadditam? Si dicant, verbi gratia, congruum valde esse homini, ut cervicem habeat flexilem, ne semper toto corpore sese inclinare aut circumvertere opus habeat; Num ideo statuunt, homines aliquando rigida cervice extitisse, & vertebrae post accessisse? Nisi quis forte eo absurditatis velit descendere, ut dicat: Deum non potuisse velut in antecessum prospicere, quid creaturæ abs se producendæ decorum sit futurum, sed capto prius experimento defectum deprehensum supplevisse. Sicut imperiti Architecti solent, qui jam extructa ubi displicuerint, reformant, & mutant quadrata rotundis. Scilicet imperfectionis humanæ hoc opus est, tentando demum rei convenientem formam adaptare, & Creatoris opera, ab ipso uno velut momento absoluta, per partes contemplari, & addendo aut abstrahendo horum inter se convenientiam & relationem rimari, ut hac via vestigia sapientiæ divinæ utcunque deprehensa admirari liceat. Ex eo autem creaturarum attributa re ipsa separare velle, & unius sine altero, existentiam comminisci, summa ruditas aut malitia foret.

§. IX. SED & ea, quæ super indole entium moralium in genere tradidi p. 3. ab *Indicis compilatore* arripiuntur, velut grandem errorem adversus primævum hominis statum, prout Theologi hunc considerant, continentia, dum inter errores meos & hunc recenset: *At-*

*tributa vel Entia moralia originis homini physice perfectio superaddita saltem, non concreata esse.* Ubi pluriorem nobis respondendi viam fecisset, si paulo discretius explicasset, adversus quem articulum fidei nostram sententiam pugnare judicaret, aut ubi in locis Theologicis de natura entium moralium in genere traderetur. Nunc conjectura tantum nobis indagandum est, quid scrupulorum ipsi suggesserit rerum moralium ignorantia. Et id quidem pro more suo *Auctor Indicis*, quod de suo infarciat hæc verba, *non concreata*, quæ in libro meo nullibi extant. Quin potius eorum contrarium a me docetur, eoque fingit iste repugnantiam inter *superaddi & concreari*, quæ revera nulla est. Deinde quantum supplicando licet assequi, id sibi, aut aliis persuadere voluit *Schwarzius*, a me statui; hominem ab initio creatum partibus quidem physicis perfectum, sed absque omni velut moralitate, quæ deinceps ipsi tanquam extrinsecum aliquod accidens, & quod essentiam ipsius non necessario comitabatur, sit superaddita. Ex quo consequi somniat, a me negari, imaginem Dei fuisse homini concreatam, aut quod ea ad naturalem primi hominis perfectionem pertinnerit; sed habuisse tantum rationem ornamenti cujusdam accessorii, quo sublato de perfectione hominis nihil decesserit. Enimvero in hoc hominem istum ratio vehementer fugit, quod imaginem Dei in classem entium moralium conjicere vult, cum tamen illa quam maxime inter entia naturalia locum sortiatur. Equidem videre mihi videor, quid istum moverit; Putavit scilicet id omne ad entia moralia referendum, quod quemconque respectum ad mores habet. Sed quo privilegio, quam sibi ipse finxit definitionem, authentica erit? Aut quare cum ad librum meum calumniandum provolaret, non id otii sibi sumsit, ut accurate consideraret, quid mihi entia moralia dicerentur, quæ super earum origine & natura traderentur, quæ classes denique earundem constituerent? His enim perspectis facile fuisset animadvertere, imaginem Dei & dona primi hominis, de quibus Theologi agunt, nullo modo ad entia moralia posse referri, prout illa a me definiuntur. Alias enim si quæ iste super entibus moralibus somniat, obtinerent, in eorum classe quoque censi deberent omnes libri, qui ad mores

res spectant, imagines itidem sanctæ apud Pontificios; tum ipsa templa, & campanæ, atque earum sonitus, quo homines evocantur ad audiendos sacros sermones morum emendationi subservientes; toga insuper holoserica ad talos descendens, capillus castigatio, collare fistulosum, abdomen & ronchi, superciliumque, tanquam gravitatem morum arguentia; denique & ipsum patibulum, cui maxima inest efficacia ad malos mores deducendos. Quo cum nihil absurdius dici queat, vel hoc indicio esse potest, quam turpiter se dare soleant homines semidocti, idiotis longe intractabiliores, magisque importuni, qui ad censuram ferendam provolant super rebus, quas vix primis labiis degustarunt; & quam horribilia fingendi ansam sua inscitia præbeat ingeniis turbulentis, & quibus ad famam, cujus tam ardens sitis eos coquit, nulla alia pater via, quam ex litigiis adversus viros celebres susceptis. Sicuti & ex eodem fonte promanat alius articulus *Indicis*: *Entia moralia eorumque effectus originis etiam considerata amitti vel deleri pro lubitu posse sine ulla mutatione aut corruptione ejus rei, cujus antea fuerunt, p. 4. & 19.* Ubi itidem primo loco observanda est foeda illa verborum meorum interpolatio; non nisi triobolaribus calumniatoribus usurpata, quippe quæ fraudem ita aperte apricatur. Nam nullibi in meo libro extant hæc verba; *originis etiam considerata*, quorum sensum mihi divinando nondum tum suspicando assequi. Sicuti & vocabulum *amitti* de suo addidit *confectur Indicis*. Tam & dicto *pro lubitu* insidiosè posita est, quæ fortasse imperitiori insinuari posset; Entia moralia pro nudo lubitu ejus, cui inhaerent, deleri posse: cum tamen hæc sint mea verba: Entia moralia eorumque effectus deleri iterum posse *pro lubitu eorundem*, a quibus suam habent originem. In quo ipso cum utique momenti aliquid sit ad istorum naturam exprimendam, a viro candide agente id omitti non debabat. Denique & hoc malitiosè est positum; *sine ulla mutatione aut corruptione ejus rei, cujus antea fuerant*. Quod non leviter abijt a meis verbis; *nulla mutatione physica in re cui erant superadditis proveniente*; item, *ipsa personarum aut rerum substantia physica haud quidquam immutata*. Sane enim licet substantia physica subjecti non mutetur, subla-

to ente morali; potest autem eandem sublationem gravis mutatio, aut corruptio alterius sequi. Sic, verbi gratia, ubi statu suo quis exiit, ejus substantia physica non mutatur; sed nihilo secius gravissima inde mutatio ipsi provenire potest, quæ ad contemptum, insultationem, aliorum paupertatem, aliaque mala illum deducere valent. Sic dominio in res suas amisso non mutatur substantia physica hominis, molestem tamen idem mutationem inde sentit, e divite pauper factus. Sic dispensator ille iniquus munere dimotus suam substantiam physicam retinebat, ut tamen mox de insolitis laboribus aut mendicitate metuere inciperet. Igitur cum ego de mutatione substantiæ *physica* ita sollicite inculcarim, malitiosum est, pro ea substituere *ul-*  
*lam* mutationem aut corruptionem. Sed hæc ideo tantum a me paulo latius deducta sunt ad ostendendas fœdas calumpniandi artes isti homini tam familiares. Nam ad me ab opinione erroris eximendum sufficit dixisse; Imaginem Dei, qua primus homo præfulgebat, & quæ per lapsum amissa natura nostra labe peccati originalis est infecta, non fuisse ens morale; sed fuisse perfectionem quandam physicam naturæ humanæ, eoque ipsa sublata utique substantiam physicam hominis sensisse mutationem, dum morti variisque imbecillitatibus ac sensui tot malorum obnoxia fuit reddita.

§. X. PORRO quos auctor *Indicis* ex vocabulis *superaddendi* & *imponendi* scrupulos concepit, illi itidem ignorantiam agnoscunt parentem. Neque ex eo quod dicimus, entia moralia rebus jam existentibus & physice perfectis superaddi inferre licet; nos asserere, hominem per ullum temporis momentum revera extitisse omnibus entibus moralibus vacuum. Sane nos de statu hominis naturali p. 6. & obligationibus congenitis p. 312. diserte docemus, quæ homini utique cœvæ sunt, & sine quibus nullo momento temporis homo extitit. Sed dum indolem entium moralium penitus rimamur,prehendimus ea diversum quid esse a substantiis, eoque ad modos, aut si ita mavis, accidentia esse referenda. Jam autem modorum natura est, ut intelligantur; præquirere subjectum aliquod, cui inhaerent, quod licet non semper tempore, tamen natura & ordine concipiendi prius est. Eoque summa inscitia est, si quis

quis natura & ordine concipiendi prius quid altero dicat, arguere, quasi idem tempore quoque prius existere asserat. Sane & circa attributa physica prius Subiectum, quam adjunctum, prius materiam, quam quantitatem concipimus, ut ut illa nunquam sine hac extiterit. Quia porro entia moralia non ex substantia & qualitatibus hominis physicis resultant, sed originarie a determinatione, decreto atque imperio Creatoris; inde istorum subiectum non aliud animo concipere possumus, quam hominem physice perfectum, cui ista attributa ex impositione Creatoris superaddita intelligantur. Nam de ceteris entibus moralibus, quæ ex impositione hominum proveniunt, manifestum est, illa substantiæ hominis jam perfectæ post superaddi, eoque & tempore posteriora ipso homine sunt. Unde & patet, *ut concreari & superimponi* imperite sibi opponi; cum utique duntur entia moralia, quæ humano generi concreata, id est, in ipso creationis momento superimposita sint. Eoque superimpositionis vocabulo non notatur productio aliqua creationi quoad tempus posterior: sed idem adhibetur peculiariter ad exprimendum modum originarium producendi entia moralia; sicuti ex usu Theologorum modus originarius entia Physica finita producendi creatio nuncupatur.

§. XI. CETERUM *Schwartzius* longe post flagellatum Indicem intervallo, calumniam, quam supra §. 8. excussimus, alia dissertatione remove non erubuit, etsi paulisper interpolatam hoc modo: *Reluctante legi voluntate, qua nunc vivitur, velut re per se & naturam suam indifferente, creatum esse hominem*. Ubi mirari liber hominis vesaniam, cui non suffecit de eadem calumnia semel convinci, & insuper ruditatem suam fœdis modis apicari. Nam isthæc propositio, quam mihi malitiose affingit, revera est ineptissima; & aperte contradictionem involvit, *aliquid legi reluctans indifferens esse ante respectum ad legem*. Quod perinde est, ac si dicerem, qui pedalem haber barbam, citra respectum ad barbam imberbis est. Deinde & hoc magnam ipsius in rebus moralibus inscitiam arguit, quod indifferentiam de voluntate dici posse paret. Sane bonitas & malitia, quando sunt attributa actionum, medium habent, indifferentiam. Sed quando personæ aut rei Physicæ, in quam boni-